

«ԱՐԴԱՐՈՒԹՅՈՒՆ» ՄԱՏԵՆԱՇԱՐ - ԹԻՎ 4

ԱՐԱՐԱՏ ՀԱԿՈՒՅԱՆ

ՀԱՅԱՍՏԱՆԻ ԽՈՐՀՐԴԱՐԱՆԸ

**ԵՎ ՔԱՂԱՔԱԿԱՆ
ԿՈՒՍԱԿՉՈՒԹՅՈՒՆՆԵՐԸ**

1918-1920



ՆՎԻՐՎՈՒՄ Է
ՀՅԴ 115 ԱՄՅԱԿԻՆ

ԱՐԱՐԱՏ ՀԱԿՈՒՅԱՆ

ՀԱՅԱՍՏԱՆԻ ԽՈՐՀՐԴԱՐԱՆԸ
ԵՎ
ՔԱՂԱՔԱԿԱՆ ԿՈՒՍԱԿՑՈՒԹՅՈՒՆՆԵՐԸ
(1918-1920 թթ.)

ԵՐԵՎԱՆ- 2005

ՀՏԳ 941 (479.25) : 329 (479.25)

ԳՄԴ 63.3 (2Հ)+66.6

Հ-177

Աշխատությունը հրատարակության է երաշխավորել ՀՀ ԳԱԱ
Պատմության ինստիտուտի գիտական խորհուրդը

Խմբագիր՝ պատմական գիտությունների
դոկտոր, պրոֆեսոր
Հ. Մ. Հարությունյան

Գրախոսներ՝ պատմական գիտությունների
դոկտոր, պրոֆեսոր
Վ. Ն. Ղազախեցյան

պատմական գիտությունների
դոկտոր, պրոֆեսոր
Ս. Ս. Ամիրջան

Հակոբյան Ա.Մ.,

Հ 177 Հայաստանի խորհրդարանը և քաղաքական կուսակցությունները
(1918 - 1920թթ.), Երևան, 2005, 364 էջ:

Աշխատության մեջ հետազոտված է Հայաստանի առաջին Հանրապետության պետաիրավական և հասարակական-քաղաքական երկու կառույցների՝ Հայաստանի խորհրդարանի և հայ քաղաքական կուսակցությունների պատմությունը: Քննության է առնված խորհրդարանի գործունեության հարցերի լայն շրջանակ՝ արդարադատության, ֆինանսավարկային, բյուջետային, հողային, գաղթականության, բանակի, արտաքին ոլորտի, սոցիալական, կրթամշակութային և այլն: Վեր են հանված խորհրդարան-կառավարություն-կուսակցություն-խմբակցություն հարաբերությունները: Տրված է հայ քաղաքական կուսակցությունների համակարգված պատմությունը: Առավել հանգամանորեն է ներկայացված ՀՀ հիմնական կառավարող կուսակցության՝ Հ Յ Գ-աշնակցության գործունեությունը:

Մեմագրությունը նախատեսված է մասնագետ – պատմաբանների, քաղաքագետների և ընթերցող լայն շրջանակների համար:

Յ 0503020913 2005թ.
0077(01)2005

ԳՄԴ 63.3 (2Հ)+66.6

ISBN 99930-69-41-8

© ՀՅԳ Բյուրո

«Արդարություն» մատենաշար թիվ 4

ԱՐԱՐԱՏ ՀԱԿՈՒՅԱՆ

ՀԱՅԱՍՏԱՆԻ ԽՈՐՀՐԴԱՐԱՆԸ
ԵՎ
ՔԱՂԱՔԱԿԱՆ ԿՈՒՍԱԿՑՈՒԹՅՈՒՆՆԵՐԸ
(1918-1920 թթ.)

Հրատարակություն
Հ Յ Դ-աշնակցության

ԵՐԵՎԱՆ-2005

ՆԵՐԱՃՈՒԹՅՈՒՆ

Սոցիալիզմի խորհրդային մոդելի ու կոմունիստական ամբողջատիրության խորտակումը, ԽՍՀՄ փլուզումը և Հայաստանի անկախության հռչակումը նոր խնդիրներ առաջադրեցին հայ պատմաբանների առջև: Հիրավի, անասան թվացող խորհրդային կայսրության կործանման հետևանքով մեկ տասնյակից ավելի խորհրդային հանրապետությունների շարքում Հայաստանը ևս բռնեց անկախության դժվարին ուղին: 1991 թ. սեպտեմբերի 21-ին համաժողովրդական ձայնավոյությամբ (հանրաքվե) պաշտոնապես հռչակվեց Հայաստանի Հանրապետության (ՀՀ) անկախությունը:

Արդ, մենք ապրում ենք ժողովրդավարական, պետաիրավական և քաղաքական կառույցների ձևավորման ու կայացման մի բարդ ու հակասական ժամանակաշրջան: Մերօրյա դժվարին առաջընթացի ճանապարհին ճիշտ կողմնորոշվելու համար պատմաբանների առաջնահերթ խնդիրներից է անդրադառնալ մեր հեռու և մոտիկ անցյալի պատմության էջերին: Այդպիսի մի ուսանելի և դասառատ ժամանակաշրջան է Հայաստանի առաջին Հանրապետության (1918-1920 թթ.) շրջանը:

Ներկայումս մեր անկախ պետականության կայացման, նրա հետագա զարգացման ու կատարելագործման ճանապարհին չափազանց մեծ գիտագործնական ու պատմաճանաչողական նշանակություն ունի Հայաստանի առաջին Հանրապետության ամբողջական պատմության ու մասնավորապես նրա խորհրդարանի պատմական փորձի ուսումնասիրումը և ընդհանրացումը, որոնք, անկասկած, կարող են օգտաշատ և ուսանելի լինել ներկայիս Հայաստանի պետաիրավական ու պետաքաղաքական կառույցների ձևավորման գործում: Հավասարաարժեք չափով կարևոր է նաև հայ քաղաքական կուսակցությունների հարուստ ու հակասական պատմական անցյալի, նրանց գործունեության և դրանց արդյունքում կուտակված փորձի գիտական ընդհանրացումը և ստացած պատմական դասերի հաշվառումը: Այնքան է, որ ժողովրդավարական երկրում կուսակցությունների գոյությունն ու գործունեությունը սերտորեն կապված են խորհրդարանի և ընդհանրապես պետական իշխանության քաղաքական համակարգի հետ:

Սույն աշխատության մեջ մենք խնդիր ենք դրել հետազոտել Հայաստանի առաջին Հանրապետության պետաիրավական և հասարակական-քաղաքական երկու շատ էական կառույցներ՝ Հայաստանի խորհրդարանը և հայ քաղաքական կուսակցությունները: Մրանք այնպիսի առանցքային հաստատություններ են, առանց որոնց հնարավոր չէ ամբողջական պատկերացում կազմել ՀՀ հասարակական-քաղաքական և պետական կյանքի մասին: «Պառլամենտ և կուսակցություն այսօր իրարից անբաժանելի երևույթ են դարձել ազգային կյանքի մէջ,- կարդում ենք «Հայրենիք» հանդեսի անդրանիկ համարում¹:

¹ «Հայրենիք», Բոստոն, 1920, թիվ 3, էջ 27

Խորհրդարանը ժողովրդի ներկայացուցչության ու կամքի դրսևորման բարձրագույն ձևն է: Նա միաժամանակ ժողովրդավարական հաստատության բարձրագույն արտահայտություն է: Այս կապակցությամբ Հնչակյան կուսակցության հայտնի գործիչ ու գաղափարախոս Ս. Սապահ-Գյուլյանը գրում էր. «Գեմոկրատիայի քաղաքական հաստատության բարձրագույն ձևը արտահայտվել է ժողովրդական ներկայացուցչությամբ, խորհրդարանային, պառլամենտական դրությամբ»²: Սովորաբար խորհրդարանական պետություններում խորհրդարանի և քաղաքական կուսակցությունների գործունեությունը անբաժանելի է: Ակներև է, որ կուսակցությունների մեծագույն մասը ձգտում է հասնել իշխանության կամ, համենայն դեպս, իշխող դիրքի, իսկ դրան հասնելու լավագույն, արդյունավետ և օրինավոր ուղին խորհրդարանն է:

Ժողովրդավարական համարվող պետության մեջ անհնար է պատկերացնել խորհրդարանը առանց կուսակցությունների: Իր հերթին, քաղաքական կուսակցությունների գործունեությունը չի կարելի համարել լիարժեք, եթե նրանք կտրված են խորհրդարանական կյանքից: «Այնտեղ, ուր կա պառլամենտ, խորհրդարան,- գրում էր Ս. Սապահ-Գյուլյանը,- անպայման պիտի լինեն կուսակցություններ... Պառլամենտական աշխատանքի զապանակը կուսակցություններն են»³: Ահա խորհրդարան-կուսակցություն հասկացությունների այս դիալեկտիկ փոխկապակցությունը մկատի ունենալով է, որ մենք ուսումնասիրության թեմա ենք դարձրել Հայաստանի խորհրդարանի և հայ քաղաքական կուսակցությունների միասնացված պատմությունը:

Հայ քաղաքական կուսակցությունների գործունեության գնահատման կարևոր չափանիշ ենք համարել պետականության գաղափարի պաշտպանության մկատմամբ նրանց վերաբերմունքը: Անկախ պետականությունը վեր պետք է դասել ամեն մի կուսակցական, դասակարգային, ընկերային նեղ շահերից: Պետականությունը հստակորեն տարբերակել ենք կառավարությունից և կառավարող կուսակցությունից: Աշխատության շարադրանքում հայոց պետականությունը և նրա կառավարությունը քննվում ու գնահատվում են տարբեր հարթությունների վրա: Զննադատել այս կամ այն կառավարությանը ամենևին էլ չի նշանակում քննադատել, առավել ևս ժխտել պետականությունը: Սրանք տարբեր հասկացություններ են: Եվ պետք է ասել, որ այս կերպ ենք մոտեցել հիմնական կառավարող կուսակցության՝ Հայ Յեղափոխական Դաշնակցության (ՀԵԴ), ինչպես նաև մյուս կուսակցությունների գործունեությունը վեր հանելիս ու գնահատելիս:

Հայ քաղաքական կուսակցությունների պատմությանը անդրադարձել ենք այնքանով, որքանով դրանց գործունեությունը առնչվել է Հայաստանի խորհրդարանի և ընդհանրապես ՀՀ պատմության հետ: Միաժամանակ խնդիր ենք դրել հայ քաղաքական կուսակցությունների գաղափարախոսության, ծրագրերի և պրակտիկ մարտավարության հիման վրա բացահայտել ու

² «Երիտասարդ Հայաստան», 17 սեպտեմբերի 1920 թ.:

³ «Երիտասարդ Հայաստան», 17 սեպտեմբերի 1920 թ.:

դասակարգել նրանց ըստ գաղափարաքաղաքական ուղղվածության: Առաջին անգամ, պատմագիտության ներկայիս պահանջներով, համակարգված կերպով տրվում է հայ քաղաքական բոլոր կուսակցությունների գործունեությունը փոխկապակցության մեջ: Արժևորվում է դրանցից յուրաքանչյուրի խաղացած դերը Հայաստանի առաջին Հանրապետության և հայ ժողովրդի պատմական ճակատագրում: Հայ քաղաքական (ազգային և ոչ ազգային) կուսակցությունների գործունեության լուսաբանման ու բնութագրման համար մենք չափանիշ ենք ընդունել ոչ այնքան նրանց դրսևորած դասակարգային, սոցիալ-տնտեսական ու քաղաքական ուղղվածությունը, ինչպես որ ընդունված էր նախկինում՝ համաձայն մարքս-լենինյան ուսմունքի ու մեթոդաբանության, այլ ազգաշահության, պետականության, անկախության, մշակութային և համանման այլ արժեքները:

Խորհրդարանի և քաղաքական կուսակցությունների գործունեության հետազոտման ընթացքում համակողմանիորեն վեր են հանվում խորհրդարան - կառավարություն - կուսակցություն - խմբակցություն հարաբերությունները: Միաժամանակ քննության է առնվում խորհրդարանի օրենսդրական և ոչ օրենսդրական գործունեության հարցերի լայն շրջանակ՝ արտաքին ոլորտի, ֆինանսավարկային, բյուջետային, հողային, գաղթականության, ներգաղթի, բանակի, սոցիալ-տնտեսական, սոցիալական պաշտպանվածության, արտախորհրդարանական և այլն: Ընդ որում ներկայացվում ու բնութագրվում են ոչ միայն խորհրդարանի ընդունած օրենքները և որոշումները, այլ ըստ հնարավորին դրանք դիտարկվում են կիրառության մեջ: Այսպիսով, մեր առջև խնդիր ենք դրել ներկայացնել ՀՀ խորհրդարանի գիտական ու ամբողջական պատմությունը, բացահայտել Հայաստանի պետականության ձևն ու կառուցվածքը, միջազգային իրավունքի չափանիշերին պետականության համապատասխանելը, նրա ժողովրդավարական մակարդակն ու բնույթը:

* * *

Խորհրդահայ պատմագրության 70 տարիներին կոմունիստական (մարքս-լենինյան) գաղափարա-քաղաքական պատմահայեցողության դիրքերից հիմնականում խեղաթյուրվել ու ծուռ հայելու մեջ են ներկայացվել Հայաստանի առաջին Հանրապետության պատմությունը, ընդհանրապես, և Հայաստանի խորհրդարանի ու հայ քաղաքական կուսակցություններինը՝ մասնավորապես: Խորհրդահայ պատմագրության մեջ, ինչպես հարկն է, չի ուսումնասիրված հայ քաղաքական կուսակցությունների պատմությունը: Խորհրդային պատմակուսակցական գրականությունը ամբողջովին նվիրված է եղել կոմունիստական-բոլշևիկյան կուսակցության պատմության համակողմանի վերհանմանը ու գովերգմանը: Մնացած կուսակցությունները ներկայացվել են որպես հակաժողովրդական, հակահեղափոխական, հետադիմական ու արկածախնդրական, ուստի և միակողմանիորեն դրանց անցած պատմական ուղին խարազանվել է ու սևացվել:

Խորհրդային ժամանակաշրջանում, մեր կողմից ուսումնասիրվող ժամանակահատվածի (1918-1920 թթ.) վերաբերյալ, ըստ ուսումնասիրության քննազավառների, Հայաստանում և Անդրկովկասի մյուս հանրապետություններում կազմվել ու հրատարակվել են փաստաթղթերի ու նյութերի ժողովածուներ⁴: Ներքոհիշյալ ժողովածուներում զգալի քանակությամբ նյութեր կան Հայաստանի առաջին Հանրապետության, Հայաստանի խորհրդարանի և հայ քաղաքական առանձին կուսակցությունների գործունեության վերաբերյալ: Սակայն ինքնին հասկանալի է, որ այդ ժողովածուների կազմողները իրենց առջև խնդիր են դրել համապատասխան փաստաթղթերով ու նյութերով հիմնավորել պրոլետարիատի դասակարգային պայքարի և խորհրդային իշխանության հաստատման անհրաժեշտությունը, ուստի և դրանք կազմելիս՝ ցուցաբերվել է խիստ ընտրովի ու միակողմանի մոտեցում:

Հետպատերազմյան չորս տասնամյակներին գրվել ու հրատարակվել են հարյուրավոր աշխատություններ, որոնք վերաբերում են Հոկտեմբերյան հեղափոխության, 1917-1920 թթ. Հայաստանի պատմության, Անդրկովկասում և Հայաստանում բոլշևիկների գործունեության ու խորհրդային իշխանության հաստատման հիմնահարցերին⁵: Անշուշտ, գերազանցապես պատմակուսակ-

⁴ Տես, «Մայիսյան ապստամբությունը Հայաստանում», (1920-1930), հիշողությունների և դոկումենտների ժողովածու, Ե., 1930, «Առաջին մասսայական հեղափոխական շարժումները Հայաստանում (Մայիսյան ապստամբությունը)», (նյութեր եւ փաստեր, կազմողներ՝ Կ. Ղազարյան և Ս. Ներսիսյան), Ե, 1932, «Հոկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում», (փաստաթղթերի և նյութերի ժողովածու), Ե. 1960, «Ռևոլյուցիոն կոչեր և թուղթիկներ 1902-1921», (կազմել և խմբագրել է Խ.Հ. Բարսեղյանը), Ե., 1960, Բ. Ղարիբջանյան, Սովետական իշխանության համար մղված պայքարում (հոդվածներ, ելույթներ և նյութեր 1917-1920 թթ.), Ե. 1966, «Борьба за победу советской власти в Грузии». /Документы и материалы 1917-1921гг. /, Тбилиси, 1958, «Великий октябрь в борьба за советскую власть в Азербайджане», /Сборник документов, материалов и статей /, Баку, 1958 и др.:

⁵ Տես Ծ. Պ. Աղայան, Հոկտեմբերյան սոցիալիստական մեծ ռևոլյուցիան և Բարվի 1918 թ. սովետական իշխանությունը, Ե., 1948, նույնի՝ Հոկտեմբերյան ռևոլյուցիան և հայ ժողովրդի ազատագրումը, Ե., 1957, Խ. Հ. Բաղայան, Անգլո-ամերիկյան գիշատիչ իմպերիալիզմի ագրեսիվ քաղաքականությունը Հայաստանում 1919-1920, Ե., 1951, նույնի՝ Գաշնակների կոմտրոնկոլյուցիոն գործունեության մի քանի փաստերի մասին (1918-1920 թթ.), Ե., 1955, Գ. Բ. Ղարիբջանյան, Հայաստանի կոմունիստական կազմակերպությունները սովետական իշխանության հաղթանակի համար մղված պայքարում, Ե. 1955, Ա. Մ. Հակոբյան, Հոկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում, Ե., 1960, Ա. Ն. Մնացականյան, Հայ ժողովրդի ազատագրումն ու վերածնունդը, Ե., 1970, Հ. Ս. Մելիքյան, Հոկտեմբերյան հեղափոխությունը և Կովկասյան քանակը, Ե., 1970, Ա. Վ. Արզումանյան, Արհավիրքից վերածնունդ, Ե., 1973, Ա. Հ. Մելքոնյան, Մայիսյան ապստամբության պատմության հարցի շուրջը, Ե., 1965, «Հայաստանի կոմկուսի պատմության ուղիագծեր», Ե. 1967, Խ.Հ. Բարսեղյան, Մարքսիզմի տարածումը Հայաստանում, գիրք 2-րդ, Ե. 1975, նույնի՝ Հայաստանի կոմունիստական կուսակցության ձեռնարկումը, Ե., 1980, Գ. Ա. Գալոյան, Հերոսական մայիսից-հաղթական նոյեմբեր, Ե., 1980, Ա. Մ.

ցական բնույթի այս աշխատություններում նպատակ է դրվել ներկայացնել կոմունիստական կուսակցության անցած ուղին՝ միակողմանիորեն քննադատելով մյուս ոչ պրոլետարական կուսակցությունների ու հոսանքների գործունեությունը: Հիշյալ մենագրություններում մեր ուսումնասիրության առարկա հանդիսացող հիմնահարցերին՝ քաղաքական կուսակցություններին, խորհրդարանին ընդհանրապես ՀՀ պատմության հարցերին անդրադարձել են այն ասպեկտով ու այնքանով, որքանով հարկավոր է եղել իրենց առջև դրված խնդիրները լուծելու համար: Խորհրդային պատմակուսակցական գրականության մեջ ՀՀ (1918-1920 թթ.) ժամանակաշրջանը բնութագրվել է որպես ամենամռայլ, մղձավանջային, իսկ դաշնակների վարած քաղաքականությունը՝ կործանարար: Խորհրդային իշխանության հաստատման անհրաժեշտությունն ու անխուսափելիությունը հիմնավորելու համար, ինչպես ասում են, «չորս ու թացը խառնվել են իրար», պատմական շատ փաստեր անտեսվել են, չեն բացահայտվել ՀՀ ծանր իրավիճակի նաև օբյեկտիվ պատճառները, երևույթները գնահատելիս՝ ցուցաբերվել է գուտ դասակարգային մոտեցում և այլն: Կոմունիստական տիրապետող գաղափարայնությունը անխուսափելիորեն իր դրոշմն է թողել այդ աշխատությունների թե՛ բովանդակության, թե՛ հետապնդած նպատակների վրա:

Խորհրդային պատմագրությունը, ըստ էության, նպատակ չի դրել վեր հանելու ՀՀ պատմությունը, իսկ եթե այս կամ այն խնդրի կապակցությամբ որոշ հեղինակներ անդրադարձել են այդ հիմնահարցերին, ապա սուկ այն սուկացնելու և որոշակի քաղաքական, կուսակցական ու դասակարգային հաշիվներ մաքրելու նպատակով:

Այն ժամանակվա ՀՀ ամենաազդեցիկ ու ղեկավար քաղաքական ուժի՝ ՀՅԳ-ը նմ մղվող գաղափարաքաղաքական պայքարում խեղաթյուրվել են առաջին հանրապետության դժվարին պատմության շատ էջեր: Բնականաբար, անվանարկվել է նաև Հայաստանի խորհրդարանի պատմությունը: Մինչև վերջերս շատերն անգամ գաղափար չունեին, թե ինչպիսի պետական կառուցվածք է ունեցել ՀՀ, եղե՞լ է արդյոք խորհրդարան, թե՞ ոչ: Ավելին, նույնիսկ ժխտվել է նման պետականության գոյության փաստը, իսկ մայիսի 28-ը դիտվել է որպես «հայ աշխատավորության ստրկացման օր»⁶: Ավելի հաճախ Հայաստանի «անկախությունը» առնվել է չակերտների մեջ⁷: Որոշ հեղինակ-

Эльчибекян, Установление советской власти в Армении, Е., 1954, Г. А. Галоян, Борьба за советскую власть в Армении, М., 1957, Г.А. Аветисян, Комсомол Закавказья в борьбе за победу и упрочение советской власти /1917-1921/, Е., 1964, "Очерки истории коммунистической организации Закавказья, Тбилиси, 1967 и др.:

⁶ Ա. Երզնկյան, *Աշխատավորության դատարանին*, Թիֆլիս, 1927, էջ 50

⁷ Ա. Հովհաննիսյան, *Հայաստանի հեղափոխության հուլիսն ու հոկտեմբերը*, Ե., 1923, էջ 5, Խ. Հ. Բադալյան, *Դաշնակների կոնտռոլյուցիոն գործունեության մի քանի փաստերի մասին (1918-1920 թթ.)*, Ե., 1955, էջ 7-8, Մ. Վ. Արզումանյան, *Արիավիրքից վերածնունդ*, Ե. 1973, էջ 153, Ա. Մ. *Эльчибекян, установление советской власти в*

ներ էլ ՀՀ խորհրդարանը որակել են որպես ֆիկցիա, «դաշնակցականների խորհրդարան»⁸ և այլն: Որքան էլ, որ Դաշնակցությունը հանդիսացել է ՀՀ - հիմնական կառավարող կուսակցությունը, այդուհանդերձ, իրավացի չեն այն հեղինակները, ովքեր հանրապետության, նրա խորհրդարանի պատմությունը նույնացնում են այդ կուսակցության պատմության հետ: Ա. Մռավյանը իր գեկուցումներից մեկում Հայաստանի խորհրդարանը համարել է դաշնակ մաուզերիստների սարքած «պառլամենտի պես մի բան»⁹, ուրիշները՝ «բացարձակապես ֆիկցիա»,¹⁰ «այսպես կոչված Հայաստանի խորհուրդ», «կատակերգություն», «պառլամենտական խեղկատակություն»¹¹ և այլն: Ոմանց կարծիքով էլ հայ ժողովուրդը պետականություն ստացավ 1920 թ. նոյեմբերին՝ Հայաստանում խորհրդային կարգեր հաստատվելուց հետո¹²:

Տակավիճ 1920-30-ական թվականներին հայ քաղաքական կուսակցությունների պատմության զանազան հիմնահարցերին են անդրադարձել ճանաչված կուսակցական, պետական ու մշակութային գործիչներ՝ Ալ. Մյասնիկյանը, Ս. Կասյանը, Ա. Մռավյանը, Ա. Երզնկյանը, Ա. Հովհաննիսյանը, Ա. Կարինյանը, Հ. Ազատյանը, Գ. Աբովը, Ե. Չուբարը, Գ. Վանանդեցին, Թ. Մանդալյանը, Հ. Ջորյանը, Ա. Բզնունին և ուրիշներ¹³: Հասկանալի է, որ նմա-

Армении, Е., 1954, с. 49, 56-57, А. Б. Кадишев, Интервенция и гражданская война в Закавказье, М., 1960, с. 63:

⁸ Б. А. Борян, Армения, международная дипломатия и СССР, ч. II, М., 1929, с. 25.

⁹ Ա. Մռավյան, Հողվածներ և ճառեր, Ե., 1961, էջ 91.

¹⁰ Գ. Ջաղերթյան, Մոտիկ անցյալից, Ե., 1969, էջ 11:

¹¹ Շ. Ամիրխանյան, Մայիսյան ապստամբությունը Հայաստանում (1920), Մոսկվա, 1926, էջ 54-56:

¹² Խ. Հ. Բարսեղյան, Հայաստանի կոմունիստական կուսակցության կազմավորումը, Ե., 1980, էջ 33:

¹³ Ալ. Մյասնիկյան (Մարտունի), Կուսակցությունները զաղութահայության մեջ, Բեռլին, 1925, Ա. Կասյան, Սպեցիֆիկները և սպեցիֆիկները, Թիֆլիս, 1928, Ա. Մռավյան, Սոցիալիստ հեղափոխականները Անդրկովկասում, Ե., 1922, Նույնի՝ Ե՞րբ և ինչպես է հիմնադրվել Հայաստանի կոմունիստական (քոլչ.) կուսակցությունը, Ե., 1928, Ա. Երզնկյան, Աշխատավորության դատարանին, Թիֆլիս, 1927, Ա. Հովհաննիսյան, Հայաստանի հեղափոխության հուլիսն ու հոկտեմբերը, Ե., 1923, նույնի՝ Դաշնակցության իդեոլոգիայի ընթացիկ կուրսը «Նորք», 1923, թիվ 3/, նույնի՝ Դաշնակցության սոցիալական ծագումը («Նորք», 1927, թիվ 1), Ա. Կարինյան, Դաշնակցությունը փաստերի դեմ, Թիֆլիս, 1926, նույնի՝ Հայ նացիոնալիզմի ուղին, Ե., 1926, նույնի՝ Հայկական ֆաշիզմի նորագույն ժամաստասիրությունը («Լենինյան ուղի», 1928, թիվ 1-2), նույնի՝ Դաշնակցությունը և իր գիմնալիզմները, Ե., 1932, Հ. Ազատյան, Դաշնակցության հակահեղափոխական գործունեությունը 1903-1908 թթ. ժամանակաշրջանում, «Լենինյան ուղի», 1928, թիվ 1 և 4, նույնի՝ Դաշնակցության դասակարգային բնույթը («Նոր ուղի» 1929, թիվ 1-2), Գ. Աբով, Դաշնակցությունը անցյալում և հիմա, Ե., 1929, Ե. Չուբար, Դաշնակցությունը սպեցիֆիզմի դրոշի տակ («Լենինյան ուղի», 1928, թիվ 11), Ջորյանի, Հոկտեմբերյան հեղափոխությունը եւ Դաշնակցությունը («Լենինյան ուղի», 1928, թիվ 10), նույնի՝ Անկախ Հայաստանի իրավունքն ու պետականությունը

նատիպ աշխատությունները, որոնք ունեին կողմնակալ, քարոզչական ուղղվածություն, հեռու էին գիտական լինելուց: «Սպեցիֆիկների» ու «սպեցիֆիզմի» պատմությանն ու գաղափարաքաղաքական գնահատությանն է վերաբերում Ս. Կասյանի համանուն աշխատությունը: Կարծում ենք, որ նա ճիշտ է որակում «սպեցիֆիկներին» ու «սպեցիֆիզմը», երբ այս հոսանքը համարում էր սոցիալ-դեմոկրատական մարքսիստական շարժման մեջ որպես աջակողմյան թեքում: Բայց մյուս կողմից դժվար է համաձայնվել նույն հեղինակի այն գնահատականին, երբ, հիմք ընդունելով այս կազմակերպության կառուցվածքը և սոցիալական կազմը, «սպեցիֆիզմը» բնութագրում էր որպես «ազգայնական-մեղչանական և ինտելիգենտական մտածելակերպ ու գործելակերպ»¹⁴: «Սպեցիֆիկների» ի՞նչ ազգայնականության մանրբորժուականության մասին կարող է խոսք լինել, երբ նրանց գաղափարական ու ծրագրային հիմնադրույթները ամբողջապես ներծծված էին սոցիալ-դեմոկրատական, մարքսիստական աշխարհայեցողությամբ ու գաղափարախոսությամբ: Բերված գրականության ցանկից դժվար չէ կռահել, որ նշված հեղինակների աշխատությունները, որոնք ավելի շատ ունեին բանավիճային, քարոզչական բնույթ, ամենից առաջ ուղղված էին ՀՀ Դաշնակցության դեմ: Այսպես՝ Ալ. Մարտունու գրքույկը գերազանցապես ուղղված է Դաշնակցության դեմ, ունի բանավիճային բնույթ և չի հավակնում գիտական աշխատության: Նույնական որակում կարելի է տալ 1920-30-ական թվականների աշխատությունների մեծագույն մասին:

Այդ ժամանակներում Դաշնակցության կազմակերպչական ջախջախումը տակավին հանգիստ չէր տալիս Խ. Հայաստանի քաղաքական ու գաղափարական ղեկավարությանը, քանզի նրանք լավ հասկանում էին, որ Դաշնակցության գաղափարախոսությունը և հոգեբանությունը բավականին խորն է նստած լայն հասարակաշերտերի շրջանում: Ուստի պետք է գործի դրվեր խորհրդային-բոլշևիկյան քարոզչական մեքենան, բոլոր թույլատրելի ու անթույլատրելի միջոցներով վարկաբեկելու և մարդկանց գիտակցությունից արմատախիլ անելու Դաշնակցության ազգային գաղափարները և դրանով իսկ գաղափարաքաղաքական հող ստեղծել՝ Հայաստանի աշխատավորությանը ներգրավելու սոցիալիզմի ու կոմունիզմի կառուցման գործին:

1930-ական թվականներից, երբ հաստատվեց ստալինյան բռնավարչակարգը, և ընդհուպ մինչ 1950-ական թվականների կեսերը, խորհրդահայ պատմագրության մեջ հայ քաղաքական կուսակցությունների պատմության ուսումնասիրությամբ գործնականում չեն զբաղվել: Այսպես կոչված Խրոշչովյան «հալոցքի» պայմաններում որոշ չափով մեղմացավ նախկինում արմա-

(«Նորք», 1926, թիվ 2), Թ. Մանդալյան, Մայիսյան պատմաբանությունը, Ե., 1929, Հ. 20րդյան, Հայ բուրժուական պատմագրության կոնցեպցիան և Հայաստանի պատմության ուսումնասիրության հիմնական պրոբլեմները («Նոր ուղի», 1931, գիրք 3), Ա. Բզնունի, Հայկական «Սեննավեխականությունը» («Նոր ուղի», 1931, գիրք 4):

¹⁴ Ս. Կասյան, Սպեցիֆիկները և սպեցիֆիզմը, Թիֆլիս, 1928, էջ 5:

տացած գաղափարական ղոզմատիզմը, և պատմաբանները սկսեցին զգուշորեն անդրադառնալ ազգային-ազատագրական շարժումների, հայ հասարակական մտքի ու քաղաքական կուսակցությունների պատմության հիմնահարցերին:

1960-ական թվականների սկզբներին լույս տեսավ Լ. Խուրշուդյանի ուսումնասիրությունը¹⁵: Նրանում հեղինակը կանգ է առել Սփյուռքում գործող հայ ավանդական երեք՝ ՀՅԴ, Ռամկավար և Հնչակ կուսակցությունների հետպատերազմյան ժամանակաշրջանի գաղափարախոսության ու քաղաքականության հարցերին, միաժամանակ համառոտակի անդրադարձել է այդ կուսակցությունների պատմական անցյալին, ինչպես նաև մեզ հետաքրքրող 1918-1920 թթ. ժամանակաշրջանին: Լ. Խուրշուդյանը ցույց է տվել Դաշնակցություն կուսակցության դասակարգային էությունը և դրականապես գնահատել հնչակյանների և ռամկավարների գործունեությունը: Սակայն հասկանալի է, որ տիրապետող կոմունիստական գաղափարաքաղաքական ամբողջատիրության պայմաններում չէր կարող խոսք լինել կոմունիստական կուսակցությանը և խորհրդային պետությանը ընդդիմադիր հայ քաղաքական կուսակցությունների պատմության գիտական, օբյեկտիվ ու անաչառ շարադրանքի մասին:

Այնուհետ, 1970-80-ական թվականներին, այսպես կոչված լճացման տարիներին, ավելի «ձախ» դիրքերից լույս տեսան Բ. Անանիկյանի, Հ. Վարդանյանի, Ա. Մնացականյանի, Բ. Օհանջանյանի և ուրիշների աշխատությունները¹⁶, որոնք հետապնդում էին զուտ քաղաքական-քարոզչական նպատակներ:

Այդ նույն թվականներին խորհրդային առանձին պատմաբաններ հաստատագրված պատմահայեցողության դիրքերից անդրադարձել են բուրժուական ու հատկապես մանրբուրժուական որակվող կուսակցությունների պատմության հարցերին: Անգամ հիմնախնդրի վերաբերյալ հրավիրվել է միութենական նստաշրջան (Յխալտուբոյում և Կալինինում), որոնցում Հայաստանից զեկուցումներով հանդես են եկել պատմաբաններ՝ Ծ. Աղայանը, Լ. Խուրշուդյանը, Կ. Խուրդավերդյանը Ռ. Խուրշուդյանը: Ձեկուցումների նյութերը ամփոփված են առանձին ժողովածուում¹⁷: Հարկ է ընդգծել, որ կոնֆերանսում

¹⁵ Լ. Ա. Խուրշուդյան, *Սփյուռքահայ կուսակցությունները ժամանակակից էտապում*, Ե., 1964:

¹⁶ Բ. Անանիկյան, *Դաշնակցության գաղափարա-քաղաքական կրախը*, Ե., 1974, Հ. Գ. Վարդանյան, *Հայ բուրժուա-ազգայնական կուսակցությունների դիրքավորումը Ռուսական առաջին հեղափոխության տարիներին (1905-1907)*, Ե., 1975, Ա. Ն. Մնացականյան, *Ընդդեմ պատմության դաշնակցական նենգափոխության*, Ե., 1976, Բ. Ս. Օհանջանյան, *Դաշնակցությունը առանց դիմակի*, Ե., 1980, Ռ. Ա. Մարտիրոսյան, *Դաշնակցության հակաժողովրդական գործունեությունը Երկրորդ համաշխարհային պատերազմի տարիներին*, Ե., 1987 և ուրիշներ:

¹⁷ *Буржуазные и мелкобуржуазные партии России в Октябрьской революции и гражданской войне /материалы конференции /, М., 1980.*

հայ պատվիրակների գեկուցումներում առաջ քաշված դրույթների ու եզրահանգումների հիմնական մասը, մեր կարծիքով, ճշմարտացի է և ունի այժմեական գիտական արժեք:

Տակավին 1970-ական թվականներին ակադեմիկոս Լ. Խուրշուդյանը պատրաստել էր ՀՅ Դաշնակցության սոցիալական էության բացահայտմանը նվիրված, իր ժամանակի համար արժեքավոր մի հոդված, որը, սակայն, իշխող գաղափարական խոչընդոտների պատճառով տպագրվեց ավելի ուշ¹⁸: Այստեղ հեղինակը բազմապիսի փաստերով հիմնավորում, պաշտպանում ու զարգացնում է ակադեմիկոս Ա. Հովհաննիսյանի տեսակետը Դաշնակցություն կուսակցության մանրբորժուական սոցիալական էության վերաբերյալ: Այդ մասին իր տեղում կլինի ավելի հանգամանալի անդրադարձ:

Հայ հասարակական հոսանքների, քաղաքական կուսակցությունների, արևմտահայության ազատագրության խնդրում արտահայտած ծրագրային փաստաթղթերի ու դիրքորոշումների լուսաբանմանն է նվիրված պրոֆ. Ա. Համբարյանի մենագրությունը¹⁹, որը, անտարակույս, ներդրում է հայ հասարակական մտքի պատմության ամբողջացման ճանապարհին: Ուսումնասիրությունը ընդգրկում է 19-րդ դարի վերջը - 20-րդ դարի սկիզբը, մինչև 1917 թ.: Ուշագրավ է նաև նույն հեղինակի ՀՅ Դաշնակցության քաղաքական կողմնորոշմանը նվիրված հոդվածը²⁰:

1980-ական թվականներին պաշտպանվեցին երիտասարդ պատմաբաններ՝ Ռ. Խուրշուդյանի, Ս. Մելիքյանի Գ. Խեչումյանի ատենախոսական թեզերը, որոնք նվիրված էին հայ քաղաքական առանձին կուսակցությունների պատմության հարցերին²¹: Պետք է ասել, որ սրանք իրենց ժամանակի ու պայմանների համար արժեքավոր ուսումնասիրություններ են, որոնցում (փաստական հարուստ նյութից բացի) մի շարք դրույթներ ու եզրահանգումներ տակավին պահպանում են իրենց գիտական արժեքը:

* * *

Հայաստանի առաջին Հանրապետության ու քաղաքական կուսակցությունների նորովի լուսաբանման ժամանակաշրջանը, իրոք, սկսվում է 1988 թ. Արցախյան շարժումից: Այդ շարժումը և հայոց պատմության «սև» և

¹⁸ Хуршудян Л. А., К вопросу о ленинской оценке “социальной сущности - партии Дашнакцутюн”, «Լրաբեր», 1988, թիվ 7 (հուլիս), էջ 12-31

¹⁹ Ա. Ս. Համբարյան, Հայ հասարակական-քաղաքական միտքը արևմտահայության ազատագրության ուղիների մասին, Ե., 1990:

²⁰ Ա. Ս. Համբարյան, ՀՀ Դաշնակցություն կուսակցության քաղաքական կողմնորոշման շուրջ (1890-1917), «Լրաբեր» ՀՀ ԳԱԱ հաս. գիտ. 1991, թիվ 2, էջ 3-16:

²¹ Хуршудян Р. Л., Критический анализ политики и идеологии армянской мелкобуржуазной партии Гнчак /1917-1921гг. /, /авторепферат /, Е., 1981, С. Г. Меликян, Борьба большевистских организации Закавказья против идеологии и политики мелкобуржуазной партии эсеров /1908-1918гг. /, /авторепферат /, Е., 1983, Д. С. Хечумян, критический анализ идеологии и политики Армянской народной партии /1917-1921гг. /, /авторепферат /, Е., 1987.

«սպիտակ» էջերի լուսաբանությունը կարծես հանդես եկան միաժամանակ՝ քաղաքական ուժ տալով ու լրացնելով միմյանց: Լույս տեսան տասնյակ ճանաչված պատմաբանների, հայոց պատմության ամենատարբեր խնդիրներին ու մասնավորապես Հայաստանի առաջին Հանրապետությանը, հայ քաղաքական կուսակցություններին, Հայկական Հարցին ու համանման հիմնախնդիրներին մվիրված հոդվածներ, գրքեր ու գրքույկներ²²:

* * *

ՀՀ ու նրա խորհրդարանի պատմության լուսաբանումը սկիզբ է առնում դեռ հանրապետության գոյության շրջանից: Նրա առաջին տարեգիրներն են եղել ՀՅԳ գործիչներ, խորհրդարանի պատգամավորներ Ս. Վրացյանը, Հ. Քաջազունին, Ալ. Խատիսյանը, Հ. Տեր-Հակոբյանը (Իրազեկ), Ռ. Տեր-Սինասյանը, Ա. Բաբայանը, Վ. Նավասարդյանը, Կ. Սասունին և այլոք, որոնք հանդիսացել են ոչ միայն այդ ժամանակաշրջանի դեպքերի ականատեսը, այլ դրանց հիմնական մասի ակտիվ մասնակիցն ու կազմակերպիչը:

²² Վ. Հ. Մելիքյան, Փետրվարյան հեղափոխությունը և հայկական ազգային խորհուրդների ստեղծումը (1916-1917 թթ. հոկտեմբեր), «Լրաբեր» հաս. գիտ., Ե., 1989, թիվ 6, Գ. Մանուկյան, Քաղաքական կուսակցությունները ՀՀ խորհրդարանում, «Նորք», 1991, թիվ 5, Ս. (Սերհակ) Ամիրյան, Հայ Հեղափոխական Դաշնակցության գնահատականի շուրջը, «Նորք», 1991, թիվ 1, Հ. Ռ. Միմոնյան, Թուրք-հայկական հարաբերությունների պատմությունից, Ե., 1991, նույնի՝ Անդրանիկի ժամանակը, գ. 1, 2, Ե., 1996, Կ. Խ. Սարգսրյան, Պատմություն և իրականություն, Ե., 1991, Գ. Ա. Գալոյան, Հայկական հարցը և միջազգային դիվանագիտությունը Առաջին համաշխարհային պատերազմից հետո «Լրաբեր» հաս. գիտ., 1993, թիվ 4, Ա. Հակոբյան, Հայաստանի Հանրապետություն, Ե., 1992, նույնի՝ Անկախության գաղափարը Հ.Յ. Դաշնակցության ծրագրերում (1890-1920 թթ.), «Լրաբեր» հաս. գիտ., 1993, թիվ 3, նույնի՝ ՀՅԳ 9-րդ ընդհանուր ժողովը, Ե., 1994, Ռ. Լ. Խորշոռյան, Հայ ժողովրդավարության քաղաքական ուղեգիծը (1917-1918 թթ.), «Լրաբեր» 1993, թիվ 1, Վլ. Ղազարյան, Հայաստանի Հանրապետությունը 1918-1920 թթ., «Ազատամարտի» հավելված «Միարք», Ե., 1993, Լ. Ա. Խորշոռյան, Հայկական հարցը, Ե., 1995, Գ. Բ. Ղարիբջանյան, Յեղասպանությունը պատմության դատաստանի առաջ, Ե., 1995, Ա. Համբարյան, Ս. Ստեփանյան, Հայոց Յեղասպանությունը, Ե., 1995, Ռ. Սահակյան, Կ. Խորպալեղյան, Հայոց Յեղասպանությունը, տասնամյակների լույսի ներքո, Ե., 1995, Հ. Մ. Հարությունյան, Լեռնային Ղարաբաղը 1918-21 թթ., Ե., 1996, Ռ. Ավագյան, Հանցավորությունը Հայաստանի առաջին Հանրապետությունում (1918-1920 թթ.), Ե., 1997, Է. Ա. Չոխրաբյան, 1920 թ. բուրք-հայկական պատերազմը և տերությունները, Ե., 1997, Վ. Հ. Մելիքյան, 1917 թ. Փետրվարյան հեղափոխությունը և Հայաստանը, Ե., 1997, Ս. Հ. Մելիքյան, Սոցիալիստ-հեղափոխականները Հայաստանում և Անդրկովկասի հայաշատ քաղաքներում 1900-1920 թթ., Ե., 1997, Հ. Ա. Ավետիսյան, Հայկական հարցը 1918թ., Ե., 1997, Գ. Ա. Գալոյան, Հայաստանը և մեծ տերությունները 1917-1923թթ., Ե., 1999, *Нагорный Карабах в 1918-1923гг., сборник документов и материалов. Ереван, 1992, отв. ред. В. А. Микаелян, Армянский вопрос и геноцид армян в Турции /1913-1919/, Материалы политархива МИД Кайзеровской Германии, составитель В. А. Микаелян, Ереван, 1995, Г. А. Аветисян, Брест-Литовск: как были отторгнуты Турцией Карс, Ардаган и Батум, Ереван, 1994 и др.*

ՀՀ պատմության ուրվագիծը առաջին անգամ տվել է Ս. Վրացյանը ՀՅԳ պաշտոնաթերթեր՝ «Հորիզոնի», «Զանգի», «Հայաստանի աշխատավորի», «Հառաջի» համարներում պարբերաբար գետեղված հոդվածաշարերով: Թերթային խմբագրականներից ու հոդվածներից գատ՝ 1920 թ. Բոստոնում լույս տեսավ «Անկախ Միացյալ Հայաստան» գրքույկը²³: 1922 թ. «Հայրենիք» հանդեսում լույս տեսավ Ս. Վրացյանի «Հայաստանի Հանրապետություն» վերտառությամբ պատմական ակնարկը²⁴, իսկ 1923 թ.՝ «Հուլեր մոտիկ անցյալից» աշխատությունը²⁵: Սրանցում Ս. Վրացյանը ուրվագծել է ՀՀ սկզբնավորման պատմությունը՝ ավելի կատարյալը թողնելով ապագային: Եվ պետք է ասել, որ նա փայլուն կատարեց իր խոստումը: 1928 թ. լույս տեսավ նրա հիմնարար աշխատությունը²⁶: Այն հետագայում բարելավվեց և 1958 թ. վերահրատարակվեց Բեյրութում: Գիրքն ունեցավ նաև այլ հրատարակություններ: Սույն մենագրությունը իրավամբ համարվում է ՀՀ պատմությանը նվիրված ամենամթողջական աշխատությունը, որը կարելի է համարել և՛ պատմագիտական ուսումնասիրություն, և՛ հուշագրություն: Մեծարժեք աշխատություն է նաև Ալ. Խատիսյանի հուշագրային մենագրությունը՝ նվիրված ՀՀ ծագման ու զարգացման պատմությանը²⁷: ՀՀ պատմաքաղաքական դեպքերի ու իրադարձությունների գնահատումներին, հայ քաղաքական կուսակցությունների և խորհրդարանի վերջին փուլի գործունեությանն են նվիրված Հակոբ Տեր-Հակոբյանի (Իրագեկի) հուշերը²⁸:

ՀՀ պետական կառուցվածքի և ժողովրդավարական համակարգի առաջին քննադատներից է Հ. Քաջազնունին իր հայտնի աշխատությամբ²⁹: Մինչ ներքոհիշյալ գրքին անդրադառնալը իրագեկենք, որ ՀՀ առաջին վարչապետ Հ. Քաջազնունին իր արտասահմանյան հայտնի գործողման ժամանակ, ԱՄՆ-ի համակրանքը շահելու նպատակով, պատրաստել և 1919 թ. աշնանը ամերիկյան սենատին էր ներկայացրել «Հայաստանի Հանրապետություն» վերտառությամբ հուշագիրը: Այդ ամփոփ աշխատության մեջ հեղինակը փաստական հարուստ նյութերի հիման վրա տվել է ՀՀ տասնվեց ամիսների սեղմ, սակայն բովանդակալից պատմության ուրվագիծը: Հ. Քաջազնունու կազմած այս հուշագիր-պատմության ինքնագիր օրինակը պահվում է ՀՀ ՊԿՊ արխիվային ֆոնդում³⁰: Արժեքավոր ուշագրավ այս փաստաթուղթը հրատարակվել է պրոֆ. Վլ. Ղազախեսյանի կողմից³¹:

²³ Ս. Վրացյան, *Անկախ և Միացյալ Հայաստան, Բոստոն, 1920*:

²⁴ «Հայրենիք», *Բոստոն, 1922, թիվ 1-2*:

²⁵ «Հայրենիք», *1923, թիվ 1 (նոյեմբեր)*:

²⁶ Ս. Վրացյան, *Հայաստանի Հանրապետություն, Փարիզ, 1928*:

²⁷ Ալ. Խատիսյան, *Հայաստանի Հանրապետության ծագումն ու զարգացումը, Բեյրութ, 1968*:

²⁸ Յ. Իրագեկ, *Մոտիկ անցյալից, Պեյրութ, 1956*:

²⁹ Հ. Քաջազնունի, *Հ.Յ.Դաշնակցությունը անելիք չունի այլևս, Պուրթեշ, 1923*:

³⁰ ՀՀ ՊԿՊԱ, *Ֆ. 200, ց. 1, գ. 498*:

³¹ Հ. Քաջազնունի, *Հայաստանի Հանրապետություն, Ե., 1993*:

Մի քանի տարի անց՝ պատմաքաղաքական դեպքերի կտրուկ շրջադարձներից հետո, Հ. Քաջազնունին գրում է իր հանրագումարային գեկուցում-աշխատությունը՝ «Հ.Յ.Դաշնակցությունը անելիք չունի այլևս», որում Դաշնակցության հանդեպ կայացնում է խիստ դատավճիռ: ՀՅԴ Վիեննայի խորհրդաժողովը (1923 թ.) մերժում է գեկույցի հիմնական գաղափարը, որից հետո Քաջազնունին դուրս է գալիս կուսակցության շարքերից և վերադառնում հայրենիք՝ Խ. Հայաստան: Սակայն այդ մեղայական աշխատությունը չփրկեց նրան ստալինյան բռնաճնշումներից: Այս գրքի առնչությամբ պատասխան քննադատական աշխատություններ ու հոդվածաշարեր գրեցին Քաջազնունու նախկին կուսակից ընկերներ՝ Ս. Վրացյանը, Վ. Նավասարդյանը, Ա. Ջամալյանը և ուրիշներ³²: Հ. Քաջազնունին իր այս գրքում անդրադարձել է ՀՅԴ գործունեության հետ առնչվող բազմապիսի հարցերի, տվել դրանց սուր և ոչ միանշանակ գնահատականներ: Ընդամին նա անդրադարձել է նաև ՀՀ պատմության և Հայաստանի խորհրդարանի գործունեության խնդիրներին: Հ. Քաջազնունին բավականին մռայլ գույներով է տալիս ՀՅԴ, Հայաստանի կառավարության ու խորհրդարանի գործունեության քաղաքական գնահատականը: Աշխատության վերնագիրը ինքնին բովանդակում է նրա էությունը: Անշուշտ, հեղինակի կողմից արվող քննադատության մի որոշ մասը դառը ճշմարտություն է: Սակայն նրա գնահատականների ու որակումների մի զգալի մասը, կարծում ենք, սուբյեկտիվ են և ոչ արդարացի: ՀՀ և ՀՅԴ երբեմնի քաղաքական ու պետական գործիչը 1920-ական թվականների սկզբների քաղաքական կոնյունկտուրայի ազդեցության տակ գրում էր. «Պառլամենտ չկար Հայաստանում, մի դատարկ ձև էր առանց պարունակության»³³: Այնուհետև շարունակում էր. «Պետական հարցերը քննության էին առնվում ու լուծվում դռնփակ, դաշնակցական ֆրակցիայի սենյակում ու ապա հայտարարվում պառլամենտի ամբիոնից: Իրոք չկար և պառլամենտական ֆրակցիա, որովհետև սա դրված էր Դաշնակցության բյուրոյի խիստ հսկողության տակ ու պարտավոր էր կատարել նրա հրամանները»³⁴: Ահա այսպիսին էր նախկին դաշնակցական երևելի գործչի մեղադրանքը իր իսկ կուսակցության հասցեին: Ուսումնասիրությունը մեզ բերել է այն հետևության, որ վերոհիշյալ տողերի հեղինակը գույները բավականին խտացրել է: Այդ մասին կխոսվի իր տեղում: Քաջազնունու քննադատական դիտողությունները, թերևս, կարելի է տարածել Բյուրո-կառավարության ժամանակաշրջանի վրա (1920 թ. մայիս-նոյեմբեր): Գրքում տրված որակումներն ու գնահատականները խիստ են, հաճախ կողմնակալ ու վիճելի: Հեղինակը ձգտել է ամեն կերպ

³² Ս. Վրացյան, *Խարխափումներ, Պոսքրն, 1924, Վ. Նավասարդյան, Հ.Յ.Դաշնակցության անելիքը, Գահիրե, 1924, Ա. Ջամալյան, Հ. Քաջազնունին և Հ.Յ.Դաշնակցությունը («Հայրենիք», 1924, թիվ 3, էջ 48-60, թիվ 4, էջ 117-130):*

³³ Հ. Քաջազնունի, *Հ.Յ.Դաշնակցությունը անելիք չունի այլևս, Պոսքրեշ, 1923, էջ 45:*

³⁴ Նույն տեղում:

հիմնավորել գրքի հանրահայտ վերնագրի ճշմարտացիությունը, այն է՝ ՀՅԳ պետք է հեռանա ասպարեզից և իր տեղը զիջի հայ բուշևիկներին:

ՀՀ պատմության առաջին ուրվագծող հեղինակներից մեկն էլ բազմավաստակ պատմաբան Լեոն Է՝ իր «Անցյալից» աշխատությամբ³⁵: Քաղաքական դեպքերին ականատես ու մասնակից հեղինակը հուշերի ու դատումների ձևով մեկ ամբողջ գլուխ (յոթերորդը) հատկացրել է Հայաստանի 1918-1920 թթ. անկախության հակիրճ պատմությանը: Այնտեղ կան դառը ճշմարտություններ, ճիշտ վերագնահատումներ: Բայց և այնտեղ կարելի է հանդիպել երբեմն վիճելի մտքերի, կառավարող կուսակցությանը հասցեագրված անհարկի մակդիրների ու արտահայտությունների³⁶:

Հայ հասարակական մտքի և քաղաքական կուսակցությունների ուսումնասիրության տեսակետից ուշադրության արժանի է «սպեցիֆիկների» գաղափարախոս Գ. Անանունի եռահատոր կապիտալ աշխատությունը³⁷: Այստեղ հեղինակը «սպեցիֆիկյան» դիրքերից տվել է 19-րդ դարի և 20-րդ դարի սկզբի ռուսահայ հասարակական-քաղաքական մտքի և սոցիալ-տնտեսական հարաբերությունների զարգացման պատմությունը: Այնտեղ, մեր կարծիքով, վիճելի ու անընդունելի առանձին դրույթների ու դատողությունների կողքին կան նաև ճշմարիտ և ուսանելի մտքեր ու հետևություններ, որոնք որոշակի ներդրում են հայ հասարակական-քաղաքական մտքի պատմության մեջ:

Հայաստանի խորհրդարանի, Դաշնակցության՝ որպես կառավարող կուսակցության գործունեության քննադատությանն են մվիրված Գրիգոր Ջաղեթյանի հոդվածաշարերը՝ «Հայաստանի պառլամենտը», «Դաշնակցական շեֆերի հաշվետվությունը», «Դաշնակցականների արդարադատությունը» և այլն, որոնք լույս են տեսել «Ռանջբար Իրանի» թերթի 1922 թ. համարներում³⁸: Այդ հոդվածներում գնահատելին ու արժեքավորն այն է, որ Հայաստանի խորհրդարանի և դաշնակցական կառավարության ու ղեկավարների մասին հիշողություններ է պատմում ու բնութագրություններ անում ՀՀ պատասխանատու պաշտոններ վարած և այդ թվում պետական թիվ մեկ վերահսկիչ աշխատած գործիչը:

Տեղին ու արդարացի են հուշագրողի մերկացումները հանրապետության պետական ապարատի վերին և ստորին օղակներում առկա շահատակությունների, կաշառակերության, պետական ու բարեգործական միջոցների յուրացումների, բռնությունների ու բռնագրավումների մասին և այլն: Ասենք, որ նման երևույթների մասին փաստում են նաև դաշնակցական հեղինակները և ժամանակի իրենց մամուլը: Սակայն, կարծում ենք, որ իրավացի չէ հեղի-

³⁵ Լեոն, *Անցյալից*, Թիֆլիս, 1925:

³⁶ Լեոն, *նշվ. աշխ.*, 404, 413, 454-456 և այլն:

³⁷ Գ. Անանուն, *Ռուսահայերի հասարակական զարգացումը 19-րդ դարում (1800-1870)*, հ. 1, Բաքու, 1916, /1870-1900/, հ. 2, Էջմիածին, 1922, (1901-1918), հ. 3, Վենետիկ, 1926:

³⁸ Հոդվածաշարը լույս է տեսել առանձին գրքույկով՝ տես Գ. Ջաղեթյան, *Մոտիկ անցյալից*, Ե., 1969:

նակը, երբ նմանատիպ մեղադրանք է վերագրում ամբողջ խորհրդարանին, Գաշնակցություն կուսակցությանը և կառավարությանը: Գ. Ջաղեթյանի գրքույկում տեղ են գտել փաստական մի շարք անճշտություններ: Օրինակ՝ չի կարելի համաձայնել հեղինակի այն պնդմանը, թե «Գաշնակցականների ճնշման տակ 1919 թ. մայիսին Հայաստանի խորհուրդը լուծարվեց»³⁹: Նախ՝ Հայաստանի խորհուրդը արձակվել է 1919 թ. հունիսի 5-ին, իսկ երկրորդ՝ խորհուրդը ինքնալուծարման ենթարկվեց այն բանի հետանքով, որ երեք կուսակցությունների (ՀԺԿ, սոց.- դեմ. և Էսեռական) խմբակցությունները (թվով 18 պատգամավորներ), բողոքելով կառավարության մայիսի 28-ին հրապարակած «Միացյալ և Անկախ Հայաստանի մասին» ակտի դեմ, ցուցադրաբար հեռացան խորհրդարանից: Գրանից հետո չէր մնում այլ բան, քան դադարեցնել խորհրդի աշխատանքները և արագացնել նոր խորհրդարանի ընտրությունները: Փաստական անճշտություն և միտումնավորություն պետք է համարել հուշագիր Գր. Ջաղեթյանի հայտնած այն տեղեկությունը, թե Արտակարգ դատարանների մասին կառավարության օրենքը ընդունվել է 1920 թ. մայիսյան դեպքերից հետո և իբր «այդ օրենքի ուժը տարածվել է հրապարակումից մի ամիս առաջ կատարված հանցանքների վրա»⁴⁰: Իրականում այդ օրենքը ընդունվել է նախարարների խորհրդի մայիսի 8-ի նիստում, այսինքն այն բանից առաջ, երբ նոր պետք է ծավալվեին մայիսյան ապստամբության հիմնական իրադարձությունները, ուստի հարկ չէ խոսել այդ օրենքի հետադարձ գործադրության մասին:

Պատմական գրականության մեջ մեր կողմից քննվող հիմնահարցերին՝ խորհրդարանին և կուսակցություններին մվիրված ուսումնասիրություններ մինչ օրս չկան: Այս տեսակետից առանձնանում է, թերևս, միայն Արշամ Խոնդկարյանի «Օպոզիցիան Հանրապետական Հայաստանում» հուշերի հոդվածաշարը⁴¹: Անշուշտ, Էսեռական կուսակցության այս գործիչը, իր հուշերը շարադրելիս, առանձին դեպքերում հանդես է բերել կողմնակալ մտտեցումներ: Օրինակ՝ մենք համակարծիք չենք Ա. Խոնդկարյանի արտահայտած այն մտքին, թե հայ քաղաքական բոլոր կուսակցությունները դարձան «հայ նորաստեղծ պետական կյանքի շարժիչ ուժերը»⁴²: Ինչպես հետո կտեսնենք՝ իրականում «ձախ» կուսակցությունները՝ (Էսեռները, որի ղեկավար անդամն էր հենց ինքը՝ Ա. Խոնդկարյանը, սոցիալ-դեմոկրատ մենշևիկները ու հատկապես բոլշևիկները) դեմ էին Հայաստանի անկախությանը և կամա թե ակամա՝ խարխլում էին հայոց պետականության հիմքերը: Իսկ ինչ վերաբերում էր «աջ» համարվող Հայ ժողովրդական կուսակցությանը (ՀԺԿ), ապա նա ուներ ոչ այնքան հակասակախական ու հակապետական բնույթ, որքան՝ հակադաշնակցական:

³⁹ Գր. Ջաղեթյան, *Մոտիկ անցյալից, Ե., 1969, էջ 9*:

⁴⁰ Գր. Ջաղեթյան, *նշվ. աշխ., էջ 24*:

⁴¹ «Վեմ», *Փարիզ, 1933, թիվ Ա, Բ, 1934, թիվ Գ, Ե, Զ*:

⁴² «Վեմ», *Փարիզ, 1934, թիվ Ե, էջ 52*:

Վերապահությանը պետք է մոտենալ նաև Ա. Խոնդկարյանի՝ իր կուսակցության գործունեությանը տված այն գնահատականին, թե էսէռների ընդդիմությունը եղել ու մնացել է պատասխանատու դիրքերում⁴³: «Մենք (էսէռները Ա. Հ.),- գրում էր Ա. Խոնդկարյանը,- անպատասխանատու ընդդիմադիրներ չէինք ոչ Հայաստանի խորհրդում, ոչ էլ, առհասարակ, Հայաստանում»⁴⁴: Սակայն այդ մասին իր տեղում կտեսնենք, որ էսէռ պատգամավոր Ա. Խոնդկարյանը 1919 թ. օգոստոսին արտահայտել է միանգամայն հակադիր տեսակետ⁴⁵:

Մեր առաջ ծառայած հիմնահարցի լուսաբանման համար սկզբնաղբյուրի նշանակություն ունի ՀՅԳ երևելի գործիչ Ռ. Տեր-Սիմայանի բազմահատոր հուշերի՝ ՀՀ պատմության շրջանին վերաբերող հատորը⁴⁶: Այն սկսվում է Հանրապետության սկզբնավորումից՝ հասցնելով մինչ 1920 թ. մայիսյան դեպքերը: Ռուբենը կուսակցության մեջ՝ պետության կառավարման խնդիրներում, հարում էր «հեղափոխական», այսպես կոչված «կոմիտաջիության» թեկն: Ուստի գրքում տրված նրա մի շարք գնահատականներին մոտեցել ենք քննադատաբար ու առանձին դեպքերում վերապահությամբ: Պետք է ասել, որ անցած ժամանակաշրջանում սիյուռքում ստեղծվել է հարուստ գրականություն հայ քաղաքական կուսակցությունների պատմության վերաբերյալ⁴⁷:

Սիյուռքի կուսակցական մամուլում հրատարակվել են նաև մեր ուսումնասիրության թեմային առնչվող ուշագրավ հոդվածներ, որոնցից առանձնապես կուզենայինք առանձնացնել Ս. Սնարի⁴⁸, Բենհուրի⁴⁹, Հ. Քուրքչյանի⁵⁰ և Ռ. Հովհաննիսյանի⁵¹ հոդվածաշարերը: Մեր ժամանակներում ՀՀ ամբողջա-

⁴³ Նույն տեղում, էջ 53:

⁴⁴ Նույն տեղում, էջ 54:

⁴⁵ «Սոցիալիստ հեղափոխական», 10 օգոստոսի, 1919 թ.:

⁴⁶ Ռուբեն, Հայ լեղափոխականի մը հիշատակները, հ. է. Լու Անճելրս, 1952:

⁴⁷ Մ. Վարսնդյան, Հ.Յ.Դաշնակցության պատմություն, հ. 1, Փարիզ, 1932, հ. 2, Գահիրե, 1950, Մ.Գ. Ծիզմեճյան, Պատմություն ամերիկահայ քաղաքական կուսակցությանց (1890-1925), Ֆրեզնո, 1930, Ա. Կիտուր, Պատմություն Ս.Դ. Հնչակյան կուսակցության /1887-1963/, Հ.Ա., Պեյրուք, 1962, Հ.Բ. Պեյրուք, 1963, Ա. Դարբինյան, Հայ ազատագրական շարժման օրերեն, Փարիզ, 1947, Մայիսաս, Ապրումներ, Հ.Ա. Պեյրուք, 1956, Լ. Չորմիսյան, Կուսակցությունները և հայրենիքը, Փարիզ, 1946, Նույնի՝ Կուսակցությունները, Ե., 1995, Ա. Յափուճյան, Համառոտ պատմություն Ռամկավար ազատական կուսակցության, Գահիրե, 1977, Ա. Ջամալյան, Հ.Յ. Դաշնակցությունը և ընկերվարությունը, Պեյրուք, 1979, Վ. Ղազարյան, Արմենական կուսակցություն /սկնարկներ/, Պեյրուք, 1985, Հ. Տասնապետյան, Հ.Յ. Դաշնակցությունը իր կազմությունեն մինչև Ժ. ընդհ. ժողովը /1890-1924/, Աթենք, 1988 և ուրիշներ:

⁴⁸ Ս. Սնար, Կուսակցությունները Հայկական հանրապետության մեջ, «Հայրենիք», Բուսոռն, 1920, թիվ 3:

⁴⁹ Բենհուր, Կուսակցությունները և անոնց դերը, «Հայրենիք», 1929, թիվ 3:

⁵⁰ Հ. Քուրքչյան, Ուրվագիծ Հ.Յ.Դ. պատմության 1919-1924 հնգամյակի, «Ազդակ շաբաթօրյակ», Դ. տարի, 1973, թիվ 35-42:

⁵¹ Ռ. Հովհաննիսյան, Հ.Յ. Դաշնակցության դերը, «Ասպարեզ», 28/29 մայիսի 1992 թ.:

կան պատմությանը նվիրված բարձրարժեք հիմնարար գործը, անկասկած, ամերիկահայ պատմաբան Ռիչարդ Հովհաննիսյանի բազմահատոր մենագրությունն է անգլերեն լեզվով⁵²: Ուշադրության է արժանի նաև սփյուռքահայ պատմաբան Ռ. Փիրումյանի աշխատությունը⁵³:

Այս ամենից գատ՝ ժամանակի ընթացքում խնամքով կազմվել և սփյուռքում լույս են տեսել կուսակցությունների գործունեությանը վերաբերող փաստաթղթերի և նյութերի ժողովածուներ և այլն⁵⁴:

* * *

ՀՀ խորհրդարանի և հայ քաղաքական կուսակցությունների պատմության լուսաբանման համար լայնորեն օգտագործել ենք հանրապետության կենտրոնական արխիվների ֆոնդերը:

Մասնավորապես հետազոտված են ՀՀ ՊԿՊԱ (ներկայումս՝ ՀԱԱ) «Հայաստանի Հանրապետությունը 1918-1920 թթ.» բաժնի բոլոր ֆոնդերը, այդ թվում՝ 198 («Հայաստանի խորհրդարան») ֆոնդը: Հարկ է նշել, որ Հայաստանի խորհրդի ընդունած օրենքները ի մի են բերվել ու հրատարակվել առանձին ժողովածուով: Խորհրդի օրենքների այդ հավաքածուն պահվում է ՀՀ ՊԿՊԱ 200 «ՀՀ արտգործնախարարության» ֆոնդում⁵⁵:

ՀՀ երկրորդ գումարման խորհրդարանի ընդունած օրենքների հավաքածուն, որը տպագրված է բյուլետենների ձևով, պրակներով, պահվում է 202 «ՀՀ ֆինանսների նախարարության» ֆոնդում⁵⁶: Հայաստանի խորհրդարանի ընդունած օրենքները կազմված և հրատարակված են նաև առանձին գրքերի ձևով⁵⁷: Աղբյուրագիտական առավել մեծ արժեք ունի 1998թ. լույս տեսած «ՀՀ պառլամենտի օրենքները /1918-1920թթ./» համահավաք ժողովածուն:

Հրատարակված սկզբնաղբյուրներից է նաև ընտրությունների մասին օրենքը⁵⁸: Առանձին գրքույկներով հրատարակվել են նաև խորհրդարանի կարևոր նիստերի արձանագրությունները: Այդպիսիներից է, օրինակ, 1920 թ. մայիսի 3-ի արտակարգ նիստը, որտեղ քննության ենթարկվեցին Հայաստա-

⁵² Hovannisian Richard G., *The Republic of Armenia, Vol. 1, Berkeley, Los Angeles, London, 1971, Vol. 2, 1982, Vol. 3, 1996, Vol. 4, 1996.*

⁵³ Ռ. Փիրումյան, *Հայաստանը Հ.Յ.Դ.-Բոլշևիկ հարաբերությունների ոլորտում (1917-1921)*, Ե., 1997:

⁵⁴ «Դիվան Հ.Յ.Դաշնակցության պատմության», ՀՀ. 1 և 2, Պոսթըն, 1934, «Նյութեր Հ.Յ.Դաշնակցության պատմության համար», Հ.Ա., Բեյրութ, 1984, Հ.Բ., Բեյրութ, 1985, Հ.Գ., Բեյրութ, 1985, Հ.Դ., Բեյրութ, 1985:

⁵⁵ ՀՀ ՊԿՊԱ, Ֆ. 200, g. 1, q. 86, pp. 1-87:

⁵⁶ ՀՀ ՊԿՊԱ, Ֆ. 202, g. 1, q. 333:

⁵⁷ «Հայաստանի խորհրդի հաստատած օրենքները 1918-1919 թթ.», մաս 1, Ե., 1919, «Հայաստանի Հանրապետության օրենքների հավաքածու 1919 թ. (հրատարակություն պառլամենտի), ա.տ. և թ.», «Հայաստանի Հանրապետության օրենքների հավաքածու 1920 թ.», (հրատարակություն պառլամենտի), ա.տ. և թ.:

⁵⁸ «Օրենք Հայաստանի պառլամենտի ընտրությանց», ա.տ. և թ.:

նի արտաքին քաղաքականության սկզբունքային մի շարք խնդիրներ⁵⁹: Հայաստանի խորհրդարանի սղագրական արձանագրությունների մի մասը հետագայում /1930-ական թթ./ հրատարակվել է Ս. Վրացյանի խմբագրությամբ Փարիզում լույս տեսնող հասարակական-քաղաքական ու մշակութային «Վեմ»⁶⁰, ինչպես նաև ավելի ուշ՝ «Բանբեր Հայաստանի արխիվների» հանդեսներում⁶¹: Բայց սրանք արձանագրությունների մի փոքր մասն են միայն: Խորհրդարանի նիստերի արձանագրությունների մի զգալի մասը չի պահպանվել: Ինչպես վկայում է Ս. Վրացյանը՝ բնագիր շատ արձանագրություններ և այլ արխիվային նյութեր ոչնչացել են 1920-1921 թթ. ձմռանը՝ քաղաքացիական հիմնարկություններում՝ դրանք օգտագործելով որպես վառելանյութ կամ էլ՝ իբրև ապրանք փաթաթելու թուղթ⁶²: Կորսված արձանագրությունների բացը հիմնականում հնարավոր է եղել լրացնել «Հորիզոն», «Զանգ», «Հայաստանի աշխատավոր», «Աշխատավոր», «Հառաջ», «Ժողովրդուրդ» պարբերականներում ժամանակին լույս տեսած խորհրդարանի արձանագրությունների քաղվածքներով:

Հայաստանի առաջին Հանրապետության պատմության ուսումնասիրության համար առանձնապես կուզենայինք առանձնացնել ՀՀ ՊԿՊԱ ֆոնդ 200, գ.1, գ.422 և 427 մաս 1-ին և 2-ում պահվող բավականին ծավալուն նյութերը⁶³: Սրանք իրենցից ներկայացնում են ՀՀ ներքին և արտաքին կյանքի տարբեր կողմերին վերաբերող պատմական տեղեկությունների մի հարուստ ժողովածու, որն առանձին տեղերում կրկնում է Հ. Քաջազունու արդեն հիշատակածս հուշագրի նյութերը: Բայց ի տարբերություն վերջինիս՝ այստեղ շարադրանքը հասցված է մինչ ՀՀ անկումը՝ 1920 թ. դեկտեմբերը:

Հայաստանի առաջին խորհրդարանի պատմության ակունքների ուսումնասիրման համար շահեկան պետք է համարել ՀՀ գլխավոր արխիվային վարչության «Բանբերի» աշխատակազմի պատրաստած ու հրատարակած փաստաթղթերի և նյութերի մեկ այլ ժողովածու, որը վերաբերում է 1917 թ. Արևելահայոց համագումարին՝ Հայոց Ազգային համախորհրդակցությանը⁶⁴:

Հայ քաղաքական կուսակցությունների գործունեության վերհանման համար հանգամանորեն ուսումնասիրել ենք ՀՀ Հասարակական-քաղաքական կազմակերպությունների փաստաթղթերի (ՀԶԿՓ) ՊԿԱ-ի 4045 («Ս.Գ. Հնչակյան»), 4047 («ՀՅ Գաշնակցություն»), 1022 («Սպեցիֆիկներ»), 4033 («Կուսակցության պատմության»), 404 («Խորհրդարանի սոց.- դեմ. խմբակցություն») և այլ ֆոնդերը: Սակայն հիշյալ ֆոնդերում թեմային առնչվող նյութերը համեմատաբար աղքատիկ են:

⁵⁹ «Հայաստանի պառլամենտի 1920 թ. մայիսի 3-ի արտակարգ նիստը, Ե., 1920:

⁶⁰ «Վեմ», Փարիզ, 1934, թիվ 2,Ը:

⁶¹ «Բանբեր Հայաստանի արխիվների», Երևան, 1990, թիվ 3, էջ 106-134, 1991, թիվ 3, էջ 42-91 և այլն:

⁶² «Վեմ», Փարիզ, 1934, թիվ 2, էջ 113:

⁶³ ՀՀ ՊԿՊԱ, Ֆ. 200, գ.1, գ.422, գ.427, մաս 1 և 2:

⁶⁴ «Բանբեր Հայաստանի արխիվների», 1992, թիվ 1-2:

Այն բացը, որ զգացել ենք արխիվներից, աշխատել ենք լրացնել ընթացիկ կուսակցական և ոչ կուսակցական պարբերական մամուլի նյութերով: Քաղաքական կուսակցությունների պատմության լիարժեք լուսաբանությունը անհնարին է առանց նրանց կենտրոնական ու տեղական պաշտոնաթերթերի ու ընդհանրապես ընթացիկ մամուլի նյութերի ուսումնասիրության: Միայն Հայաստանի Հանրապետությունում լույս էին տեսնում շուրջ վեց տասնյակի հասնող պարբերականներ⁶⁵: Ընթացիկ մամուլը հանդիսանում է ժամանակաշրջանի բազմաշերտ իրականության արտացոլման հայելին: Կուսակցությունների գործունեության, հանրապետության ներքին ու արտաքին կյանքի բազմաբնույթ երևույթների մասին առատ նյութ են տալիս հատկապես «Հորիզոն», «Ջանգ», «Խոսք», «Կայծ», «Աշխատավոր», «Աշխատանք», «Հայաստանի աշխատավոր», «Ժողովուրդ», «Հառաջ», «Ժողովրդի ձայն», «Հայաստանի ձայն», «Սոցիալիստ հեղափոխական», «Աշխատանքի դրոշակ», «Հայաստանի կոոպերացիա» թերթերը: Ընթացիկ մամուլի էջերում կարելի է հանդիպել ոչ միայն խորհրդարանի աշխատանքի վերաբերյալ տեղեկատվության, այլև շատ օրենքների ու օրինագծերի: Այս տեսակետից առանձնապես անփոխարինելի է ՀՀ պաշտոնաթերթ «Կառավարության լրաբերը»: Այն լույս է տեսել 1918 թ. սեպտեմբերի մեկից մինչև 1920 թ. հուլիսի 20-ը: Թերթի ամբողջական հավաքածուն պահվում է ՀՀ ՊԿՊ արխիվում:

⁶⁵ Ա. Հակոբյան, Հայաստանի Հանրապետության պարբերական մամուլի պատմություն (1918-1920թթ.), Ե., 2005, էջ 3-4:

ՎՈՒՆ ԱՌԱՋԻՆ ՀԱՅԱՍՏԱՆԻ ԽՈՐՀՐԳԻ (ԽՈՐՀՐԳԱՐԱՆԻ) ԿԱԶՄԱՎՈՐՈՒՄԸ

1. Պատմական ակնարկ

Համաշխարհային պատմությունից հայտնի է, որ պառլամենտը (խորհրդարանը), որպես օրենսդիր իշխանության մարմին, հանդես է եկել այն ժամանակ, երբ եվրոպական մի շարք երկրների թագավորներ, դեռևս իրենց միապետական, կենտրոնացված, ամուր իշխանությունը հաստատած չլինելով, կարիք զգացին երկրին վերաբերող մի շարք խնդիրների լուծմանը ներգրավել տարբեր դասերի ներկայացուցիչների՝ այդպիսով հիմք դնելով իշխանության նոր մարմնի՝ դասային ներկայացուցչական (պառլամենտ) և պետության կառավարման պատմական նոր ձևի՝ դասային ներկայացուցչական միապետության:

Արդեն նոր դարաշրջանում Արևմուտքի երկրների մեծ մասում պետական համակարգի անբաժանելի ու անօտարելի մասը դարձավ խորհրդարանը: Նա ժամանակակից իմաստ և բովանդակություն ստացավ այն ժամանակ, երբ նյութական անհրաժեշտություն զգացվեց սահմանափակել կամ վերացնել բացարձակ միապետական (անձնիշխանական), ինքնակալական կամ ամբողջատիրական իշխանության համակարգը և ստեղծել ամբողջ հասարակության (ժողովրդի), ազգի առնվազն մեծամասնության կամքի ու ցանկության հաշվառման վրա հիմնված, օրենքներով ու օրինականությամբ կառավարում: Այսինքն՝ ինքնակալի միահեծան իշխանությունը սահմանափակել ու փոխարինել օրենքի գերակայության վրա հիմնված իշխանությամբ, հաստատել սահմանադրական-հանրապետական կառավարում, որի հիմքում ընկած է ժողովրդական ներկայացուցչությամբ կազմված խորհրդարանը:

Պառլամենտարիզմը ժողովրդավարական իշխանության ձև է, որը ենթադրում է կառավարում ժողովրդի (հասարակության) ներկայացուցչության միջոցով, իշխանությունների (օրենսդիր, գործադիր և դատական) տարանջատվածություն, կառավարության պատասխանատվություն խորհրդարանի առաջ և այլն: Խորհրդարանը հանդիսանում է քաղաքացիական հասարա-

կության հաստատման ճանապարհին կարևորագույն պետաիրավական ու քաղաքական հաստատություն:

Խորհրդարանական համակարգի դասական երկիր ու նախահայրենիք է համարվում Անգլիան: Տվյալներ կան այն մասին, որ այնտեղ ժողովրդական ներկայացուցչության՝ խորհրդարանի առաջին նստաշրջանը գումարվել է 1265 թ., իսկ նույն դարի 90-ական թվականների վերջերից այն սկսել է գործել որպես ինքնուրույն և մշտապես գործող հաստատություն (մարմին)¹: Այդ ժամանակ էլ հանդես եկավ «Պառլամենտ» /Parliamentum/ անվանումը²: Իր ձևավորման պահից անգլիական խորհրդարանը կատարում էր երկմիասնական խնդիր. մի կողմից նա դիտվում էր «միապետական իշխանության սահմանափակող», իսկ մյուս կողմից՝ թագավորի և նրա հպատակների միջև երկիրը կառավարելու նոր համագործակցության (ընկերակցության- Partnership) ձև (եղանակ)³:

Անգլիական խորհրդարանը կոչված էր թագավորի և ժողովրդի /հասարակության/ միջև հաստատել յուրօրինակ հավասարակշռություն ու ներդաշնակություն: Եվ պետք է ասել, որ դարերի ընթացքում նա հաջողությամբ է կատարել իր պատմական առաքելությունը և որից մարդկությունը ուսանելու շատ բան ունի:

* * *

Հայ իրականության մեջ պառլամենտի, պառլամենտական-հանրապետական կարգեր հաստատելու գաղափարը, ինչպես հայտնի է, առաջին անգամ արծարծվել է 18-րդ դարում⁴, Անգլիայի գերիշխանության տակ գտնվող հեռավոր Հնդկաստանում հայ հայրենասերների Մադրասի խմբակի կազմած ու 1788-1789թթ. ընթացքում հրատարակած «Որոգայթ փառաց» գրքում (թեև տիտղոսաթերթին նշված է 1773թ.): Նրանում ապագա ազատագրված Հայաստանի բարձրագույն ներկայացուցչական մարմինը՝ խորհրդարանը, անվանվում էր «Տուն Հայոց»:

Խորհրդարանն ինքնին ենթադրում է օրենք և օրինականություն: «Որոգայթ փառաց»-ի հեղինակ Շահամիր Շահամիրյանը հայ ժողովրդի փրկությունը և երջանկությունը, անկախությունից զատ, տեսնում էր նաև ռանկավարական հանրապետության, օրենքի գերակայության ու խորհրդարանական համակարգ ունենալու մեջ: Հսկայական դեր էր տրվում օրենքին՝ որպես ժողովրդի կամքի. «Օրենք մեր եղիցին տեր և թագավոր մեր»⁵: Ըստ Շահամիր-

¹ *Парламенты зарубежных стран /справочник/, М., 1968, с. 26, Парламенты мира, М., 1991, с. 619.*

² *Е. В. Гутнова, Возникновение английского парламента, М., 1960, с. 333.*

³ *Е. В. Гутнова, նշվ. աշխ., էջ 27, 419:*

⁴ *Հին Հայաստանում ժողովրդական ներկայացուցչության յուրօրինակ արտահայտություն կարելի է համարել Աշխարհաժողովները, որոնք գումարվում էին ժամանակ առ ժամանակ՝ երկրի ու ժողովրդի կյանքի ու ճակատագրի կարևորագույն /բախտորոշ/ հարցերը վճռելու կապակցությամբ:*

⁵ *«Որոգայթ փառաց», Մադրաս, 1773, էջ 89:*

յանի՝ ապագա (անկախ) ազատագրված Հայաստանը պետք է լինեն ռամկավարական հանրապետություն, որտեղ ժողովուրդն էր լինելու երկրի բարձրագույն տերը և իշխանության աղբյուրը: Նա էր օրենքներ տալիս և կառավարում երկիրը՝ հանձին իր ներկայացուցչական մարմնի՝ խորհրդարանի՝ «Հայոց տան»: Վերջինս լինելու էր միպալատանի՝ կազմված մոտ 517 պատգամավորներից:

«Հայոց տունը» ոչ միայն երկրի բարձրագույն օրենսդիր մարմինն էր, այլև բովանդակ իշխանության աղբյուրը (կրողը): Նրանից էին բխելու ե՛ր - վարչական, ե՛ր դատական, ե՛ր զինվորական իշխանությունները: Ըստ «Ռոբզայթի» հեղինակի՝ «Հայոց տան» օրենքներն ու կարգադրությունները պարտադիր էին բոլորին, և ոչ ոք՝ ոչ մի գործադիր, դատական իշխանություն կամ անձնավորություն, չէր կարող դեմ գնալ կամ չհնազանդվել «Հայոց տանը»⁶:

Գնահատելով ամերիկյան սահմանադրությանը հասակակից այս փաստաթղթի նշանակությունը՝ պետք է ասել, որ չնայած ապագա Հայաստանի կառավարման համար նախատեսված օրենքների այս հավաքածուն կտրված էր Հայաստանի կյանքից ու իրական պայմաններից, նրա շատ թեզեր ու դրույթներ օտարածին, վերացական ու անիրական էին, բայց իր ժամանակի համար սա նշանակալի երևույթ էր հայ իրավաբանական մտքի պատմության մեջ: Ուշագրավ է, որ հետագա ժամանակաշրջանի հայ իրավաբանական միտքը օգտվել ու շարունակում է օգտվել «Ռոբզայթ փառաց» գրքի քաղաքական ու գաղափարական առանձին թեզերից ու դրույթներից:

Արդեն 19-րդ դարում սահմանադրական-խորհրդարանական գործունեության առաջին նախաքայլը կարելի է համարել 1860 թ. արևմտահայերի Ազգային սահմանադրությունը: Հայ իրականության մեջ առաջին անգամ էր, որ գումարվեց, դարձյալ Եվրոպայից ներմուծված, յուրովի խորհրդարան հիշեցնող, արևմտահայ համայնքի ազգային գործերով ու ներքին խնդիրներով զբաղվող Ազգային ժողովը՝ իր ընտրված պատգամավորներով (երեսփոխաններով):

Արևմտահայերի քաղաքական իրավագրկության պայմաններում սահմանվում էր, որ Ազգային գործերի գլխավոր մարմինը, ազգի կամքի ու իրավունքների արտահայտիչը հանդիսանալու էր երեսփոխանական (պատգամավորական) **Ազգային ընդհանուր ժողովը**: Այն կազմված էր 140 երեսփոխաններից, որոնցից 80-ը ընտրվելու էին Կոստանդնուպոլսի թաղերից, 40-ը գավառներից, իսկ 20-ը պետք է լինեին եկեղեցականներ՝ ընտրված Կ. Պոլսի հոգևորականների կողմից⁷: Ազգային ընդհանուր ժողովը ընտրում էր Կ. Պոլսի պատրիարքին: Վերջինս էլ համարվում էր Ազգային ժողովի նախագահը և

⁶ «Հայրենիք», 1927, թիվ 8, էջ 133:

⁷ Ստ. Պալասանյան, Պատմություն հայոց /սկզբից մինչև մեր օրերը/, Թիֆլիս, 1895, էջ 746, Սարուխան, Հայկական խնդիրը եւ Ազգային սահմանադրությունը Թուրքիայում /1860-1910/, Հ.Ա. /Հավելված/, Թիֆլիս, 1912, էջ 76:

իրականացնում էր գործադիր իշխանությունը: Նա միաժամանակ հանդիսանում էր միջնորդը Բ. Դռան (սուլթանական կառավարության) և հայ ազգի միջև⁸:

Ակներև է, որ Ազգային սահմանադրության մշակող հեղինակները (Ն. Ռուսինյան, Գ. Օտյան, Ն. Պալյան, Սիրվիչեն և ուրիշներ) քաջ ծանոթ են եղել «Ռրոգայթ փառաց» գրքին: Արևմտահայ բանասեր և ազգային գործիչ Բժիշկ Վ. Թորգոմյանը հայտնում է, որ բժիշկ Սերվիչենի եղբայրը Կալկաթայից Կ. Պոլիս էր բերել «Ռրոգայթ փառաց» գրքի մի օրինակ⁹: Ռրքան էլ որ Ազգային սահմանադրությունը անվանենք ոչ լիարժեք, իրավասություններից զուրկ, արևմտահայերի ներքին կյանքը, ազգային, կրոնական, կրթամշակութային և այլ գործերը կանոնակարգող մի կանոնադրություն, այդուհանդերձ, դա իր ժամանակի ու պայմանների համար նոր երևույթ էր, հայ հասարակական-քաղաքական կյանքի, հայ քաղաքական մտքի ուշագրավ թռիչք: Ազգային սահմանադրությունը պետք է դիտել որպես ազգային-մշակութային ինքնավարության մի դրսևորում: Ազգային սահմանադրության ընձեռած կրթամշակութային կյանքի զարգացման հնարավորությունները, ինչ խոսք, խթանեցին «հայ **ազգային ինքնագիտակցությունը**, որ նախերգանք էր ազատագրական շարժումի»¹⁰:

Արևմտահայերի Ազգային սահմանադրության կարևորագույն տեսական հիմնադրույթներից էր այն, որ հռչակում էր ամբողջ ազգի և նրա յուրաքանչյուր անդամի միասնության ու ամբողջականության, փոխադարձ կապի ու պատասխանատվության գաղափարը: «Ազգին ամեն մեկ անհատը առ Ազգը **պարտավորություններ** ունի, Ազգն ալ իր կողմեն ամեն մեկ անհատ պարտավորություններ ունի, դարձյալ ամեն մեկ անհատ **իրավունքներ** ունի Ազգեն և Ազգն անհատներեն»¹¹: Արդարև, կարելի է ասել, որ արևմտահայերի Ազգային սահմանադրությունը շոշափելի հետք թողեց հայ հասարակական-քաղաքական մտքի, ազգային ինքնագիտակցության աճի ու ժողովրդավարական-պաշտամունտական գաղափարների արմատավորման գործում: Արտաքին ու ներքին ազդակներով հայ մարդը աստիճանաբար ընտելանում ու հարողակից էր դառնում պաշտամունտարիզմի արժեքներին:

Առհասարակ, խորհրդարանն իր ձևավորման սկզբունքով հանդիսանում է հասարակության ամենաներկայացուցչական ու ամենաժողովրդավարական մարմինը: Նա, թերևս, այն եզակի համապարփակ ներկայացուցչական բարձրադիր հաստատությունն է, որը կոչված է ներկայացնելու ամբողջ ազգաբնակչությանը՝ իր ձգտումներով, մտածողությամբ ու կարողություններ-

⁸ Б. А. Борьян, *Армения, международная дипломатия и СССР*, ч. I, М.-Л., 1928, с. 195.

⁹ Ե. Չարենցի անվան գրականության և արվեստի թանգարան (Գ-ԱԹ), Վ. Թորգոմյանի ֆոնդ, գ. 44, էջ 3::

¹⁰ Մ. Վարանդյան, Հ.Յ.Դաշնակցության պատմություն, Հ. 1, Փարիզ, 1932, էջ 18:

¹¹ Ստ. Պալասանյան, նշվ. աշխ., էջ 744, Սարուխան, նշվ. աշխ., էջ 22, նաև «Գործ», Թիֆլիս, 26 սեպտեմբերի 1908 թ.:

րով: Քանի որ խորհրդարանը՝ որպես պետական կառույց, համաժողովրդական ներկայացուցչական մարմին է և ոչ թե՝ դասակարգային, ուստի կուսակցականության տեսանկյունից ինքնըստինքյան պառլամենտարիզմի գաղափարի գլխավոր կրողները հանդիսանում են ազգային և ժողովրդավարական կուսակցությունները: Պառլամենտը և պառլամենտարիզմը խորթ են մարքսիստական տիպի կուսակցություններին: Հայտնի է, որ մարքս-լենինյան (կոմունիստական) կուսակցությունները պառլամենտը և պառլամենտարիզմը համարում էին բուրժուական հասարակարգին բնորոշ պետաիրավական հաստատություն, ուստի և իրենց պրակտիկ գործունեության ընթացքում քննադատել ու պայքարել են դրա դեմ:

Խորհրդային պետության փորձով մենք գիտենք, որ ռուսական սոցիալ-դեմոկրատների հեղափոխական թևը՝ բոլշևիկ-կոմունիստները, առհասարակ մերժեցին պառլամենտարիզմը, որպես բուրժուական իշխանության մարմին և դրան հակադրեցին **խորհուրդները**: Այս կապակցությամբ տեղին է հիշել Վ.Ի.Լենինի ««Չախության» մանկական հիվանդությունը կոմունիզմի մեջ» աշխատությունը¹²: Սակայն այդ չի նշանակում, թե կոմունիստներն ընդհանրապես չեն ցանկացել իրենց ներկայացուցչությունը ունենալ խորհրդարանում: Իրենց պայքարի պատմությունից հայտնի է, որ ռուսական մարքսիստ-սոցիալիստները պառլամենտ (Պետական դումա) էին մտնում՝ նրա ամբիոնը ծառայեցնելու իրենց կուսակցական-դասակարգային շահերին՝ քարոզչություն անելու նպատակով:

Յուրաքանչյուր երկրի ժողովրդավարության մակարդակը կարելի է չափել նրա խորհրդարանով, նրանում ընդունված ու երկրում գործադրված օրենքներով: Ժողովրդավարական համակարգի գումարելիներ են այնպիսի հասկացություններ, ինչպիսիք են՝ սահմանադրությունը, խորհրդարանը, օրենքները, ընդդիմությունը, ազատ խոսքը, ազատ մամուլը, ինքնակառավարումը, ինքնորոշումը, հանրաքվեն և այլն: Ժողովրդավարությունը, իրոք, մարդկության համակեցության ցարդ փորձված լավագույն ձևն է, որի այբուբենը, ցավոք, նոր-նոր ենք յուրացնում: Ամեն մի պետության արժեքը, անշուշտ, չափվում է իր քաղաքացիների համար ստեղծած խաղաղ կյանքով ու բարեկեցությամբ: Յավոք, իր տարաբախտ ճակատագրի բերումով, հայ ժողովրդին ու նրա կառավարությանը վիճակված չէին ապրել նման կյանքով: Իր անկախ պետականության նվաճման ճանապարհին հայ ժողովուրդը ունեցավ մեծ ողբերգություն՝ կորցնելով իր թվաքանակի շուրջ մեկ երրորդը և իր հայրենիքի մեծ մասը: Վերընձյուղվող հայ ժողովուրդը և նորաստեղծ Հայոց պետականությունը, մինչ խաղաղ, բարեկեցիկ կյանքին անցնելը, խռովահույզ ապրումների մեջ էր, սպասում էր իր Դատի արդարացի լուծմանը և պայքարում դրա համար:

Հայ ժողովրդի պատմության այդ դժվարին փուլում, Հայոց անկախ պետականության համակարգում ձևավորվեց առաջին խորհրդարանը: Առաջին

¹² Վ.Ի.Լենին, ԵԼԺ, Հ. 41, Ե., 1982, էջ 48-53:

անգամ գործնականում իրականություն դարձավ շուրջ դարուկես առաջ հեռավոր Մադրասի խմբակի ծրագրած հանրապետական Հայաստանում խորհրդարան՝ «Հայոց տուն» ունենալու գաղափարը:

2. Արևելահայերի համագումարը

Հայաստանի խորհրդարանի պատմությունն ավելի ամբողջական ներկայացնելու և նրա գործունեությունը ճիշտ գնահատելու համար հարկ է անդրադառնալ Հայաստանի խորհրդի ձևավորման ակունքներին. այն է՝ Արևելահայերի ազգային համագումարի ու Հայոց (կենտրոնական) Ազգային խորհրդի հակիրճ նախապատմությանը:

1917 թ. Փետրվարյան հեղափոխությունը մեծ փոփոխություններ ու հասարակական-քաղաքական տեղաշարժեր առաջացրեց Ռուսաստանի հսկայածավալ կայսրության մեջ: Փետրվարյան հեղափոխությամբ դրությունը հիմնովին փոխվեց նաև Անդրկովկասում: Ինքնակալության տապալման և ժողովրդավարական կարգախոսների հռչակման պայմաններում ազգային շրջաններում ու այդ թվում՝ Հայաստանում տեղի ունեցավ ազգային ինքնագիտակցության աճ, զարթոնք ապրեց ազգային կյանքը: Առաջնակարգ ու հրատապ նշանակություն ստացավ ազգային հարցը: Այս առնչությամբ սոց.-դեմ. (մենչևիկ) Գ. Ղարաջյանը գրում էր, որ երկրամասում ազգային գործոնը ավելի ուժեղ թափով արտահայտվեց, քան սոցիալականը¹³:

Քաղաքական գործունեության լայն ասպարեզ իջան հայ քաղաքական կուսակցությունները, որոնցից ամենաազդեցիկը, անկասկած, ՀՅ Գաշնակցությունն էր: Հարկ է նշել, որ պատերազմի տարիներին մյուս կուսակցությունների նման զգալիորեն թուլացել էր նաև ՀՅԳ: Հայոց Մեծ եղեռնի գոհերի թվում էին մեծ թվով դաշնակցականներ: Այդուհանդերձ, ՀՅԳ-ն շարունակում էր մնալ հայ հասարակական-քաղաքական կյանքի առաջատարը: «Ներկայումս, անկասկած,- գրում էր «Կովկաս» թերթը և արտատպում էր «Մշակը»,- նա /ՀՅԳ-Ա.Հ./ ամենաազդեցիկ հայ կուսակցությունն է»¹⁴: Նրա կազմակերպությունները համեմատաբար ուժեղ էին Թիֆլիսում, Բաքվում և Երևանում¹⁵: Հեղափոխության ընձեռնած լայն ու ազատ գործունեության պայմաններում կուսակցությունները անմիջական կապ հաստատեցին ժողովրդական լայն զանգվածների հետ՝ աշխատելով պատասխան ու ընթացք տալ նրանց հուզող հարցերին:

1917 թ. ապրիլին Թիֆլիսում ստեղծվեց հայ ազգային մի նոր կուսակցություն՝ Հայ ժողովրդական կուսակցությունը (ՀԺԿ), որը, ըստ էության, Փետրվարյան հեղափոխության ծնունդն էր:

¹³ Գ. Ղարաջյան, *Անդրկովկասի քաղաքական կյանքը 1918 թ., Թիֆլիս, 1919, էջ 16*:

¹⁴ «*Кавказ*», 1917, թիվ 140, «Մշակ», 27 հունիսի 1917 թ.:

¹⁵ «*Հորիզոն*», 4 հունվարի 1918 թ.:

Հայ հասարակական-քաղաքական բոլոր կուսակցություններն ու կազմակերպությունները, բացառությամբ հայ բոլշևիկների, հիմնականում պաշտպանում էին Ժամանակավոր կառավարության արտաքին ու ներքին քաղաքականությունը: Առաջնորդվելով բոլշևիկյան մայր կուսակցության ռազմավարությամբ ու մարտավարությամբ՝ հայ բոլշևիկները ևս հանդես էին գալիս Ժամանակավոր կառավարության դեմ: Ինչպես հայտնի է, նրանք, առաջնորդվելով իրենց ծրագրային հիմնադրույթներով, նպատակ էին դրել չբավարարվել Փետրվարյան հեղափոխության արդյունքներով, այլ այն վերածել սոցիալիստական հեղափոխության, այսինքն՝ հասնել իրենց ծրագրային խնդիրների առավելագույն իրագործման:

Հայերը, իրենց կուսակցությունների հետ միասին, արտահայտվում էին ռուսական համապետականության օգտին այն ակնկալությամբ, որպեսզի նրա օգնությամբ կարողանան լուծել մեծապես հայաթափ եղած Թուրքահայաստանի հարցը և Անդրկովկասում անցկացնել, ըստ պատմա-ազգագրական հատկանիշի, վարչական արդարացի վերաբաժանում: Միաժամանակ հայ ազգային կուսակցությունները արտահայտվում էին Անդրկովկասի ու Հայաստանի լայն ինքնավարության օգտին: Օրինակ, 1917 թ. աշնանը համառուսական Սահմանադիր ժողովի ընտրություններին գնացող Գաշնակցությունը արտահայտվում էր Ռուսաստանի ֆեդերատիվ (դաշնակցային) դեմոկրատական հանրապետության օգտին¹⁶: Բայց մի քանի օր անց՝ Սահմանադիր ժողովի ընտրությունների և Անդրկովկասյան կոմիսարիատի ստեղծումից հետո, ՀՅԳ Կովկասյան հատվածում կատարվում է քաղաքական էվոլյուցիա (բնաշրջում). ազգային-մշակութային ինքնավարությունից անցում է կատարվում «ազգերի ինքնորոշման» պահանջի¹⁷: Հավանաբար այս մտայնության թելադրանքով էլ հայ քաղաքական գործիչները կազմեցին «Թուրքահայաստանի ինքնորոշման մասին» դեկրետի նախագիծը:

Ընդհանուր առմամբ 1917 թ. արևելահայ հասարակական-քաղաքական գաղափարակիր հոսանքները ներկայացնում էին հիմնականում «Հորիզոն» (ՀՅԳ), «Մշակ» (հայ կադետներ), «Գաղափար» (Ս Գ հնչակ), «Հովիտ» (եկեղեցի), «Պայքար» (սոց.- դեմոկրատ) և «Վան- Տոսպ» (հայ ռամկավար) լրագրերը¹⁸: Սրանց գաղափարակիր կուսակցությունների ու հոսանքների ներկայացուցիչներն էլ ներկայացնում էին Հայ Ազգային բյուրոյի կազմը¹⁹:

1917 թ. մարտի 7-ին Թիֆլիսի Հայոց առաջնորդարանում տեղի ունեցավ վերոգրյալ արևելահայ հասարակական-քաղաքական կազմակերպութ-

¹⁶ «Հորիզոն», 8 նոյեմբերի 1917 թ.:

¹⁷ Նույնը, 26 նոյեմբերի 1917 թ.:

¹⁸ ՀՀ ՊԿՊԱ, ֆ. 222, ց. 1, գ. 4, ք. 2:

¹⁹ Ազգային բյուրոն կազմվել էր 1912 թ. աշնանը: Նրա գործադիր մարմինը բաղկացած էր հինգ հոգուց, մեծամասամբ դաշնակցականներից: Հետո դրա կազմը ընդլայնվեց: Ազգային բյուրոյի նպատակն էր աջակցել Ամենայն Հայոց կաթողիկոսին, Հայ Ազգային պատվիրակությանը և Կ. Պոլսի հայոց պատրիարքարանին Հայկական հարցի պաշտպանության գործում:

յունների ու հոսանքների (միջկուսակցական) ժողով-խորհրդակցություն, որին մասնակցում էին մոտ 50 մարդ²⁰: Ժողովը նախագահում էր Մխիթար եպիսկոպոսը, իսկ քարտուղարն էր Ստ. Մալխասյանը: «Մշակ» թերթի խմբագիր Հ. Առաքելյանը, ելույթ ունենալով ժողով-խորհրդակցությունում, ասաց, որ այն հրավիրվել է Փետրվարյան հեղափոխության կապակցությամբ՝ ծագած ազգային նոր խնդիրների լուծման, հստակ կողմնորոշիչներ ու դիրքորոշում մշակելու համար: «Պե՞տք է արդյոք,- շարունակել է հռետորը,- հրավիրել ազգային համագումար, ուր հիմնվի մի մարմին, որն իրավունք ունենա հայ ժողովրդի անունից հանդես գալու և նրա ցանկությունների թարգման հանդիսանալու, նկատի ունենալով, որ ներկա պայմաններում անջատ գործունեությունը կարող է աղետալի հետևանքներ ունենալ հայ ժողովրդի համար»²¹:

Փետրվարյան հեղափոխությունից հետո նոր ծագած ազգային հիմնահարցերը լուծելու ճանապարհին առաջնային կարևորություն է ստանում միջկուսակցական համագործակցության խնդիրը: Հայ քաղաքական կուսակցությունների գործողությունները կոորդինացնելու և ազգային ու քաղաքական զանազան խնդիրների շուրջ փոխզիջումային համաձայնության գալու նպատակով խորհրդակցությունում ստեղծվում է ժամանակավոր **Միջկուսակցական մարմին**: Այս մարմնում ընդգրկված էին ՀՅԳ, ՀԺԿ, սոց.-դեմ., էսէռ և Ս Գ- Հնչակյան կուսակցությունների ներկայացուցիչներ: Նրա նախագահն էր Հ. Օհանջանյանը (ՀՅԳ): Այսպիսով, հայ քաղաքական կուսակցությունների ներկայացուցիչների մարտյան այս խորհրդակցությունում հիմնվում է միջկուսակցական ժամանակավոր ղեկավար մի մարմին, որի առջև հարց է բարձրացվում նախապատրաստել և գումարել ազգային համագումար: Միաժամանակ խորհրդակցությունը որոշում է՝ մինչ համագումարի հրավիրումը ազգային գործերի ղեկավարությունը դնել Ազգային բյուրոյի վրա՝ վերջինիս կազմը համալրելով նոր անդամներով, այն հաշվով, որ նրանում ներկայացված լինեն հայ բոլոր կուսակցություններն ու հոսանքները²²: Ազգային բյուրոյի կազմը համալրելու նպատակով խորհրդակցությունը բազմակուսակցական հիմքի վրա ընտրում է 11 հոգուց բաղկացած մի մասնաժողով, որ և պետք է ժողովի ավարտից հետո լրացներ ու թարմացներ Ազգային բյուրոյի և նրա գործադիր մարմնի կազմը (23 անդամ): Ազգային բյուրոյի կազմը բազմակուսակցական էր՝ թվով 18 հոգի, իսկ նրան կից գործադիր մարմինը՝ 5 մարդ՝ Ն. Աղբալյան, Բ. Հ. Չավրիյան, Ա. Ջամալյան, Ռոստոմ և Ս. Վրացյան²³:

Ազգային բյուրոյի մեջ կուսակցական և դասակարգային համամասնությունը պահպանելու նպատակով Միջկուսակցական մարմինը որոշեց դրա կազմը ավելի ընդլայնել հասարակական-քաղաքական կազմակերպություն-

²⁰ ՀՀ ՀԶԿՓ ՊԿԱ, ֆ. 1022, ց.3, գ. 210ա, ք.1, նաև Վ. Հ. Մելիքյան, 1917թ. փետրվարյան հեղափոխությունը և Հայաստանը, Ե., 1997, էջ 262::

²¹ Նույն տեղում:

²² ՀՀ ՀԶԿՓ ՊԿԱ, ֆ. 1022, ց.3, գ. 210ա, ք. 1-2:

²³ Նույն տեղում, ք.2:

ների, միությունների, թերթերի ներկայացուցիչներով, ինչպես նաև 7 անդամ արևմտահայ միություններից, որոնք գործում էին Թիֆլիսում²⁴: Ի դեպ, Ազգային բյուրո, որպես անդամ, հրավիրվել էր նաև սոց-դեմ. բոլշևիկներից «Պայքար» թերթի ներկայացուցիչ Ա. Մռավյանը, որը, սակայն, հրաժարվեց նրա աշխատանքներին մասնակցելուց²⁵:

Ինչպես տեսնում ենք, հետփետրվարյան ժամանակաշրջանում հայ հասարակական-քաղաքական բոլոր կուսակցություններն ու հոսանքները, բացի բոլշևիկներից, համագործակցել են իրար հետ, համեմայն դեպս նման փորձեր են արել, որն ինքնին ազգային համախմբման տեսակետից պետք է դիտել որպես դրական երևույթ: Դրա վառ ասպացույցն է այն, որ Ազգային բյուրոյի նիստերից գատ և նրան զուգահեռ, պարբերաբար գումարվում էին Միջկուսակցական մարմնի խորհրդակցություններ: 1917 թ. մայիսի 3-ի խորհրդակցությունում Ռուսական սոցիալիստ-հեղափոխականների կուսակցության ներկայացուցիչ Ա. Խոնդկարյանը ելույթ ունենալով պարզաբանեց, որ ռուսական էսեռական կուսակցության մեջ գոյություն ունի հայ էսեռների հոսանք, որը շուտով ստեղծելու է այդ կուսակցության հայկական մասնաճյուղը (բաժանմունքը): Ուստի՝ նա դիմեց Հայոց Միջկուսակցական մարմնին՝ իրենց ներկայացուցիչը ունենալու այդ մարմնի մեջ: Էսեռների դիմումը բավարարվեց²⁶: Այդպիսով, Միջկուսակցական մարմնում ընդգրկվել են ՀՅԳ, ՀԺԿ, սոց.- դեմոկրատ, էսեռ և Հնչակ կուսակցությունների ներկայացուցիչներ: Հետագայում հնչակյանների ներկայացուցիչները հրաժարվեցին մասնակցել խորհրդի նիստերին²⁷:

Նկատի ունենալով, որ 1917 թ. գարնանը՝ ապրիլին, թուրք-ադրբեջանցիներն արդեն հրավիրում են իրենց ազգային՝ մուսուլմանական համագումարը, հայ Ազգային բյուրոն որոշում է արագացնել արևելահայերի (ռուսահայերի) համագումարի նախապատրաստումը և գումարումը²⁸: Համագումարի նախապատրաստման ու հրավիրման գործը, բացի Ազգային բյուրոյից, դրված էր նաև Միջկուսակցական մարմնի վրա: Այդ նույն ժամանակ նախապատրաստվում էր նաև արևմտահայերի առանձին համագումարը, որը գումարվեց 1917 թ. մայիսի սկզբներին Երևանում²⁹:

Ապրիլի կեսերին Ազգային բյուրոյի և Միջկուսակցական մարմնի համատեղ խորհրդակցական ժողովում որոշվեց հրավիրել արևելահայերի համագումարը՝ ոչ ուշ քան երկու ամսվա ընթացքում³⁰: Մշակվեց ընտրակարգը, ընտրությունների կազմակերպումն ու ղեկավարումը, համագումարի օրակար-

²⁴ ՀՀ ՀՔԿՓ ՊԿԱ, ֆ. 1022, ց. 3, գ. 210ա, քք. 2-3:

²⁵ ՀՀ ՊԿՊԱ, ֆ. 222, ց. 1, գ. 4, քք. 4-5:

²⁶ ՀՀ ՀՔԿՓ ՊԿԱ, ֆ. 1022, ց. 3, գ. 210ա, ք. 34:

²⁷ ՀՀ ՊԿՊԱ, ֆ. 222, ց. 1, գ. 4, ք. 48:

²⁸ ՀՀ ՀՔԿՓ ՊԿԱ, ֆ. 1022, ց. 3, գ. 210ա, քք. 6-7:

²⁹ Հ. Ա. Ալեքսիսյան, Հայկական հարցը 1918 թ., Ե., 1997, էջ 16:

³⁰ ՀՀ ՀՔԿՓ ՊԿԱ, ֆ. 1022, ց. 3, գ. 210^ա, ք. 25:

գի մշակումը և այլն հանձնարարվեց Թիֆլիսի Միջկուսակցական մարմնին³¹: Արևելահայոց համագումարի պատգամավորների ընտրություններին մասնակցելու էին միայն ռուսահայերը՝ քառանդամ համակարգով: Նախատեսվում էր, որ յուրաքանչյուր 10 հազար բնակչին ընկնելու էր մեկ պատգամավոր: Եվ քանի որ Անդրկովկասում ու ամբողջ Ռուսաստանում հաշվվում էր 1.8 մլն. հայ, ուստի՝ ռուսահայոց համագումարի պատգամավորների ընդհանուր թիվը նախնական հաշվարկներով պետք է կազմեր 180-200 մարդ³²: Սակայն մի շարք խանգարիչ հանգամանքներ՝ երկրի քաղաքական անկայունությունը, ընտրությունների անցկացման կազմակերպական, ազգային-տարածքային դժվարությունները, միջկուսակցական տարածայնությունները և այլն հնարավորություն չտվեցին համագումարը հրավիրել նախատեսված ժամկետում: Ուստի՝ դրա գումարումը հետաձգվեց մինչև աշուն՝ սեպտեմբեր ամսվա վերջը: Եվ ահա երկար ու ձգձգվող նախապատրաստական աշխատանքներից ու ընտրություններից հետո 1917 թ. սեպտեմբերի 29-ից մինչև հոկտեմբերի 13-ը, արևելահայ հասարակական-քաղաքական կյանքի կենտրոն Թիֆլիսում կայացավ արևելահայերի համագումարը (համախորհրդակցությունը): Համագումարի պաշտոնական բացումը տեղի ունեցավ սեպտեմբերի 29-ին, իսկ նախորդ օրը՝ սեպտեմբերի 28-ին, կայացել էր խորհրդակցական նիստ³³, որտեղ, ըստ քաղաքական հոսանքների, հիմնվեցին 4 սեկցիաներ (խմբակցություններ)՝ ՀՅԳ, ՀԺԿ, սոց.-դեմ. և Էսեռական: Հատկանշական է, որ այս չորս խմբակցությունները կային նաև 1917 թ. գարնանից հիմնված Թիֆլիսի հայ Միջկուսակցական մարմնում և այդ նույն չորս խմբակցությունները պահպանվեցին հետագայում Հայաստանի խորհրդարանում:

Բազմակուսակցական հիմքի վրա հրավիրված այս համախորհրդակցությանը մասնակցեցին հայ քաղաքական գրեթե բոլոր ուժերի ներկայացուցիչներ, ինչպես նաև անկուսակցական պատգամավորներ:

Արևելահայոց համագումարի կես ընտրովի ու կես նշանակովի՝ ընդամենը 228 պատվիրակների կուսակցական պատկանելությունը հետևյալն էր. ՀՅԳ՝ 116 մարդ, ՀԺԿ՝ 40, սոց.-դեմ՝ 30, սոց. հեղ. (Էսեռ)՝ 24 և անկուսակցական՝ 14, իսկ անհայտ ու չներկայացած 4³⁴: Ինչպես տեսնում ենք, պատգամավորների ավելի քան կեսը դաշնակցականներ էին, որը և արտահայտում էր կովկասահայ իրականության քաղաքական ուժերի հարաբերակցությունը: Հաշվումները ցույց են տալիս, որ համախորհրդակցության ժամանակ կարողացել են ճշտել ու հաստատել ընդամենը 203 պատգամավորների մանդատները, իսկ մնացած 25 հոգունը տարբեր պատճառներով (չներկայանալու, տեղ չհասնելու, հիվանդանալու, գուցե մահվան ու անհայտ այլ պատճառներ

³¹ Ս. Վրացյան, Հայաստանի Հանրապետություն, Բեյրութ, 1958, էջ 34:

³² «Մշակ», 5 մայիսի 1917 թ.:

³³ «Արև», 3 հոկտեմբերի 1917 թ.:

³⁴ ՀՀ ՊԿՊԱ, ֆ 222, ց. 1, գ. 16, թթ. 1-4, նաև «Բանբեր Հայաստանի արխիվների», 1990, թիվ 1-2, էջ 105-110:

րով) չեն հաստատվել: Այս է պատճառը, որ պատմական գրականության մեջ համագումարի պատգամավորների թիվը, որպես կանոն, նշված է 203:

Կուսակցական խմբակցություններից ամենախայտաբղետը սոցիալ-դեմոկրատներինն էր: Նրա մեջ մտնում էին հիմնականում մենշևիկները, 5-ը՝ ՍԳ- հնչակյաններ և մեկ «սպեցիֆիկ»՝ Գ. Անանունը, ինչպես նաև բոլշևիկներ: Բայց Ռ-ՍԳԿ (բոլշևիկները) պաշտոնապես բոլկոտեցին համախորհրդակցությունը՝ այն որակելով որպես «նացիոնալիստական, հակաբանվորական և հակառևոլյուցիոն»³⁵:

Ազգային համախորհրդակցության նախագահությանը ուղղված Ռ-ՍԳԿ (բոլշևիկների) Թիֆլիսի կոմիտեի գրությունում (որն ի դեպ ստորագրել է քարտուղար Ա. Միկոյանը) մասնավորապես ասվում էր. «Ռուսաստանի սոցիալ-դեմոկրատական բանվորական կուսակցությունը (բոլշևիկներ) բոլկոտ է հայտարարել ազգային խորհրդակցությանը և կարգադրել, որ իր բոլոր անդամները մույնպես չմասնակցեն»³⁶: Համախորհրդակցությունը բոլկոտելու բանաձևեր են ընդունել նաև Թիֆլիսի բոլշևիկյան կոմիտեի «Кавказский рабочий» և «Բանվորի կռիվ» թերթերը, Շուշիի և Ալեքսանդրապոլի բոլշևիկյան կազմակերպությունները և այլն³⁷:

Այսպիսով, հայ բոլշևիկները բոլկոտեցին և չմասնակցեցին համախորհրդակցության աշխատանքներին: Նույն կերպ բոլշևիկյան կուսակցությունը բոլկոտեց նաև 1917 թ. աշնանը հրավիրված Համառուսական դեմոկրատական խորհրդակցությունը:

Հայ քաղաքական գրեթե բոլոր կուսակցությունների ներկայացուցիչներից ու անկուսակցականներից կազմված ռուսահայ Ազգային խորհրդաժողովը հոկտեմբերի 2-ին անկուսակցական Հակոբ Մանանդյանի ընթերցմամբ ընդունած բանաձևում իր բացարձակ վստահությունն էր հայտնում Ժամանակավոր կառավարությանը³⁸: Համաժողովի պատգամավոր Գ. Անանունը փաստում է, որ «Արևելահայոց համագումարը շեշտեց հայերի ռուսական օրինատացիան»³⁹: Այս բանաձևի քվեարկությանը չմասնակցեցին միայն Ս Գ մենշևիկներն ու հնչակյանները⁴⁰:

Հարկ է ընդգծել, որ Ռուսաստանում եթե եղել է մի իշխանություն, որից հայերը մեծ ակնկալիքներ են ունեցել և որն իր ձեռնարկած գործնական քայլերով բավականին հույսեր է ներշնչել, ապա դա եղել է Ժամանակավոր կառավարությունը, որի մի քանի անդամների հետ, ի դեպ, սերտ ու մտերիմ կա-

³⁵ «Հայաստանի կոմկուսի պատմության ուրվագծեր», Ե., 1967, էջ 245, «Հոկտեմբերյան սոցիալիստական մեծ ռևոլյուցիան ...», Ե., 1960, էջ 74:

³⁶ ՀՀ ՊԿՊԱ, ֆ. 222, ց. 1, գ. 16, թ. 71:

³⁷ Նույն տեղում:

³⁸ «Մայիս 28», Փարիզ, 1926, էջ 13, «Բանբեր Հայաստանի արխիվներին», 1992, թիվ 1-2, էջ 41:

³⁹ Գ. Անանուն, նշվ. աշխ., հ. 3, էջ 655:

⁴⁰ «Մայիսի 28», Փարիզ, 1926, էջ 13:

պերի մեջ են եղել հայ առանձին քաղաքական գործիչներ՝ Հ. Ջավրիյանը, Ս. Հարությունյանը, Հ. Սաղաթելյանը և ուրիշներ:

Համագումարում սոց.-դեմոկրատ և էսէռ պատվիրակները, հանդես գալով ինտերնացիոնալիզմի դիրքերից, մեղադրում էին հայ իրականության իշխող կուսակցությանը ազգային մեկուսացման մեջ, որ նա հայ ժողովրդին կտրում է համառուսական և համակովկասյան հեղափոխական պայքարից: Նրանք քննադատում էին Ն. Ադբայանին և մյուս դաշնակցականներին այն բանի համար, որ անվստահություն են արտահայտում դեպի սոցիալիզմը և միջազգային հեղափոխական դեմոկրատիան⁴¹:

Արևելահայոց համագումարը զբաղվել է տարածաշրջանի ներքին և արտաքին քաղաքականության, Անդրկովկասի վարչական բաժանումների, զենասովորներ մտցնելու, ազգային գորքի կազմակերպման, գաղթականության և այլ խնդիրներով, որոնց քննությունը, սակայն, մեր ուսումնասիրության շրջանակներից դուրս է:

Համագումարի աշխատանքները և ընտրություններն ընթացան բուռն վեճերի ու փոխադարձ մեղադրանքների մթնոլորտում: Գ. Անանունի վկայությամբ. «Միայն արտաքին վտանգն էր ստիպում հայ հոսանքներին համախմբվել մեկ դահլիճում և մեկ մարմնի մեջ»⁴²:

Արժեքավորելով ու գնահատելով համաժողովի ընդունած որոշումները (փաստաթղթերը)՝ կարելի է վստահ ասել, որ նա դրեց ազգային պետականության գաղափարի նյութականացման առաջին հիմնաքարը: Մեր կարծիքով՝ համագումարի ընդունած առանցքային որոշումներից էր հետևյալ բանաձևը. «Ընդունելով ազգերի ինքնորոշման իրավունքը, հայ ժողովուրդը պիտի ձգտի իրականացնել իր այդ իրավունքը **պեղրականության հիմունքներով ու սկզբունքներով** (ընդգծ. մերն է - Ա. Հ.), անդրկովկասյան ժողովուրդների դեմոկրատիայի փոխադարձ համաձայնությամբ»⁴³:

3. Հայոց Ազգային խորհրդի հիմնումը և գործունեությունը

Համագումարի աշխատանքների վերջնափուլում՝ հոկտեմբեր 9-ին, բազմակուսակցական հիմքի վրա ընտրվեց 15 հոգուց բաղկացած գործադիր մարմին՝ Հայոց (կենտրոնական) Ազգային խորհուրդ՝ կուսակցությունների պատգամավորական ներկայացուցչության և դրանց ունեցած քաղաքական կշռին համապատասխան: Հայոց Ազգային խորհրդի ժամանակավոր կազմը հետևյալն էր՝ 1. Ա. Ահարոնյան, 2. Խ. Կարճիկյան, 3. Ա. Գյուլխանդանյան, 4.

⁴¹ ՀՀ ՊԿՊԱ, ֆ. 222, ց. 1, գ. 16, ք. 77:

⁴² Գ. Անանուն, նշվ. աշխ., հ. 3, էջ 655:

⁴³ «Բանբեր Հայաստանի արխիվների», 1992, թիվ 1-2, էջ 77:

Ռ. Տեր-Սիմասյան, 5. Ն. Աղբալյան, 6. Կ. Ղազարյան (ՀՅԳ), 7. Լ. Աբաբեկյան, 8. Հ. Տեր-Օհանյան (Էսէռ), 9. Ղ. Տեր-Ղազարյան, 10. Ա. Երզնկյան (սոց.-դեմ.), 11. Ս. Հարությունյան, 12. Հ. Այվազյան (ՀԺԿ), 13. Տ. Բեկզադյան, 14. Պ. Չաքարյան, 15. Ստ. Մամիկոնյան (անկուս)⁴⁴:

Հետագայում այս կազմը փոփոխություններ կրեց: Կուսակցություններն իրավունք ունեին իրենց տրված տեղերի շրջանակներում անհրաժեշտության դեպքում անդամների փոփոխություններ կատարել: Այդ իսկ պատճառով արդեն 1918 թ. գարնանը Հայոց Ազգային խորհրդի կազմը զգալիորեն փոխվել էր: ՀՅԳ ներկայացնում էին հետևյալ վեց անդամները՝ Ա. Ահարոնյան, Ա. Մանուկյան, Ռ. Տեր-Սիմասյան, Ա. Բաբալյան, Խ. Կարճիկյան և Ն. Աղբալյան: ՀԺԿ երկու՝ Ս. Հարությունյան և Մ. Պապաջանյան, սոցիալ-դեմոկրատները երկու՝ Ղ. Տեր-Ղազարյան և Մ. Ղարաբեկյան, սոցիալիստ հեղափոխականները երկու՝ Հ. Տեր-Օհանյան և Ա. Ստամբոլցյան և անկուսակցական երեք՝ Ստ. Մամիկոնյան, Տ. Բեկզադյան և Պ. Չաքարյան, ընդամենը 15 անդամ⁴⁵: Խորհրդի նախագահն էր Ա. Ահարոնյանը:

Հայոց Ազգային խորհուրդն իր կազմով միատարր չէր: Նրանում ներկայացված էին կովկասահայ իրականության գրեթե բոլոր աչքի ընկնող կուսակցությունները: Թե՛ համագումարում և թե՛ համագումարի ավարտից հետո Հայոց Ազգային խորհուրդում հայ քաղաքական կուսակցությունների խմբակցությունները ձեռք բերեցին համատեղ ու միասնական աշխատանք վարելու փորձ, որը հետո այնքան անհրաժեշտ էր խորհրդարանական աշխատանքի ժամանակ: Հայոց Ազգային խորհուրդը՝ որպես գործադիր մարմին, ստանձնեց արևելահայ հատվածի քաղաքական կյանքի ղեկավարությունը և դեպքերի բերումով փաստորեն դարձավ հայ ժողովրդի գերագույն իշխանությունը: Այ. Խատիսյանի վկայությամբ Հայոց Ազգային խորհուրդը փաստորեն գրավեց արդեն հեղինակազրկված Ազգային բյուրոյի տեղը⁴⁶: Նա՝ իբրև գործադիր մարմին, ստանձնեց արևելահայ հատվածի քաղաքական ղեկավարությունը:

Բացի Ազգային խորհրդից, դարձյալ կուսակցական համամասնության սկզբունքով, կազմվեց նաև 35 հոգուց բաղկացած օրենսդիր մարմին՝ «Ազգային ժողով», որը լինելու էր ռուսահայերի ժամանակավոր ներկայացուցչական օրենսդիր մարմինը⁴⁷:

Սինչ Անդրկովկասում տեղի էին ունենում ազգային- քաղաքական ուժերի վերախմբավորում ու կոնսոլիդացիա, բուն Ռուսաստանում քաղաքական իրադարձությունները զարգացան գլխապետույտ արագությամբ և ունե-

⁴⁴ ՀՀ ՊԿՊԱ, ֆ. 222, ց. 1, գ. 16, թ. 58, Դ. Անանուն, նշվ. աշխ., հ. 3, էջ 656, «Բանբեր Հայաստանի արխիվներին», 1992, թիվ 1-2, էջ 104:

⁴⁵ «Մայիս 28», Փարիզ, 1926, էջ 21-26, Ս. Վրացյան, Հայաստանի Հանրապետություն, Բեյրութ, 1958, էջ 47:

⁴⁶ Այ. Խատիսյան, Հայաստանի Հանրապետության ծագումն ու զարգացումը, Բեյրութ, 1968, էջ 18:

⁴⁷ «Բանբեր Հայաստանի արխիվներին», 1992, թիվ 1-2, էջ 102-103:

ցան անսպասելի ավարտ: Մինչև 1917 թ. ամռան վերջը իրենցից առանձնապես քաղաքական կշիռ չներկայացնող բոլշևիկները՝ Վ. Ի. Լենինի գլխավորությամբ, օգտագործելով ժողովրդական զանգվածներին հուզող հաշտության, հողի, հացի, ազատությունների մասին քարոզչական կարգախոսները, շոշափելի ազդեցություն նվաճեցին ու օգտվելով ժամանակավոր կառավարության թույլ տված սխալներից ու հապաղումներից՝ 1917 թ. հոկտեմբերի 25-ին (ն. տ. նոյեմբերի 7-ին) մայրաքաղաք Պետրոգրադում զինված հեղաշրջում կատարեցին ու իշխանությունը վերցրին իրենց ձեռքը:

Անդրկովկասի քաղաքական ազդեցիկ ուժերը հիմնականում բացասաբար ընդունեցին Հոկտեմբերյան հեղաշրջումը: Եվ 1917 թ. նոյեմբերի 15-ին երկրամասի ամենահեղինակավոր երեք կուսակցությունները՝ վրաց մենշևիկները, հայ դաշնակցականները և ազերի մուսավաթականները հեղինակագրված ու անգործության մատնված ՕԶԱԿՈՍ-ի փոխարեն ստեղծեցին նոր կառավարություն՝ Անդրկովկասյան կոմիսարիատ՝ մենշևիկ Ե. Գեգեչկորու գլխավորությամբ:

1917 թ. բոլշևիկների հոկտեմբերյան հեղաշրջումը արմատապես փոխեց իրադրությունը Անդրկովկասում: Հոկտեմբերյան դեպքերից անմիջապես հետո Հայոց Ազգային խորհուրդը հրապարակեց կոչ՝ ուղղված հայ հասարակայնությանը իր բռնելիք քաղաքական ուղու մասին: Այդ կոչում ասվում էր. «Ազգային խորհուրդը, իր գործունեության կետ նպատակ ունենալով հայ ժողովրդի կենսական շահերը, միաժամանակ պիտի ճգնի այդ շահերը ներդաշնակել ռուսական մեծ դեմոկրատիայի և մեր բոլոր հարևանների մույնպիսի շահերի հետ՝ միշտ առաջնորդ ունենալով մի կողմից առողջ պետականության և մյուս կողմից՝ ժողովուրդների եղբայրության և ազատության բարձր սկզբունքները»⁴⁸:

Հոկտեմբերյան հեղաշրջումից հետո խզվեցին կապերը կենտրոնի (Պետրոգրադի) հետ: Երկրի քաղաքական անկայունության, ինչպես նաև բոլշևիկյան հրապուրիչ կարգախոսների ազդեցությամբ սկսեց տարերայնորեն քայքայվել ինչպես Արևմտյան, այնպես էլ Կովկասյան ռազմաճակատը: Կովկասյան բանակի քայքայման գործընթացը սկսվել էր դեռ ավելի վաղ՝ 1917 թ. սեպտեմբեր-հոկտեմբեր ամիսներից, որը դրսևորվում էր դասալքումների ձևով⁴⁹:

Հեղաշրջումից հետո ավելի ուժեղացան կազմալուծիչ ու անիշխանական գործընթացները: Ռուսաստանի պետական կյանքի կազմալուծման գործոններից մեկը Գ. Ղարաշյանը համարում էր. «Գյուղացիության և բանվորության լայն զանգվածների հիպնոզն ու հափշտակությունը լենինյան

⁴⁸ «Հորիզոն», 7 նոյեմբերի 1917 թ.:

⁴⁹ Հ. Ս. Մելիքյան, Հոկտեմբերյան հեղափոխությունը և Կովկասյան բանակը, Ե., 1970, էջ 157-158:

բոլշևիզմով, մի հոսանք, որն իր սոցիալական մաքսիմալիզմով Ռուսաստանը հասցրեց անիշխանության»⁵⁰:

Վ. Ի. Լենինի գլխավորած խորհրդային կառավարության հրահանգով Կովկասում ռուսական բանակի հրամանատարությունից հրաման էր արձակվել, որ մինչև 1917 թ. դեկտեմբերի 25-ը պետք է լիովին դատարկվեր Կովկասյան ռազմաճակատը: Ըստ հրամանի՝ այնտեղ չպետք է մնար ոչ մի ռուս զինվոր⁵¹: «1917 թ. դեկտեմբերից,- գրում էր գորավար Թ. Նազարբեկյանը,- ռուսական զորքերը, թողնելով ռազմական գույքի վիթխարի պահեստներ, սկսեցին լքել ռազմաճակատը և մեկնել դեպի Ռուսաստան: Ոչ մի ուժ, անգամ Շամխորի հայտնի մղձավանջային ջարդերը, ի վիճակի չեղան կանգնեցնել նրանց»⁵²: Դեռ դեկտեմբերի 14-ին Բրեստ-Լիտովսկի բանակցությունների առաջին փուլում խորհրդային կողմի հրապարակած հաշտության պայմանագրի ռուսական պայմաններում ասված էր «Ռուսաստանն իր զորքերը դուրս է բերում Ավստրո-Հունգարիայի, Թուրքիայի և Պարսկաստանի իր գրաված մարզերից, իսկ քառյակ դաշինքի տերությունները՝ Լեհաստանից, Լիտվայից, Կուռլանդիայից»⁵³: Ինքնին հասկանալի է, թե հայ ժողովրդի համար ինչ էր նշանակում ռուսական զորքերի դուրսբերումը Արևմտյան Հայաստանից:

Կովկասյան բանակի Երկրային նոր խորհուրդը 1917 թ. դեկտեմբերի 26-ին Կովկասյան բանակի զինվորներին ուղղված դիմումի մեջ հայտնում էր, որ ինքը ձեռնամուխ է եղել «Կովկասյան բանակի պլանաչափ գորացրմանը»⁵⁴: Ռուսական զորքերի՝ Արևմտյան Հայաստանից դուրս բերելու մասին էր հաստատում ժողկոմխորհի դեկտեմբերի 29-ին ընդունած «Թուրքահայաստանի մասին» դեկրետի առաջին կետը⁵⁵: Բանակի գորացրմանը կազմակերպված բնույթ տալու նպատակով ստեղծվել էր ռազմա-տեխնիկական կոմիտե⁵⁶: Եվ այս ամենը կատարվում էր Խ. Ռուսաստանի կառավարության նախագահ Վ. Ի. Լենինի գլխությամբ և երկրի ռազմահեղափոխական խորհրդի նախագահ ու արտ. գործ. նախարար Լ. Գ. Տրոցկու հրամանով: Մակայն գորացրումը կազմակերպված չընթացավ: Ռուսական զինվորականությունը ցամաքով և ծովով (առանձին դեպքերում բռնի զինաթափման ենթարկվելով) սկսեց վերադառնալ հայրենիք: Չորրի առաջին խմբաքանակը

⁵⁰ ՀՀ ՀՔԿՓ ՊԿԱ, ֆ. 4051, ց. 1, գ. 44, էջ 17:

⁵¹ Ա. Ամիրխանյան, Ռուս և թուրք զինադադարը 1917-1918, Ֆրեզնո, 1921, էջ 11:

⁵² ՀՀ ՊԿՊԱ, ֆ. 121, ց. 2, գ. 79, թ. 16:

⁵³ Հ. Ա. Ավետիսյան, Հայկական հարցը 1918 թ., Ե., 1997, էջ 50, Հ. Ն. Սարգսյան, Բրեստից մինչև Մոսկոն, Ե., 1989, էջ 29, Գ. Ա. Аветисян, Брест-Литовск: как были отторгнуты Турция и Армения, Ардаган и Батум, Е., 1994, с. 21:

⁵⁴ «Ռեկյուզիտի կոչեր և բռուցիկներ 1902-1921», Ե., 1960, էջ 434:

⁵⁵ Декреты советской Власти, т. 1, М., 1957, с. 298.

⁵⁶ Ա. Հ. Հարությունյան, Թուրքական ինտերվենցիան Անդրկովկաս 1918 թ. և ինքնապաշտպանական կռիվները, Ե., 1984, էջ 38:

ռազմաճակատը քեց դեկտեմբերի 10-ին⁵⁷: Արդեն 1918 թ. հունվարի վերջերին Կովկասյան ճակատը հիմնականում դատարկված էր ռուսական զորքերից⁵⁸:

Ռ-ազմաճակատի քայքայումը ամենից ավելի ծանր անդրադարձավ հայ ժողովրդի վիճակի վրա: Հայ հասարակական-քաղաքական բոլոր ուժերը անհանգստացած էին ռուսական զորքերի հեռացումից՝ «միշտ գիտակցելով, որ առանց Ռ-ուսաստանի ամեն ինչ վատ է լինելու»⁵⁹: Միանգամայն այլ էր թուրք-մուսավաթականների և մասամբ էլ վրաց մենչևիկների վերաբերմունքը հանդեպ ռուսական զորքերի հեռացման: Մասնավորապես թուրք-թաթարների շատ էր դուր գալիս բուլչևիկների հռչակած՝ «առանց զավթումների ու ռազմատուգանքների անջատ հաշտության» կարգախոսը, քանզի դա իրավունք էր տալիս Թուրքիային կրկին տիրանալու ռուսական զորքերի կողմից գրավյալ հայկական հողերին: «Տաճկական զինվորական ինպերիալիզմը, - ասում էր Ս. Կասյանը, - ձգտում էր ամբողջապես կլանել Հայաստանը, բնաջինջ անել հայ ժողովուրդը և անվրդով տիրանալ հայ արյան ծովի վրա»⁶⁰:

ՕԶԱԿՈՍ-ը հեղինակագրկվեց և դադարեց գործելուց: 1917 թ. նոյեմբերի կեսերին նրան փոխարինեց ազգային-կուսակցական ներկայացուցչության սկզբունքով հիմնված նոր կառավարություն՝ Անդրկովկասյան կոմիսարիատը: Անընդունելի պետք է համարել պատմական գրականության մեջ տարածում գտած այն դատողությունը, թե Անդրկովկասյան կառավարության ստեղծումով հենց սկզբից նպատակ էր հետապնդվում Անդրկովկասը անջատել Ռ-ուսաստանից: Կանխավ փարատելով նման թյուր մտայնությունը՝ «Հորիզոնը» իր առաջնորդողում գրում էր. «Անդրկովկասի կոմիսարիատը ժամանակավոր մի իշխանություն է: Նրա նպատակը ոչ թե Անդրկովկասը Ռ-ուսաստանից անջատելն է, ինչպես, երևի, կփորձեն չարամիտ մարդիկ բացատրել, այլ քանի պետության կենտրոնում տիրում է քայքայում, Անդրկովկասը կառավարել և առանց կործանումի հասցնել նրան մինչև Սահմանադիր ժողով»⁶¹: Այս նույն առնչությամբ Ալ. Խատիսյանը հայտնում է, որ իշխանության գլուխ անցած կոմիսարիատը Կովկասը հայտարարեց Ռ-ուսաստանի անբաժան մասը⁶²: Այդ նույն միտքն է հաստատվում Անդրկովկասյան կոմիսարիատի նոյեմբերի 18-ի հռչակագրով: Այստեղ ընդգծվում էր այն միտքը, որ պահպանվելու էր համառուսաստանյան միասնական ճակատը, և որ Անդրկովկասյան կոմիսարիատը ձեռնարկելու է եռանդուն քայլեր անհապաղ հաշ-

⁵⁷ «Կայծ», 1 հունվարի 1919 թ.:

⁵⁸ Ռ. Դարբինյան, *Բուլչևիզմը եւ Հայաստանը*, Ե., 1920, էջ 4, Հ. Քաջազանունի, Հ. Յ. Դաշնակցությունը անելիք չունի այլևս, *Բուրքեշ*, 1923, էջ 25:

⁵⁹ Ջ. Ս. Կիրակոսյան, *Երիտթուրքերը պատմության դատաստանի առաջ /1915-ից մինչև մեր օրերը/*, գ. 2-րդ, Ե., 1983, էջ 100:

⁶⁰ Ս. Ատենյան, Ո՞ր է ելքը, Նոր Նախիջեւան, 1920, էջ 22:

⁶¹ «Հորիզոն», 21 նոյեմբերի 1917 թ., տես նույնը՝ Ս. Մ. Տաճրովսկի, *Закавказье после Октября*, М., 1925, с. 7-8:

⁶² Ալ. Խատիսյան, *նշվ. աշխ.*, էջ 34:

տություն կնքելու ուղղությամբ՝ հաշվի առնելով Արևմտյան ճակատի ընդհանուր կացությունը և Կովկասի տեղական պայմանները⁶³։

Տարածաշրջանի այս ընդհանուր քաղաքական չափազանց բարդ ու խառնակ իրավիճակում գնալով ավելի մեծացավ Ազգային խորհուրդների դերը։

Հայոց ազգային խորհուրդը զբաղվում էր ոչ միայն քաղաքական, վարչա-քաղաքացիական, գաղթականության, պարենավորման, այլև զինվորական գործերով։ Օրինակ՝ նա ձեռնարկեց ազգային զորաբանակի՝ Հայկական կորպուսի հիմնումը, զորավար Թ. Նազարբեկյանի հրամանատարությամբ, որը պետք է գրավեր Կովկասյան ռազմաճակատից հեռացող ռուսական զորքերի տեղը։ Բայց հայկական և մասամբ վրացական ազգային զնդերը անկարող եղան պատշաճ դիմադրություն ցույց տալ թուրքական կանոնավոր բանակին։

Վերջինս երկու-երեք ամսում գրավեց ոչ միայն ամբողջ Արևմտյան Հայաստանը, այլև ներխուժելով Անդրկովկաս՝ սկսեց զավթել արևելահայ տարածքները։

Անդրկովկասյան սեյմը ոչ միայն չկարողացավ կազմակերպել երկրամասի պաշտպանությունը, այլև իր ներսում առկա ազգամիջյան և սոցիալ-քաղաքական հակասությունների ու չհամաձայնեցված գործողությունների հետևանքով գործնականում նպաստեց թուրքերի ներխուժմանը Անդրկովկաս։ Այս գործում, թաթար մուսավաթական պարագլուխներից զատ, թուրք ջարդարար-զավթիչներին, կարելի է ասել, մեծ ծառայություն մատուցեց նաև վրաց մենչևիկների աջ թևի պարագլուխ, թուրքասեր Ա. Չխենկելին, որի կարգադրությամբ էլ, ապրիլի վերջերին, գրեթե առանց դիմադրության, ամուր պաշտպանված Կարս բերդաքաղաքը հանձնվեց թուրքերին։

Դեռ մինչ Մեյմի կողմից Անդրկովկասի անկախության պաշտոնական հռչակումը՝ 1918 թ. ապրիլի 6-8-ը, ճակատամերձ Ալեքսանդրապոլում Հայոց Ազգային խորհրդի նախաձեռնությամբ գումարվեց հայ քաղաքական կուսակցությունների և անկուսակցական գործիչների խորհրդակցություն։ Խորհրդակցությանը մասնակցում էին Հայոց Ազգային խորհրդի անդամներ, կուսակցությունների ներկայացուցիչներ, այդ թվում՝ բոլշևիկներ։ Այնտեղ քննարկվեցին ռազմաճակատի, զորքի, հաշտության, անկախության և այլ հարցեր։ Խորհրդակցությունում ընթերցվեց Խ. Կարճիկյանի նամակը, որում ընդգծվում էր այն միտքը, որ հայ ժողովուրդը չպետք է երես թեքի Ռուսաստանից, որ միայն Ռուսաստանը կարող է լինել հայ ժողովրդի անվտանգության միակ երաշխավորը։ Նա գտնում էր, որ Անդրկովկասը անկախ հայտարարելը համազոր էր հայ և վրաց ժողովուրդների ինքնասպանության, և որ Ռուսաստանը չպիտի հաշտվի Անդրկովկասը կորցնելու մտքի հետ⁶⁴։ Ի

⁶³ *Документы и материалы по внешней политике Закавказья и Грузии, Тифлис, 1919, с. 8-10.*

⁶⁴ Հ. Ա. Ավետիսյան, *Հայկական հարցը 1918 թ., Ե. 1997, էջ 150:*

պաշտպանություն այդ դիրքորոշման՝ խորհրդակցության մասնակիցները պատրաստակամություն հայտնեցին հրաժարվել անկախության գաղափարից, միայն թե չկտրվել Ռուսաստանից⁶⁵: Միաժամանակ հրամայական անհրաժեշտություն էր համարվում «բոլոր հնարավոր միջոցներով շարունակել երկրի պաշտպանությունը»⁶⁶: Խորհրդակցությունում քննության առնվեց Հ. Քաջազունու զեկուցումը, որի մեջ վերջինս աշխատում էր ապացուցել, որ ստեղծված պայմաններում, որպես չարյաց փոքրագույն, պետք է համաձայնվել ադրբեջանցիների ու վրացիների հետ և ընդունել Բրեստ-Լիտովսկի հաշտության պայմանները, այլապես կը քայքայվի Անդրկովկասյան խախուտ դաշնությունը և հայ ժողովուրդը կհայտնվի թուրքերի դեմ մեն-մենակ⁶⁷: Հաշտության և պատերազմի, ինչպես նաև Անդրկովկասի անկախության մասին ներկայացվեց բանաձևի վեց նախագիծ⁶⁸: Խորհրդակցությանը մասնակից խմբակցությունների մեծամասնությունը գտնում էր, որ պետք է ճանաչել Բրեստի պայմանագիրը, Սեյմում դեմ քվեարկել Անդրկովկասի անկախությանը, ուժեղացնել երկրի պաշտպանությունը և չհեռանալ ռուսական կողմնորոշումից⁶⁹:

Այս ուղղությամբ մտահոգություն արտահայտողներից մեկն էլ ՀՅ - Դաշնակցություն կուսակցությունն էր: ՀՅԴ Արևելյան Բյուրոյի պաշտոնաթերթ «Հորիզոնը» ավելի վաղ՝ փետրվարյան իր խմբագրականներից մեկում զգուշացնում էր, որ «Անդրկովկասի անկախությունն առնվազն թեթևամտություն է և աններելի՝ քաղաքական պատասխանատու գործիչների համար»⁷⁰: Իսկ Հ. Քաջազունուին (փետրվարի 15-ին), Դաշնակցության խմբակցության ամուսնից հանդես գալով Անդրկովկասյան սեյմի նիստում, նշում էր, որ Անդրկովկասը պետք է մնա Ռուսաստանյան դաշնակցային մեծ հանրապետության անբաժան մասը⁷¹: Ի տարբերություն վրաց մենչևիկների և ազերի մուսավաթականների՝ ՀՅԴ Անդրկովկասի այն եզակի խոշոր կուսակցություններից էր, որ կողմնորոշված էր դեպի հյուսիս՝ Ռուսաստան, և մինչև վերջին պահը դեմ է եղել Անդրկովկասը Ռուսաստանից անջատելուն: Հիշեցնենք, որ ՀՅԴ ծրագիրը նույնպես Ռուսաստանի հանդեպ անջատական ու անկախական որևէ պահանջ չէր դնում: Ընդհակառակը, նա արտահայտվել է ռուսական համապետականության օգտին, սահմանափակվելով միայն Ռուսական Դաշնության շրջանակներում՝ Արևելահայաստանին վարչական ինքնավարության համեստ պահանջով: Այդ բանը ավելի քան հստակորեն է ամրագրված կուսակցության երկրորդ ծրագրում⁷²: Այս կապակցությամբ անընդունե-

⁶⁵ ՀՀ ՀՔԿՓ ՊԿԱ, ֆ. 4047, ց. 1, գ. 213, ք. 35:

⁶⁶ Ա. Երզնկյան, *Աշխատավորության դատարանին*, Ե. 1927, էջ 36:

⁶⁷ Ս. Վրացյան, *Անկախ և Միացյալ Հայաստան*, Բոստոն, 1920, էջ 28-29:

⁶⁸ Հ. Ա. Ավետիսյան, *նշվ. աշխ. էջ 153*:

⁶⁹ ՀՀ ՀՔԿՓ ՊԿԱ, ֆ. 4047, ց. 1, գ. 213, ք. 35:

⁷⁰ «Հորիզոն», 25 փետրվարի 1918 թ.:

⁷¹ *Кавказское слово*, 17 февраля 1918г.

⁷² «Հ. Յ. Դաշնակցության ծրագիր», Կ. Պոլիս, 1908, էջ 18-19:

լի պետք է համարել ռուս հեղինակ Ի. Վլադիսլավևի արտահայտած այն միտքը, թե «Դաշնակցության ծրագրում խնդիր էր դրվում հասնել Կովկասի անկախությանը»⁷³: Ռազմաքաղաքական այդ բարդագույն ժամանակաշրջանում հակասակախական և պրոռուսական կողմնորոշում են դրսևորել հայ հասարակական-քաղաքական գրեթե բոլոր ուժերը: Չնայած նրանք հիմնականում չէին ընդունում Խորհրդային Ռուսաստանի քաղաքական վարչաձևը և տնտեսական համակարգը, սակայն ներքուստ և արտաքուստ հանդես էին բերում ընդգծված ռուսական կողմնորոշում: «Հայերն իրենց զանազան կուսակցություններով,- հավաստում է ռամկավար Ա. Գարբինյանը,- կառչած էին Ռուսիո հետ միացած մնալու գաղափարին»⁷⁴: Արևելահայությունը մեծ ձգտում ուներ ամուր բռնել «ռուսական փեշից», «Բայց այդ փեշը»,- Գ. Անանունի պատկերավոր բնորոշմամբ,- հակառակ հայության բուռն փափագին՝ ինքը դուրս սողաց նրա ձեռքից»⁷⁵:

Հայոց Ազգային խորհրդին հիմնական ուղղություն տվող ՀՅԳ հետևողականորեն պաշտպանում էր այդ գաղափարը այնքան ժամանակ, քանի դեռ դրսից Թուրքիան, իսկ ներսից վրաց և ադրբեջանական անջատողական ուժերը չէին դրել Անդրկովկասի՝ Ռուսաստանից անջատման ու անկախության խնդիրը: Իսկ երբ Թուրքիայի ցանկությամբ ու դրդումով վճռականորեն բարձրացվեց այդ հարցը, Սեյմի ՀՅԳ խմբակցությունը, լիակատար մեկուսացումից խուսափելու նպատակով, ստիպված ընդունեց անջատման փաստը: Անդրկովկասյան սեյմի ապրիլի 9(22)-ի ճակատագրական նիստում Անդրկովկասի անկախության հռչակման օգտին ՀՅԳ խմբակցության ամուսնից հակիրճ ու զուսպ հայտարարությամբ հանդես եկավ Հ. Քաջազունունի⁷⁶:

Անդրկովկասի անկախության կապակցությամբ Հայոց Ազգային խորհուրդը ձայների մեծամասնությամբ արտահայտվեց «այդ անկախության դեմ»⁷⁷: Սակայն նա չկամենալով իր վրա վերցնել գալիք ծանր պատասխանատվությունը՝ ապրիլի կեսերին (15-18-ը) գումարեց ռուսահայ ժամանակավոր ներկայացուցչական օրենսդիր մարմնի՝ Ազգային ժողովի արտակարգ նիստեր: Սի քանի օր տևած բուռն քննարկումներից հետո, որպես արդեն կատարված փաստ, ի վերջո հավանություն է տրվում Անդրկովկասի անկախությանը⁷⁸:

Գրեթե միաժամանակ նույնպիսի որոշում է կայացնում նաև ՀՅԳ - Թիֆլիսի ներկայացուցչական ժողովը: Ապրիլի 14-ին և 17-ին լսելով, Խ. Կարճիկյանի զեկուցումը Անդրկովկասը անկախ հայտարարելու մասին, ժողովը կայացրեց հետևյալ որոշումը. «Ստեղծված պայմաններում անկախության

⁷³ Программы политических партий в России, М., 1917, с. 23.

⁷⁴ Ա. Գարբինյան, նշվ. աշխ., էջ 351:

⁷⁵ Գ. Անանուն, նշվ. աշխ., հ, 3, էջ 612:

⁷⁶ Документы и материалы..., с. 215:

⁷⁷ Հ. Ա. Ավետիսյան, նշվ. աշխ., էջ 172:

⁷⁸ ՀՀ ՊԿՊԱ, Ֆ. 222, ց. 1, գ. 124, թթ. 25-33, նաև Հ.Ա. Ավետիսյան, նշվ. աշխ. էջ 172-174:

հայտարարությունը որպես չարիքներից փոքրագույն քաղաքական անհրաժեշտություն է»⁷⁹: Անդրկովկասի անկախության փաստը ձայների մեծամասնությամբ ընդունեցին նաև հայ մենչևիկները⁸⁰:

Պատմաքաղաքական դեպքերն ու իրադարձությունները զարգացան այնպես, որ Անդրկովկասի դաշնակցային հանրապետության անկախության հռչակումից շատ չանցած՝ մայիսի վերջերին, տեղի ունեցավ այդ դաշնության քայքայում և դրա հիման վրա երեք ինքնուրույն հանրապետությունների հռչակում:

Անդրկովկասյան դաշնության (կառավարության և խորհրդարանի) ներսում առկա էին ազգային-տարածքային սուր վեճեր, քաղաքական իրարամերժ կողմնորոշումներ, տարակարծություններ պատերազմի և հաշտության հարցում, միջկուսակցական հակամարտություններ և այլն, որոնք անկենսունակ էին դարձնում մման պետության գոյությունը: Այդ էր պատճառը, որ Անդրկովկասը չկարողացավ պատշաճ դիմադրություն ցույց տալ թուրքական ներխուժմանը: Սրված տարածայնությունների պատճառով Անդրկովկասյան դաշնության փլուզումը դարձավ անխուսափելի:

1918 թ. մայիսի 26-ին (ցերեկվա ժամը 3-ին) լուծարվեց Սեյմը: Նախապես ստանալով Գերմանիայի հովանավորությունը՝ նույն օրը՝ ժամը 4-ին, վրաց Ազգային խորհուրդը Ն. Ժորդանիայի նախագահությամբ Վրաստանը հայտարարեց անկախ: Այդ նույն օրը՝ մայիսի 26-ին, գումարվեց Հայոց Ազգային խորհրդի նիստ, որում վերաբերմունք ցույց տալով Վրաստանի անկախությանը՝ այն ընդունվեց որպես փաստ: Միաժամանակ Ազգային խորհուրդը իր վրա վերցրեց հայկական շրջանների նկատմամբ ժամանակավոր կառավարության ֆունկցիաներ⁸¹:

Հաջորդ օրը՝ մայիսի 27-ին (Ս. Վրացյանը նշում է նույն օրը՝ մայիսի 26-ին)⁸² ՀՅԳ Թիֆլիսի ներկայացուցչական ժողովի և թաղային կոմիտեների անդամների համատեղ նիստում՝ լսելով ներկա մոմենտի, Սեյմի արձակման և Վրաստանի անկախության հայտարարության մասին, ընդունեց հետևյալ բանաձևը՝ «Ի նկատի առնելով այն, որ Անդրկովկասյան Սեյմի ինքնացրումից և Վրաստանի՝ անկախության հայտարարելուց հետո, լուծվելու է Անդրկովկասյան կառավարությունը, և հայ ժողովուրդը մնալու է բախտի բերմունքին՝ ներկայացուցչական ժողովը գտնում է անհրաժեշտ, որ Հայոց Ազգային խորհուրդը, ուժեղացնելով իր կազմը, անցնի գործելու հայության կենտրոնում՝ ստանալով կառավարական ֆունկցիաներ, օժտված դիկտատորական իրավունքներով հայ կյանքի բոլոր երևույթների և գործերի նկատմամբ»⁸³:

⁷⁹ «Հորիզոն», 11 մայիսի 1918 թ.:

⁸⁰ Նույն տեղում:

⁸¹ ՀՀ ՊԿՊԱ, ֆ. 222, ց. 1, գ. 120, քք. 36-37:

⁸² Ս. Վրացյան, Անկախ և Միացյալ Հայաստան, Բոստոն, 1920, էջ 41:

⁸³ «Հորիզոն», 29 մայիսի 1918 թ.:

Այն բանից հետո, երբ մայիսի 27-ին ազերիների Ազգային խորհուրդը հայտարարեց Ադրբեջանի անկախությունը, Հայոց Ազգային խորհրդին չէր մնում այլ բան, քան ինքնաբերաբար հայտարարել նաև Հայաստանի անկախությունը: Մայիսի 28-ին՝ բուռն քննարկումներից հետո, Հայոց Ազգային խորհուրդը վճռեց հայտարարություն անել Հայաստանի անկախության մասին: Այդ հիման վրա հանձնարարվեց Ա. Ահարոնյանին, Ն. Ադբայանին, Հ. Քաջազունուն և Ալ. Խատիսյանին մշակել Հայաստանի անկախության պաշտոնական հայտարարագիրը, որը և լույս տեսավ մամուլում մայիսի 31-ին: Նրանում ասվում էր. «Անդրկովկասի քաղաքական ամբողջության լուծարումով և Վրաստանի ու Ադրբեջանի անկախության հռչակումով ստեղծված նոր դրության հանդեպ՝ Հայոց Ազգային խորհուրդը իրեն հայտարարում է հայկական գավառների գերագույն և միակ իշխանություն: Որոշ ծանրակշիռ պատճառներով թողնելով մոտիկ օրերում կազմելու Հայոց Ազգային կառավարություն՝ Ազգային խորհուրդը ժամանակավորապես ստանձնում է կառավարական բոլոր ֆունկցիաները հայկական գավառների քաղաքական և վարչական ղեկը վարելու համար»⁸⁴:

Միաժամանակ, մայիսի 28-ին Հայոց Ազգային խորհուրդը որոշում կայացրեց Հայաստանի (որպես ինքնուրույն պետություն) պատվիրակություն ուղարկել Բաթում՝ թուրքերի հետ հաշտության պայմանագիր կնքելու նպատակով⁸⁵: Բանն այն էր, որ մեկ օր հետո՝ մայիսի 29-ին, լրանում էր Թուրքիայի վերջնագրի ժամկետը⁸⁶: Անհրաժեշտ էր շուտափույթ պատվիրակություն ուղարկել Բաթում և հաշտության պայմանագիր կնքել՝ լուծել պատերազմի և խաղաղության խնդիրը:

Հայոց Ազգային խորհրդի պաշտոնական հայտարարության համաձայն՝ կառավարության կազմվելը հետաձգվեց: Խնդիրն այն էր, որ նոր կառավարությունն հնարավոր չէր միանգամից կազմել, որովհետև դրա շուրջ պահանջվում էր միջկուսակցական խորհրդատվությունների և փոխադարձ համաձայնությամբ կառավարություն ձևավորելու անհրաժեշտություն: Միաժամանակ, հարկավոր էր խորհրդակցել և կառավարության մեջ ներգրավել երևանյան այն կարող ուժերը, որոնք պետական կառույցների ձևավորման ուղղությամբ արդեն հսկայական աշխատանք էին կատարել՝ Հայոց Ազգային խորհրդի լիագոր և Երևանի դիկտատոր Արամի գլխավորությամբ: Մայիսի 29-ին ՀՅԴ- բարձրադիր ղեկավար մարմինները՝ Արևելյան և Հայաստանի Բյուրոները, ՀՅԴ- Թիֆլիսի կոմիտեն և այլն հավանություն են տալիս Հայաս-

⁸⁴ «Հորիզոն», 31 մայիսի 1918 թ., «Кавказское слово», 31 мая, 1918г., Ալ. Խատիսյան, նշվ. աշխ., էջ 84:

⁸⁵ Ս. Վրացյան, Հայաստանի Հանրապետություն, Բեյրութ, 1958, էջ 153-154:

⁸⁶ С. Т. Аркомед, Материалы по истории отпадения Закавказья от России, Тифлис, 1923, с. 74.

տանի անկախության հայտարարությանը, և Հովհաննես Քաջազունին առաջադրվում է որպես վարչապետության թեկնածու⁸⁷:

Հարկ է նշել, որ Հայոց Ազգային խորհրդի գործունեության թիֆլիսյան ժամանակաշրջանում նրանում ներկայացված հայ քաղաքական կուսակցությունները հիմնականում հանդես են եկել ազգային միացյալ ճակատով: Անգամ 1918 Մայիսի 28-ի Արամյանցի տանը Հայաստանի անկախության մասին վճիռը Հայոց Ազգային խորհրդում ընդունվեց առանց որևէ ներքին պայքարի, քանզի մայիսի վերջին ստեղծված քաղաքական իրավիճակն էր թելադրում այդպես⁸⁸: Ալ. Խատիսյանը վկայում է, որ անկախության բանաձևը ընդունվեց Ազգային խորհրդի բոլոր կուսակցությունների համաձայնությամբ⁸⁹: Արդարև, պատմական տվյալ պահին այլընտրանք չկար: Իհարկե, սա ամենևին էլ չէր նշանակում, թե խորհրդի բոլոր կուսակցությունների ներկայացուցիչները, իրոք, անկեղծորեն կողմնակից էին Հայաստանի անկախությանը:

Այդ օրերին հայ ժողովուրդը ունեցավ իր երկրորդ Ավարայրը: Մայիս-վերջյան հաղթական շարաթը փաստորեն ծնեց Հայաստանի անկախությունը: Այն կռվեց ոչ թե Թիֆլիսում` Հայոց Ազգային խորհրդի վախվորած ու հոգեմաշ նիստում, այլ Սարդարապատում, Ղարաբիլիսայում և Բաշ-Ապարանում:

Ազգային խորհրդի շատ անդամներ երկշտ ու թերահուստ զգացումով էին համակված անկախության հանդեպ: Սոցիալիստական կուսակցությունների ներկայացուցիչներից գատ, դաշնակցականներ` Ա. Մխարմյանը, Ռ. Տեր-Մինասյանը և Ա. Բաբայանը ևս տարակուսում էին անկախության խնդրում⁹⁰: Այդ մտավախությունը պետք է բացատրել 1918 թ. գարնանը, թուրքական արշավանքի պայմաններում, հայ ժողովրդի համար ստեղծված չափազանց բարդ քաղաքական վիճակով, որի ժամանակ ըստ Ս. Վրացյանի «անկախությունը կարող էր ավելի ևս ծանրացնել կացությունը»⁹¹: Հարկ է նշել, որ անկախության խնդրում չկար միասնություն մաս ՀՅԳ շարքերում: Օրինակ, ՀՅԳ Բաքվի կոմիտեն, որը շատ խնդիրներում համերաշխվում էր Ստ. Շահումյանի դիսավորած Բաքվի կոմունայի հետ, ոչ միայն դեմ արտահայտվեց անկախությանը, այլև այն որակեց որպես «հայ ժողովրդի կամքի» ոտնահարում⁹²: Անկախության խնդրում կար մաս հոգեբանական արգելք, որն ամենից առաջ նշանակում էր կտրվել Ռուսաստանից:

Եվ, իրոք, Հայոց Ազգային խորհուրդը տարակուսում էր այդ հարցում, և դրա համար կային լուրջ հիմնապատճառներ: Նրանց հիշողության դաշտում

⁸⁷ Յ. Իրազեկ, *Մոտիկ անցյալից, Պեյրոթ, 1956, էջ 35*:

⁸⁸ «Վեն», *Փարիզ, 1934, թիվ Գ., էջ 79*:

⁸⁹ Ալ. Խատիսյան, *նշվ. աշխ., էջ 84*:

⁹⁰ Ա. Բաբայան, *Էջեր Հայաստանի անկախության պատմությունից, Գահիրե, 1959, էջ 7*:

⁹¹ ՀՀ ՊԿՊԱ, ֆ. 200, ց. 1, գ. 644, ք. 1:

⁹² «Արև», 9 հունիսի 1918 թ.:

էր 1,5 մլն հայության կորուստը, թշնամու գորքը գտնվում էր Երևանի մոտերքում և թույլ ու անօգնական Հայաստանի անկախության հռչակումը, առանց քաղաքական ծանրակշիռ դիրքորոշումների ու երաշխիքների, կարող էր լուրջ սպառնալիքի տակ դնել արևելահայության գոյությունը:

Հակառակ հայերի՝ անկախության հարցում ամենևին չտատանվեցին վրացիները և թաթարները: Նրանք չերկմտեցին այն պարզ պատճառով, որովհետև արդեն ունեին իրենց հովանավոր պետությունները՝ հանձինս Գերմանիայի և Թուրքիայի, իսկ Հայաստանը չունեւր այդպիսին, ուստի և Հայոց Ազգային խորհուրդը հայտնվել էր անորոշության ու տարակուսանքի մեջ:

Հակառակ Հայոց Ազգային խորհրդի անդամ կուսակցությունների՝ ՍԳՀնչակյան կուսակցության Անդրկովկասյան կենտրոնը բուռն կերպով բողոք արտահայտեց Մայիսի 28-ի Հայաստանի անկախության հայտարարության կապակցությամբ: Այդ որոշումը համարվեց **անօրինակսն**, իսկ Ազգային խորհուրդը որպես ինքնակոչ մարմին, որն «ուզուրպացիա» է կատարում հայ ժողովրդի ազատ իրավունքների դեմ⁹³: Նրանք, ովքեր ժխտում, քննադատում կամ կասկածի տակ են առնում Հայոց Ազգային խորհրդի Մայիսի 28-ի պատմական քայլը, այդպիսիներին պետք է հիշեցնել, որ եթե խորհուրդը տվյալ պահին իրեն չհայտարարեր հայկական գավառների գերագույն իշխանություն, ապա հայապատկան գավառները պարզապես բաժին կդառնային հարևան թուրքերին, ադրբեջանցի-թաթարներին և վրացիներին: Հարկ է ընդգծել, որ այդպես էին վճռել նաև Կովկասի այն ժամանակվա փաստական տերերը՝ Գերմանիան և Թուրքիան⁹⁴: Եվ այս առընչությամբ միանգամայն հիմնագուրկ է Ա. Երզնկյանի և հետագայում նրան ձայնակցած շատ հեղինակների արտահայտած այն միտքը, թե Մայիսի 28-ին Հայաստանի անկախացումը կատարվել է Թուրքիայի բռնի թելադրանքով⁹⁵: Այնինչ փաստերը և դեպքերի ու իրադարձությունների տրամաբանությունը հուշում են, որ եթե խնդիրը թողնվեր Թուրքիային, ապա նա ոչ միայն Հայաստանը չէր «անկախացնի», այլև հնարավորության դեպքում Անդրկովկասում ևս հայ չէր թողնի և արևելահայոց հարցը ևս կլուծեր արևմտահայոց նման: Կնշանակի՝ Հայաստանի անկախության ակտը պատմական անհրաժեշտություն էր և ստեղծված պայմաններում չունեւր այլընտրանք:

1918 թ. Մայիսի 28-ի պատմական որոշումից երկու շաբաթ անց՝ արդեն հունիսի 13-ին, Ազգային խորհրդի կազմած առաջին կառավարությունը պաշտոնապես հայտարարում է Հայաստանի անկախության մասին այն պետություններին, որոնք ներկայացուցիչներ ունեին այդ ժամանակ Թիֆլիսում և Կ. Պոլսում⁹⁶: Հայոց Ազգային խորհրդի գործունեության թիֆլիսյան շրջանում

⁹³ ՀՀ ՀԶԿՓ ՊԿԱ, ֆ. 4045, ց. 1, գ. 221, ք. 1:

⁹⁴ ՀՀ ՊԿՊԱ, ֆ. 222, ց. 1, գ. 137, ք. 1:

⁹⁵ Ա. Երզնկյան, նշվ. աշխ. էջ 50-51, Ա. Դարբինյան, նշվ. աշխ., էջ 435, Մ. Մերքրյան, Հայաստանի անկախության առթիվ, Գահիրե, 1950, էջ 9-10 և ուրիշներ:

⁹⁶ ՊԿՊԱ, ֆ. 200, ց. 1, գ. 35, ք. 146:

նրանում ներկայացված կուսակցությունների ներկայացուցիչների միասնությու-
նը պայմանավորված էր արտաքին գործոններով՝ թուրքական մահաբեր
ներխուժմամբ, ռուսական զորքերի հեռացումով և խորհրդային կառավարու-
թյան կողմից առանց Անդրկովկասի ժողովուրդների գիտության ու կամքի
Բրեստի դաշնագրի ստորագրումով: Այդ դաշնագիրը իրավական հիմք տվեց
Թուրքիային ներթափանցելու Անդրկովկաս և միաժամանակ թաղելու «Թուր-
քահայաստանի մասին» դեկրետը: Բաթումի, Կարսի և Արդահանի հանձնու-
մը դյուրին ճանապարհ էր հարթում թուրքերի համար՝ տիրանալու ամբողջ
Անդրկովկասին ու բնաջնջելու Հայաստանը⁹⁷: Իրոք, Բրեստի կողոպտչա-
կան հաշտության պայմանագիրը «սառը ցնցող» եղավ հայ քաղաքական
կուսակցությունների, այդ թվում սոց. դեմ. և Էսեռների համար՝ Խորհրդային
Ռուսաստանի կառավարությունից քաղաքականապես սառելու և հիասթափ-
վելու տեսակետից: «Սա մի ակտ էր,- նշում էր Արկունեղը,- որը նորանոր ա-
դետների շրջան էր բացում Ռուսաստանի և թե, մասնավորապես, Անդրկով-
կասի համար»⁹⁸:

Հայ քաղաքական գրեթե բոլոր ուժերը դատապարտեցին Բրեստ-Լի-
տովսկի պայմանագիրը: Հայտնի է, որ Բրեստի կողոպտիչ պայմանագրի դեմ,
շատ կուսակցությունների հետ միասին, բուռն կերպով բողոքեցին «ճախ» է-
սեռները: Էսեռների կուսակցության Անդրկովկասյան կազմակերպության ԿԿ-
ը ժողովրդին ուղղված կոչ հրապարակեց, որով դիմում էր Կովկասի ժողո-
վուրդներին չճանաչել այդ պայմանագիրը և սեփական ուժերով պաշտպանել
երկրամասը թշնամու ավազակային հարձակումներից⁹⁹:

Հայ ազգային և ոչ ազգային կուսակցությունների Խ. Ռուսաստանից
սառելու և հիասթափվելու գլխավոր պատճառն այն էր, որ Գերմանիայի
ճնշմամբ խորհրդային կառավարությունը Թուրքիային էր հանձնում ոչ միայն
1914-1917 թթ. պատերազմի ընթացքում այնքան մեծ դժվարությամբ ու անթիվ
զոհերի գնով գրավյալ արևմտահայ նահանգները, այլև Արևելյան Հայաստա-
նի մասը կազմող Կարսի մարզը, ընդհուպ մինչև Ախուրյան գետը¹⁰⁰: Այսինքն՝
վերականգնվում էր 1877-1878 թթ. ռուս-թրքական նախապատերազմյան պե-
տական սահմանը: Բրեստի դաշնագրի /Կովկասին վերաբերող հատվածի/ 4-
րդ կետով «Ռուսաստանը իրենից կախված ամեն ինչ կանի, որ ապահովի
Արևելյան Անատոլիայի գավառների շուտափույթ մաքրումը և դրանց կանո-
նավոր հանձնումը Թուրքիային: Արդահանի, Կարսի և Բաթումի օկրուգները
ևս անհապաղ մաքրվում են ռուսական զորքերից»¹⁰¹: Միաժամանակ Ռու-

⁹⁷ ՀՀ ՀՔԿՓ ՊԿԱ, ֆ. 4047, ց. 1, գ. 213, ք. 18:

⁹⁸ Գ. Ղարաջյան, *Անդրկովկասի քաղաքական կյանքը 1918 թ., Թիֆլիս, 1919, էջ 20*:

⁹⁹ «Հորիզոն», 29 մարտի 1918 թ.:

¹⁰⁰ *История дипломатии, т. 2, М.-Л., 1945, с. 346.*

¹⁰¹ *Л. У. Хоружий, Հայկական հարցը, Ե., 1995, էջ 42, Г. А. Аветисян, Брест-Литовск : как были отторгнуты Турцией Карс, Ардаган и Батум, Е., 1994, с. 70.*

սաստանը պետք է կանխեր Թուրքիայի կապիտուլյացիան¹⁰²: Ավելին, Ռուսաստանի և Թուրքիայի միջև նույն մարտի 3-ին ստորագրված լրացուցիչ պայմանագրի 5-րդ կետով Ռուսաստանը պարտավորվում էր զորացրել հայկական զինվորական կազմավորումները (խմբերը), մինչդեռ Թուրքիան «իր մյուս թշնամիների դեմ պատերազմը շարունակելու անհրաժեշտությունից՝ ստիպված է իր բանակը պահել մարտական վիճակում»¹⁰³:

Կարծում ենք, որ Բրեստ-Լիտովսկի կողոպտիչ պայմանագիրը ինչ-որ չափով ազդակ հանդիսացավ այն բանին, որ Հայոց Ազգային խորհրդի քաղաքական ուժերի ներկայացուցիչներին ինքնաբերաբար մղեց անկախության քայլին:

Թուրք զավթիչների դեմ պայքարի հարցում բոլոր կուսակցությունները համակարծիք էին ու միասնական: Այդ նշանակում է, որ Հայոց Ազգային խորհրդում, մինչև նրա խորհրդարանական կերպարանք ստանալը, լուրջ հակասություններ ու պայքար չի դրսևորվել: Ավելին, արտաքին վտանգի սպառնալիքի տակ նրանք անգամ համագործակցել են իրար հետ:

Արդեն այլ վիճակ ստեղծվեց Հայաստանի անկախության հռչակումից հետո, երբ Հայոց Ազգային խորհրդի հիմքի վրա կազմվեց ՀՀ գերագույն օրենսդիր մարմինը՝ Հայաստանի խորհուրդը (խորհրդարանը), որը նույն թվականի օգոստոսի մեկից իր աշխատանքները սկսեց ՀՀ մայրաքաղաք Երևանում: Այստեղ՝ արդեն բուն հայրենիքում, գործնական աշխատանքի պայմաններում բուն կերպով դրսևորվեց այդ կուսակցությունների ընդդիմադիր կեցվածքը:

Այսպիսով, հայ ժողովրդի հերոսական մաքառումների և Հայոց Ազգային խորհրդի թափած ջանքերի արդյունքով Հայաստանի մի փոքր հատվածը կանգնեց անկախության անխուսափելի փաստի առջև: «Մայիսի 28-ով» սկզբնավորվեց Հայաստանի առաջին Հանրապետությունը:

4. Անդրանիկ կառավարության և խորհրդարանի ձևավորումը

ՀՀ անկախության հռչակումից հետո Հայոց ազգային խորհրդի առջև ծառայած էր երկու կարևոր խնդիր՝ կառավարության և խորհրդարանի ձևավորումը: Կառավարության կազմումը հետաձգվեց մինչև Բաթումի հաշտության պայմանագրի կնքումը: Պայմանագրի կնքումից անմիջապես հետո օրակարգում դրվեցին գործադիր՝ կառավարության և օրենսդիր՝ խորհրդարանի ձևավորման հարցերը:

¹⁰² ՀՀ ՊԿՊԱ, ֆ. 122, ց. 1, գ. 118, ք. 2, «Հորիզոն», 15 ապրիլի 1918:

¹⁰³ Стенографический отчет 4-го Чрезвычайного съезда советов рабочих, солдатских, крестьянских и казачьих депутатов, М., 1920, с. 135:

Հունիսի սկզբին գումարված ՀՅԳ Թիֆլիսի ներկայացուցչական ժողովը, քննության առնելով Բաթումում կնքված հաշտության պայմանները և անկախ Հայաստանի կառավարություն ու խորհրդարան կազմելու խնդիրը, որոշեց. «Կազմակերպվող կառավարությունը և հրավիրվելիք Ազգային ժողովը (խորհրդարանը - Ա. Հ.) հիմք պիտի ունենան կուսակցական սկզբունքը»¹⁰⁴: Ընդամին, թե՛ խորհրդարանը և թե՛ կառավարությունը լինելու էին ժամանակավոր, մինչև որ հնարավոր կլիներ ժողովրդավարական ընտրությունների ճանապարհով ձևավորել իսկական (ընտրովի) խորհրդարան, որն էլ կընտրեր նոր կառավարություն:

1918 թ. հունիսի 7-ին Հայոց Ազգային խորհուրդը (13 կողմ և 2 դեմ) կառավարության նախագահ ընտրեց **Հովհաննես Քաջազնունուն**, որին և հանձնարարվեց կազմելու կաբինետը: Դեմ քվեարկողները ՀԺԿ երկու ներկայացուցիչներն էին¹⁰⁵: Որոշվել էր, որ կաբինետը կազմելուն պես կառավարությունը և Ազգային խորհուրդը կփոխադրվեն մայրաքաղաք Երևան: Բայց քանի որ կաբինետի ձևավորումը ձգձգվեց, ուստի՝ հետաձգվեց նաև իշխանության մարմինների փոխադրումը Երևան:

Անկախության հռչակումից հետո հայ քաղաքական կուսակցությունների միջև առաջին սուր պայքարը ծագեց Հայոց Ազգային խորհրդում անդրամիկ կառավարության կազմավորման կապակցությամբ: Այդ ժամանակ չհաջողվեց ձևավորել ազգային միասնության կառավարություն: Վարչապետ ընտրված Հ. Քաջազնունին խառը կաբինետի ձևավորման նպատակով ամբողջ հունիս ամսվա ընթացքում կուսակցությունների ներկայացուցիչների հետ վարած բանակցություններում դժվարությունների հանդիպեց: Այսպես, Հայ ժողովրդականները (Ս. Պապաջանյան և Ս. Հարությունյան) հրաժարվեցին մտնել նորակազմ կաբինետ, որովհետև ցանկանում էին, որ իրենց կուսակից Ս. Պապաջանյանին տրվի վարչապետի պոստը, ուստի և կաբինետի ձևավորման իրավունքը¹⁰⁶: Ս. Պապաջանյանը սկզբունքորեն մերժեց մտնել Քաջազնունու կաբինետ և մեկնել Երևան: Ավելին, ժողովրդականները պահանջում էին, որ դաշնակցականները հեռանան քաղաքական ասպարեզից՝ գտնելով, որ նրանք են պատասխանատու հայերի գլխին եկած աղետների համար, և որ Թուրքիայի հետ ընդհանուր լեզու գտնելու համար անհրաժեշտ է քաղաքական նոր ուժ: Նոր ուժ ասելով՝ նրանք նկատի ունեին իրենց¹⁰⁷: Այդ օրերին ժողովրդականներն իրենց մամուլում և հասարակական միտինգներում ու ժողովներում հակադաշնակցական մեծ արշավ ծավալեցին՝ խոչընդոտելու համար Հայոց Ազգային խորհրդի որոշումը:

¹⁰⁴ «Հորիզոն», 4 հունիսի 1918 թ.:

¹⁰⁵ «Հորիզոն», 13 հունիսի 1918 թ., «Աշխատանքի դրոշակ», 25 հունիսի 1918 թ.:

¹⁰⁶ *Кавказское слово*, 11 июня, 1918г., «Աես», 1934, թիվ 9, էջ 94, Ա. Բարալյան, նշվ. աշխ., էջ 10,12

¹⁰⁷ Ս. Վրացյան, *Հայաստանի Հանրապետություն, Բեյրութ, 1958*, էջ 178:

ՀՅԳ-ի և ՀԺԿ-ի միջև հակամարտությունը այնքան բացահայտ ու սկզբունքային բնույթ էր ստացել, որ անգամ դրան անդրադարձել է մինչև իսկ ռուսալեզու «Կավկասկոյե սլովոն»: Թերթը անտեղի էր համարում ժողովրդականների մեղադրանքները Դաշնակցության հասցեին, որովհետև ըստ նրա՝ աշխարհամարտի տարիներին «Սշակը» և նրա իրավահաջորդ ժողովրդականները չեն ունեցել հատակորեն արտահայտված ինքնուրույն ազգային քաղաքական կուրս (ուղեգիծ) և գրեթե բոլոր սկզբունքային հարցերում (պատերազմի և հաշտության, կամավորական շարժման, Տաճկահայաստանի ինքնորոշման, Անդրկովկասի վարչական սահմանների բաժանման, Տրապիզոնի բանակցությունների, Անդրկովկասի անկախության և այլն) «Սշակը» և ՀԺԿ գնացել են Դաշնակցության հետ ու համերաշխվել նրան¹⁰⁸: Ուստի, եթե քաղաքական այդ խնդիրներում սխալներ ու ձախողումներ են եղել, ապա դրանց պատասխանատվությունը հավասարապես պետք է կիսեր նաև ՀժԿ կուսակցությունը:

Ի դեպ, համանման ձևով այդ նույն օրերին ընդդիմադիր Վրաց ազգային-դեմոկրատների կուսակցությունը և նրա օրգան «Սաքարթվելոն» նույն կերպ քննադատության տարափ էին տեղում կառավարություն կազմած վրաց սոցիալ-դեմոկրատների (մենչևիկների) վրա: Վրաց կալվածատերերի շահերն արտահայտող Ազգային-դեմոկրատները մեղադրում էին վրաց մենչևիկներին, որ նրանց վարած անհեռատես քաղաքականության հետևանքով Վրաստանի գրեթե կեսը խլվել է թուրքերի կողմից¹⁰⁹: Վրաց կառավարությանը համեմատաբար մեղմ կերպով, քննադատում էին նաև վրաց սոցիալիստ-ֆեդերալիստները և նրանց օրգան «Սախալխո սաքմեն»:

Հ. Քաջագունին, բացի ժողովրդականներից, կառավարության մեջ մտնելու առաջարկ էր արել թե՛ Էսեռներին և թե՛ սոցիալ-դեմոկրատներին, սակայն տարբեր պատճառաբանություններով մերժում էր ստացել: Էսեռները հայտարարեցին, որ իրենք հրաժարվում են կաբինետ մտնել¹¹⁰: Այսպես, հունիսի 7-ին Էսեռական կուսակցության հայ հասովածը, Թիֆլիսում գումարելով իր ընդհանուր ժողովը, Հայոց Ազգային խորհրդի անդամ Ա. Ստամբոլցյանի տված զեկուցման հիման վրա, ձայների բացարձակ մեծամասնությամբ որոշեց «սկզբունքային նկատառումներով» չմտնել կառավարության մեջ¹¹¹: Սկզբունքային նկատառում ասելով՝ նրանք հավանաբար նկատի ունեին այն, որ Անդրկովկասն անջատվել էր Ռուսաստանից, իսկ Հայաստանը՝ հայտարարվել անկախ: Բացի այդ՝ սոցիալիստական (Էսեռ և սոց.-դեմ.) այս կուսակցությունները չցանկացան իշխանությունը կիսել բուրժուական որակվող Ժո-

¹⁰⁸ *Кавказское слово, 11 июня 1918г., «Հորիզոն», 13 հունիսի 1918 թ.:*

¹⁰⁹ *«Հորիզոն», 13 հունիսի 1918 թ.:*

¹¹⁰ *Նույն տեղում, 9 հունիսի 1918 թ.:*

¹¹¹ *«Աշխատանքի դրոշակ», Թիֆլիս, 30 հունիսի 1918:*

դովրդական կուսակցության հետ¹¹²: Կնշանակի՝ Հայաստանի համար, իրոք, շատ ծանր ժամանակաշրջանում մյուս կուսակցությունները փաստորեն բոյկոտեցին նորակազմ կառավարությունը և ողջ պատասխանատվությունը ՀՅԴ ստանձնեց միայնակ: «Երեկվան ֆեդայական, հայդուկային կազմակերպությունը,- գրում է ռամկավար Ա. Դարբինյանը իր հուշերում,- այսօր դարձել է օրինական կառավարություն և ղեկավարում է Հայաստանի պետական կյանքը: Շատ ծանր բեռ է առել նա իր ուսերին: Մեր մյուս կուսակցությունները հեռվից և վերապահությամբ են օժանդակում նրան»¹¹³:

Այսպիսով, հայ քաղաքական կուսակցությունները չկարողացան համաձայնության գալ միմյանց հետ կուսակցական սկզբունքով խառը (կոալիցիոն) կառավարություն կազմելու համար:

Տեսնելով, որ այդ ճանապարհով գործը չի հաջողվում, հունիսի վերջին հանձնարարվեց վարչապետին կառավարություն կազմել անհատական կարգով¹¹⁴: Հ. Քաջազունու անդրանիկ կառավարության մեջ մտան չորս դաշնակցական (Հ. Քաջազունի՝ նախարար-նախագահ, Ալ. Խատիսյան՝ արտ. գործ., Ա. Մանուկյան՝ ներք. գործ., Խ. Կարճիկյան՝ ֆինանսների) և երկու անկուսակցական (գորավար Հ. Հախվերդյան՝ զինվորական և մի փոքր ուշ՝ հուլիսի 28-ից Գ. Պետրոսյան՝ արդարադատության նախարար): Վերջինս համակիր էր Ժողովրդական կուսակցությանը¹¹⁵:

Խոսելով անդրանիկ կառավարության կազմի գործարար կարողությունների մասին՝ չի կարելի համաձայնել էսէռ Ա. Խոնդկարյանի այն պնդմանը, թե Քաջազունու այս կարիները շատ թույլ էր անձնական կազմով: Եվ սա ասվում էր այն դեպքում, երբ այդ կառավարության մեջ էին մտնում այնպիսի հանրաճանաչ ու փորձառու գործիչներ, ինչպիսիք էին վերոգրյալ դաշնակցական չորս նախարարները: Առաջին կառավարությունը, իհարկե, եթե իրավասությունների (լիազորությունների) առումով թույլ էր, ապա անձնական կազմի տեսակետից՝ ոչ ամենևին: Նշենք որ հետագայում նախարարությունների քանակը ավելացվեց:

Հայտնի է նաև, որ Հ. Քաջազունին, լինելով ՀՅԴ շարքերում, պետական տեսակետի ամենահետևողական ջատագով, ջանում էր ուժեղացնել պետական իշխանությունը և կուսակցական կառույցներին հնարավորին չափ հեռու պահել պետական, կառավարության գործերին միջամտելուց և ուղղակի ցուցումներ տալուց:

Հուլիսի կեսերին ՀՅԴ ղեկավարությունը և Քաջազունու կաբինետը վճռապես հարց բարձրացրին Ազգային խորհուրդն ու կառավարությունը Թիֆլիսից Երևան փոխադրելու վերաբերյալ: Սրան նպաստեց նաև վրաց կա-

¹¹² Ո. Հովհաննիսյան, *Հայ Յեղափոխական Դաշնակցության դերը ՀՀ-ի մեջ*, «Ասպարեզ», 28/29 մայիսի 1992 թ.:

¹¹³ Ա. Դարբինյան, *նշվ. աշխ.*, էջ 432:

¹¹⁴ «Հորիզոն», 28 հունիսի 1918 թ., «Աշխատանքի դրոշակ», 30 հունիսի 1918 թ.:

¹¹⁵ «Ժողովուրդ», 14 օգոստոսի 1918 թ.:

ռավարության համանման պահանջը ու անբարյացակամ վերաբերմունքը Հայաստանի իշխանությունների հանդեպ: Հուլիսի 13-ին Հայոց Ազգային խորհրդի և Հայաստանի կառավարության համատեղ նիստում ձայների մեծամասնությամբ (7 կողմ և 5 դեմ) որոշվեց հուլիսի 16-ին ամբողջ կազմով տեղափոխվել Երևան¹¹⁶: Տեխնիկական պատճառներով մեկնումը կատարվեց հուլիսի 17-ին: Ավելացնենք, որ Ազգային խորհրդի Երևան տեղափոխվելու հետևանքով, վիրահայոց ազգային գործերը ղեկավարելու համար, 1918 թ. ամռանը կազմվեց Վրաստանի Հայ ազգային խորհուրդ: Այնտեղ կուսակցական ներկայացուցչության սկզբունքով մտան 4 դաշնակցական, 4 ժողովրդական, 4 սոցիալ-դեմոկրատ և 3 էսէռ անդամներ¹¹⁷: Վիրահայոց ազգային խորհուրդը մերժեց Հնչակյան կուսակցության առաջարկն իր ներկայացուցչին ընդունել խորհրդի կազմում¹¹⁸:

Մինչ Հայաստանի նորակազմ կառավարությունը Թիֆլիսից կժամաներ Երևան, տեղում իշխանությունն իրականացնում էր Երևանի Հայ ազգային խորհուրդը¹¹⁹, ժողովրդի կողմից Երևանի դիկտատոր ճանաչված Արամ Մանուկյանը ու նրա գլխավորած քաղաքային վարչությունը: Նա կազմակերպել էր վարչություններ և սպասում էր նորընտիր կառավարության և Ազգային խորհրդի մայրաքաղաք փոխադրվելուն: 1918 թ. հուլիսի 17-19-ի ընթացքում Հայոց Ազգային խորհուրդը և կառավարությունը Թիֆլիսից ժամանեցին Երևան¹²⁰: Կառավարության կազմը Երևանում ստացավ ավարտուն տեսք:

Այսպիսով, 1918 թ. հուլիսի երկրորդ կեսից Հայոց Ազգային խորհրդի և կառավարության Հայաստանի մայրաքաղաք փոխադրումով հայ քաղաքական կյանքի կենտրոնը, որ մինչ այդ համարվում էր Թիֆլիսը, այժմ դարձավ Երևանը:

ՀՀ հռչակումից հետո Հայոց Ազգային խորհրդի առջև ծառայած մյուս խնդիրը խորհրդարանի ձևավորումն էր: Ստեղծված արտասովոր պայմաններում, երբ պակասում էին ժամանակը և հնարավորությունը խորհրդարանի համաժողովրդական ընտրություններ անցկացնելու համար, Հայոց Ազգային խորհուրդը, հետևելով Անդրկովկասյան սեյմի և Վրաց Ազգային խորհրդի օրինակին, դեռևս Թիֆլիսում հանգեց Հայաստանի ապագա խորհրդարանը Ազգային խորհրդի մեջ մտնող կուսակցությունների ներկայացուցիչների թվի համամասնական եռապատկման միջոցով կազմելու գաղափարին:

Սկզբում որոշվել էր խորհրդարանը կոչել **Պեպական խորհուրդ**, բայց հետո այն պաշտոնապես կոչվեց «Հայաստանի խորհուրդ»: Հասկանալի է, որ այս խորհրդարանը լինելու էր ժամանակավոր, մինչև որ ժողովրդավարա-

¹¹⁶ «Հորիզոն», 17 հուլիսի 1918 թ.:

¹¹⁷ «Հորիզոն» 12 հուլիսի 1918 թ., «Ժողովուրդ», 14 օգոստոսի 1918 թ., «Աշխատանքի որոշակ», 12 հուլիսի 1918 թ.:

¹¹⁸ «Հորիզոն», 20 սեպտեմբերի 1918 թ.:

¹¹⁹ ՀՀ ՊԿՊԱ, Ֆ. 201, ց. 1, գ. 15, թթ. 4-5:

¹²⁰ «Հորիզոն», 27 հուլիսի 1918 թ., Ա. Բաբայան, նշվ. աշխ., էջ 9-12:

կան ընտրությունների ճանապարհով կիրավիրվեր Սահմանադիր ժողով (նոր խորհրդարան):

1918 թ. հուլիսի վերջերին արդեն Երևանում՝ Հայոց և Երևանի ազգային խորհուրդների համատեղ նիստերում, ձայների մեծամասնությամբ որոշվեց՝ Հայոց Ազգային խորհրդի անդամների թվի, կուսակցական համամասնությամբ եռապատկելու (բացի անկուսակցականները), ինչպես նաև հանրապետությունում ապրող ազգային փոքրամասնությունների ներկայացուցիչներ հրավիրելու միջոցով կազմել Հայաստանի առաջին օրենսդիր մարմինը՝ Հայաստանի խորհուրդը (խորհրդարանը)¹²¹:

Հայոց Ազգային խորհրդի չորս կուսակցությունները Հայաստանի խորհրդում ներկայացվեցին հետևյալ թվով՝ ՀՅԳ (6x3) 18, ՀԺԿ (2x3) 6, Սոց.-դեմ. (2x3) 6, Սոց.-հեղափ. (2x3) 6: Չեռապատկվեցին միայն երեք անկուսակցականները (չեզոքները): Կենտրոնական և Երևանի Ազգային խորհուրդների համատեղ նիստում խոսվում է այդ մասին: Սակայն անկուսակցականները երեք տեղի փոխարեն Հայաստանի խորհրդում զբաղեցնում են երկու տեղ¹²²: Հայոց Ազգային խորհրդի անկուսակցական երեք անդամներից Երևան են ժամանում և Հայաստանի խորհրդում իրենց պատգամավորական տեղերն են զբաղեցնում երկու հոգի՝ Ստեփան Մամիկոնյանը և Պետրոս Ջաքարյանը, իսկ երրորդը՝ Տիգրան Բեկզադյանը, Երևան չի գալիս և Հայաստանի կառավարության հանձնարարությամբ զբաղվում է դիվանագիտական աշխատանքով: Այս մեկ անկուսակցական ներկայացուցչի պակասն էր պատճառը, որ Հայաստանի խորհուրդը պաշտոնապես 47-ի փոխարեն հենց սկզբից էլ ունեցավ ընդամենը 46 պատգամավոր:

Հայաստանի խորհրդում Գաշնակցությունը ստացավ 18, իսկ մնացած երեք կուսակցությունները (ՀԺԿ, սոց.,դեմ. և սոց.-հեղ.) 6-ական ձայն: Բայց ինչպես հետագայում խոստովանում էր սոց.-հեղ. գործիչ Ա. Խոնդկարյանը, «Ուժերի այս բաշխումը չէր համապատասխանում իրականության: Կասկածից դուրս է, որ Գաշնակցությունը շատ ավելի հետևորդներ ուներ, քան մյուս երեք կուսակցությունները միասին վերցրած»¹²³: Արդյունքում՝ Հայաստանի խորհրդի հայ պատգամավորների թիվը կազմեց ընդամենը 38 մարդ:

Ինչպես արդեն ասվեց, սահմանվեց նաև, որ «Հայաստանի Հանրապետության պառլամենտի աշխատանքներին առաջին իսկ նիստից պիտի մասնակցեին հանրապետության բոլոր ազգությունների ներկայացուցիչները՝ ազգաբնակչության համեմատական թվի սկզբունքով»¹²⁴: Այդ նպատակով կազմվեց մի համձնաժողով, որը բանակցեց մյուս ազգությունների ներկայացուցիչների հետ ու համաձայնության եկավ Հայաստանի խորհրդում ընդգրկել ազգային փոքրամասնությունների պատգամավորներ: Բանակցությունների

¹²¹ «Հորիզոն», 27 հուլիսի 1918 թ.:

¹²² ՀՀ ՊԿՊԱ, Ֆ. 200, ց. 1, գ. 282, թ. 2, «Խոսք», 20 դեկտեմբերի 1918 թ.:

¹²³ «Վես», Փարիզ, 1934, թիվ Ե., էջ 47:

¹²⁴ «Հորիզոն», 27 հուլիսի 1918 թ.:

արդյունքում՝ 38 հայազգի պատգամավորներին գումարվեցին նաև ազգային փոքրամասնություններից հրավիրված ներկայացուցիչներ՝ 6 թուրք (հաշվի առնելով, որ ՀՀ կար զգալի թվով թուրք-թաթար), մեկ ռուս և մեկ քուրդ (եզդի)՝ ընդամենը 8 անդամ: Այդպիսով՝ Հայաստանի խորհրդի պատգամավորների ընդհանուր թիվը կազմեց 46 հոգի:

Համեմատության համար ասենք, որ Վրաստանի նույնատիպ (Ժամանակավոր) խորհրդարանը, որը սկսել էր գումարվել հունիսի սկզբներից, մինչև հոկտեմբերի 1-ը իր կազմում չուներ ազգային փոքրամասնությունների (հայ, ռուս, թաթար) և ոչ մի ներկայացուցիչ¹²⁵: Եվ սա այն դեպքում, երբ Վրաստանը պաշտոնապես կոչվում էր **Գեոկրասպական** Հանրապետություն, իսկ այնտեղ կառավարողները սոցիալիստներ էին: Ազգային փոքրամասնությունների ներկայացուցիչներ վրաց խորհրդարանում ընդգրկվեցին միայն այն բանից հետո, երբ նա ընդունեց Վրաստանի Հանրապետության քաղաքացիության մասին օրենքը¹²⁶: Վրաց խորհրդարանում հայերին հատկացվեց 10 տեղ: Ըստ կուսակցական պատկանելության՝ ՀՅԳ-ին՝ 3, մյուս կուսակցություններին (ՀԺԿ, սոց.-դեմ, ԷսէՆ)՝ 2-ական տեղ և մեկ թափուր տեղ¹²⁷: 1918 թ. հոկտեմբերի 1-ից վրացական խորհրդարանի նիստերին սկսեցին մասնակցել հայ պատգամավորները¹²⁸: Ինչ վերաբերում է Ադրբեջանի խորհրդարանին (մեջլիսին)՝ ազգային փոքրամասնությունների ներկայացուցիչների ընդգրկումը կատարվեց ավելի ուշ՝ դեկտեմբերի սկզբներից¹²⁹:

5. Հայաստանի խորհրդի առաջին քայլերը

Հայաստանի խորհրդի պաշտոնական բացումը տեղի ունեցավ հինգ-շաբթի օրը՝ օգոստոսի 1-ին: Ժամանակակիցներից մեկը (բժիշկ Հ. Մելիքյանը) այդ օրը համարում է Երևանի տարեգրության ամենաահիշարժան օրերից մեկը¹³⁰: Խորհրդարանի աշխատանքների համար հարմարացվել էր քաղաքային ակումբի շենքը, որը նախկինում պատկանում էր Երևանի թեմական դպրոցին: Նիստը բացվեց ժամը 11.30-ին: Ժողովուրդը խռնվել էր քաղաքային ակումբի շենքի առջևում գտնվող կենտրոնական այգում և մայթերին:

Դահլիճում պատգամավորները տեղեր էին զբաղեցրել հետևյալ կերպ: Աջ կողմում՝ Հայ ժողովրդական կուսակցության խմբակցության անդամներ՝

¹²⁵ Նույն տեղում, 20 հունիսի 1918 թ.:

¹²⁶ Նույն տեղում, 9 հոկտեմբերի 1918 թ.:

¹²⁷ Նույն տեղում, 20 սեպտեմբերի 1918:

¹²⁸ «Ժողովրդի ձայն», Թիֆլիս, 9 հոկտեմբերի 1918 թ.

¹²⁹ «Նոր հորիզոն», 28, 29 նոյեմբերի եւ 4 դեկտեմբերի 1918 թ.:

¹³⁰ «Հայրենիք», 1925, թիվ 9, էջ 100:

Ստ. Մալխասյանը, Արշ. Մխիթարյանը, Գր. Տեր-Խաչատրյանը, Հովհ. Մելիք-յանը, Գարեգ. Ենգիբարյանը և Սիր. Տեր-Մարտիրոսյանը¹³¹:

Նույն կողմում էին անկուսակցականներ՝ Ստ. Մամիկոնյանը և Պետր. Չաքարյանը, մահմեդական 6 պատգամավորները՝ Սեիդ-Ռեզա Միր-Բաբանը, Սիրզա Ջաբար Մամեդովը, Աբալեր-ադա Իսմայիլովը, Միր-Բադիր Միր Բաբանը, Մամեդ-բեկ Մամեդ-Բեկովը, Ասադ-բեկ Ադաբաբ-Բեկովը, ռուս պատգամավոր՝ Իվան Ջորիմը և եզդի պատգամավոր Յուսուֆ-բեկ Թեյմուրովը¹³²:

Դահլիճի կենտրոնում տեղ էր զբաղեցրել ՀՅԳ խմբակցությունը՝ Ավ. Սահակյան, Սիր. Տիգրանյան, Սմբ. Խաչատրյան, Սահ. Թորոսյան, Արտ. Բաբայան, Եփր. Սարգսյան, Ռ. Տեր-Սիմասյան, Հովհ. Տեր-Սիբայեյան, Արտ. Ղազարյան, Դր. Կանայան, Հով. Բուդաղյան, Տիգ. Ռաշմաճյան, Թադ. Թոշյան, Հակ. Տեր-Հակոբյան, Հայկ. Սարգսյան, Արտ. Վանցյան, Ար. Աստվածատրյան¹³³: ՀՅԳ խմբակցության նախագահն էր Սմբատ Խաչատրյանը:

Չախ կողմում տեղեր էին զբաղեցրել սոցիալիստ-հեղափոխական (էսեռական) և սոցիալ-դեմոկրատական խմբակցությունները. էսեռներ՝ Գր. Տեր-Հակոբյան, Դավիթ Ջուբյան, Արշամ Խոնդկարյան, Գ. Տեր-Օհանյան, Տիգ. Մուշեղյան և Արմ. Ավետիքյան. սոց.-դեմոկրատներ՝ Հայկ Ազատյան, Թադ. Ավդալբեկյան, Մ. Ղարաբեկյան, Ա. Մելիք-Աղաջանյան, Հովհ. Չաքարյան (մենշևիկներ) և Արշավիր Մելիքյան (բոլշևիկ)¹³⁴: Վերջինս առաջադրվել էր պատգամավոր Երևանի սոց.-դեմ. տեղական կազմակերպության ընդհանուր ժողովում: Արդյունքում՝ 5 մենշևիկները և 1 բոլշևիկը Հայաստանի խորհրդարան են մտնում որպես ռուսական սոց.-դեմ. կուսակցության միացյալ կազմակերպության ներկայացուցիչ¹³⁵:

Դահլիճի օբյակներից մեկը հարմարեցված էր կառավարության անդամների համար: Առանձին տեղ էր պատրաստված նաև Ամենայն Հայոց կաթողիկոսի համար: Սակայն այդ օրը Վեհափառը՝ Գևորգ Ե-ն, բացակայում էր¹³⁶: Խորհրդարանի հանդիսավոր բացմանը ներկա էին Գերմանիայի,

¹³¹ «Ժողովուրդ», 14 օգոստոսի 1918 թ.:

¹³² «Հորիզոն», 9 օգոստոսի 1918 թ., «Աշխատանքի դրոշակ», 8 օգոստոսի 1918 թ.:

¹³³ Պատգամավոր Ավ. Մարտիրոսյանը գտնվում էր գործուղման մեջ (Կ. Պոլիս):

¹³⁴ «Վեմ», Փարիզ, 1934, թիվ 2, էջ 114-115, «Հորիզոն», 7 օգոստոսի 1918 թ., «Աշխատանքի դրոշակ», 8 օգոստոսի 1918 թ.: Խորհրդարանական կուսակցությունները իրավունք ունեին անհրաժեշտության դեպքում փոխել իրենց պատգամավորներին՝ հետ կանչել մեկին և նշանակել մեկ ուրիշին: Համաձայն կանոնի՝ պատգամավորներ փոփոխելիս՝ անպայման պետք է լինեն հետ կանչվող պատգամավորի գրավոր համաձայնությունը («Չամգ», 16 փետրվարի 1919 թ.): Այդ հիման վրա պատգամավորների կազմը հետագայում ենթարկվեց զգալի փոփոխությունների:

¹³⁵ «Խոսք», 20 դեկտեմբերի 1918 թ.:

¹³⁶ «Հայրենիք», 1925, թիվ 9, էջ 101:

Ավստրո-Հունգարիայի, Թուրքիայի, Պարսկաստանի և Ռուսիանայի պատվիրակները¹³⁷:

Ռուսաստանի մեռելածին Սահմանադիր ժողովի և Անդրկովկասյան Սեյմի (խորհրդարանի) պատվիրանների (НАКАЗ) օրինակով՝ մշակվեց ու հաստատվեց Հայաստանի խորհրդի աշխատակարգը՝ **ռեզլամենկը**¹³⁸: Հայաստանի խորհրդի ընդունած աշխատակարգի համաձայն՝ առաջին նիստը բացելու էր խորհրդի ամենատարեց անդամը, որը կատարելու էր նախագահորդի պարտականությունը մինչև մշտական նախագահի ու քարտուղարի ընտրությունը¹³⁹: Խորհրդի անդամների լիազորությունները ստուգելու համար ընտրվում է մանդատային հանձնաժողով: Լիազորությունները ճշտելուց հետո խորհուրդը ձեռնամուխ է լինում նախագահի և քարտուղարի ընտրությանը:

Հայաստանի խորհրդի աշխատակարգը բաղկացած էր **ուր բաժիններից և 201 հոդվածներից**¹⁴⁰: Աշխատակարգով սահմանվում էր հետևյալը. խորհրդարանի պաշտոնատար անձանց ընտրություն, խորհրդարանի հանձնաժողովների ձևավորում, դրանց աշխատակարգի, օրինագծերի մշակում քննարկումների ու քվեարկությունների կարգի մասին և այլն: Ըստ աշխատակարգի՝ խորհուրդն ուներ նախագահություն, որը կազմված էր խորհրդի նախագահից, նախագահի երկու օգնականից, քարտուղարից և նրա օգնականից:

Քվեարկությունները կատարվելու էին բաց և փակ (գաղտնի): Փակ քվեարկությունները կատարվում էին հատուկ պատրաստված քվեարկության շարերի (գնդերի, քվեաշարի) միջոցով¹⁴¹: Աշխատակարգով նախատեսված էր նաև անվանական քվեարկություն:

Նկատենք, որ խորհրդի անդամներից շատերը մինչ այդ արդեն Անդրկովկասյան սեյմում կուտակել էին խորհրդարանական գործունեության ու օրենսդրական աշխատանքի որոշ փորձ:

Խորհրդի հանդիսավոր նիստը բացեց Հայոց Ազգային խորհրդի փոխնախագահ, ՀՅԴ պատգամավորական խմբակցության անդամ, տարիքով ավագագույնը՝ Ավետիք Սահակյանը: Նա իր բացման խոսքում ընդգծում էր այն միտքը, որ խորհուրդը հանդիսանալու ՀՀ պետական իշխանության գերագույն իրավասու մարմինը: Նա ունենալու էր ոչ միայն բարձրագույն օրենսդիր մարմնի, այլ առանձին դեպքերում գործադիր իշխանության իրավասություններ: Ա. Սահակյանը հույս էր հայտնում, որ «կյանքի երկաթյա օրենքի ուժով» կընդարձակվեն Հայաստանի սահմանները: Վերջում նա կոչ արեց

¹³⁷ Ռ. Հովհաննիսյան, Հայաստանի Հանրապետություն, հ. 1, էջ 42 (անգլերեն):

¹³⁸ «Հորիզոն», 23 օգոստոսի 1918 թ., «Վեմ», 1934, թիվ Լ, էջ 87:

¹³⁹ ՀՀ ՊԿՊԱ, Ֆ. 198, ց. 1, գ. 3, ք. 2:

¹⁴⁰ Նույն տեղում, քթ 1-11:

¹⁴¹ ՀՀ ՀԶԿՓ ՊԿԱ, Ֆ. 4051, ց. 1, գ. 42, ք. 2:

պատգամավորներին լծվել հայոց երիտասարդ պետության շենքի կառուցման գործին¹⁴²:

Նույն օրը՝ ժամը 12-ին, «Մեր հայրենիք» օրհներգի հնչյունների ներքո խորհրդարանի շենքի գլխին բարձրացվեց հայկական եռագույն դրոշը: Հայկական եռագույնի՝ որպես հանրապետության պետական դրոշի վերաբերյալ որոշում էր կայացվել 1918 թ. հուլիսի վերջերին Երևանում Հայոց և Երևանի հայ ազգային խորհուրդների միացյալ նիստերից մեկում: «Ժողովրդի ձայնը» հայտնում է, որ այդ մասին առաջարկություն էր մտցրել Հայ ժող. կուսակցության ներկայացուցիչ Ստ. Մալխասյանը¹⁴³:

Այնուհետև Ավ. Սահակյանը առաջարկեց պատգամավորներին ընտրել Հայաստանի խորհրդի նախագահ: Առանց մեծ բարդությունների ու ձգձգումների կռալիցիոն սկզբունքով ձևավորվեց խորհրդի նախագահությունը: ՀՅԳ խմբակցության խոսնակ Սմբատ Խաչատրյանը առաջարկեց նախագահի պաշտոնի համար Ավետիք Սահակյանի թեկնածությունը, որը բաց քվեարկությամբ ընտրվեց Հայաստանի խորհրդի նախագահ: Չեռնպահ մնացին սոց.-դեմ. (6) պատգամավորները¹⁴⁴: Մնացած բոլոր խմբակցությունները, այդ թվում՝ թուրքականը և անկուսակցականները կողմ քեարկեցին Ավ. Սահակյանին¹⁴⁵: Խորհրդարանի փոխնախագահներ ընտրվեցին **Գրիգոր Տեր-Խաչատրյանը** (ՀԺԿ), որի ժամանակ ձեռնպահ մնացին 4 սոց.-դեմ. պատգամավորները և սոցիալիստ-հեղափոխական (էսէն) **Դավիթ Չուրյանը**՝ միաձայն: Խորհրդի ավագ քարտուղար ընտրվեց անկուսակցական **Պեպրոս Չարսրյանը**:

Հանդիսավոր նիստի ավարտից հետո դրսում՝ հրապարակում, տեղի ունեցավ ՀՀ առաջին գորահանդեսը, որն ընդունեց հայկական կորպուսի հրամանատար, գորավար Թ. Նազարբեկյանը: Ականատեսը պատմում է, որ հայ ազգային զորքը շարքեշարք անցնում էր իրենց առջևից, և այդ պահին հուզմունքից հազարավոր հանդիսականների աչքերից հոսում էին արտասուքի կաթիլներ¹⁴⁶:

Հաջորդ նիստում՝ օգոստոսի 3-ին, լսվեց վարչապետ Հ. Քաջազունու կառավարության հայտարարությունը՝ հայտարագիրը: Որի համաձայն՝ կառավարությունը իր գործունեության հիմքում դնում էր հետևյալ հիմնական խնդիրները՝ կասեցնել երկրի քայքայման պրոցեսը, հաստատել տարրական իրավակարգ և կատարել դատաիրավական բարեփոխումներ, բացել հաղորդակցության ուղիները, վերականգնել կապի միջոցները, մեղմացնել պարենային ճգնաժամը և գաղթականների վիճակը, ստեղծել սեփական դրամական

¹⁴² «Հորիզոն», 9 օգոստոսի 1918 թ.:

¹⁴³ «Ժողովրդի ձայն», Թիֆլիս, 20 հոկտեմբերի 1918:

¹⁴⁴ «Հորիզոն», 9 օգոստոսի 1918 թ., «Աշխատանքի դրոշակ», 11 օգոստոսի 1918 թ.:

¹⁴⁵ «Վես», 1934, թիվ 2, էջ 79:

¹⁴⁶ «Հայրենիք», 1925, թիվ 9, էջ 101:

համակարգ, վերակառուցել երկրի զինուժը, դրացիական հարաբերություններ հաստատել հարևան երկրների հետ և այլն¹⁴⁷:

Իր ելույթում վարչապետը զարգացնում էր իրատեսական այն միտքը, որ հանրապետությունում առկա անձն քառսի և ավերակների կույտի պայմաններում կառավարությունն ամեն ինչ սկսում է գրոյից և իր առջև դնում է միայն իրագործելի խնդիրներ: Հիրավի, Հայաստանի նորաստեղծ հանրապետության կառավարությանը բաժին էր հասել տխուր ժառանգություն. 10-12 հազար կմ² կիսալեռնաստան և տնտեսապես քայքայված ու կազմալուծված մի երկրամաս՝ շուրջ մեկ միլիոնի հասնող բազմազգ բնակչությանը, որից շուրջ 300 հազարը՝ գաղթականներ: «Տասը հազար քառակուսի վերստ էր այդ Հայաստանը,- գրում էր Լեոն,- մեծ մասամբ լեռ ու անապատ՝ Սևանի լճի չորս կողմը, հայ ժողովրդի ոչ թե բնակության տեղ, այլ գերեզման»¹⁴⁸: «... Չկար ոգևորություն կամ հույս,- խորհում էր այդ օրերի մասին Ա. Բաբայանը,- թե պիտի կարողանանք **խեղդող օդակից դուրս հանել հայ ժողովուրդը** (ընդգծումը հեղինակինն է, Ա. Հ.)»¹⁴⁹:

Օգոստոսի 5-ին (3-րդ նիստում) հայտագրի առթիվ արտահայտվեցին խմբակցությունները: ՀԺԿ խմբակցությունը հիմնականում հավանություն տվեց կառավարության որդեգրելիք քաղաքականությանը, քաղաքականություն, որը չէր նույնանում ՀՅԴ ծայրահեղ ծրագրային պահանջներին: Քաջազնունու կառավարության հայտարարությունից մասնավորապես դժգոհություն է արտահայտում «ճախ» ընդդիմությունը: Այսպես՝ էսէռների խմբակցության խոսնակ Ա. Խոնդկարյանը կառավարության հայտագիրը համարում էր պարզունակ, իսկ սոց.-դեմ. խոսնակ Հ. Ազատյանը այն նմանեցնում էր Ստոլիպինի կառավարության վարած քաղաքականությանը¹⁵⁰: Պետք է ասել, որ ընդհանուր առմամբ խմբակցությունների տված գնահատականները զուսպ էին: Խորհրդարանի հաջորդ՝ օգոստոսի 6-ի (4-րդ) նիստում Քաջազնունին լրացուցիչ բացատրություններ ու պարզաբանումներ է տալիս ընդդիմադիր խմբակցությունների ու առանձին պատգամավորների արած դիտողություններին ու առարկայություններին: Նույն նիստում 23 ձայնով և 11 ձեռնպահությամբ (ոչ մի դեմ) հավանություն է տրվում կառավարության հայտագրին¹⁵¹: Այնուհետև օգոստոսի 15-ի նիստում ՀԺԿ խմբակցության անդամ Ս. Տեր-Մարտիրոսյանի ներկայացմամբ միաձայն հաստատվեցին պատգամավորների մանդատները¹⁵²:

Խորհրդարանի աշխատանքները կազմակերպելու և օրենսդրական գործունեություն ծավալելու համար շատ կարևոր էր հանձնաժողովների ձևա-

¹⁴⁷ «Հորիզոն», 15 օգոստոսի 1918 թ.:

¹⁴⁸ Լեո, Անցյալից, Թիֆլիս, 1925, էջ 404:

¹⁴⁹ Ա. Բաբայան, Աշվ. աշխ., էջ 11:

¹⁵⁰ «Հորիզոն», 22 օգոստոսի 1918 թ.:

¹⁵¹ «Հորիզոն», 7 սեպտեմբերի 1918 թ., «Ժողովուրդ», 14 օգոստոսի 1918 թ.:

¹⁵² «Ժողովուրդ», 18 օգոստոսի 1918 թ.:

վորումը: Եւ առանց հապաղելու, հենց օգոստոս ամսին, առաջին նիստերի ընթացքում կազմվեցին խորհրդի հանձնաժողովները՝ հետևյալ սկզբունքով՝ յուրաքանչյուր հանձնաժողովում երեքական հոգի ՀՅԳ խմբակցությունից և մեկական հոգի մյուս խմբակցություններից, այսինքն՝ պահպանվեց այն համամասնությունը, ինչպես որ կազմվել էր խորհրդարանը: Ժամանակի ընթացքում Հայաստանի խորհրդի հանձնաժողովների ցանկը կրեց առանձին փոփոխություններ:

Հայաստանի խորհուրդն ուներ հետևյալ հանձնաժողովները՝ 1.Ֆինանսական, 2.Օրենսդրական, 3.Ինքնավարության, 4.Խմբագրական, 5.Կարգադրիչ, 6.Գյրոցական, 7.Պարենավորման, 8.Գաղթականության, 9.Բժշկա-սանիտարական, 10.Հողային, 11.Աշխատանքի, 12.Մանդատային, 13.Նակազի և 14.Հարցապնդումների¹⁵³: Ընտրվեցին հանձնաժողովների անդամները և նրանց նախագահները:

1. **Ֆինանսական հանձնաժողով** Ա. Վանցյան, Հ. Սարգսյան, Հ. Տեր-Միքայելյան, Ա. Ավետիքյան, Ա. Մելիքյան, Ս. Տեր-Մարտիրոսյան, Ի. Չորին:

2. **Օրենսդրական** Ս. Տիգրանյան, Հ. Բուդաղյան, Ռ. Տեր-Սինասյան, Ա. Խոնդկարյան, Հ. Չաքարյան, Գ. Տեր-Խաչատրյան:

3. **Ինքնավարությունների** Թ. Թոշյան, Ս. Խաչատրյան, Գ. Ենգիբարյան, Հ. Ազատյան, Ա. Խոնդկարյան:

4. **Խմբագրական** Ս. Տիգրանյան, Ստ. Մալխասյան, Հ. Տեր-Հակոբյան, Հ. Չաքարյան, Գ. Չուբյան, Ի. Չորին, Ա. Աղբաբ-բեկով:

5. **Կարգադրիչ** Հ. Տեր-Միքայելյան, Ե. Սարգսյան, Հ. Տեր-Հակոբյան, Ա. Ավետիքյան, Հ. Չաքարյան, Գ. Ենգիբարյան:

6. **Գյրոցական** Տ. Ռաշմաճյան, Հ. Տեր-Հակոբյան, Ս. Տիգրանյան, Ստ. Մալխասյան, Ա. Մելիքյան, Գ. Չուբյան, Ի. Չորին, Ջ. Մամեդով:

7. **Պարենավորման** Տ. Ռաշմաճյան, Թ. Թոշյան, Հ. Մելիքյան, Ա. Մելիք-Աղաջանյան, Գ. Տեր-Օհանյան, Ս. Միր-Բաբան:

8. **Գաղթականության** Ա. Բաբալյան, Ռ. Տեր-Սինասյան, Հ. Մելիքյան, Թ. Ավդալբեկյան, Գ. Տեր-Օհանյան, Ս. Ռիզա Միր-Բաբան, Յ. բեկ Թեյմուրով:

9. **Բժշկա-սանիտարական** Ա. Ղազարյան, Ա. Բաբալյան, Հ. Տեր-Միքայելյան, Ա. Մխիթարյան, Հ. Չաքարյան, բժ. Տեր-Հակոբյան, Ի. Խամայիլով:

10. **Հողային** Հ. Չաքարյան, Ս. Մալխասյան, Հ. Ազատյան, Ա. Տեր-Ավետիքյան, Ի. Չորին, Ա. Խամայիլով:

11. **Աշխատանքի** Հ. Սարգսյան, Ս. Տեր-Մարտիրոսյան, Ա. Մելիք-Աղաջանյան, Գ. Տեր-Օհանյան, Ա. Աղաբաբ-բեկով:

12. **Մանդատային** Հ. Սարգսյան, Ս. Տեր-Մարտիրոսյան, Գ. Տեր-Օհանյան:

13. **Նակազի** Հ. Բուդաղյան, Գ. Չուբյան, Գ. Ենգիբարյան, Հ. Չաքարյան, Ի. Չորին:

¹⁵³ ՀՀ ՊԿՊԱ, Ֆ. 198, g.1, q. 15, p. 16:

14. **Հարցապնդումների** Հ. Բուդաղյան, Ս. Խաչատրյան, Ա. Դազարյան, Գ. Տեր-Հակոբյան, Թ. Ավդալբեկյան, Գ. Ենգիբարյան¹⁵⁴:

Ըստ աշխատակարգի՝ խորհրդի հանձնաժողովները կարող էին իրենց ներսում հիմնել ենթահանձնաժողովներ¹⁵⁵: Ինչպես նկատում ենք, վերոհիշյալ հանձնաժողովների ցանկի շուրջ կեսը իր մեջ ներառում էր սոցիալ-տնտեսական բնույթի հարցեր: Այդ նշանակում էր, որ խորհրդարանը կոչված էր իր ուշադրության կենտրոնում պահել այդ ոլորտների գործունեությունը և դրանց համար անհրաժեշտ իրավական դաշտի ստեղծումը:

Սկզբնական փուլում խորհրդարանի և նրա հանձնաժողովների աշխատանքի բացերից մեկն այն էր, որ, օրենսդրական նախաձեռնության իրավունքով, օրինագծերը ոչ թե իրենք էին մշակում, այլ, որպես կանոն, կառավարությունը:

Այս ամենից գատ՝ Հայաստանի խորհուրդն ուներ, սովորաբար խորհրդարանների համար անսովոր, այսպես կոչված «**Կարգադրիչ**» հանձնաժողով, որով փաստորեն իրականացնում էր կառավարչական բնույթի գործառնություններ (ֆունկցիաներ): Պարզվում է, որ խորհուրդն հանդիսանում էր ոչ միայն բարձրագույն օրենսդիր մարմինը, այլև ուներ գործադիր իշխանության իրավասություններ: «Մեր երիտասարդ պառլամենտը,- նկատում է «Ժողովուրդ»-ը,- հենց սկզբից սկսեց միտում ցույց տալ վերցնել իր վրա գործադիր իշխանության ֆունկցիաներ»¹⁵⁶: Պատգամավոր Ա. Խոնդկարյանն իր հուշերում նշում էր, որ Հայաստանի խորհուրդը շատ հաճախ հանդես էր գալիս գործադիր մարմնի իրավունքներով և իր հանձնաժողովների միջոցով տնօրինում էր վարչական բնույթի գործեր, ինչպիսիք էին խոլերայի և վարակիչ հիվանդությունների դեմ պայքար, ժողովրդի պարենավորման, գաղթականների խնամատարության, անօրեն գեներ ու զինամթերք ունեցող քաղաքացիների զինաթափման և այլ գործեր¹⁵⁷: 1918 թ. օգոստոսի 21-ի օրենքով խորհուրդն իր ձեռքը վերցրեց խոլերայի դեմ պայքարի գործը: Հայաստանի ամբողջ տարածքը հայտարարվեց խոլերայի կողմից վտանգված, իսկ խորհրդի բժշկա-սանիտարական հանձնաժողովը վարակիչ հիվանդությունների դեմ պայքարող բոլոր հիմնարկությունների վրա հսկող ամենաբարձր մարմին¹⁵⁸: Դատապարտյալներին ներում շնորհելու կամ պատիժը մեղմացնելու իրավունքը ևս վերապահվեց խորհրդարանին: Խորհրդարանը փորձ արեց իր անմիջական վերահսկողության տակ վերցնել նաև ժողովրդական կրթության գործը¹⁵⁹:

¹⁵⁴ «Հորիզոն», 7 սեպտեմբերի 1918 թ., «Ժողովուրդ», 25 օգոստոսի և 19 սեպտեմբերի 1918թ.:

¹⁵⁵ ՀՀ ՊԿՊԱ, ֆ. 198, ց. 1, գ. 8 թ. 3:

¹⁵⁶ «Ժողովուրդ», 3 սեպտեմբերի 1918 թ.:

¹⁵⁷ «Վեմ», 1934, թիվ 2, էջ 74:

¹⁵⁸ «Հայաստանի խորհրդի հաստատած օրենքները 1918-1919 թթ.», մաս 1, Ե., 1919, էջ 1-2:

¹⁵⁹ «Ժողովուրդ», 8 սեպտեմբերի 1918 թ.:

Խորհրդարանը հաճախ օրենքների անվան տակ հրապարակում էր վարչական հրահանգներ ու որոշումներ: Այստեղ հավանաբար պետք է հաշվի առնել այն հանգամանքը, որ Խորհրդարանի վերափոխված նախկին Հայոց Ազգային Խորհուրդը կարծես իներցիայի ուժով շարունակում էր կատարել գործադիր իշխանության (մարմնի) ֆունկցիաներ: Եւ, իրավ, նրա ընդունած օրենքների ցանկի ուսումնասիրությունից դժվար չէ համոզվել, որ դրանք իրականում ոչ այնքան օրենքներ էին (բառիս իսկական իմաստով), որքան վարչական կարգադրություններ:

Խորհրդարանը, կառավարության ներկայացրած օրինագծի (օրենքի նախագծի) հիման վրա, ստեղծեց **Պեդական վերահսկողության մարմին**: Հայաստանի Խորհուրդը իրեն վերապահեց **պեդական վերահսկիչի** ընտրության իրավունքը՝ միաժամանակ իրեն ենթարկելով վերահսկողության ամբողջ գործը¹⁶⁰: 26 ձայնով պետական վերահսկիչ ընտրվեց (հաստատվեց) **Մինաս Բերբերյանը** (ՀԺԿ)¹⁶¹ Ընդամին պետական վերահսկիչը ենթակա ու հաշվետու էր Խորհրդարանին և նա կառավարությունից որևէ կախում չպետք է ունենար:

Պետական վերահսկողությունը օրենսդիր իշխանության կողմից գործադիր իշխանության (ֆինանսական, տնտեսական և այլ) գործունեության վրա վերահսկողության իրականացման կարևոր լծակներից մեկն էր: Հիշեցնենք, որ պետական վերահսկողության մարմինը զգալի չափով նմանվում է մերօրյա սահմանադրությամբ նախատեսված Ազգային ժողովի Վերահսկիչ պալատին¹⁶²:

Պետական վերահսկիչի աշխատավարձը հավասար էր նախարարի աշխատավարձին՝ ամսական 2000 ռուբլի¹⁶³: Այս մարմինը վերահսկում էր հարկային և ֆինանսական հարցերը, բացահայտում էր պետական գեղծումները, պաշտոնական չարաշահումները, կոռուպցիան և այլն:

Խորհրդարանը սահմանեց նաև պատգամավորներին տրվող օրապահիկի չափը: 1918 թ. սեպտեմբերի 20-ին հաստատված առանձին օրենքով պետգանձարանից Խորհրդի անդամներին տրվում էր սննդադրամ՝ յուրաքանչյուրին ամսական 900 ռուբլու չափով կամ օրական 30 ռուբլի:

Խորհրդի անդամներին, իրենց պատգամավորական լիազորությունների սկզբում և ավարտին, երկու անգամ տրվում էր ճանապարհածախս: Նիստերից անհարգելի բացակայության դեպքում՝ պատգամավորը գրկվում էր սննդադրամի վճարից՝ բացակայած օրերի հաշվով: Այս առնչությամբ հետագայում Խորհրդարանի ներքին կանոնագրում կատարվեց հետևյալ լրացումը.

¹⁶⁰ «Վեմ», 1934, թիվ 2, էջ 74:

¹⁶¹ «Բանբեր Հայաստանի արխիվների», 1991, թիվ 3, էջ 48:

¹⁶² «ՀՀ սահմանադրություն», Ե. 1995, էջ 39, Հ. Խաչատրյան, Պառլամենտ եւ պատգամավոր, Ե., 1994, էջ 46:

¹⁶³ ՀՀ ՊԿՊԱ, Ֆ. 200, ց. 1, գ. 86, ք. 26:

«Պառլամենտի նիստերից բացակայության հարգելի պատճառ համարել՝ որպես կամավոր քանակի մեջ մտնելը»¹⁶⁴:

Հայաստանի խորհրդի նախագահին, բացի պատգամատրական սննդադրամից, տրվում էր ամսական լրացուցիչ ևս 600 ռուբլի: Հետագայում, ինչպես հայտնի է, դրամի կուրսի արժեզրկմանը համապատասխան, փոփոխություն էր կատարվում նաև պատգամավորների սննդադրամի վճարաչափում: Խորհրդի անդամներին տրվում էր արձակուրդ՝ տարեկան մեկ և կես ամսվա չափով:

Սահմանվում էր նաև, որ Հայաստանի խորհրդի անդամը չէր կարող վարել որևէ այլ պետական կամ վճարովի հասարակական պաշտոն: Այդ պաշտոնների տեսակն ու քանակը որոշում էր ինքը՝ խորհրդարանը¹⁶⁵: Սա պետք է համարել շատ էական լրացում, որը կոչված էր ապահովելու պատգամավորների անկախությունը, անկողմնակալությունը և արհեստավարժությունը: Սկսած սեպտեմբեր ամսից՝ նիստերը գումարվում էին շաբաթական երկու անգամ՝ երեքշաբթի և ուրբաթ օրերին, երբեմն էլ հանրապետության համար ծանր իրավիճակներում հրավիրվում էին արտակարգ նիստեր¹⁶⁶: Արարողակարգային տեսակետից խորհրդարանի նիստերը սովորաբար գումարվում էին երեկոյան ժամերին, որոնք երբեմն ավարտվում էին կեսգիշերին: Զվեարկությունները անցնում էին պարզ մեծամասնությամբ: Խորհրդի նիստերին ներկա էին լինում հասարակայնության ներկայացուցիչները, որոնց համար դահլիճի հետևի մասում հատկացված էին տեղեր: Միայն 1919 թ. սկզբներին, բժավոր տիֆի համաճարակի պատճառով, խորհրդարանի դռները ժամանակավորապես փակվեցին հասարակության առաջ¹⁶⁷:

Այսպիսով, երբ ձևավորվեց Հայաստանի խորհրդարանը, այն իր մեջ բովանդակում էր երկրի գերագույն իշխանությունը: Գործադիր իշխանությունը՝ կառավարությունը, ենթակա էր խորհրդարանին: Խորհրդարանը ոչ միայն ընտրում էր կառավարությանը, այլև նրա ֆինանսատնտեսական գործունեությունը վերահսկում էր իր ներկայացուցչի՝ պետական վերահսկիչի միջոցով: Այսպիսով՝ Հայաստանը պառլամենտական գերակայությամբ հանրապետություն էր:

¹⁶⁴ ՀՀ ՊԿՊԱ, Ֆ. 202, ց. 1, գ. 333, ք. 54:

¹⁶⁵ «Բանբեր Հայաստանի արխիվներին», 1990, թիվ 3, էջ 114:

¹⁶⁶ «Հորիզոն», 9 հոկտեմբերի 1918 թ., «Ժողովուրդ», 5 սեպտեմբերի 1918 թ.:

¹⁶⁷ «Չանգ», 24 հունվարի 1919 թ.:

ԳԼՈՒԽ ԵՐԿՐՈՐԳ ԿՈՒՍԱԿՑՈՒԹՅՈՒՆՆԵՐԸ ԵՎ ԽՈՐՀՐԳԱՐԱՆԸ

1. Խորհրդարանական կուսակցությունները և նրանց խմբակցությունները

Քաղաքակիրթ ժողովրդավարական երկրներում հնարավոր չէ պատկերացնել խորհրդարանը առանց կուսակցությունների ներկայացուցչության, առանց քաղաքական պայքարի: Խորհրդարանը, լինելով ժողովրդավարական հաստատություն, պարտավոր է հավասարաչափ կերպով արտահայտել հասարակության բոլոր խմբերի ու խավերի շահերը, իղձերը և ձգտումները: Բայց, ցավոք, միշտ չէ, որ այդպես է լինում: Մի դեպքում առանձին խմբերի ու խավերի շահերը կարող են արտահայտվել ուժեղ, մյուսում՝ թույլ, իսկ մի այլ դեպքում՝ բոլորովին անտեսվել: Դա մեծապես կախված է այնտեղ ներկայացված քաղաքական ուժերի և խմբակցությունների կշռից, դիրքորոշումներից ու վերաբերմունքից:

Խորհրդարանը վերածվում է քաղաքական կուսակցությունների ինքնադրսևորման աշխատավայրի: Այդպիսին դառնալու բոլոր նախադրյալներն ու հնարավորություններն ունենալու Հայաստանի խորհուրդը (խորհրդարանը): Հայաստանի խորհրդում պաշտոնապես գործել են չորս կուսակցական խմբակցություններ՝ ՀՅԴ, որը սկզբից մինչև վերջ եղել է կառավարող կուսակցություն և երեք ընդդիմադիր կուսակցություններ՝ ՀԺԿ, Սոց.-դեմ. (մենչևիկ և բոլշևիկ) և սոցիալիստ-հեղափոխական (Էսէն): Այն բանից հետո, երբ 1918 թ. նոյեմբերի սկզբին ՀԺԿ-ը ՀՅԴ-ի հետ միասին կազմեց կոալիցիոն կառավարություն, այն դադարեց ընդդիմադիր կուսակցություն լինելուց: Եւ այս վիճակը շարունակվեց մինչև 1919 թ. հունիսի սկիզբը, այսինքն՝ մինչև ՀԺԿ ներկայացուցիչների՝ կառավարությունից հեռանալը և խորհրդի արձակումը:

Ինչպես տեսանք, Հայաստանի խորհրդում ընդգրկված էին ռուսահայ կուսակցությունները, քանզի խորհրդարանն ինքը փաստորեն ծնունդն էր Արևելահայերի համագումարի ընտրած Ազգային խորհրդի:

Ընդհանրապես հայ քաղաքական կուսակցությունների գործունեության և քաղաքական դիմագծի բացահայտման բանալի են հանդիսանում Հայաստանի խորհրդի նիստերը: Խորհրդի առաջին իսկ նիստերից սկսվեցին հակամարտությունները և քաղաքական պայքարը պատգամավորական խմբակցությունների միջև:

Խորհրդարանական կուսակցությունների էությունը լավ հասկանալու և նրանց գործունեությունը ճիշտ բնութագրելու համար պայմանականորեն դրանք բաժանել ենք երկու խմբի՝ ազգային և ոչ ազգային: Նման բաժանում կատարելիս հիմք ենք ընդունել կուսակցությունների ծրագրային հիմնադրությունները և հետապնդած քաղաքական նպատակները: Ըստ այդ բաժանման՝ խորհրդարանում ներկայացված ազգային կուսակցություններն էին ՀՅԳ և ՀԺԿ, իսկ ոչ ազգային՝ հայ սոցիալ-դեմոկրատները (5 մենշևիկ և մեկ բոլշևիկ), և հայ էսեռները (սոցիալիստ-հեղափոխականները):

Ազգային և ոչ ազգային կուսակցությունները բնորոշող տարբերակիչ գծերից են նրանց քաղաքական ուղղվածությունը, վերաբերմունքը Հայկական հարցին, համազգային, դասակարգային և ընկերային հիմնահարցերի հանդեպ մոտեցումների ու դիրքորոշումների տարբերությունը և այլն: Եթե ազգային կուսակցություններն իրենց ծրագրերում և գործելակերպում, հենվելով գերազանցապես սեփական ժողովրդի վրա, կարևորում էին ազգային ազատագրությունն ու պետական անկախությունը՝ երկրորդելով ընկերայինը և տնտեսականը, ապա ոչ ազգային որակված կուսակցությունները, հենվելով Ռուսաստանի վրա, Հայաստանի և հայ ժողովրդի ազգային ազատագրության երաշխիքը տեսնում էին համառուսաստանյան հեղափոխական-դասակարգային պայքարի հաղթանակի և դրա հետևանքով ճնշված ժողովուրդների ու դասակարգերի սոցիալական ազատագրության մեջ: Եթե առաջին խմբի դրոշակակիրը կարելի է համարել ՀՅԳ-ը, ապա երկրորդինը՝ բոլշևիկներին՝ հանձին Հայկոմկուսի:

Հայ քաղաքական կուսակցությունների միջև գաղափարաքաղաքական պայքարը շատ բացորոշ կերպով դրսևորվել է Հայաստանի խորհրդարանում: Ըստ իրենց քաղաքական դավանանքի և հետապնդած նպատակների՝ այնտեղ կարելի է գատորոշել երեք ուղղություն՝ «**աջ**» (աջակողմյան), «**կենտրոն**» (կենտրոնամետ) և «**չախ**» (ձախակողմյան): Այս առումով ձախակողմյան կուսակցություններին բնորոշ էր դասակարգային աշխարհայացքը, իսկ աջակողմյանին ու կենտրոնականին՝ ազգային գաղափարախոսությունը:

«Աջ» և «ձախ» կուսակցությունների տարաբաժանման ամենաբնութագրական հատկանիշերից մեկն այն է, որ եթե ձախակողմյան կուսակցությունները որպես կանոն կողմնակից են հողի ու արտադրության խոշոր միջոցների պետականացման և ընդհանրապես տնտեսավարման պետական սեկտորի գերակայությանը, ապա աջակողմյան կուսակցությունները պաշտպանում են մասնավոր սեկտորը, անհատական ու անձնական ձեռներեցությունը: Նման դասակարգման դեպքում մենք տեսնում ենք, որ խորհրդարանական

կուսակցություններից ՀԺԿ դասվում է աջակողմյանին, իսկ սոց.-դեմոկրատները և էսէռները՝ ձախակողմյանին:

Ինչ վերաբերում է ՀՅԳ-ը, ապա իր սոցիալիստական ծրագրային պահանջներով նա մոտենում ու նմանվում էր ձախակողմյանին, բայց գործնական քաղաքականության բնագավառում՝ պաշտպանում էր սեփականության ձևերի բազմազանությունը և տնտեսավարման ազատությունը: Այդ իսկ պատճառով, հաշվի առնելով ՀՅԳ բռնած միջանկյալ դիրքը, նրան դասել ենք «կենտրոն» ուղղությանը:

Խորհրդանշական է, որ վերը նշված երեք հիմնական քաղաքական ուժերը խորհրդարանի դահլիճը ևս զբաղեցնում էին համապատասխան դասավորությամբ՝ աջ կողմում ՀԺԿ խմբակցությունն էր, կենտրոնում՝ ՀՅԳ, իսկ ձախ կողմում՝ էսէռ ու սոցիալ-դեմոկրատների խմբակցությունները:

Վերոգրյալ այս չորս խմբակցություններից երեքը (ՀԺԿ, սոց.-դեմ. և էսէռ) ի սկզբանե գրավեցին ընդդիմադիր դիրք: Ընդդիմությունը կանգնած էր «աջ» և «ձախ» թևերում և բավականին դժվար է միանշանակ կերպով տալ դրանց գաղափարախոսության, քաղաքական դավանանքի ու գործելակերպի զնահատականը:

Նրանում ընդգրկված էին՝ սկսած «աջ» հայ դրամատերերի շահերն արտահատող (բուրժուական) ՀԺ կուսակցությունից, վերջացրած՝ ամենաձախ բուլշևիկյան կուսակցության ներկայացուցիչներով: Մենք համակարծիք չենք Ա. Խոնդկարյանի արտահայտած այն մտքին, թե հայ քաղաքական բոլոր կուսակցությունները դարձան «**հայ նորաստեղծ պեղական կյանքի շարժիչ ուժերը**»¹: Ինչպես հետո կտեսնենք, իրականում «ձախ» կուսակցությունները (էսէռները, որի անդամն էր հենց ինքը՝ Ա. Խոնդկարյանը, և սոց.-դեմոկրատները՝ մենշևիկ ու հատկապես բուլշևիկները) փաստորեն դեմ էին Հայաստանի անկախությանը և կամսա թե ակամս խարխլում էին հայոց պետականության հիմքերը: Իսկ ինչ վերաբերում է «աջ» համարվող ՀԺԿ, ապա սա, լինելով իշխանության համար մղվող պայքարում ՀՅԳ գլխավոր մրցակիցը, որպես ընդդիմություն ուներ ոչ այնքան հակաանկախական ու հակապետական բնույթ, որքան՝ հակադաշնակցական:

Եթե դասակարգելու լինենք հայ քաղաքական կուսակցությունները ըստ գաղափարախոսության և ազգային-դասակարգային բովանդակության, ապա բոլոր «ձախ» կուսակցությունները ունեին ընդգծված սոցիալիստական ուղղվածություն և դասակարգային բովանդակություն, իսկ «կենտրոնի» և «աջակողմյանի» մեջ մտնող ազգային կուսակցությունները, չնայած իրենց սոցիալիստական ու ոչ սոցիալիստական, դասակարգային և ապադասակարգային գունավորումներին ու դրսևորումներին, առաջնային էին համարում համազգային խնդիրները:

¹ «Վեմ», Փարիզ, 1934, թիվ Ե, էջ 52:

ա) «Աջակողմյան»

Խորհրդարանում և նրանից դուրս ամենաաջակողմյան կուսակցությունը ներկայանում էր ՀԺԿ: Նրա բարձրագույն ղեկավար մարմինը՝ ԿԿ-ը գտնվում էր Թիֆլիսում: ԿԿ-ի նախագահն էր Մ. Պապաջանյանը, իսկ փոխնախագահը՝ Ս. Հարությունյանը²: Այս կուսակցությունը համարվում էր «աջերի» գաղափարակիրը: Սա ուներ ընդգծված հակասոցիալիստական ուղղվածություն: Ժողովրդականների «աջ» դիրքավորումը դրսևորվել է հատկապես գաղափարական, երկրի սոցիալ-տնտեսական քաղաքականության հարցերում: Այսպես՝ 1917 թ., սեպտեմբերին ընդունած իր առաջին ծրագրում, ՀԺԿ-ը լիովին պաշտպանում էր ռուսական Ժողովրդական ազատություն (կադետական) կուսակցության ծրագրի հիմնական կետերը՝ կապիտալի, մասնավոր սեփականության և շուկայական հարաբերությունների հաստատման մասին³: Իսկ օրինակ, Հայկական հարցում, պետք է ասել, որ սրանք, համերաշխվելով Հայ սահմանադրական ռամկավարների առաջադրած ծովից ծով Հայաստանի պահանջին, Դաշնակցությունից ավելի «ձախ» ու ծայրահեղ պահանջներ էին դնում ու պաշտպանում: Այդուհանդերձ, Ժողովրդականների խորհրդարանական գործունեությունը պետք է գնահատել որպես պատասխանատու և կառուցողական:

Հարկ է նշել, որ Ժողովրդական կուսակցության երկու՝ թիֆլիսյան և երևանյան հատվածների միջև կար տեսակետների ու մոտեցումների որոշ տարբերություն: Ժողովրդականների հայաստանյան հատվածը ավելի չափավոր էր ու շրջահայաց, որովհետև ավելի մոտիկից էր ծանոթ (իրագրել) Հայաստանի պայմաններին, քան թիֆլիսյան պարագլուխները: 1918 թ. օգոստոսի 14-ից Երևանում սկսեց լույս տեսնել ՀԺԿ Երևանի կոմիտեի օրգան «Ժողովուրդ» լրագիրը: Երևանում, Հայաստանի խորհրդարանի աշխատանքներին մասնակցելու հետ կապված, ՀԺԿ Երևանի վարչությունը հուլիսի 29-ի նիստում կատարեց լրացուցիչ ընտրություն: ՀԺԿ Թիֆլիսի կենտրոնական խորհրդի կողմից Երևան ժամանած Ստեփան Մալխասյանը, Արշալույս Մխիթարյանը և Երվանդ Հարությունյանը մտան ՀԺԿ Երևանի վարչության մեջ⁴: Արդեն 1918 թ. աշնանից ՀԺԿ տեղական կազմակերպություններ հիմնվեցին Ապարանի, Փամբակի, Համամլուի, Լոռիի, Դիլիջանի, Քարվանսարայի, Ն. Բայազետի, Ծաղկաձորի և այլ շրջաններում⁵:

1918 թ. ամռանը ՀԺԿ օրգան «Մշակի» խմբագիր Համբարձում Առաքելյանի սպանությունից հետո թերթի վերաբերմունքը փոքր-ինչ մեղմացավ ձՅԳ-հանդեպ: 1918 թ. սեպտեմբերի 1-ից Թիֆլիսում սկսեց լույս տեսնել ՀԺԿ ԿԿ-ի նոր օրգան «Ժողովրդի ձայն» թերթը: Շուտով «Մշակի» և ՀԺԿ միջև առաջա-

² «Ժողովուրդ», 1 դեկտեմբերի, 1918 թ.:

³ ՀՀ ՊԿՊԱ, Ֆ. 292, ց. 1, գ. 5, թ. 1, Ե. Չարենցի անվան գրականության եւ արվեստի բանգարան (ԳԱԹ), Դ. Անանունի ֆոնդ, գ. 78, թ. 1:

⁴ «Ժողովուրդ», 14 օգոստոսի 1918 թ.:

⁵ «Ժողովրդի ձայն», 8 դեկտեմբերի 1918 թ.:

ցավ սառնություն և որոշ հակասություն: «Մշակի» երիտասարդ խմբագիրները հանդես բերեցին սոցիալիստամետ հակումներ: Անբարյացակամությունը գաղափարակից այդ երկու թերթերի միջև հասավ այն աստիճանի, որ «Մշակի» ղեկտեսների 21-ի համարում նյութ տպագրվեց այն մասին, որ «իբր հայ-վրացական կոմֆիլկտի պատճառը Հայ ժողովրդական կուսակցությունն է»⁶:

Այս ամենից գատ` հարկ է նշել, որ ՀԺԿ թիֆլիսյան և երևանյան հատվածների վերաբերմունքը Հայաստանի իշխանությունների նկատմամբ տարբեր էր: Եթե ՀԺԿ հիմնադիր օրգան «Մշակը» դժգոհ էր վարչապետ Քաջազնունուց, ապա այդ նույն կուսակցության Երևանի օրգան «Ժողովուրդն» իր վստահությունն էր հայտնում նույն Քաջազնունուն⁷: ՀԺԿ կուսակցության թիֆլիսյան և երևանյան հատվածների միջև եղած տեսակետների ու մոտեցումների որոշ տարբերությունը, անշուշտ, իր դրոշմն էր թողնում «աջ» խմբակցության գործունեության վրա:

Նկատի ունենալով այն հանգամանքը, որ ՀԺԿ գերագույն մարմնի Թիֆլիսում գտնվելը դժվարացնում էր կուսակցական կյանքի ղեկավարումը բուն Հայաստանում, ուր վերջին մեկ տարում ծավալվում էին գլխավոր իրադարձությունները, բավականին ուշացումով՝ 1919 թ. հունիսին, ՀԺԿ ԿԿ-ը որոշեց` պետական կյանքի վերաբերյալ իր բոլոր իրավունքները և լիազորությունները հանձնել ՀԺԿ Հայաստանի կոմիտեին⁸: ՀԺԿ Հայաստանի կոմիտեի մեջ մտան ԿԿ-ի ութ անդամներ, Երևանի կոմիտեից` վեցը, մեկական ներկայացուցիչներ Ալեքսանդրապոլից, Նոր Բայազետից, Կարսից և ուսանող երիտասարդության երկու ներկայացուցիչ⁹: Դրանից հետո ՀԺԿ ծանրության կենտրոնը փոխադրվեց Երևան, որտեղ էլ նույն թվականի սեպտեմբերին գումարվեց կուսակցության 2-րդ (Բ) համագումարը:

ՀԺԿ գաղափարական պլատֆորմի հիմքում դրված էր հայկական մշակույթի և պետականության պահպանման ու զարգացման գաղափարը: Հայկական պետականությունը նրանք համարում էին միջոց հայկական մշակույթի ուրույն զարգացման համար:

Ի տարբերություն ձախակողմյան կուսակցությունների` ՀԺԿ հայ ժողովրդի և Հայաստանի քաղաքական կողմնորոշման հարցում եղել է ավելի ազատ:

Նրանք միակողմանիորեն չէին ջատագովում ռուսական կողմնորոշումը, թեև իրենք զուտ ռուսահայ կուսակցություն էին: «Եթե հայ ժողովրդի փրկությունը,- կարդում ենք «Ժողովուրդ» թերթում,- պահանջե ընդունել մի այնպիսի օրիենտացիա, որը կհակասի նույնիսկ ներկա պայմաններում Ռուսաստանի շահերին, Հժ կուսակցությունը դա կանի առանց վարանման»¹⁰:

⁶ «Ժողովրդի ձայն», 22 դեկտեմբերի 1918 թ., «Մշակ», 21 դեկտեմբերի 1918 թ.:

⁷ «Հորիզոն», 23 օգոստոսի 1918 թ.:

⁸ «Ժողովուրդ», 18 հունիսի 1919 թ.:

⁹ Նույն տեղում:

¹⁰ Նույն տեղում, 29 օգոստոսի 1918 թ.:

«Մեզ համար,- կարդում ենք նույն թերթի մեկ այլ խմբագրականում,- այս կամ այն օրիենտացիան միայն միջոց է հայ ժողովրդի իդեալները իրականացնելու գործում, և մի որևէ ուրիշ երկիր կամ ժողովուրդ չի կարող լինել մեզ համար իդեալ»¹¹: Ժողովրդականները հանգում էին այն հետևությանը, որ Հայաստանը և հայ ժողովուրդը պետք է ունենան միայն մի՝ հայկական կողմնորոշում:

Ինչպես տեսնում ենք, քաղաքական կողմնորոշման խնդրում էլ Հայ ժողովրդականները այնքան էլ կառչած չէին կադետներին ու Ռուսաստանին:

Ժողովրդականների ազգային նկարագիրը երևում է նաև հայ-վրացական սահմանային ընդհարման կապակցությամբ նրանց դրսևորած հետևողականությամբ՝ հայկական Լոռու շրջանը և Ախալքալաքը Հայաստանին վերամիավորելու հարցում¹²:

Տարվ «աջակողմյան»՝ ժողովրդական (ռամկավար) կուսակցության ընդհանուր գնահատականը՝ կարելի է ասել, որ նա, լինելով ազգային տիպի կուսակցություն, ընդունում էր ազգային շահերի գերակայությունը դասակարգայինի նկատմամբ: Հանդես էր գալիս ազգային դիմագծի և նրա օրինական շահերի ու պատմաքաղաքական իրավունքների պաշտպանությամբ՝ միաժամանակ հարգելով մյուս ժողովուրդների իրավունքներն ու շահերը:

բ) «Կենտրոն»

ՀՅԳ, որը ներկայացնում էր «Կենտրոնը», ՀՀ գոյության ամբողջ ընթացքում մնաց որպես կառավարող կուսակցություն: «Կենտրոն» խմբակցությունը՝ հանձնի ՀՅԳ, կանգնած էր ազգային-պետական տեսակետի վրա: Կուսակցության նշանաբանն էր՝ սկզբում (մինչև 1918 թ. վերջը) անկախ պետականության գաղափարի իրացումը, իսկ 1919 թ. սկզբներից Միացյալ և Անկախ Հայաստանի կայացումը: Նա արտահայտում էր ժողովրդական զանգվածների մեծամասնության հայացքները և մտայնությունները: «Հ. Յ. Դաշնակցությունը,- գրում է Հ. Քաջազունին,- իմ խորին համոզումով, միշտ եղել է ու միշտ մնացել գիտակցորեն թե անգիտակցորեն հայ քաղաքական ազատագրման մարտիկը, իսկ այդ ազատագրման վերջին կայանը-անկախ պետությունն է»¹³:

Հարկ է նշել, որ մինչև 1918 թ. Հայաստանի անկախության հռչակումը, այս կուսակցության համար ավելի մեծ կարևորություն է ունեցել ազգապահպանության խնդիրը: Ըստ Ռ. Տեր-Մինասյանի գնահատումների՝ դաշնակցության ծրագրերում և գործունեության մեջ առաջնային պլանում եղել են նախ հայության և հայրենիքի պաշտպանության, ապա՝ անկախության և պետականության հիմնախնդիրները¹⁴: Այս կուսակցությունն էր անկախության գաղափարի ամենահետևողական պաշտպանը և մարմնավորողը:

¹¹ «Ժողովուրդ», 15 սեպտեմբերի 1918 թ.:

¹² Նույն տեղում, 13 հոկտեմբերի 1918 թ.

¹³ Հ. Քաջազունին, Հ.Յ. Դաշնակցությունը անելիք չունի այլևս, Երևան, 1994, էջ 45:

¹⁴ Ռուբեն, Հ.Յ. Դաշնակցություն կազմակերպությունը, Աթենք, 1935, էջ 17:

Թեև ՀՅԴ-ն նրա «Կենտրոն» խմբակցությունը իր քաղաքական նպատակադրումներով մոտ էր «աջակողմյան» ՀԺԿ խմբակցությանը, որի համար էլ սրանք դասվում են ազգային տիպի կուսակցությունների թվին, սակայն իր շարքերի սոցիալական կազմի, սոցիալ-տնտեսական մի շարք պահանջների խնդրում նա զանազանվում էր բուրժուական որակվող «աջակողմյան» խմբակցությունից և կարծես մոտենում էր «ձախակողմյան» զուտ սոցիալ-դեմոկրատական ու սոցիալիստական խմբակցություններին: Իրոք, խորհրդարանի պրակտիկ գործունեության ուսումնասիրությունը ցույց է տալիս, որ քաղաքական, ազգային-պետական խնդիրներ լուծելիս «Կենտրոնը» գործակցում էր «աջերի» հետ, իսկ սոցիալ-տնտեսական բնույթի խնդիրների ժամանակ նա հիշելով իր սոցիալիստական ծրագիրն ու կոչումը, երբեմն հակվում էր դեպի «ձախ» թևը և նպաստում կիսասոցիալիստական ձեռնարկների իրագործմանը: Օրինակ, փորձ արվեց իրագործել հողի սոցիալիզացիայի գաղափարը, երկրում անցկացվեցին ռազմակոմունիստական բնույթի բռնագրավումներ, առևտրի պետական մենաշնորհի և այլն: Բայց այս ամենով հանդերձ՝ բոլոր վճռական պահերին ՀՅԴ-ն նրա խմբակցությունը նախընտրում էին մերձենալ ու դաշնակցել ազգային նկարագիր ու նպատակներ հետապնդող «աջակողմյան» թևի հետ:

ՀՅԴ-ն նրա խմբակցության գործունեությունը բնութագրելիս ու գնահատելիս ամենից առաջ պետք է նկատի ունենալ, որ այս կուսակցության սոցիալական բազան բավականին լայն էր ու բազմաշերտ, որն էլ պատմական գրականության մեջ տեղիք է տվել տեսակետների ու մոտեցումների տարակարծությունների ու տարրընթերցումների: Մասնավորապես տարակարծություններ են ծագել ՀՅ Դաշնակցության սոցիալական կազմի և դասակարգային էության շուրջ:

Խորհրդային պատմաքաղաքական գրականության մեջ, սոցիալ-դասակարգային կազմի ու բովանդակության տեսակետից, Դաշնակցությունը բնութագրվել է որպես բուրժուական, նույնիսկ խոշոր բուրժուական կուսակցություն: Սակայն սկսած 1920-ական թվականների սկզբներից՝ նոր ձևավորվող խորհրդահայ պատմագրության մեջ առաջինը՝ կուսակցական և պետական ականավոր գործիչ Ա. Հովհաննիսյանը, հերքեց սոցիալ-դասակարգային իմաստով Դաշնակցությանը խոշոր բուրժուական կուսակցություն համարելը¹⁵: Նա այն եզակի ու հետևողական պատմաբան-հեղինակներից մեկն է, որ դասակարգային բովանդակության տեսակետից ի սկզբանե Դաշնակցությանը բնորոշեց որպես **մանրբուրժուական**, գյուղացիական կուսակցություն և այդպես էլ գրեթե մինչև վերջ (չնայած առանձին կոնյունկտուրային խտտումների) պաշտպանեց այդ տեսակետը: Ավելի ուշ նրա այս տեսակետը պաշտպանեց ու ավելի հիմնավորեց ակադեմիկոս Լ. Խուրշուդյանը¹⁶: Դաշ-

¹⁵ ՀՀ ՀԶԿՓ ՊԿԱ, Ֆ 4047, ց. 1, գ. 199, թթ. 25-31:

¹⁶ «Լրաբեր» հաս. գիտ. ՀԽՍՀ ԳԱ, 1988, թիվ 7 (հուլիս), էջ 12-31:

նակցություն կուսակցությանը մանրբուրժուական կուսակցությունների թվին են դասել նաև Ա. Համբարյանը, Ռ. Հովհաննիսյանը և ուրիշներ¹⁷:

Իրականում ՀՅԳ սոցիալ-դասակարգային կազմի տեսակետից միատարր չէր: Նրանում ընդգրկված էին հասարակական բոլոր շերտերն ու խավերը: «Հայ ժողովրդի ազատագրության գաղափարը,- նշում էր ՀՅԳ հիմնադիրներից Լ. Սարգսյանը իր հուշերում,- իր շուրջ միացրել էր շատ տարբեր տարբեր. բանվորից սկսած մինչև ինտելիգենտ»¹⁸: ՀՅԳ ազգային լինելը երևում է թե՛ իր շարքերի սոցիալական կազմի խայտաբղետությունից ու ստվարությունից և թե՛ իր որդեգրած նպատակներից: Գաշնակցության ծրագրի ազգային-քաղաքական պահանջները հոգեհարազատ էին թե՛ հայ մտավորականին, թե՛ հայ առևտրաարդյունաբերողին, թե՛ հայ գեղջուկին (գյուղացուն) ու արհեստավորին և թե՛ վերջապես հայ սեփականազուրկ գործավորին (բանվորին): «Հայ Յեղ. Գաշնակցությունը,- կարդում ենք «Արև» թերթում,- մի կոնգլոմերատ է, այլատարր մի կուսակցություն. նրա մեջ նստած են բուրժուական տարրերից սկսած մինչև բանվորը, միլիոնատերից մինչև գյուղացին»¹⁹: Գաշնակցության շարքերի խայտաբղետությունը փաստում են անգամ ամենահետևողական հայ հեղափոխական մարքսիստները: Ըստ Ս. Սպանդարյանի՝ Գաշնակցությունը իրենից ներկայացնում էր «մի անասելի խառնուրդ բուրժուաների և բանվորների, գյուղացիների ու ճորտերի և կալվածատերերի»²⁰:

Որպեսզի ամբողջական պատկերացում կազմենք ՀՅԳ թվաքանակի ու ազդեցության մասին, բերենք 1907 թ. կազմված արխիվային մի վավերագրից տվյալներ: 1907 թ. սկզբներին միայն Անդրկովկասում Գաշնակցությունը իր ազդեցության տակ է ունեցել 110 տարբեր տիպի արհմիություններ²¹: Այդ նույն ժամանակ կուսակցության շարքերում կային 23300 բանվոր անդամներ²²: Գաշնակցության ազդեցությունը շատ ավելի մեծ էր գյուղացիության շրջանում: Պատահական չէ, որ 1916 թ. Ստ. Շահումյանը գրում էր, որ հայ գյուղացիությունը համարյա ամբողջովին գտնվում է Գաշնակցության ազդեցության տակ²³: ՀՅԳ ընդունած հողի սոցիալիզացիայի գաղափարը, որը վերցվել էր ռուսական էսեռների կուսակցության ծրագրից, և որը շատ հոգեհարազատ էր նաև հայ գյուղացու սրտին ու ձգտումներին, պարարտ հող էր ստեղծում Գաշնակցության ազդեցության աճի համար: 1907 թ. սկզբներին

¹⁷ Ա. Ս. Համբարյան, Ազրարային հարաբերությունները Արևմտյան Հայաստանում, Երևան, 1965, էջ 267, Ռ. Փ. Հովհաննիսյան, Արևմտահայ ազգային ազատագրական շարժումները և Կարինի «Պաշտպան հայրենյաց» կազմակերպությունը, Երևան, 1965, էջ 9:

¹⁸ ՀՀ ՀԲԿՓ ՊԿԱ, Ֆ 4047, ց. 2, գ. 9, ք. 177:

¹⁹ «Արև», 7 հունիսի 1918 թ.:

²⁰ Ս. Սպանդարյան, Երկեր, Հ. 1, Ե. 1959, էջ 48:

²¹ ՀՀ ՀԲԿՓ ՊԿԱ, Ֆ. 4047, ց. 1, գ. 237, ք. 54:

²² Նույն տեղում, ք. 53:

²³ Ստ. Շահումյան, Երկեր, հ. 3, Ե., 1978, էջ 50:

Գաշնակցության շարքերում հաշվվում էին 67000 գյուղացի անդամներ²⁴։ Եթե հաշվի առնենք, որ Հայաստանի հայ ազգաբնակչության 80-90 տոկոսը կազմում էին գյուղացիական զանգվածները (գյուղացիությունը), ապա պարզ կդառնա, թե ՀՅԳ-ինչ կշիռ ու ազդեցություն ունեւր գյուղացիության շրջանում։ Ըստ ամենայնի այս պարագան նկատի ունեւր Ա. Հովհաննիսյանը, Լ. Խորշուդյանը և մյուսները, որ Գաշնակցությանը բնութագրում էին որպես մանրբուրժուական կուսակցություն։

Այս ամենը հիմք է տալիս ասելու, որ ՀՅԳ-ն բուրժուական կուսակցություն չէր։ Եթե, իրոք, ՀՅԳ- սոցիալական հեներանը հայ բուրժուազիան էր, ապա ինչպես էր, որ այդ մեծաքսակ կապիտալի ներկայացուցիչները չէին ֆինանսավորում իրենց «հոգեհարազատ» կուսակցությանը։ Ավելին՝ պատմությունից մենք գիտենք, որ Գաշնակցությունը իր առաքելության իրագործման ճանապարհին դրամ հայթայթելու նպատակով ստիպված դիմում էր այդ նույն կապիտալիստների նկատմամբ հարկադրանքի ու ահաբեկչության²⁵։ Հայ բուրժուազիան ոչ միայն գաղափարական, այլև նյութական օգնություն ցույց չի տվել Գաշնակցությանը։ Այդ էր պատճառը, որ նա դրամ կորզելու նպատակով դիմում էր հարկադիր բռնագանձումների, որը հայտնի է «Փոթորիկ» անունով։ Բացի այդ Գաշնակցության սկզբնավորման առաջին տարիների պատմությանը քաջ ծանոթ ուսումնասիրողները գիտեն, որ, իրոք, եթե Գաշնակցությունը բուրժուական կուսակցություն եղած լիներ, ապա նրա հիմնադրմանը մասնակից հայ բուրժուազիայի երկու ճանաչված ներկայացուցիչները (Կ. Խատիսյանը և Լ. Սարգսյանը), դեռ մեկ-երկու տարի չանցած, չէին հեռանա նրանից։ Իսկ այն բանից հետո, երբ 1907 թ. կուսակցությունը իր ծրագրում ընդունեց նաև սոցիալիզմի գաղափարները, ապա դրանից հետո առավել ևս չի կարող խոսք լինել Գաշնակցության բուրժուական լինելու բովանդակության մասին։ Բայց սրա կողքին պետք է ընդունել այն իրողությունը, որ Գաշնակցության ծրագրում սոցիալիստական համադրույթները այնպես էին

²⁴ ՀՀ ՀԶԿՓ ՊԿԱ, Ֆ. 4047, ց.1, գ. 237, թ. 55: Ծանոթացման կարգով տեղեկացնենք, որ 1907 թ. Շոտլանդիայի միջազգային սոցիալիստական կոնգրեսին ներկայացված հաշվետվությանը ընդհանուր հաշվով Գաշնակցության շարքերում հաշվառման կանգնած անդամների թիվը կազմել է մոտ 165 հազար մարդ (չենք բացառում, որ այս և նախորդ տվյալները որոշ չափով ուռճացված լինեն), որոնք ստորաբաժանված են եղել հետևյալ թվով քաղաքական, պրոֆեսիոնալ ու մարտական խմբերում. Անդրկովկասում՝ 1951 խումբ, Թուրքիայում՝ 693, Հյուսիսային Կովկասում ու Ռուսաստանում՝ 260, Իրանում՝ 90, Բալկաններում՝ 48 և Ամերիկայում՝ 51 խումբ (ՀՀ ՀԶԿՓ ՊԿԱ, Ֆ. 4047, ց. 1, գ. 237, թ. 58): Համեմատության համար ասենք, որ ՌՍԴԲԿ միավորումից հետո այդ նույն 1907 թ. գարնանը (մայիսին) Լոնդոնում գումարված նրա 5-րդ համագումարը ներկայացնում էր ընդամենը 145 կուսակազմակերպությունների 150 հազար անդամ (Տես՝ «История КПСС, 3 шестом томах, т.2, М., 1966, с. 215»): Եվ սա այն դեպքում, երբ այդ ժամանակ ՌՍԴԲԿ մեջ էին միավորված նրա երկու թևերը՝ մենչևիկները և բոլշևիկները, սոցիալ-դեմոկրատական ազգային կազմակերպությունները և այդ բլյում հայ «սպեցիֆիկները»:

²⁵ Մ. Վարանդյան, Հ.Յ. Գաշնակցության պատմություն, հ. 1, Փարիզ, 1932, էջ 328:

ծնակերպված, որ, ասենք, հայ առևտրաարդյունաբերական բուրժուազիան չխրտներ նրանից:

ՀՅԳ բուրժուական կուսակցություն որակելը մեղմ ասած նշանակում էր՝ խեղաթյուրել իրականությունը և մեղանչել պատմական ճշմարտության առաջ: Շահումյանի, Սպանդարյանի և մյուսների կողմից Դաշնակցությանը նման պիտակավորում արվել է հավանաբար այն միտումով, որպեսզի հայ բանվորին ու աշխատավորությանը խրտնեցնեն ու հեռու պահեն այդ կուսակցությունից, խարխլեն նրա հիմքերը: Հայ բուրժուազիան և ունևոր վերնախավը չէր կարող Դաշնակցությանը դիտել որպես իր հարազատ զավակի նաև այն պարզ պատճառով, որովհետև այս կուսակցությունն իր ծրագրերում որդեգրել էր սոցիալիստական գաղափարներ, կազմակերպում էր բանվորական գործադուլներ, հիմնում էր արհմիություններ, առաջադրում էր տնտեսական պահանջներ, պաշտպանում էր հողի սոցիալիզացիայի պահանջը և այլն²⁶: Հասկանալի է, որ նման ծրագրային պահանջները և գործելակերպը հայ բուրժուազիային ավելի էր հեռացնում Դաշնակցությունից և դարձնում նույնիսկ դասակարգային հակառակորդ:

Այսպիսով, վերը բերած փաստարկները մեզ բերում են այն հետևության, որ ՀՅԳ ոչ բուրժուական էր, ոչ էլ՝ մանրբուրժուական, այլ ըստ իր սոցիալական կազմի, գաղափարախոսության ու հետապնդած նպատակների՝ ապադասակարգային, ազգային կուսակցություն էր: Ապադասակարգային ասելով նկատի ունենք այն, որ ՀՅԳ շարքերը կարող էին մտնել հայ ազգին պատկանող բոլոր չափահաս անձինք՝ անկախ սեռի, դավանանքի ու դասակարգային պատկանելության:

Արդ, երբ Դաշնակցությունը դարձել էր հիմնական կառավարող կուսակցություն, իսկ խորհրդարանում նրա «Կենտրոն» խմբակցությունը կազմում էր հարաբերական մեծամասնություն, բնականաբար, սոցիալական նման լայն հենարանի ու աջակցության պայմաններում այս կուսակցությունը պետք է լիներ հանրապետության սոցիալ-տնտեսական և քաղաքական կյանքին հիմնական տոն տվողը:

գ) «Չախակողմյան»

Ինչպես ասվեց, խորհրդարանի ձախակողմյան կուսակցություններն էին Էսեռները և սոցիալ-դեմոկրատները (մենշևիկ և բոլշևիկ): Խորհրդարանում սրանց խմբակցությունների հիմնական գործելակերպը հարցապնդումներն էին²⁷: Խորհրդարանական քննարկումների ժամանակ ձախակողմյան խմբակցություններին ամենից ավելի հետաքրքրում ու մտահոգում էին (համեմայն դեպս, այդպես էին իրենց ցույց տալիս) Հայաստանի աշխատավորության և գաղթականության վիճակը, բնակչության պարենավորումը, կրթամշակութային հարցերը և այլն: Չախակողմյան կուսակցությունների համար խորք

²⁶ ՀՀ ՀԲԿՓ ՊԿԱ, Ֆ. 4047, ց. 1, գ. 237, ք. 53:

²⁷ «Հորիզոն», 23 օգոստոսի 1918 թ.:

էին՝ Հայաստան, հայրենիք, սահման, ազատություն, անկախություն, պետականություն, ազգային մշակույթ, ազգային բանակ և համանման այլ հասկացությունները:

Չախակողմյան կուսակցությունների ամենաբնորոշ գծերն էին հակաանկախական քաղաքական դիրքորոշումը և ընդգծված սոցիալիստական միտվածությունը: Այս խումբ կուսակցությունների հակաանկախական դիրքորոշումը այնքան ուժեղ է դրսևորվել, որ հայ հասարակական-քաղաքական առանձին գործիչներ այդ հիման վրա նույնիսկ նպատակահարմար չեն գտել դրանց լիարժեք կուսակցություն անվանել: «Եթե կա մի կուսակցություն, - գրում է հնչակյան գործիչ Սապահ-Գուլյանը, - մի խմբակցություն, հոսանք հայ կյանքի մեջ, որ հայ պետության կատարյալ անկախության թեզը չի պաշտպանել, հայ պետության ամրապնդմանը, ուռճացմանը չի ձգտել, որպես կուսակցական հավատամք, կրեդո, ապա նա հայ հասարակական, ազգային, պետական գործերի մեջ միջամխվելու, դրանց անուրից խոսելու և ոչ մի բարոյական, իրավական իրավունք ունի, նա կուսակցություն չէ այլևս, այս բառի գիտական, հասարակական նշանակությամբ»²⁸: Ազգային կուսակցության այս գործիչը հայ անկախ պետականության գաղափարն էր համարում հայ քաղաքական բոլոր կուսակցություններին իրար միացնող, շղթայող գլխավոր օղակը²⁹: Չախակողմյան կուսակցությունների սոցիալ-դասակարգային իմաստով տարբերակիչ գծերից մեկը, թերևս, այն էր, որ եթե սոցիալ-դեմոկրատները հանդես էին գալիս առաջին հերթին բանվոր դասակարգի (պրոլետարիատի) շահերի պաշտպանության դիրքերից, ապա սոցիալիստ հեղափոխականները՝ ամբողջ աշխատավորության և առաջին հերթին գյուղացիության անունից:

Չախակողմյան կուսակցությունները իրենց ծրագրերով, հետապնդած քաղաքական նպատակներով ու գործելակերպով հայ իրականությունից, ազգային արմատներից ու ավանդներից հեռու, գրեթե առանց որևէ իրական սոցիալական հենարանի, խորհրդարանում ստացել էին 6-ական պատգամավորական տեղ և ծայրահեղ ձախ հեղափոխական ֆրակցիայի դիրքերից հոխորտում էին հայ ժողովրդին հոգևարքից նոր դուրս բերող և երկրի վերքերը նոր-նոր բուժող Հայաստանի կառավարությանը:

Չախակողմյան կուսակցությունները կոչված էին արտահայտելու սոցիալ-տնտեսապես ու իրավապես հարստահարվող ու սեփականագուրկ զանգվածների շահերն ու պահանջները: Այդ իսկ պատճառով սրանց մշակած ռազմավարությունը և գործելակերպը անզուսպ էր ու ծայրահեղական: Բայց դժվար չէ տեսնել, որ բուն Հայաստանում սեփականագուրկ պրոլետարական (բանվորական) դասակարգի բացակայության պատճառով³⁰ այնտեղ ձախա-

²⁸ «Երիտասարդ Հայաստան», 15 սեպտեմբերի 1920 թ.:

²⁹ Նույն տեղում:

³⁰ Որ չէ-ում բանվոր դասակարգ, ըստ էության, բացակայում էր, խոստովանում էին հենց իրենք՝ Չախակողմյան թևի ամենաժայռահեղ կուսակցության՝ բոլշևիկ-ներկայա-

կողմյան կուսակցությունների առաջացման ու գործունեության համար չկար բավարար սոցիալական հող ու հենարան:

Ի տարբերություն ՀՅԳ-ի՝ էսէռների և սոց.-դեմոկրատների սոցիալական հողը Հայաստանում շատ խախտու էր, քանզի սրանց գաղափարախոսությունները չէին բխում հայ իրականությունից, օտարածին էին: Նրանք Հայաստանում իբրև հոսանք, կուսակցություն՝ չունեին բավականաչափ կշիռ ու հենարան: Այսպես, օրինակ, հայ էսէռները ավելի շատ հակված էին պաշտպանել Անդրկովկասի ռուս զինվորականության ու ազգաբնակչության, քան հայ ժողովրդի ազգային-քաղաքական շահերը: Էսէռական հայտնի գործիչ Ա. Խոնդկարյանի խոստովանությամբ իրենց կազմակերպությունը «երբեք էլ տեղական խոշոր զանգվածներ չունեցավ իր հետ»³¹: Ավելին՝ Ա. Մռավյանը հայտնում է, որ էսէռները «չունեին և ոչ մի ազդեցություն հասարակական-քաղաքական կյանքում»³²:

Այս կապակցությամբ ոմանք կարող են առարկել, թե ինչպես կարող է պատահել, որ զուտ գյուղացիական կուսակցություն համարվող սոցիալիստ-հեղափոխականների կազմակերպությունը գերազանցապես գյուղացիական երկիր Հայաստանում չունենար բավականաչափ սոցիալական հենարան: Այստեղ խնդիրն այն է, որ էսէռականության ագրարային ծրագրերն ու պահանջներն արդեն ռուսական առաջին հեղափոխության ժամանակներից որդեգրել էր ՀՅ Գ-աշնակցությունը, ուստի այդ կտրվածքով ևս հայ էսէռները դառնում էին ավելորդություն՝ կրկնելով ՀՅԳ-ին:

Պետք է ասել, որ հայ էսէռների կազմակերպությունն իր աշխարհայացքով ու մարտավարությամբ հարում էր համառուսական էսէռականության կենտրոնամետ ուղղությանը, որը գլխավորում էր Վ. Չեռնովը: Հայ էսէռները առանձնապես համակրանք չեն ունեցել «ձախ» էսէռների հանդեպ: Այսպես, օրինակ, «ձախ» էսէռների 1918 թ. հուլիսյան հայտնի խռովության կապակցությամբ հայ էսէռները ցուցաբերել են բացասական վերաբերմունք. իրենց օրգան «Աշխատանքի դրոշակը» հայտարարում էր, որ «պայտամբության ճնշումը մեզ համար ոչ մի առանձին նշանակություն չի ներկայացնում»³³: Ի դեպ, «ձախ» էսէռներին չի համակրել նաև սոց-հեղ. կուսակցության Բաքվի կոմիտեն³⁴: Էսէռների անդրկովկասյան կազմակերպությունները հիմնականում հակառակորդ են եղել «ձախ» էսէռներին:

ցուցիչները՝ Ա. Մելիքյանը (*Տես «Խոսք», 26 հոկտեմբերի 1918 թ.*), Շ. Ամիրխանյանը՝ (*Տես՝ Շ. Ամիրխանյան, Մայիսյան պայտամբությունը Հայաստանում 1920 թ. Մոսկվա, 1926, էջ 75*), Ա. Հովհաննիսյանը՝ (*Ա. Գ. Հովհաննիսյան, Հայաստանի հեղափոխության հուլիսն ու հոկտեմբերը, Ե, 1923, էջ 9*), Բ. Բորյանը՝ (*Տես՝ Բ. А. Борьян, նշվ. աշխ., մաս 2-րդ, Մ.- Լ., 1929, էջ 91*) և ուրիշներ:

³¹ «Վեմ», Փարիզ, 1933, թիվ Ա, էջ 76:

³² Ա. Մռավյան, *Հողվածներ և ճառեր*, էջ 129:

³³ «Աշխատանքի դրոշակ», 12 հուլիսի 1918 թ.:

³⁴ *Знамя труда, 5 января, 1918.*

Ե՛լ էսէռները, և՛ սոցիալ-դեմոկրատները հանդես էին գալիս ռուսական համապետականության պաշտպանության կարգախոսներով³⁵: Մրանք անգամ իրենց կուսակցական համապատասխան լիագոր մարմինները չունեին ՀՀ տարածքում և նրանց խորհրդարանական խմբակցությունները սկզբնական փուլում ուղղություն ու ցուցումներ էին ստանում Թիֆլիսում գտնվող Անդրկովկասի սոցիալ-դեմոկրատական շրջանային և էսէռական կենտրոնական ղեկավար մարմինների կողմից: Դրա համար էլ, օրինակ, հայ սոցիալ-դեմոկրատների վրա զգալի էր վրաց սոց.-դեմ. ազդեցությունը: Բնավ պատահական չէր այն, որ Հայաստանի խորհրդարանի սոց.-դեմ. մենչևիկ պատգամավորների կուսակցական մանդատների տակ դրված էր Վրաստանի ներքին գործոց նախարար Նոյ Ռամիշվիլու ստորագրությունը³⁶:

Հայ սոցիալ-դեմոկրատները, որոնք հիմնականում հայ մենչևիկներն էին, հանդիսացել են ընդամենը վրաց մենչևիկների ձայնավողն ու կամակատարը: Հայ ազգաբնակչության մեջ այն պատկերացումը կար, որ մենչևիկները վրացական կուսակցություն են կամ էլ ռուսական³⁷: «Չեմ հիշում մի դեպք, - գրում էր պատգամավոր Ա. Բարայյանը (ՀՅԳ) իր հուշերում, - որ այս մարդիկ (հայ սոց.-դեմ. - Ա.Հ.) պաշտպան չհանդիսանան վրաց ղեկավար շրջանների անարդար և հայավնաս գործերին»³⁸: Օրինակ, 1918 թ. ղեկտեմբերին հայ-վրացական զինաբախման կապակցությամբ հայ մենչևիկ պատգամավորները, պաշտպանելով վրաց կառավարությանը, հայտարարում էին, թե Ախալքալաքը անհրաժեշտ է վրաց ժողովրդին որպես արտատեղ և ինչպես կարելի է զրկել վրաց դեմոկրատիային այդ գավառից: Իսկ պատերազմի ընթացքում այդ նույն խմբակցության անդամ Հ. Ազատյանը խորհրդարանի շենքում թաքցնում էր երիտասարդներին, որպեսզի նրանց զինվոր չտանեն³⁹:

Հատկանշական է, որ եթե հայ սոց.-դեմ. մենչևիկները հանդես էին գալիս Ախալքալաքը Վրաստանին կցելու անհրաժեշտության օգտին, ապա հայ էսէռները և շատ բոլշևիկներ, սուլթանովների ու նարիմանովների պես, Արցախն էլ դիտում էին որպես Ադրբեջանի անբաժան մասը: 1920 թ. մարտին, նույնիսկ Ղարաբաղից հայ բոլշևիկ-էսէռական պատվիրակություն է մեկնել Բաքու՝ վարչապետ Ուսուբբեկովի մոտ՝ իրենց համաձայնությունը հայտնելու Արցախը Ադրբեջանին միացնելու վերաբերյալ⁴⁰: Ահա մնան հարցերում է երևում այս կամ այն կուսակցության ազգային և ոչ ազգային էությունը:

Հայ մենչևիկները միայն մեկ անգամ փորձ արեցին ներագդելու իրենց կուսակից վրաց մենչևիկյան կառավարության վրա՝ հայ-վրացական սահմանային վեճը խաղաղ ճանապարհով հարթելու նպատակով, բայց ոչ մի արդ-

³⁵ «Վեմ», Փարիզ, 1933, թիվ Ա, էջ 67-69:

³⁶ «Հորիզոն», 10 նոյեմբերի 1918 թ.:

³⁷ *Буржуазные и мелкобуржуазные партии...*, М., 1980, с. 147.

³⁸ Ա. Բարայյան, նշվ. աշխ., էջ 7:

³⁹ Ա. Բարայյան, նշվ. աշխ., էջ 46:

⁴⁰ ՀՀ ՊԿՊԱ, Ժ. 198, գ. 1, գ. 52, թ. 52:

յունքի չհասան: Համենայն դեպս՝ հայ մենշևիկների այդ քայլը կարելի է համարել նրանց գործունեության ամենագնահատելի դրսևորումներից մեկը: 1918 թ. վերջերին հայ-վրացական դիմակայության կապակցությամբ Հայաստանի խորհրդի սոց.-դեմ. խմբակցությունը և Երևանի սոց.-դեմ. կազմակերպությունը սքափության և ողջախոհության համատեղ կոչ հրապարակեցին ու համապատասխան հեռագիր ուղարկեցին Թիֆլիս՝ ուղղված Անդրկովկասի (վրաց) սոց.-դեմ. կուսակցության մարզային (շրջանային) կոմիտեին, Վրաստանի խորհրդարանի նախագահ Ա. Չխեիձեին և կառավարության նախագահ Ն. Ժորդանիային՝ միջադեպը խաղաղ միջոցներով կարգավորելու հորդորներով⁴¹: Նրանում ասվում էր. «Հայաստանի խորհրդի սոց.- դեմ. ֆրակցիան և Երևանի սոց.- դեմ. կազմակերպությունը նկատի ունենալով, որ սահմանների խնդիրը զենքով լուծելու վճիռը սոսկալի ոճիր է հայ և վրացի ժողովուրդների հանդեպ, որ քայքայելու է իսպառ երկուսին էլ, առաջարկում է ձեռնարկել բոլոր միջոցները՝ արգելելու համար զինվորական գործողությունները Շահալի-Սանահին շրջանում»⁴²: Բայց այս ու այլ պացիֆիստական բնույթի կոչերը արդյունք չտվեցին:

Բնորոշ է, որ մինչև 1918 թ. նոյեմբերը հայ սոցիալ-դեմոկրատները կազմակերպչորեն չէին առանձնացել Անդրկովկասյան սոց.-դեմոկրատներից և չուներին անգամ իրենց սեփական կուսակցական կենտրոնական մարմինը⁴³: Ստացվում էր, որ հայ սոց.-դեմ. մենշևիկները շարունակում էին կառչած մնալ ու ղեկավարություն ստանալ վրաց սոց.-դեմ. կենտրոնից, իսկ այդ ղեկավարությունը հասկանալի է, իր մեջ հայանպաստ, ազգային շահ հետապնդող որևէ տարր չէր կարող պարունակել⁴⁴: Նման անհարմարությունից ազատվելու համար 1918 թ. վերջերին (նոյեմ. 21-ին) ՌՄԳԲԿ Անդրկովկասյան շրջանային կոմիտեն ստիպված եղավ ՀՀ սահմաններում մի առանձին ինքնավար Բյուրո հիմնել, որը «հանդիսանալու էր հանրապետության սահմաններում կուսակցության գերագույն մարմինը և որին պետք է դիմել կուսակցական բոլոր գործերով»⁴⁵: Նոյեմբերի սկզբից (2-ից) Երևանում սկսեց լույս տեսնել ՌՄԳԲԿ Երևանի կազմակերպության «Կայծ» պաշտոնաթերթը:

⁴¹ ՀՀ ՊԿՊԱ, ֆ. 404, ց. 1, գ. 5, ք. 1:

⁴² «Նոսթ», 26 հոկտեմբերի 1918 թ.:

⁴³ «Վեմ», Փարիզ, 1934, թիվ Է, էջ 45:

⁴⁴ Հայ սոց.-դեմոկրատներից բացառության կարգով, թերևս, կարելի էր առանձնացնել Արշակ Չուրաբյանին (Չուրաբով), որը, հավատարիմ մնալով ՌՄԳԲԿ ավանդներից, ամիսնա քննադատում էր մինչ այդ համառոտական շարժման մեջ եղանակ ստեղծող վրաց մենշևիկ պարագլուխների (ժորդանիաների, ծերեթելիների, չխեիձեների, չխենկելիների) անարող ազգայնականությունը, որ երեկվա ինտերնացիոնալիստները մտել էին ազգային պատյան, ու դարձել՝ բացահայտ մացիոնալ-շովինիստներ: 1919 թ. Ա. Չուրաբյանը փոխադրվեց Երևան եւ 1920 թ. հունվարի սկզբին մահացավ տիֆլիզ (տես՝ «Հառաջ», 6 հունվարի 1920 թ.):

⁴⁵ «Կայծ», 21 նոյեմբերի 1918 թ., «Հառաջ», Թիֆլիս, 14 հունվարի 1919 թ.:

Հայ սոց.-դեմոկրատ մենշևիկների կազմակերպական պաշտոնական անջատումը վրաց մենշևիկներից տեղի ունեցավ 1918 թ. նոյեմբերին Անդրկովկասյան սոց.-դեմ. (մենշևիկների) 8-րդ համագումարի (կոնֆերանսի) որոշումով: Համագումարը որոշում կայացրեց Անդրկովկասի սոց.-դեմ. կուսակցությունը բաժանել երեք ինքնուրույն՝ Վրաստանի, Հայաստանի և Ադրբեջանի սոցիալ-դեմոկրատական կուսակցությունների⁴⁶: Այդ բաժանումը, անշուշտ, կապված էր Անդրկովկասյան երեք առանձին անկախ հանրապետությունների ստեղծման հետ: Այսպիսով, ինտերնացիոնալիստական որակվող այս կուսակցությունը իր կազմով ու կազմակերպական կառուցվածքով դարձավ ազգային, այսինքն՝ ըստ էության նմանվեց ու նույնացավ հայ «սպեցիֆիկներին»:

Վրաց սոց.-դեմոկրատները կազմեցին առանձին կուսակցություն և նոյեմբերի 26-ին «Էրթոբա» («Միասնություն») լրագիրը, Անդրկովկասյանի փոխարեն, սկսեց անվանվել «Վրաստանի սոց.-դեմոկրատական բանվորական կուսակցության ԿԿ-ի օրգան»⁴⁷: Սակայն այդ չէր նշանակում, որ հայ մենշևիկները լիակատար ինքնուրույնություն ստացան: Վրաստանի տարածքում գտնվող հայ մենշևիկները շարունակում էին կախված մնալ վրաց մենշևիկյան կենտրոնից: Նրանք պարզապես հիմնել էին Վրաստանի սոց.-դեմ. բանվորական կուսակցության Հայկական սեկցիա, որի օրգանը դարձավ «Բանվորի ձայն» թերթը: Չմոռանանք տեղեկացնել, որ այդ նույն օրերին Վրաց սոց.-դեմոկրատների առաջին հիմնադիր կոնֆերանսում ընտրված ԿԿ-ի 21 անդամների թվում էին նաև Ա. Երզնկյանը և Ս. Փիրումյանը⁴⁸:

Հենց այս ժամանակ էլ (1918 թ. նոյեմբերին) տեղի ունեցավ նաև Երևանի բոլշևիկների կազմակերպական անջատումը մենշևիկներից⁴⁹: Ճիշտ է՝ մինչ այդ Հայաստանի բոլշևիկյան տեղական կազմակերպությունները ղեկավարվում էին ՌԿ/բ/Կ Կովկասյան Երկրային կոմիտեի կողմից, սակայն Անդրկովկասյան անկախ հանրապետությունների հռչակումից հետո, սահմանափակ արգելքների ու քաղաքական հալածանքների հետևանքով, անմիջական կապը փաստորեն խզվեց⁵⁰:

1918 թ. նոյեմբերին Երևան կուսակցական աշխատանքի են գալիս ՌԿ/բ/Կ Թիֆլիսի կոմիտեի անդամ Ստ. Ալավերդյանը և մի քանի ուրիշ բոլշևիկներ: Սրանց ջանքերով ու ղեկավարությամբ 1918 թ. նոյեմբերին Երևանի բոլշևիկները վերջնականապես խզվում են մենշևիկներից և ստեղծում ինքնուրույն կուսակցական կազմակերպություն⁵¹: Ստեղծված Բոլշևիկյան կուսակցական մարմինը իրեն հայտարարում է տեղի կոմունիստական

⁴⁶ «Մշակ», 21 նոյեմբերի 1918 թ.:

⁴⁷ «Նոր հորիզոն», 28 նոյեմբերի 1918 թ.:

⁴⁸ Նույն տեղում, 22 նոյեմբերի 1918 թ.:

⁴⁹ «Հայաստանի կոմկուսի պատմության ուրվագծեր», Երևան, 1967, էջ 279:

⁵⁰ Գ. Ա. Գալոյան, Հերոսական մայիսից-հաղթական նոյեմբեր, Երևան, 1980, էջ 46:

⁵¹ Գ. Բ. Ղարիբջանյան, նշվ. աշխ., էջ 264, Ծ. Պ. Աղայան, հոկտ. ռեոլյուցիան եւ հայ ժող. ազատագրումը, Երևան, 1957, էջ 215:

կազմակերպությունների ղեկավար, իսկ «Խոսք» լեզալ շաբաթաթերթը դառնում նրա օրգանը⁵²: Մինչ այդ արդեն՝ 1917 թ. հուլիսին, երկու ինքնուրույն մասերի՝ բոլշևիկյանի և մենշևիկյանի էր բաժանվել Ալեքսանդրապոլի կազմակերպությունը: Բոլշևիկյան կազմակերպության նախագահն էր Պ. Արվելաձեն, իսկ քարտուղարը՝ Բ. Ղարիբջանյանը⁵³:

Հարկ է նշել, որ սոց.-դեմ. երկու թևերի՝ մենշևիկների և բոլշևիկների տարածայնությունների ու հակամարտությունների հիմքում ընկած էին ինչպես ռազմավարական, այնպես էլ մարտավարական բնույթի խնդիրներ: Մենշևիկները ոչ միայն հակառակ էին բոլշևիկների ծայրահեղական գործելակերպին, այլև նրանց պատկերացրած և կառուցվող սոցիալիստական հասարակարգին: «Սեծամասնական սոցիալիստական մեթոդները և գործելակերպը, - նշում էր հայ մենշևիկների պաշտոնաթերթը, - մենք միշտ գտել ենք միանգամայն սխալ և անհամապատասխան պրոլետարիատի և դեմոկրատիայի շահերին»⁵⁴:

Բավականին ուշացումով էսէռները նույնպես իրենց կուսակցության լիազոր մարմինը՝ Հայաստանի կոմիտեն, հիմնեցին Հայաստանում, որը պետք է ղեկավարեր հայ էսէռների գործունեությունը հանրապետության ողջ տարածքում⁵⁵: Էսէռների կուսակցության Հայաստանի կոմիտեի նախագահ Լ. Թումանյանի տված հաշվետու զեկուցումներից մեկից տեղեկանում ենք, որ իրենց կուսակցության Հայաստանի կոմիտեն կազմվել է 1919 թ. փետրվար ամսին, երբ մի քանի կազմակերպությունների ներկայացուցիչների մի խորհրդակցությունում որոշվում է ժամանակավորապես խորհրդարանի էսէռական խմբակցության վրա դնել Հայաստանի կոմիտեի ֆունկցիաները⁵⁶:

Սոց.-հեղ. կուսակցության Հայաստանի գործուն կազմակերպություններից էր Երևանի կոմիտեն: Սկսած 1919 թ. հունիսից՝ էսէռների կուսակցության հայաստանյան կազմակերպության օրգանն էր «Սոցիալիստ հեղափոխական» շաբաթաթերթը:

1919 թ. սկզբներից գործելով ՀՀ սահմաններում ու հատկապես մասնակցելով խորհրդարանական ընտրաշավին՝ Հայաստանի էսէռները քարոզչության, հայության մեջ նստած ռուսասիրական ձգտումների շահարկման և այլ միջոցներով կարողացան իրենց դիրքերը մի փոքր ամրացնել: Հայաստանի մի քանի շրջաններում (Կարսում, Իջևան-Դիլիջանում, Ալեքսանդրապոլում, Ղարաբաղիսայում, Սուրմալում) հիմնվեցին տեղական նոր կազմակերպություններ⁵⁷:

⁵² ՀՀ ՀՔԿՓ ՊԿԱ, Ֆ 4012, ց. 1, գ. 32, թ. 4, Ֆ. 4056, ց. 1, գ. 65, թ. 9:

⁵³ Բ. Ղարիբջանյան, Սովետական իշխանության համար մղված պայքարում (հողվածներ, ելույթներ և նյութեր 1917-1920 թթ.) Երևան, 1966, էջ 8, ՀՀ ՀՔԿՓ ՊԿԱ, Ֆ. 1022, ց. 2, գ. 12, թ. 1:

⁵⁴ «Բանվորի ձայն», Թիֆլիս, 23 մայիսի 1920 թ.:

⁵⁵ «Վեն» Փարիզ, 1934, թիվ Ե., էջ 46:

⁵⁶ «Սոցիալիստ հեղափոխական», 21 օգոստոսի 1919 թ.:

⁵⁷ «Լրաբեր», ՀՀ Գ.Ա.Ա., 1994, թիվ 1, էջ 119:

Եթե արևելահայության մեջ, այնուամենայնիվ, կային էսեռականության ու սոցիալիզմի գաղափարներին առանձին արձագանքողներ, ապա այդ նույն բանը չի կարելի ասել արևմտահայ գաղթականության մասին: Արևմտահայ գաղթական զանգվածները հիմնականում գնում էին Գաշնակցություն և Ս. Ռամկավար կուսակցությունների հետևից: Նրանք չէին ընկալում և չէին ընդունում սոցիալիզմի գաղափարախոսությունը նրա ցանկացած դրսևորումով: Էսեռների պաշտոնաթերթ «Սոցիալիստ հեղափոխականը» վկայում է, որ մինչև այժմ թրքահայության մեջ սոցիալիստական որևէ կազմակերպություն գոյություն չի ունեցել՝ ո՛չ սոցիալ-դեմոկրատական և ո՛չ էլ էսեռական⁵⁸: Հայ էսեռները գաղթականության այդ սոցիալիստամերժության մեղավորը համարում էին Գաշնակցությանը և Սահ. ռամկավարներին: Բայց իրականում դրա գլխավոր «մեղավորը» պետք է համարել այն միջավայրը և պայմանները, որի մեջ գտնվել է արևմտահայությունը:

Քաղաքական կողմնորոշման առումով հայ էսեռները ցուցաբերել են ընդգծված ռուսական կողմնորոշում, նույնիսկ առանց կարևորություն տալու Ռուսաստանում առկա քաղաքական վարչակարգերին: Նրանք դեմ էին Հայաստանի քաղաքական անկախությանը և գտնում էին, որ նա պետք է դաշնակցային (ֆեդերատիվ) կապերով միանա Ռուսաստանին, իսկ դրան հասնելու համար Հայաստանում պետք է հաստատվի խորհրդային իշխանություն⁵⁹: Ընդգծված ռուսական կողմնորոշում ուներ նաև խորհրդի «ձախ» մյուս՝ սոցիալ-դեմոկրատների խմբակցությունը: Նրանք չէին պատկերացնում Հայաստանի գոյությունը՝ առանց Ռուսաստանի: Այսպիսով, «ձախերը» թեև խոսքով ընդունում էին ազգերի ինքնորոշման իրավունքը, սակայն կողմնորոշվելով դեպի Ռուսաստան՝ գործնականում դեմ էին Հայաստանի քաղաքական ինքնորոշմանն ու անկախությանը: Օրինակ, սոց.-դեմ. (մենշևիկ) Թ. Ավդաբեկյանը 1919 թ. ամռանը գրում էր. «Վտանգալից ու ծանրալուծ անկախության փոխարեն մենք՝ հայ սոցիալ-դեմոկրատներս, քարոզում ենք և քարոզելու ենք նաև ապագայում մտնել վերակազմված Ռուսաստանի իրավահավասար ժողովուրդների ազատ ու մեծ գերդաստանի մեջ»⁶⁰:

Իսկ էսեռական կուսակցության Անդրկովկասի շրջանային և Թիֆլիսի կոմիտեի օրգան «Աշխատանքի դրոշակ» թերթը Հայաստանի անկախությունը որակում էր որպես «դառն հեգևանք ինքնորոշման գաղափարին ու այն ժողովրդին, որին «անկախություն է» պարզևում»⁶¹: Հայ բոլշևիկները և երիտասարդական «Սպարտակ» միությունը ևս Հայաստանի «հանրապետություն», «անկախություն» հասկացությունները առնում էին չակերտների մեջ⁶²: Հարց է ծագում. ինչո՞ւ էին էսեռները և մյուս ձախակողմյան քաղաքական ուժերը դեմ

⁵⁸ «Սոցիալիստ հեղափոխական», 21 օգոստոսի 1919 թ.:

⁵⁹ ՀՀ ՀՔԿԳ ՊԿԱ, ֆ. 4033, ց. 7, գ. 53, թ. 1:

⁶⁰ «Կայծ», 2 հուլիսի 1919 թ.:

⁶¹ «Աշխատանքի դրոշակ», Թիֆլիս, 13 հունիսի 1919 թ.:

⁶² ՀՀ ՀՔԿԳ ՊԿԱ, ֆ. 4012, ց. 1, գ. 9, թ. 2, նույնը՝ «Սպարտակ», 1 մայիսի 1919 թ.:

Հայաստանի անկախությանը: Նրանք դեմ էին Հայաստանի անկախությանը նախ նրա համար, որ անկախանալու դեպքում Հայաստանը կկտրվեր Ռուսաստանից, ինչպես նաև նրա համար, որ անկախացման գործընթացը կվնասեր անդրկովկասյան ժողովուրդների ինտերնացիոնալ համերաշխությանն ու համագործակցությանը:

Որքան որ էսեռները իրենց ծրագրով և գործելակերպով մոտ էին կանգնած ՀՅԳ կուսակցությանը, նույնքան էլ հեռու էին իրարից քաղաքական դավանանքով ու հետապնդած նպատակներով: Այստեղ խնդիրն ամենևին էլ այն չէ, թե սխալ կամ ճիշտ էր Հայաստանի ռուսական կողմնորոշումը, այլ բանն այն էր, որ «ձախ» կուսակցությունները հիմքից ժխտում էին Հայաստանի անկախ պետականության գաղափարը և Հայաստանն ու հայ ժողովրդին տարբարություն էին ռուսական համապետականության մեջ: Տակտիկական նկատառումով, թերևս, որոշ վերապահություն պետք է անել սոց.-դեմ մենշևիկների մոտեցման (դիրքորոշման) հարցում: Վերջիններս ճանաչում էին Հայաստանի անխակությունն ու Ռուսաստանից անջատվելու անհրաժեշտությունը այնքանով, որքանով, որ այնտեղ իշխում էր, իրենց համար անընդունելի, բոլշևիկյան վարչակարգը: Հայ սոց.-դեմ. մենշևիկներին ամենևին ցանկալի չէր բոլշևիկյան Ռուսաստանի Անդրկովկաս ու Հայաստան գալը⁶³: Նրանք հայ ժողովրդի փրկությունը տեսնում էին «դեմոկրատական Ռուսաստանի վերականգնման մեջ»⁶⁴, իսկ դրա տակ հասկանում էին հետփետրվարյան ժամանակավոր կառավարության տիպի ժողովրդավարական Ռուսաստանը: Յավոք, սրանք «ձախ» կուսակցությունների կողմից արտահայտվող սուկ ցանկություններ էին, որոնք հեռու էին իրական կյանքից: Բացի այդ, սոց.-դեմոկրատները և էսեռները շատ էին խոսում անդրկովկասյան ժողովուրդների միասնության ու համերաշխության մասին: Մինչդեռ միակողմանի մասն քարոզը, ըստ էության, նշանակում էր կազմալուծել ու թուլացնել հայ ժողովրդի ազգային-պետական և միասնական ինքնապաշտպանական ոգին ու շահերը: Եվ դա այդ դեպքում, երբ Ադրբեջանի, Վրաստանի, էլ չենք ասում Թուրքիայի իշխող քաղաքական ուժերը անսքող զավթողական ծրագրեր ունեին Հայաստանի նկատմամբ: Չախերի թույլ տված այս բացը փակում էին հայ ազգային կուսակցությունները:

«Չախ» կուսակցությունների ներկայացուցիչները Հայաստանի խորհրդարան էին մտել ոչ թե այն բանի համար, որ ընդունում էին Հայաստանի պետականությունը և անկախությունը, այլ Հայաստանը «կրկին իր իսկական տիրոջը՝ Ռուսաստանին վերադարձնելուն»⁶⁵: Ինչպիսին էլ որ լիներ «ձախ» ընդդիմության՝ սոցիալիստ-հեղափոխականների ու սոցիալ-դեմոկրատ մենշևիկների գործունեության դասակարգային, ապագային բովանդակույթ-

⁶³ «Խոսք», 10 հունվարի 1919 թ.:

⁶⁴ «Կայծ», 13 փետրվարի 1919 թ.:

⁶⁵ «Աշխատանք», 17 մայիսի 1919 թ.:

յունը, այնուամենայնիվ, դրանք հանդիսանում էին ժողովրդավարական կուսակցություններ:

Չախակողմյան կուսակցությունների ծայրագույն ձախ թեևն էին հարում բոլշևիկ-կոմունիստները, որոնք եղածներից ամենավտանգավորն էին երկրի անկախության և հանրապետության իշխանությունների համար:

Հայաստանի խորհրդում սոց.-դեմ. խմբակցությունը չունեք միասնական ու հետևողական ուղեգիծ: Դրա պատճառը ոչ միայն այն էր, որ հինգ մենչևիկ պատգամավորների կողքին կար մեկ բոլշևիկ (Ա. Մելիքյան), այլ նաև, որպես սուբյեկտիվ գործոն, նրա համար, որ խմբակցությունը գլխավորում էր մի անձնավորություն, որն Ա. Խոնդկարյանի կարծիքով «իր խառնվածքով ու ունակություններով միանգամայն անհամապատասխան էր նման մի ծանրակշիռ պաշտոնի համար»⁶⁶: Խոսքը մենչևիկ Հայկ Ազատյանի մասին է, որն հետագայում Հայաստանի խորհրդայնացման փուլում անցավ Կոմունիստական կուսակցության շարքերը: Նա խորհրդի նիստում հանդես էր գալիս ինքնավստահ կեցվածքով ու հանդուգն տոնով աջ ու ձախ քննադատում էր կառավարությանը, ՀՅԳ-ին, մյուս կուսակցություններին⁶⁷: Պատահում էին նաև դեպքեր, երբ սոց.-դեմ. խմբակցության խոսնակ Հ. Ազատյանը այս կամ այն հարցի առթիվ արտահայտած իր անձնական տեսակետը ներկայացնում էր որպես խմբակցության տեսակետ և դրանով իսկ խմբակցության անդամների մեջ առաջ բերում դժգոհություններ:

Իր հերթին, միակ բոլշևիկ պատգամավոր Ա. Մելիքյանը փաստորեն հանդես էր գալիս մեկուսի: Մեպտեմբերի սկզբի նիստերից մեկում նա, հանդես բերելով ավելի զգաստ ու հավասարակշիռ մոտեցում, քննադատում էր իր խմբակցության ներկայացուցիչ Հ. Ազատյանին այն բանի համար, որ նա տեղի ու անտեղի, անհարկի քննադատում էր Հայաստանի կառավարությանը, մինչդեռ Անդրկովկասյան սեյմում աշխատած ժամանակ նա չէր քննադատում մենչևիկների կառավարությանը, որովհետև վրաց սոցիալ-դեմոկրատներից նպաստ (աշխատավարձ) էր ստանում: Ա. Մելիքյանի այդ ելույթը խորհրդարանը դիմավորել է ծափահարությամբ⁶⁸:

Հարկ է նշել, որ Ա. Մելիքյանն իր պահվածքով ու չափավորությամբ եպես տարբերվում էր մյուս ավելի արմատական ու ծայրահեղ երիտասարդ բոլշևիկներից: Բայց և այնպես՝ նա հավատարիմ էր մնում իր կուսակցության քաղաքական դավանանքին ու հետապնդած նպատակներին: Ա. Մելիքյանը մենչևիկներից շատ ավելի հետևողականորեն, խորհրդի նիստերի իր ելույթներում, հանդես էր բերում ընդգծված սոցիալ-դասակարգային մոտեցում: Օրինակ, նա դասակարգային բաժանում մտցնելով հայ ժողովրդի մեջ, պա-

⁶⁶ «Վեմ», 1934, թիվ Ե, էջ 55:

⁶⁷ «Կառավարության լրաբեր», 6 սեպտեմբերի 1918 թ.:

⁶⁸ Նույն տեղում:

հանջում էր «անպայման անցնել բուրժուազիայի վրայով», հանուն ժողովրդի շահերի՝ գոհել դրան⁶⁹:

Հայ բոլշևիկները ի սկզբանե անհանդուրժող դիրք գրավեցին ՀՀ և նրա կառավարության նկատմամբ: Նրանք գաղտնի ու բացահայտ առիթը բաց չէին թողնում տապալելու գոյություն ունեցող վարչակարգը: Հայ բոլշևիկների գրաված ակնհայտ հակադաշնակցական, մարտաշունչ դիրքորոշումը բացորոշ երևում է 1918 թ. սեպտեմբերի ամսին Հայաստանի խորհրդարանում կարդացված մեծամասնականների հայտարարագրից: Այն տպագրվել է Երևանի կոմունիստական կազմակերպությունների օրգան «Խոսք» թերթում, որի խմբագիրն ու հրատարակիչն էր Ա. Մելիքյանը: Նրանում մասնավորապես ասվում էր. «Մենք անհրաժեշտ ենք համարում շեշտել, որ հայ ժողովրդի ներկա քաղաքական կացությունը երբեք չի կարելի համարել կայուն, բնական ու բավարար: Ժողովրդի վզին բռնությամբ և խաբեությամբ փաթաթված քաղաքական ծանր վիճակը պետք է նույնպես ուժով և դիվանագիտական ճարպկությամբ վերացնել: Մեր կուսակցության կողմից հանցանք կլիներ, եթե փորձեր որևէ մեկի ներշնչել այն միտքը, թե մեր տվյալ իրականության հետ պետք է հաշտվել և սկսել խաղաղ ստեղծագործական աշխատանք. այդ ոչ մի դեպքում⁷⁰: Եվ ահա այս ամենին վերջ տալու համար հայտագրում հետևյալ միտքն էր զարգացվում. «Չխնայել ոչ մի գոհաբերություն և ցույց տալ ամենայն պատրաստակամություն՝ գոյություն ունեցող անարգ և խայտառակ լուծը դեն շարտելու համար»⁷¹:

Բայց Ա. Մելիքյանին վիճակված չէր երկար զբաղեցնելու պատգամավորական աթոռը: Այն բանից հետո, երբ 1918 թ. նոյեմբերին տեղի ունեցավ Հայաստանի բոլշևիկների վերջնական կազմակերպական անջատումը մենշևիկներից, այդ հիման վրա բոլշևիկները պահանջեցին, որ խորհրդարանում իրենց առանձին տեղ հատկացվի: Ա. Մելիքյանը նոյեմբերի 16-ի նիստում գրավոր առաջարկություն մտցրեց, որպես առանձին քաղաքական հոսանքի, իրենց մեկ առանձին տեղ տալ⁷²: Սակայն խորհուրդը ձայների մեծամասնությամբ մերժեց նման պահանջը: Գաշնակցության խմբակցությունը առաջարկեց բոլշևիկներին մեկ տեղ տալ սոց.-դեմ. խմբակցության հաշվին, այսինքն՝ բոլշևիկներին թողնել սոց.-դեմ. խմբակցության 6-րդ տեղը: Բայց մենշևիկները չհամաձայնեցին այդ առաջարկին: Նրանք գտնում էին, որ վեց տեղն էլ իրենց է պատկանում, և թող բոլշևիկների համար մեկ լրացուցիչ տեղ հատկացվի: Սակայն մանդատային հանձնաժողովը հայտնում է, որ դա խորհրդի ձևավորման մասին օրենքի խախտում կլինի: Զվեարկությամբ անցնում է ՀՅԳ խմբակցության առաջարկը. այն է՝ բոլշևիկներին մեկ տեղ հատկացնել սոց.-դեմ. խմբակցության 6-րդ տեղի հաշվին: Բայց բոլշևիկների հա-

⁶⁹ ՀՀ ՊԿՊԱ, ֆ. 198, ց. 1, գ. 17, թ. 6:

⁷⁰ «Խոսք», 22 սեպտեմբերի 1918 թ. (թիվ 1):

⁷¹ Նույն տեղում:

⁷² «Կայծ», 21 նոյեմբերի 1918 թ.:

յաստանյան կազմակերպությունը հրաժարվում է սոց.-դեմ. խմբակցության 6-րդ տեղը գրավելուց: Գ-րանից հետո Ա. Մելիքյանը, իր դիմումի համաձայն, դուրս է գալիս Հայաստանի խորհրդի կազմից և նրա տեղը գրավում է մեկ ուրիշ մենչևիկ⁷³:

Երևանի կոմունիստական կազմակերպության պաշտոնաթերթ «Խոսքի» հավաստմամբ՝ Ա. Մելիքյանի հեռացումը խորհրդարանից մենչևիկ խմբակցության բանասրկության հետևանք էր: Ըստ «Խոսքի»՝ Ա. Մելիքյանին հեռացրել են, որպեսզի սոց.-դեմ. խմբակցության 6-րդ անդամի տեղը զբաղեցնի Թիֆլիսից Երևան ժամանած Արկոմեդը (Գ-ևորգ Ղարաջյանը)⁷⁴: Տեղեկացնենք, որ դեռ 1918 թ. գարնանը (մայիսին) իր դիմումի համաձայն Գ. Ղարաջյանը հեռացել էր Վրաստանի սոց.-դեմ. բանվորական կուսակցության շարքերից⁷⁵: Արկոմեդի խորհրդարան մտնելը նպատակ ուներ ուժեղացնել սոց.-դեմ. խմբակցությունը: Վերջինս ներկայացավ որպես խմբակցության նոր խոսնակ՝ առաջ բերելով ներքին մրցակցություն իր և Հ. Ազատյանի միջև:

Հայաստանի խորհրդում կուսակցական պատկանելություն չունեին (համենայն դեպս, ցույց չէին տալիս) ազգային փոքրամասնությունների՝ թուրք, ռուս, եզդի ներկայացուցիչները: Նրանք բնականաբար հանդես էին գալիս Հայաստանում բնակվող բոլոր ժողովուրդների շահերի պաշտպանության պահանջով: Խորհրդում հակաանկախական և հակապետական դիրքորոշում ունեին ազգային փոքրամասնությունների, մասնավորապես 6 թուրք և 1 ռուս ներկայացուցիչները: Թուրք պատգամավորները ավելի հաճախ աշխատում էին իրենց ցույց տալ չեզոք կամ էլ վճռական պահերին խուսափում էին նիստերից ու քվեարկություններից: Թուրք-թաթարների դիրքորոշումը ՀՀ - հանդեպ ինքնըստինքյան պարզ է: Հարկ է նշել, որ հայաստանաբնակ ռուսների վերաբերմունքը հայկական պետականության նկատմամբ այնքան էլ նպաստավոր չէր: «Հայաստանում բնակվող ռուսները,- գրում էր անկուսակցական Գ. Չալխուշյանը,- երբեք չուզեին մեզ հպատակել, որովհետև ցարական կառավարության օրոք արտոնյալ դրություն կը վայելեին Հայաստանի մեջ և կուզեին նույն դրությունը պահպանել»⁷⁶:

Ազգային փոքրամասնությունների պատգամավորներից, թերևս, միակ կառուցողական դիրքորոշում ցուցաբերող քրդական միակ ներկայացուցիչն էր: Գ. Չալխուշյանը վկայում է, որ Հայաստանում բնակվող ազգային փոքրամասնություններից միայն եզդիները մեզ հետ էին, միշտ մեր օգնությանը կարոտ և կառավարությունը անգամ դրամ բաց կթողներ նրանց Եվրոպայի մեջ իրենց շահերը պաշտպանելու համար⁷⁷: Հաճախ եզդի միակ պատգամա-

⁷³ «Կայծ», 24 նոյեմբերի 1918 թ., «Վեմ», 1934, թիվ 2, էջ 84, «Խոսք», 30 նոյեմբերի 1918 թ.:

⁷⁴ «Խոսք», 22 փետրվարի 1919 թ.:

⁷⁵ ՀՀ ՊԿՊԱ, Ֆ. 4051, ց. 1, գ. 39, թթ. 1-2:

⁷⁶ Գ. Չալխուշյան, Ի՞նչ էր և ի՞նչ պիտի լինի մեր ուղին, Վիեննա, 1923, էջ 13-14:

⁷⁷ Գ. Չալխուշյան, նշվ. աշխ., էջ 14:

վորի ձայնից էր կախված լինում այս կամ այն հարցի լուծումը: Պատգամավոր Ա. Բաբայանը հայտնում է, որ եզրի պատգամավորը մշտապես հարում էր ՀՅԴ խմբակցությանը⁷⁸:

Այսպիսով, Հայաստանի խորհրդարանի ընդդիմադիր կուսակցությունների գործունեության ուսումնասիրությունը ցույց է տալիս, որ ընդհանուր առմամբ դրանք եղել են թույլ: Դրա գլխավոր պատճառներից մեկն այն էր, որ թե՛ ժողովրդականները և թե՛ հատկապես սոցիալ-դեմոկրատներն ու սոցիալիստ-հեղափոխականները Հայաստանի իրականության մեջ չունեին բավականաչափ սոցիալական հող, նրանց հետևից չէին գնում լայն հասարակաշերտեր, իսկ նրանց կուս-կազմակերպությունները տեղում թույլ էին ու տարտամ:

Ընդդիմադիր կուսակցությունների՝ Հայաստանում թուլության մյուս կարևոր պատճառն այն էր, որ խորհրդարանական «աջ» և «ձախ» երեք կուսակցությունները իրենց ղեկավար ցուցումները գործնականում ստանում էին Թիֆլիսից՝ այնտեղ գտնվող նրանց կենտրոնական մարմիններից: Վերջիններս, հեռու գտնվելով հայրենիքից, ուշացած որոշումներ էին կայացնում ու ղեկավար հրահանգներ տալիս՝ հաճախ առանց իրազեկ լինելու տեղական պայմաններին:

Ի տարբերություն Վրաստանի և Ադրբեջանի, որտեղ իրենց պետականության պաշտպանության դիրքերում էին կանգնած ոչ միայն բուրժուական, այլև տարբեր գունավորման սոցիալիստական, սոցիալ-դեմոկրատական, կրոնական տիպի կուսակցություններն ու կազմակերպությունները, Հայաստանի խորհրդարանում, ընդհակառակը, բացահայտ հակապետական գիծ էին վարում «ձախ» կուսակցությունների խմբակցությունները, առանձին ղեպքերում նաև աջակողմյան ՀԺԿ-ը: Վերջինս նման գործունեությունը ամենից առաջ ուղղված էր ՀՅԴ ղեկավար դիրքերն ու հեղինակությունը թուլացնելու և իշխանությունն իր ձեռքը վերցնելու հանգամանքով:

Ասպարեզում մնում էր 18 պատգամավորանոց ՀՅԴ խմբակցությունը, որը հարկադրված էր դիմակայել «աջ» ու «ձախ» խմբակցություններին: Կառուցողական աշխատանքի գրեթե ամբողջ ծանրությունը ընկած էր Դաշնակցության խմբակցության վրա: Նա էր ազատ և անկախ Հայաստանի գաղափարի ամենահետևողական պաշտպանն ու մարմնավորողը:

Խորհրդարանի «աջ» և «ձախ» ընդդիմադիր կուսակցությունների շատ առաջնորդներ այդպես էլ չբարեհաճեցին տեղափոխվել ու աշխատել հայրենիքում: Պետք է նկատի ունենալ, որ Հայաստան գալ և աշխատելը կապված էր Երևանից 7 վերստ հեռավորության վրա, կյանքը այստեղ բարեկեցիկ չէր, տարածված էին համաճարակային հիվանդությունները: Շատերը աքսորավայր էին համարում սովի, համաճարակի, գաղթականության ու ավերի երկիր Հայաստանը և նրա մայրաքաղաք Երևանը:

⁷⁸ Ա. Բաբայան, *նշվ. աշխ., էջ 13*:

Ի տարբերություն Հայ ժողովրդական, սոց.-դեմ. և էսեռական կուսակցությունների՝ ՀՅԳ-ն ի սկզբանե իր կառույցներով ու պատասխանատու դեկավար գործիչներով փոխադրվեց հայրենիք (Երևան)՝ Թիֆլիսում թողնելով միայն «Աշխատավոր» թերթի շուրջը համախմբված այն երիտասարդներին, որոնք գլխավորեցին ՀՅԳ Վրաստանի կազմակերպությունը⁷⁹։ Հայաստան եկան նաև Ադրբեջանում գտնվող ՀՅԳ լավագույն ուժերը։ Դաշնակցությունը, հավատարիմ մնալով իր լավագույն ավանդներին, նախընտրեց լինել ժողովրդի հետ։ «Դաշնակցության դերը բուն Հայաստանում էլ ավելի մեծացավ, որովհետև նախորդ տասնամյակների բեղմնավոր գործունեությամբ նա խոր արմատներ էր ձգել հայ զանգվածների մեջ»⁸⁰։ Դառնալով կառավարող կուսակցություն, ՀՅԳ գնալով ավելի ամրապնդեց դիրքերը ժողովրդի մեջ և պետական կառույցներում։

2. Արտախորհրդարանական կուսակցությունները

ՀՀ գործում էին նաև կուսակցություններ, որոնք խորհրդարանում չուներին պատգամավորական ներկայացուցչություն։ Այդպիսիներից էին Հայ Ս. Ռամկավար, ՍԳ- Հնչակյան կուսակցությունները և «Սպեցիֆիկների» կազմակերպությունը։ Այս երեք քաղաքական կազմակերպություններն էլ ՀՀ ներսում առանձնապես շոշափելի կշիռ չեն ունեցել։

Հայ սահմանադրական ռամկավար կուսակցությունը։ Ինչպես հայտնի է, 1908 թ. հոկտեմբերին Արմենականների, Վերակազմյալ հնչակյան կազմակերպությունների և մի քանի այլ համախոհ խմբակցությունների միավորումով հիմնվել էր Հայ սահմանադրական ռամկավար կուսակցությունը⁸¹։ Սահմանադրական ռամկավարների կուսակցության ստեղծումից հետո Արմենականությունը գործնականում դադարում է այս անունով կոչվել, սակայն, հանձին իր այս նոր իրավահաջորդի, պահպանվում ու շարունակվում են նրա ուղղությունն ու ավանդները նոր անվան տակ։ Արտակ Դարբինյանի պատկերավոր արտահայտությամբ՝ Արմենականությունը եղավ ռամկավար կուսակցության շաղախը⁸²։

Հանդես գալով երիտթուրքական հեղաշրջման փուլում, Սահմանադրական ռամկավարները իրենց մշակած ծրագրում պաշտպանեցին Օսմանյան

⁷⁹ «Վեմ», Փարիզ, 1934, թիվ Ե, էջ 43։

⁸⁰ Նույն տեղում, էջ 47։

⁸¹ Ա. Դարբինյան, Հայ ազատագրական շարժման օրերեն (1890-1940), Փարիզ, 1947, էջ 181-195, Մ. Ավետյան, Հայ ազատագրական ազգային հիսունամյա հուշամատյան (1870-1920), Փարիզ, 1954, էջ 59-60, Վ. Ղազարյան, Արմենական կուսակցություն (ակնարկներ), Բեյրութ, 1985, էջ 63։

⁸² Ա. Դարբինյան, նշվ. աշխ., էջ 5։

պետության ամբողջականության պահպանման գաղափարը⁸³: ՀՅԴ և Ս. Դ. հնչակյանների պես սրանք էլ արտահայտվում էին Արևմտյան Հայաստանի ինքնավարության օգտին: Ս. ռամկավարները իրենց մերձավոր նպատակն էին համարում «օրինական միջոցներով ձեռք բերել թուրքահայերի համար ազգային լայն իրավասություններ (կրոնական, կրթական, լեզվի, մշակույթի, առաջադիմության և այլն) Օսմանյան պետության մեջ⁸⁴: Ինչպես տեսնում ենք, իր ազգային պահանջներում կուսակցությունը չափավոր էր: Այս կուսակցության նշանաբանը ժողովրդավարությունն էր:

Ազատական ու ժողովրդավարական բովանդակություն ուներ նրա տնտեսական և սոցիալ-քաղաքական պլատֆորմը: Ս. ռամկավարները պաշտպանում էին սեփականատիրական, ապրանքաշուկայական հարաբերությունները: Նրանք չէին ընդունում ընկերվարության (սոցիալիզմի) վարդապետությունը, կողմ էին տնտեսական բարեփոխումներին, անհատական գործունեությանը, տնտեսական մրցությանը, ընդունում էին ե՛ր դրամը, ե՛ր տաղանդը, ե՛ր աշխատանքը⁸⁵:

Շարունակելով Արմենականների մարտավարական ավանդները՝ սրանք ևս դեմ էին ցուցարարությանը, աղմկարարությանը և հախուռն գործողություններին: Ս. Ռամկավար կուսակցությունը, նախապատվություն տալով խաղաղ (ոչ հեղափոխական) գործելակերպին, այդուհանդերձ, պատրաստ էր օգնել ու օժանդակել հայրենասիրական ամեն մի ձեռնարկ, այդ թվում՝ մարտական ու ինքնապաշտպանական, եթե վտանգ է սպառնում ազգին:

Սակայն կարճ ժամանակամիջոցում կյանքը ցույց տվեց, որ Օսմանյան Թուրքիան այն երկիրն ու միջավայրը չէր, ուր հնարավոր լիներ իրագործել ծրագրային այս չափավոր, ռամկավար, ազատական պահանջները: Ընդհակառակը, իշխանության ղեկին անցած երիտթուրք պարագլուխները հայ քաղաքական ուժերի առաջ քաշած այս օրինապահ և առաջադիմական դիրքորոշմանը պատասխանեցին արևմտահայության զանգվածային տեղահանությանը ու կոտորածներով:

Եղեռնից մազապուրծ տարագիր հայության հետ միասին Ս. Ռամկավարների գործունեության ծանրության կենտրոնը փոխադրվեց գաղթաշխարհ: Արևմտահայ գաղթականության, հատկապես վան-վասպուրականցիների մի սովոր հատված (120 հազար) ներգաղթեց Անդրկովկաս⁸⁶: Դրանց մեջ էին նաև Ս. ռամկավարների մի հատվածը: Փաստերը ցույց են տալիս, որ Կովկասի հայ ռամկավարները քաղաքական հայացքներով ու համոզմունքով հիմնականում ներկայացնում էին Վան-Վասպուրականի նախկին Արմենականներին, որոնք, 1915 թ. փախստական հայ գաղթականության հետ միասին

⁸³ «Ծրագիր և կանոնագիր Սահմանադրական-ռամկավար կուսակցության», Պոլիս, 1910, էջ 9-10:

⁸⁴ «Հայաստանի ծայն», 2 նոյեմբերի 1919 թ.:

⁸⁵ «Ծրագիր և կանոնագիր...», էջ 9-11:

⁸⁶ Ա. Դարբինյան, *նշվ. աշխ.*, էջ 334:

վտարանդի լինելով, ներգաղթել էին Կովկաս՝ կենտրոնավայր ունենալով Թիֆլիսը: Դեպի Անդրկովկաս ներգաղթած ժողովրդի հետ էր նաև Վանի շրջանային ակումբը: Թիֆլիսում սկսեց վերահրատարակվել «Վան-Տոսպը»: Սա փաստորեն համարվում էր տակավին 1913 թ. Վանում լույս տեսնող նույնանուն թերթի իրավահաջորդն ու գործի շարունակողը: Թերթն իր առջև խնդիր էր դրել արևելահայերին լսելի դարձնել արևմտահայ ժողովրդի ձայնը⁸⁷: Անդրկովկասում «Վան-Տոսպը» կուսակցության անունից իր առջև խնդիր էր դրել.

ա) Ներկայացնել հայ և օտար ընթերցողներին Եղեռնի ժամանակ երիտթուրքերի գործած գազանությունները,

բ) Պաշտպանել Հայաստանը Թուրքիայից անջատելու գաղափարը,

գ) Վեր հանել ՀՀ Դաշնակցության գործած սխալներն ու աղետները թրքահայոց խնդրում ,

դ) Հոգալ թրքահայ գաղթական բեկորների գոյության մասին⁸⁸:

1917 թ. մայիսին Թիֆլիսում գումարվեց Հայ ռամկավարների Վան-Վասպուրականի տարածքային (շրջանակային) ակումբի ընդհանուր ժողովը (համագումարը)՝ խնդիր ունենալով ճշտելու և հստակեցնելու համար գաղթականության հետ կապված իրենց անելիքները⁸⁹: Այս համագումարում Վանի շրջանային Ակումբի վարչությունը վերակառուցվեց Հայաստանի կենտրոնական (շրջանային) խորհրդի, որը 1918 թ. գարնանը թուրքերի՝ Անդրկովկասի սահմանները ներխուժման պատճառով, փոխադրվեց Ռոստով, իսկ ավելի ուշ՝ 1919 թ. առաջին ամիսներին, Խորհուրդն իր գործունեությունը սկսեց նորանկախ հանրապետության մայրաքաղաք Երևանում⁹⁰:

1919թ. մարտի 24-ից Երևանում սկսեց լույս տեսնել Հայ ռամկավարների պաշտոնաթերթ «Վան-Տոսպը», որի լուսընծայումը ընդհատվել էր հայվրացական պատերազմի հետևանքով: Իսկ ավելի ուշ՝ 1919 թ. սեպտեմբերի 22-ից, «Վան-Տոսպի» փոխարեն սկսեց լույս տեսնել «Հայաստանի ձայն» եռօրյան, որը հանդիսանում էր Հայ ռամկավար կուսակցության Հայաստանի կենտրոնական խորհրդի (շրջանային վարչության) օրգանը: Թերթի խմբագիրն էր հայ ռամկավար ճանաչված գործիչ Արտակ Դարբինյանը⁹¹: «Հայաստանի ձայնը» դարձյալ նպատակ ուներ շարունակելու «Վան-Տոսպի» բռնած ուղին: Ռամկավարների քաղաքական ձգտումներից ամենադրվատելին, թերևս, այն էր, որ նրանք ունեին արդար ու ազնիվ մղում՝ «պաշտպանելու արևմտահայ հատվածի քաղաքական շահերը»⁹²: Ինչպես տեսնում ենք, հայ

⁸⁷ Ա. Դարբինյան, *նշվ. աշխ.*, էջ 336:

⁸⁸ «Հայաստանի ձայն», 22 սեպտեմբերի 1919 թ.:

⁸⁹ «Հայաստանի ձայն», 23 դեկտեմբերի 1919 թ.:

⁹⁰ «Հայաստանի ձայն», 15 հունվարի 1920 թ.:

⁹¹ ՀՀ ՊԿՊԱ, ֆ 201, ց. 1, գ. 39, ք. 131, Ա. Դարբինյան, *նշվ. աշխատանք*, էջ 382:

⁹² ՀՀ ՀԶԿՓ ՊԿԱ, ֆ.1022, ց. 7, գ. 72, էջ 9:

ռամկավարների կազմակերպության հիմնական ուշադրությունը բևեռված էր Տաճկահայ խնդրի վրա:

Հայ ռամկավար կուսակցության Հայաստանի խորհուրդն իրեն համարում էր համահայկական Հայ սահմանադրական ռամկավար կուսակցության մասը՝ դուստր կուսակցություն⁹³:

Տաճկահայ գաղթականության անունից հանդես եկող հայ ռամկավարները արտահայտվում էին հայրենիքի վերաշինության օգտին: Կուսակցություն սոցիալ-տնտեսական խնդիրների կտրվածքով իր գործունեության ուղին և մերձավոր նպատակը մասնավորապես տեսնում էր հետևյալում.

ա) զարգացնել ազգային-հասարակական նախաձեռնության ոգին մեր ժողովրդի մեջ,

բ) օժանդակել, որ Հայաստանի պետական կյանքի մեջ ստեղծվի ռամկավար-ժողովրդապետական իրավակարգ,

գ) պայքարել աջ և ձախ ծայրահեղությունների դեմ և այլն⁹⁴:

Հայ ռամկավարները, ընդունելով ու պաշտպանելով հայոց անկախ պետականության գաղափարը և արտահայտվելով հայրենիքի վերաշինության օգտին, միաժամանակ թերահավատորեն էին լցված ՀՀ իշխանությունների նկատմամբ: Բացի այդ՝ նրանք ցուցաբերում էին ոչ ռուսական քաղաքական կողմնորոշում⁹⁵: Հայ ռամկավարները ռուսական կողմնորոշմանը չէին հարում ամենից առաջ Ռուսաստանի քաղաքական ու տնտեսական համակարգին դեմ լինելու պատճառով: Դժվար չէ տեսնել, որ իրենց ծրագրային հիմնադրությամբով ռամկավարները մոտ ու նույնական էին արևելահայ իրականության ծնունդ՝ Հայ ժողովրդական կուսակցությանը: Այդ նշանակում է, որ հայ ռամկավարները դասվում են «աջակողմյան» կուսակցությունների շարքին: Արևմտահայ գաղթականության հետ Անդրկովկաս ներգաղթած ու հաստատված ռամկավարները արևելահայ ժողովրդականների հետ հաստատել էին սերտ կապեր: 1919 թ. սեպտեմբերին ՀԺԿ 2-րդ համագումարում նույնիսկ սկզբունքային համաձայնություն կայացվեց Հայ ռամկավար և Հայ ժողովրդական կուսակցությունների միավորման վերաբերյալ⁹⁶: Սակայն այդ կուսակցությունների կազմակերպչական միացումը որոշվեց հետաձգել մինչև Հայկական հարցի լուծումը⁹⁷:

Հայաստանի անկախության խնդրում Հայ ռամկավարները սկզբունքորեն ընդունում ու պաշտպանում էին անկախության գաղափարը⁹⁸: Բայց պետք է ընդգծել, որ նրանց համար առաջնայինը Տաճկահայ դատն էր ու արևմտահայ գաղթականության ճակատագիրը: Այս առնչությամբ համամիտ

⁹³ «Հայաստանի ծայն», 15 հունվարի 1920 թ.:

⁹⁴ «Հայաստանի ծայն», 22 սեպտեմբերի 1919 թ.:

⁹⁵ Նույն տեղում, 3 հոկտ. 1919 թ.:

⁹⁶ Ա. Դարբինյան, Հայ ազատագրական շարժման օրերեն, Փարիզ, 1947, էջ 393, «Հայաստանի ծայն», 3 հոկտեմբերի 1919 թ.:

⁹⁷ Ա. Դարբինյան, նշվ. աշխ., էջ 395-396:

⁹⁸ «Հայաստանի ծայն», 22 սեպտեմբերի 1919 թ.:

չենք Ռ. Տեր-Մինասյանի արտահայտած այն մտքին, թե «Ռամկավարների խորթ էր Հայաստանի անկախությունը և ազատությունը»⁹⁹: Հիմնականում Տաճկահայաստանի և արևմտահայ գաղթականության ճակատագրով տապակվող ռամկավարները, եթե առանձին արտահայտություններով երկրորդում էին ՀՀ-ը, դժգոհում նրա կառավարությունից, կարևորելով Տաճկահայաստանի դատը, ապա դա ամենևին էլ չէր նշանակում, թե նրանք դեմ էին անկախ Հայաստանի գաղափարին:

ՄԳ-Հնչակ կուսակցություն: Ոչ խորհրդարանական կուսակցություններից էր նաև Մ. Գ. Հնչակյան կուսակցությունը: Ինչպես հայտնի է, Հնչակյան կուսակցության գաղափարական երկվորությունը՝ ազգային և սոցիալիստական գաղափարների մեկտեղումը, 1896 թ. Լոնդոնի համագումարից ի վեր դարձել էր կուսակցության պառակտման հիմնապատճառ: Այս հիման վրա կուսակցության քայքայման ու կազմալուծման գործընթացները շարունակվեցին ու ավելի խորացան նաև 20-րդ դարի սկզբներին:

Ռուսական առաջին հեղափոխության տարիներին Հնչակյան կուսակցությունը ռուսահայ իրականության մեջ ավելի ընդգծեց իր սոց.-դեմ. բովանդակությունը: Անդրկովկասի ու հատկապես Բաքվի հնչակյանները, համերաշխելով ՌՍԳԲԿ ծրագրին և մենշևիկյան գործելակերպին, համագործակցում էին նրա տեղական կազմակերպությունների հետ, համատեղ կազմակերպում ու ղեկավարում էին բանվորական շարժումները, գործադուլային պայքարը, քաղաքական ցույցերը և այլն¹⁰⁰: Նրանք, մի կողմ թողնելով թուրքահայ խնդիրը, կենտրոնանալով Կովկասում, իրենց ուշադրությունը բևեռեցին ցարիզմի տապալման և սոցիալ-տնտեսական այլ խնդիրների լուծման վրա:

1917 թ. Փետրվարյան հեղափոխության ազդեցությամբ, հունիս ամսին, Թիֆլիսում հրավիրվեց հնչակյանների ռուսահայ կազմակերպությունների առաջին շրջանային խորհրդածողովը /կոնֆերանսը/, որտեղ մշակվեց Կովկասի հնչակյանների համար ինքնուրույն ծրագիր, որը շուտով լույս տեսավ Թիֆլիսում¹⁰¹: Այս ծրագրում կովկասահայ հնչակյանները իրենց մերձակա պահանջը համարում էին մոտավորապես այն, ինչ որ առաջադրվում էր ՌՍԳԲԿ մենշևիկների մինիմում ծրագրում¹⁰²: Այսինքն՝ առաջին պլան էր մղվում իր հեռավոր՝ սոցիալիստական գաղափարների իրագործումը: Հնչակյանների սոցիալ-դասակարգային իմաստով մեծան ձախացումը պայմանավորված էր ոչ թե բուն հայկական իրականությամբ, այլ ամենից առաջ Ռուսաստանում կատարվող լուրջ գործընթացներով: Կովկասահայ հատվածի հնչակյանները հասան նույնիսկ այն բանին, որ 1917 թ. իրենց շրջաբերական-

⁹⁹ Ռուբեն, *Հայ հեղափոխականի մը հիշատակները*, հ. Է, Լոս Անջելոս, 1952, էջ 316:

¹⁰⁰ ՀՀ ՀԲԿՓ ՊԿԱ, ֆ. 4045, ց.1, գ.3, քք.35-36:

¹⁰¹ «Ծրագիր Մ. Գ. Հնչակյան կուսակցության», *Թիֆլիս*, 1917:

¹⁰² ՀՀ ՀԲԿՓ ՊԿԱ, ֆ. 4045, ց.1, գ.196, քք.2-6:

ներից մեկում միամտություն ունեցան՝ Հայկական հարցի լուծումը հանձնել «*միջազգային պրոլետարիատի դադաարանին*»¹⁰³:

Հոկտեմբերյան հեղափոխությունը հնչակյանները դիմավորեցին գուսպ ու սպասողական կեցվածքով: Նրանք էլ բավականին մեծ հույսեր կապեցին «Թուրքահայաստանի մասին» ղեկընտի հետ և կտրուկ բացասական վերաբերմունք ցուցաբերեցին Բրեստ-Լիտովսկի դաշնագրի հանդեպ¹⁰⁴: Թիֆլիսում նստած ՍԳ- Հնչակյան կուսակցության ԿԿ-ը մի կողմից խարազանում էր Անդրկովկասը դեմոկրատական Ռուսաստանից անջատող Սեյմին, իսկ մյուս կողմից՝ կոչ անում, զենքը ձեռքին, ոտքի ելնել պաշտպանելու հայրենիքը թուրքական մահաբեր ներխուժումից¹⁰⁵: Հնչակյանների Անդրկովկասյան կենտրոնը, ի տարբերություն նրա արտասահմանյան կազմակերպությունների, բուռն կերպով բողոք արտահայտեց Սալիսի 28-ի Հայաստանի անկախության հայտարարության կապակցությամբ:

Այսպիսով, ՍԳ- Հնչակյան կուսակցության կովկասյան կազմակերպությունը, ըստ էության, վարել է այնպիսի քաղաքական ուղեգիծ ու մարտավարություն, ինչպիսին բնորոշ էին տեղի «ձախակողմյան» սոցիալ-դեմոկրատական ու սոցիալիստական մյուս կուսակցություններին: Այդ իսկ պատճառով էլ այս կուսակցությունը, ըստ էության, կրկնելով ձախակողմյան կուսակցություններին, տարածաշրջանում՝ Անդրկովկասում, առանձնապես քաղաքական ազդեցիկ ուժ չէր: ՍԳ- Հնչակյան կուսակցությունը առավել ևս նորանկախ ՀՀ սահմաններում իրենից իրական որևէ ուժ չէր ներկայացնում¹⁰⁶: Իրավացի է ակադեմիկոս Լ. Խուրշուդյանը, երբ գրում էր, որ Արևմտյան Հայաստանում իր դիրքերը զիջած (այն անցել էր Դաշնակցության ձեռքը) Հնչակյան կուսակցությունը «Կովկասում երբեք չկարողացավ ժողովրդական լայն մասսաներին իր հետևից տանել և հայ իրականության ազդեցիկ կուսակցությունների շարքն անցնել»¹⁰⁷: Ինչպես արդեն ասվեց, դրա պատճառն այն էր, որ հնչակյանները Անդրկովկասում և առհասարակ ռուսահայ իրականության մեջ հանդես էին գալիս ամենից առաջ որպես ընկերավարությանը հավատարիմ սոցիալ-դեմոկրատական կուսակցություն: Բայց մենք գիտենք, որ այդ նույն ժամանակ մարքսիստական, սոցիալիստական գաղափարախոսությամբ ու գործունեությամբ, այդ նույն իրականության մեջ, հանդես էին գալիս նույնադավան այլ կուսակցություններ, որոնք հնչակյաններից խլել էին սոցիալիստականության առաջնության դափնին: Եվ դա առաջին հերթին վերաբերում էր ՌՍԳԲԿ-ին՝ իր թևերով ու ազգային դրսևորումներով: Այստեղից էլ կարծես ավելորդ ու կրկնական էր դառնում Հնչակի սոցիալիստական գործու-

¹⁰³ Նույն տեղում, գ.210, բ.1:

¹⁰⁴ *Буржуазные и мелкобуржуазные партии..., М., 1980, с. 137.*

¹⁰⁵ ՀՀ ՀԲԿՓ ՊԿԱ, Ֆ.4045, ց.1, գ.215, բ.1:

¹⁰⁶ «Հայրենիք», Բոստոն, 1920, էջ 31:

¹⁰⁷ Լ. Ա. Խուրշուդյան, *Սփյուռքահայ կուսակցությունները ժամանակակից էտապում, Երևան, 1964, էջ 209:*

նությունը Անդրկովկասում: Այս կապակցությամբ, ահա թե ինչ էր գրում Հայ ռամկավարների օրգան «Վան-Տոսպը». «Հնչակյանությունը, որ հոս Կովկասի մեջ ավելի գտարյուն էր և բավականին ուժեղ, այժմ փաստորեն գոյություն չունի, որովհետև Ռուսական հեղափոխությունից հետո ան իր գոյության իրավունքը կորսնցուց, քանի որ իր կողքին կար անհամեմատ ավելի ուժեղ և միևնույն ատեն նույնադավան կուսակցություն մը, հանձին Ռ.Ս.դեմոկրատ կուսակցության»¹⁰⁸:

Քաղաքական կողմնորոշման հարցում հնչակյանները արտահայտում էին ընդգծված ռուսամետ դիրքորոշում: Հնչակյան գործիչ Ռ. Պերպերյանին է պատկանում հետևյալ միտքը. «Հայը չի կարող ապրել առանց Ռուսաստանի, ինչպես որքը՝ առանց խնամակալի»¹⁰⁹: Ռուսաստանում ընթացող քաղաքական պայքարի խնդրում Կովկասի հնչակյանները գնալով ավելի ու ավելի են հակվում դեպի խորհրդային իշխանությունը: Օրինակ՝ կամավորական բանակի և Խ. Ռուսաստանի պայքարում, Թիֆլիսում լույս տեսնող հնչակյան «Գործավոր» թերթը իր նախապատվությունը և համակրանքը տալիս էր վերջինին¹¹⁰:

Պետք է ասել, որ ինչպես Անդրկովկասի, այնպես էլ դրսաշխարհում գործող հնչակյանները չեն եղել հայոց անկախ պետականության հետևողական պաշտպաններ: Նրանք, հավատարիմ իրենց առաջին ծրագրային հիմնադրույթներին, Հայաստանի անկախությունը դարձյալ չէին դիտում որպես վերջնանպատակ, այլ նախկինի պես այն համարում էին միջոց՝ սոցիալիստական կարգերի հաղթանակի համար: Այնուամենայնիվ, ՀՀ անկախության նկատմամբ վերաբերմունքի հարցում որոշակի տարբերակում պետք է մտցնել ռուսահայ և գաղութահայ հատվածների հնչակյան կազմակերպությունների դիրքորոշումների միջև: Այնհայտ իրողություն է այն, որ արտասահմանի հնչակյան մասնաճյուղերը համակրել ու օգնել են Հայաստանի նորանկախ պետությանը: Այս առնչությամբ Հնչակի պատմագիր Ա. Կիտուրը նկատում էր. «1918 թ. ՀՀ հռչակումի առաջին օրեն իսկ արտասահմանի մեջ Հնչակյան կուսակցությունը, օրինակելի հայրենասիրությամբ տոգորված, զորավիգ կանգնեց ՀՀ, հակառակ նրա, որ իշխանությունը Գազմակցությունը բռնազրաված էր»¹¹¹: Այնպես որ՝ Հնչակի արտասահմանյան կազմակերպությունների գործունեությունը և դիրքորոշումները էապես տարբերվել են ռուսական ու կովկասյան հատվածների գործունեությունից: Դրսաշխարհի հնչակյան կազմակերպությունները, որպես կանոն, արտահայտվել են Հայաստանի անկախ պետականության օգտին, պաշտպանել են ՀՀ, ունեցել են արևմտյան քաղաքական կողմնորոշում: «Ունինք պետություն,- գրում էր Ս. Սապահ- Գյուլյանը

¹⁰⁸ «Վան-Տոսպ», 26 մայիսի 1919 թ.:

¹⁰⁹ Հ. Գանգրունի, Հայաստանը 1920-21 և միջազգային դիվանագիտությունը, Պեյ-րուք, 1986, էջ 10:

¹¹⁰ «Գործավոր», 24 մարտի 1919 թ.:

¹¹¹ Ա. Կիտուր, Աշվ. աշխ., հ.բ, Պեյրուք, 1962, էջ 11:

ՀՀ վերաբերյալ,- դա մերն է, դա մեր արյան, մեր կյանքի գնովն է առաջացել: Գա ամբողջ հայության նորածին զավակն է: Հարկավոր է նրան պահել, սնուցել, զարգացնել, ապահովել սպառնացող ամեն վտանգներից»¹¹²: Ասվածները գալիս են հաստատելու, որ իր ամբողջության մեջ Հնչակյան կուսակցությունը շարունակում էր մնալ որպես ազգային:

ՄԳԲՀ «Սպեցիֆիկներ»: ՀՀ-ում աննշան թիվ էին կազմում նաև Սոցիալ-դեմոկրատական բանվորական հայ կազմակերպությունը կամ այսպես կոչված «սպեցիֆիկները»:

Դարասկզբին (1903 թ.) ռուսահայ իրականության մեջ ՀՅԳ-ից հեռացած սոցիալ-դեմոկրատական ընդգծված հայացքներ ունեցող երիտասարդ դաշնակցականների այս խումբը Բաքվում հիմնեց «բունդական» կազմակերպական կառուցվածք ունեցող ՄԳԲՀ կազմակերպությունը:

ՄԳԲՀ, կամ «սպեցիֆիկները»՝ իր դավանած գաղափարախոսությամբ, պաշտպանած ծրագրով ու գործելակերպով մենշևիկ-բունդական թեքման, մարքսիստական, սոցիալ-դեմոկրատական բանվորական կազմակերպություն էր: Թեև մի շարք հարցերում այս կազմակերպությունը դրսևորել է ազգային վարքագիծ, բայց նրան պետք է դասել «ձախակողմյան» կուսակցությունների (մենշևիկ, էսէռ, բոլշևիկ) շարքում: 1907 թ. «սպեցիֆիկները» կազմեցին իրենց կազմակերպության ծրագրի և կանոնադրության նախագծերը: Ծրագրի նախագծում ընդգծվում էր կազմակերպության նվիրվածությունը սոց.- դեմոկրատական, մարքսիստական ուսմունքին, հայ բանվոր դասակարգի շահերի առաջնային պաշտպանությունը¹¹³: Ազգային հարցում սրանք պաշտպանել են հայության ազգային-մշակութային ինքնավարության պահանջը¹¹⁴: Նրանք վերապահումով էին մոտենում Տաճկահայ դատին՝ այն համարելով տաճկահայերի գործը¹¹⁵: Որպես սոցիալ-դեմոկրատներ՝ «սպեցիֆիկ» գործիչները այնքան էլ ոգեշնչված չէին հայ ազգային կուսակցությունների ազգայնական ձեռնարկներով: Մասնավորապես հայ կամավորական շարժման հանդեպ սառը և բացասական վերաբերմունք է ունեցել Գ. Անանունը¹¹⁶: Որպես ժողովրդավարական քաղաքական կազմակերպություն՝ ՄԳԲՀ ևս պաշտպանեց Ժամանակավոր կառավարությանը, իսկ 1918 թ. մայիսին՝ Հայաստանի անկախությունը: ՀՀ փուլում ՄԳԲՀ կազմակերպությունը Հայաստանի ու հայ ժողովրդի քաղաքական կողմնորոշման խնդրում նախապատվությունը տալիս էր Արևմուտքին ու մասնավորապես ԱՄՆ-ին: Օրինակ՝ սրանց գաղափարախոսներից Բ. Իշխանյանը գտնում էր, որ Հայաստանի համար նախ գերադասելի է ԱՄՆ-ի, ապա հետո Անգլիայի ու

¹¹² «Երիտասարդ Հայաստան», 15 սեպտեմբերի 1920 թ.:

¹¹³ ՀՀ ՀԲԿՓ ՊԿԱ, ֆ. 1022, ց. 7, գ. 44, թթ. 3-10:

¹¹⁴ Գ. Անանուն, նշվ. աշխ., հ. 3, էջ 95, «Նոր հոսանք», 1913, թիվ 2:

¹¹⁵ ՀՀ ՀԲԿՓ ՊԿԱ, ֆ. 1022, ց. 7, գ. 44, թթ. 10-11:

¹¹⁶ ՀՀ ՀԲԿՓ ՊԿԱ, ֆ. 1022, ց. 7, գ. 96, թ. 29: Նույնը Գ. Անանուն, նշվ. աշխ., հ. 3., էջ 560:

Ֆրանսիայի և միայն հետո Ռուսաստանի հովանավորությունը¹¹⁷: Կարծում ենք, խնդրի նման գնահատականին պետք է մոտենալ տվյալ ժամանակաշրջանի քաղաքական հանգամանքների և ուժերի հարաբերության տեսանկյունից:

«Սպեցիֆիկները» հանրապետության հասարակական-քաղաքական կյանքում էական դեր չէին խաղում: Կազմակերպության կշիռն ու ազդեցությունը աննշան էր: Բայց փոփոխված իրադրության պայմաններում նրանք սպրեցին գաղափարաքաղաքական զգալի հեղաշրջում և կանգնեցին Հայաստանի անկախության գաղափարի ու ազգային-պետական շահերի պաշտպանության դիրքերում: Ավելի ուշ՝ 1920 թ. սկզբներին, ՍԳԲՀԿ-ը կազմակերպորեն ձևավորվեց որպես կուսակցություն:

Այսպիսով, վերոհիշյալ երեք արտախորհրդարանական կուսակցությունները իրենցից առանձնապես շոշափելի կշիռ չէին ներկայացնում հանրապետության հասարակական-քաղաքական կյանքում, ուստի և չունեին ու այդպես էլ չունեցան իրենց ներկայացուցիչները ՀՀ խորհրդարանում:

3. Կառավարության առաջին ճգնաժամը

1918 թ. աշնանը տեղի ունեցավ կառավարության առաջին ճգնաժամը: Հանրապետության սոցյալ-տնտեսական ու քաղաքական ծանր իրավիճակի թելադրանքով՝ բավականին բարդ հակասություն էր գոյացել խորհրդարանական մեծամասնության և կառավարության միջև: Խորհրդարանի ներսում և նրա պատերից դուրս քննադատության թիրախ էր դարձել կառավարությունը, որովհետև անցնում էին ամիսներ և երկրում դրական տեղաշարժեր չէին նկատվում: Սոցիալ-դեմոկրատ մենշևիկների օրգան «Կայծը» իր առաջնորդում գրում էր, որ արդեն երեք ամիս է անցել կառավարության հայտագրից, սակայն Հայաստանը շարունակում է մնալ վարչապետի իսկ բնորոշած՝ «ավերակների կույտ ու անձև քառս» վիճակում¹¹⁸: Մյուս կողմից կառավարական ճգնաժամի մյուս դրդիչն այն էր, որ նա չունեի պատգամավորական կայուն մեծամասնություն, որի վրա կարողանար հենվել: Խորհրդարանը մի տեսակ անգործության էր մատնվել, լուրջ կերպով կաղում էր օրինաստեղծ աշխատանքը:

Ջննադատությունը գնում էր ոչ միայն ընդդիմության, այլև հենց իսկ դաշնակցականների կողմից: Կառավարության հասցեին դժգոհության ու անբավականության ելույթներ եղան ՀՅԳ- Հայաստանի շրջանային ժողովի միստերի ժամանակ (1918 թ. սեպտեմբեր): «Գործերը դանդաղ են ընթանում,- հայտնում էին շրջանային ժողովում ելույթ ունեցողները,- ժողովուրդը դրական

¹¹⁷ «Ժողովուրդ», 15 նոյեմբերի 1919թ.:

¹¹⁸ «Կայծ», 2 նոյեմբերի 1918թ.:

աշխատանք չի տեսնում: Գաղթականության գործերը անուշադրության են մատնված, և վարիչը այս ճգնաժամային ռուպեին արձակուրդ է ստացել: Վատ դրության մեջ է ժողովրդի պարենավորումը և այլն¹¹⁹:

Կառավարության ճգնաժամին, ինչ խոսք, նպաստեց նաև օրավուր խորացող հայ-վրացական սահմանային վեճը: Այս առնչությամբ խորհրդարանում Քաջագունոն կարբինետը մեղադրվում էր՝ «ձախից»՝ արկածախնդրության, հրահրիչ քաղաքականության, իսկ «կենտրոնից» ու «աջից» պասիվության մեջ:

Չնայած սեպտեմբերի վերջերից փաստորեն սկսվել էր կառավարության ճգնաժամը, սակայն վարչապետը պաշտոնապես խորհրդարանին հրաժարական չէր ներկայացրել:

Այնուամենայնիվ, մինչև 1918 թ. հոկտեմբերը Հայաստանի պետականության հեղեղուկ վիճակը և նրա գլխին կախված արտաքին՝ թուրքական մահացու վտանգը իրենց դրոշմն էին թողնում հայ քաղաքական կուսակցությունների գործելակերպի վրա, հարկադրում նրանց հնարավորին չափ լինել ավելի գուսա ու ըմբռնողական: Բայց իրերի վիճակը կարուկ կերպով փոխվեց 1918 թ. հոկտեմբերից հետո: Թուրքիայի պարտությունից և Առաջին աշխարհամարտի ավարտից հետո մի շարք կուսակցություններ, մասնավորապես ՀՅՌ- և ՀՏԿ, ձեռք բերեցին լավատեսություն և ավելի մեծ ինքնավստահություն: Իսկ «ձախ» ընդդիմությունը ընկավ մի տեսակ հռետեսության մեջ, որովհետև նա անկախ պետականություն կերտելու նպատակներ չէր հետապնդում: Կնշմանակի՝ 1918 թ. աշնան ամիսները հանդիսացան հայ քաղաքական կուսակցությունների դիրքորոշումների հստակեցման ժամանակաշրջան:

1918 թ. աշնանը, երբ մոտալուտ էր դարձել գերմանական դաշինքի երկրների, այդ թվում՝ Օսմանյան Թուրքիայի պարտությունը և Հայաստանում նշմարվում էին կայունացման որոշ միտումներ, իշխանատենչության հակումներ ցուցաբերող ժողովրդականները ցանկություն հայտնեցին մտնել կառավարության մեջ և ՀՅՌ-ի հետ միասին կիսել պատասխանատվությունը ժողովրդի, հայրենիքի ու պետության առաջ: Այս կապակցությամբ հոկտեմբերի սկզբներին Թիֆլիսում գումարված ՀՏԿ երկրորդ խորհրդաժողովը կայացրեց հետևյալ որոշումը. «Ժողովը ի նկատի ունենալով Հայաստանի ներքին և արտաքին քաղաքական դրությունը, անհրաժեշտ է համարում, որ Հայաստանի կառավարությունը կազմվի կռալիցիոն սկզբունքով»¹²⁰: Այս հիման վրա ՀՏԿ ԿԿ սկզբունքային որոշում ընդունեց մտնել կռալիցիոն կառավարության մեջ¹²¹: Հոկտեմբերի երկրորդ կեսին Թիֆլիսից Երևան ժամանեցին ՀՏԿ ԿԿ-ի անդամներ՝ Մ. Բերբերյանը, Գ. Մելիք-Ղարաբյոզյանը, Ս. Հարությունյանը, Լ. Ղուլյանը և ուրիշներ: Հոկտեմբեր 31-ին կայացած ՀՅՌ- և ՀՏԿ ներկայացուցիչների խորհրդակցությունում կայացվեց այդ համաձայնությունը: ՀՅՌ- -

¹¹⁹ «Հորիզոն», 26 սեպտեմբերի 1918 թ.:

¹²⁰ «Ժողովուրդ», 6 հոկտեմբերի 1918թ.:

¹²¹ «Ժողովուրդ», 13 հոկտեմբերի 1918թ.:

խորհրդարանական խմբակցության կողմից մասնակցում էին քժ. Ա. Ղազարյանը, Ս. Թորոսյանը և Հ. Սարգսյանը, իսկ ՀԺԿ խմբակցության կողմից՝ Ս. Հարությունյանը, Գ. Մելիք-Ղարազյոզյանը և Գ. Տեր-Խաչատրյանը¹²²: Ժողովրդականները պահանջում էին կառավարության կազմի կեսը¹²³: Նախարար-նախագահ Հ. Քաջազունին միաժամանակ բանակցություններ էր վարում խորհրդարանի մյուս խմբակցությունների ավագների հետ՝ խառը կառավարություն ձևավորելու շուրջ:

ՀԺԿ-ից գատ՝ խառը կառավարության մեջ մտնելու հավակնություններ ունեին նաև սոցիալ-դեմոկրատները և էսէռները¹²⁴: Բանակցությունների ընթացքում պարզվեց, որ սոցիալ-դեմոկրատները պահանջում են առնվազն երկու տեղ և անպայման՝ ներքին ու արտաքին գործոց նախարարների աթոռները: «Չախակողմյան» կուսակցությունները առանձնապես շատ էին խորշում ն.գ. նախարար Արամ Մանուկյանից, որը «կարգ պահելով» նրանց նկատմամբ վարում էր կոշտ ու զսպող քաղաքականություն: Չախերն ուզում էին ստանձնել հատկապես այդ պորտֆելը, որպեսզի ազատ, հևափոխական գործունեություն ծավալելու լայն հնարավորություն ստանան: Յուրահատուկ վարքագիծ ցուցաբերեցին էսէռները: Նախնական հավակնություններից հետո նրանք հրաժարվեցին մտնել նոր կազմվելիք խառը կաբինետ: Էսէռների անդրկովկասյան տարածաշրջանային կոմիտեն հավակնություն տվեց խմբակցության այդ քայլին¹²⁵: Հայ էսէռները, հրաժարվելով հանդերձ մտնել նոր կազմվելիք կառավարության մեջ, պահանջեցին, որ արտգործնախարարի պորտֆելը չտրվի ժողովրդականներին, իսկ ներք. գործերինը՝ սոցիալ-դեմոկրատներին¹²⁶: Բանակցությունների արդյունքում՝ խառը կառավարության մեջ մտնելուց հրաժարվեցին նաև սոց.- դեմոկրատները: Վերջիններիս խմբակցության ներկայացուցիչը հայտարարեց. «Դաշնակցության կռալիցիան Հայ ժողովրդական կուսակցության հետ ոչ միայն դրական փոփոխություն չի մտցնի կառավարության մեջ, այլ փաստորեն կնշանակի «ռեակցիայի ուժեղացում»¹²⁷:

Պետք է ասել, որ ՀՅԴ առանձնապես մեծ հակում չունեի համագործակցելու «ճախ» ընդդիմության հետ: ՀՅԴ ընդառաջ գնաց ՀԺԿ հետ կազմելու ՀՀ առաջին խառը կառավարությունը: Բանակցությունները շարունակվեցին միայն «կենտրոնի» (ՀՅԴ) և «աջակողմի» (ՀԺԿ) միջև: ՀՅԴ և կառավարությունը լավ էին հասկանում, որ իրենք խորհրդարանում չունեն կայուն մեծամասնություն՝ 46-ի դիմաց ընդամենը 18 տեղ: Հասկանալի է, որ ձայների նման հարաբերակցության դեպքում կառավարության ամեն մի ձեռնարկ կամ

¹²² ՀՀ ՊԿՊԱ, ֆ.199, ց.1, գ.10, ք.1:

¹²³ «Հորիզոն», 10 նոյեմբերի 1918թ.:

¹²⁴ ՀՀ ՊԿՊԱ, ֆ.404, ց.1, գ.2, ք.1:

¹²⁵ «Հորիզոն», 10 հոկտեմբերի 1918թ.:

¹²⁶ «Հորիզոն», 10 նոյեմբերի 1918թ.:

¹²⁷ «Կայծ», 14 նոյեմբերի 1918թ.:

ծրագիր կարող էր խորհրդարանում տապալվել: Ուստի՝ անհրաժեշտ էր գնալ փոխզիջման: Դաշնակցությունը նախընտրեց համագործակցել ազգային նպատակներ հետապնդող ժողովրդականների հետ:

ՀՅԴ ընդառաջ գնաց ժողովրդականներին՝ հաշվի առնելով հետևյալ նկատառումները: ՀՅԴ և ՀԺ կուսակցություններին արտաքին քաղաքականության հարցում իրար էին մերձեցնում այն, որ Հայկական հարցում երկուսն էլ, որպես ազգային կուսակցություն, գրեթե միակամ էին, իսկ ներքին սոցիալ-տնտեսական քաղաքականության ասպարեզում Դաշնակցությունը, ինքն իրեն անվանելով «սոցիալիստական», երես դարձրեց իսկական սոցիալիստներից, որովհետև գտնում էր, որ ընկերվարային բարենորոգումները ՀՀ-ում դեռևս անժամանակ են ու չհասունացած¹²⁸: Ամերիկահայ ճանաչված պատմաբան Ռ. Հովհաննիսյանի կարծիքով՝ Դաշնակցությունը ժողովրդական կուսակցության հետ խառը կառավարություն կազմելու համաձայնություն տվեց նաև այն դրդապատճառով, որ «ակնկալվում էր ստանալ Արևմուտքի դրամատիրական պետությունների աջակցությունը, որովհետև Դաշնակցության ծրագիրը ընկերվարական էր: Այս քայլը պիտի բարձրացներ հանրապետության հեղինակությունը»¹²⁹:

Բայց միաժամանակ պետք է մատնանշել, որ «աջերի» կամ «ճախերի» հետ համագործակցության խնդրում Դաշնակցության շարքերում չկար միակարծություն: Եթե ՀՅԴ Բյուրոն, կուսակցության հայաստանյան Կ. կոմիտեությունները հակված էին համագործակցելու աջերի հետ, ապա ՀՅԴ Վրաստանի հատվածը հավատարիմ իր սոցիալիստամետ ուղեգծին, ընդհակառակը, պահանջում էր իր երևանյան ընկերներից համագործակցել «ճախերի» հետ՝ «ստեղծել Հայաստանի սահմաններում միացյալ սոցիալիստական, դեմոկրատական ֆրոնտ, ընդդեմ բուրժուական կուսակցության ոհմակին»¹³⁰: «Մեր Երևանի ընկերները,- այնուհետև շարունակում էր ՀՅԴ Վրաստանի ԿԿ-ի և Թիֆլիսի կոմիտեի օրգան «Աշխատավորը»,- որոնք ինչ-ինչ պատճառներով թեքվել են դեպի բուրժուական կոալիցիան, պետք է հեռացնեն ու վերջացնեն իրենց այդ քաղաքականությունը»¹³¹: Այնուամենայնիվ, համաձայնություն կայացնելով ժողովրդականների հետ՝ Դաշնակցությունը հույս ուներ (ՀԺԿ խմբակցության հետ միասին) խորհրդարանում ստեղծել կայուն մեծամասնություն և դրանով իսկ բարձրացնել խորհրդարանի աշխատանքի արդյունավետությունը:

Այսպիսի նախապատրաստական քայլերից ու նկատառումներից հետո՝ 1918 թ. նոյեմբերի 4-ին, գումարված խորհրդարանի նիստում լսվեց կառավարության հրաժարականի հարցը: Խորհրդի նախագահ Ավ. Սահակյանը կարդաց վարչապետ Հ. Քաջազնունուց ստացած հետևյալ դիմումը. «Ի նկա-

¹²⁸ «Դրոշակ» 1920, թիվ 4-5, էջ 70:

¹²⁹ «Ասպարեզ», 28/29 մայիսի 1992 թ.:

¹³⁰ «Աշխատավոր», Թիֆլիս, 8 մայիսի 1919թ

¹³¹ Նույն տեղում:

տի ունենալով այն, որ Հայաստանի խորհրդի մեծամասնության և կառավարության միջև ստեղծվել են այնպիսի հարաբերություններ, որոնք թույլ չեն տալիս կառավարությանը արդյունավետ աշխատանք կատարել, ուստի և կարիք են համարում ներկայացնել խորհրդին կառավարության հրաժարականը»¹³²: Պատգամավոր Ս. Թորոսյանը (ՀՅԴ խմբակցության կողմից) առաջարկում է ընդունել կառավարության հրաժարականը և հանձնարարել նույն Հ. Քաջազնունուն կազմել նոր կաբինետ: Այս առաջարկին դեմ են արտահայտվում սոց.-դեմ. և էսենական խմբակցությունները: Սոցիալ-դեմոկրատները Հ. Քաջազնունու փոխարեն վարչապետի թեկնածու են առաջադրում Խ. Կարճիկյանին¹³³: Ի վերջո, ձայների մեծամասնությամբ (25 կողմ, 14 դեմ և 1 ձեռնպահ) հանձնարարվում է Քաջազնունուն կազմել նոր կառավարություն¹³⁴: Համաձայն նախնական պայմանավորվածության՝ նոր կաբինետը կազմվեց միայն ՀՅԴ և ՀԺԿ ներկայացուցիչներից: «Չախակողմյան» սոցիալիստական կուսակցությունները չեզոքացվեցին խառը կառավարությանը մասնակցելուց: Նոր կաբինետի ձևավորման առնչությամբ Հայ ժողովրդականների պաշտոնաթերթը իրավացիորեն զգուշացնում էր, որ այս կամ այն անհատի պաշտոնի առաջադրելիս պետք է հաշվի առնել ոչ թե նրա կուսակցական պատկանելությունը, այլ անձնական հատկանիշները, կարողություններն ու ընդունակությունը, «երկրին համար օգտակար ըլլալը»¹³⁵:

Վարչապետ Հ. Քաջազնունու ներկայացմամբ նոր կառավարության մեջ մտան (4 դաշնակցական, 4 ժողովրդական և 1 անկուսակցական): Նրանք էին՝ Սիրական Տիգրանյան (արտ. գործ. նախ., ՀՅԴ), Արամ Մանուկյան (ներք. գործ. նախ. ՀՅԴ), Հովհաննես Հախվերդյան (գորական նախ., անկուս.), Արտաշես Էնֆիաջյան (ֆին. նախ., ՀԺԿ), Սամսոն Հարությունյան (արդար. նախ., ՀԺԿ), Սիբայել Աթաբեկյան (ժող. լուսավ. նախ., ՀԺԿ), Լևոն Դուլյան (պարեն. նախ., ՀԺԿ), Խաչատուր Կարճիկյան (խանր. խնամատ. նախ., ՀՅԴ)¹³⁶:

Այսպիսով, Դաշնակցությունը ստանձնեց վարչապետի, արտաքին, ներքին և խնամատարության նախարարությունները, իսկ ժողովրդականները՝ ֆինանսների, արդարադատության, պարենավորման և լուսավորության: Թեև նախարարական պորտֆելները բաժանված էին հավասար, սակայն դժվար չէ նկատել, որ առանցքային նախարարական աթոռները զբաղեցնում էին ՀՅԴ ներկայացուցիչները: Նախարարներ Ա. Էնֆիաջյանի, Մ. Աթաբեկյանի և Լ. Դուլյանի¹³⁷ բացակայության պատճառով, վարչապետ Հ. Քաջազ-

¹³² «Կառավարության լրաբեր», 12 նոյեմբերի 1918թ.:

¹³³ «Կայծ», 17 նոյեմբերի 1918թ.:

¹³⁴ «Կառավարության լրաբեր», 12 նոյեմբերի 1918թ., «Կայծ», 14 նոյեմբերի 1918թ.:

¹³⁵ «Ժողովրդի ձայն», Թիֆլիս, 9 նոյեմբերի 1918թ.:

¹³⁶ Ռ. Հովհաննիսյան, Հայաստանի հանրապետություն, հ.1, էջ 64 (անգլերեն):

¹³⁷ Պաշտոնավարությունից մեկ ամիս չանցած Մ. Աթաբեկյանը հրաժարական տվեց: Նրան փոխարինեց Գ. Մելիք-Ղարազյոզյանը /ՀԺԿ/, իսկ Լ. Դուլյանին փոխարինեց Զ. Վերսիշյանը:

նունու հանձնարարությամբ ֆինանսների նախարարի պարտականությունը ժամանակավորապես դրվեց Խ. Կարճիկյանի¹³⁸, լուսավորությանը՝ Ս. Հարությունյանի և պարենավորմանը՝ Ա. Մանուկյանի վրա: «Ժողովրդի ձայնի» բնորոշմամբ իրենց կուսակցությունը «լծվեց հայկական պետական նա-վին»¹³⁹:

Տեղին է նշել, որ Ֆինանսա-տնտեսական, վարչա-իրավական բնույթի աշխատանքների բնագավառներում ժողովրդական կուսակցության շարքե-րում կային բարձր կրթություն ու որակավորում ստացած ավելի մեծ թվով հմուտ մասնագետ կադրեր, քան՝ Դաշնակցության: Սակայն ինչպես տես-նում ենք, ժողովրդական նախարարները ամբողջ նվիրումով չէին կամենում Երևանում աշխատել և զանազան պատրվակներով մեկնում էին Թիֆլիս և այլևս չէին վերադառնում կամ էլ պարզապես հրաժարվում էին իրենց պաշ-տոնից: Ս. Վրացյանը ենթադրում էր, որ նրանք վախենում էին հիվանդու-թյուններից¹⁴⁰: Այդուհանդերձ, խորհրդի ընդդիմադիր խմբակցություններից մե-կը՝ Ժողովրդականները ևս դարձան կառավարող կուսակցություն: Կռալիցիոն կառավարություն ստեղծելով, ՀՅԳ-ն և ՀԺԿ կազմեցին խորհրդարանական մե-ծամասնություն և խորհրդարանի ղեկավար կենտրոնը մի փոքր թեքվեց «աջ»: Ընդդիմության մեջ մնացին միայն էսէռները և սոց.- դեմոկրատները: Վերջիններիս ընդդիմությունը ստացավ ավելի բացահայտ ու անհաշտ բնույթ: Այս կապակցությամբ Ռ. Հովհաննիսյանը հայտնում է, որ չնայած «ձախ» (էսէռ և սոց.-դեմ.) խմբակցությունները թույլ էին, սակայն նրանց ընդ-դիմությունը «ուժեղանում էր մահմեդական առաջնորդների աջակցու-թյամբ»¹⁴¹:

Ժողովրդականները, մտնելով կառավարության մեջ, նպատակ ունեին առաջին հերթին երկրում հաստատել կարգուկանոն, մի բան, որից խիստ կա-դրում էր հանրապետությունը: Սակայն կառավարության մի քանի ամիսների համատեղ աշխատանքը ցույց տվեց, որ այս խառը դահլիճը չդարձավ մեկ միասնական, համախումբ, կուռ ու համերաշխ կողելտիվ (մարմին): Նախա-րարությունները, ըստ կուսակցական պատկանելության, գործում էին իրարից անջատ, մի կողմը իրեն պատասխանատու չէր համարում մյուսի համար: Նրանց միջև անվերջ մղվում էր ներքին պայքար, որն իր գագաթնակետին հասավ 1919թ. գարնանը (Մայիսի 28-ի կառավարության հայտնի հայտարա-րության կապակցությամբ):

Սիաժամանակ, հարկ է նշել, որ, ի տարբերություն կառավարության, այդ ընթացքում համեմատաբար ավելի արդյունավետ է եղել համագործակ-

¹³⁸ Այդ նշանակումից մի քանի օր անց՝ նոյեմբերի 13-ին, Խ. Կարճիկյանը սպանվում է իր աշխատասենյակում: Նրա փոխարեն հանրային խնամատարության նախարար է նշանակվում Ալ. Խաչատրյանը: 1919թ. հունվարի վերջերից /Ա. Մանուկյանի մահից հե-տո/ վերջինիս վրա դրվեց նաև ներք. գործ. նախարարի պարտականությունները:

¹³⁹ «Ժողովրդի ձայն», Թիֆլիս, 10 նոյեմբերի 1918 թ.:

¹⁴⁰ Ս. Վրացյան, Հայաստանի Հանրապետություն, Բեյրութ, 1958, էջ 199:

¹⁴¹ Ռ. Հովհաննիսյան, Հայաստանի Հանրապետություն, Հ. 1, էջ 153 (անգլերեն):

ցությունը ՀՅԴ-ն և ՀԺԿ խորհրդարանական խմբակցությունների միջև, «ձախերի» դեմ մղվող պայքարում. սրանք, որպես կանոն, հանդես են եկել միասնաբար, իսկ ընդունված օրենքներն ու որոշումները, որպես կանոն, եղել են երկուսի համատեղ ձայնատվության արդյունք:

Այսպես հաղթահարվեց կառավարական առաջին ճգնաժամը և կազմվեց կուլիցիոն կառավարություն: Սակայն այդ ընթացքում չսվեց ու չքննարկվեց Քաջազնունու նոր կաբինետի հայտագիրը՝ ծրագրվող արտաքին ու ներքին քաղաքական կուրսի, մոտեցումների, իրականացվելիք սոցիալ-տնտեսական բնույթի խնդիրների մասին և այլն: Պետաիրավական տեսակետից սա նշանակում էր խորհրդարանի գերակայության նսեմացում ու անտեսում, որի համար սոց.-դեմոկրատները և էսէռները մեղադրեցին կառավարությանը և կառավարող կուսակցություններին օրինազանցության մեջ: Գնահատելով այս փաստը՝ կարելի է ասել, որ չնայած վարչապետը չէր փոխվել, սակայն կաբինետի կուսակցական և թվային կազմը ավելի քան կիսով չափ փոխվել էր, ուստի և իրավական ու բարոյական տեսակետից կպատշաճեր վարչապետի հայտագիրը, մանավանդ որ այդ ժամանակ քաղաքական հանգամանքները կտրուկ կերպով փոխվել էին և հարկավոր էր խորհրդարանին տեղյակ պահել վարվելիք արտաքին քաղաքական կուրսին: Քաջազնունու խառը կաբինետի հայտագիրը խորհրդարանում չլսելու և չքննելու դրդապատճառները բազմաթիվ են: Կարծում ենք, դրանցից ամենագորավորն այն էր, որ Դաշնակցության և ժողովրդականների տնտեսական պլատֆորմները իրարից զգալիորեն տարբերվում էին. սոցիալիստ Քաջազնունու համար բավականին դժվար էր միաժամանակ մեկտեղել ու արտահայտել բուրժուական համարվող ժողովրդական մախարարների հայացքներն ու մոտեցումները տնտեսական քաղաքականության խնդրում:

Այս ամենով հանդերձ՝ վարչապետ Հ. Քաջազնունուն վիճակված չէր երկար մնալու իր պաշտոնում: 1918-1919թ. սոսկալի ձմեռը բացասաբար անդրադարձավ թե՛ կառավարության և թե՛ հատկապես վարչապետի քաղաքական դիրքի ու հեղինակության վրա:

Երբ Առաջին աշխարհամարտի ավարտից հետո պատերազմում պարտված Թուրքիան իր գորքերը հետ քաշեց նաև Արևելյան Հայաստանից, հայ ժողովուրդը, փոքր-ինչ թեթևացած շունչ քաշեց: Բայց երկիրը տնտեսապես հայտնվել էր աննկարագրելի ծանր դրության մեջ: Որպեսզի պարզ լինի, թե ինչպիսի վնասներ էր պատճառել թուրքական արշավանքը 1918 թ., բավական է հիշատակել մի երկու փաստ: Հաշվումները ցույց են տվել, որ թուրքական գորքը և թաքարական հրոսակախմբերը Անդրկովկասում ոչնչացրել, թալանել ու ավերել են 329 հայկական գյուղ, որի անմիջական նյութական վնասը կազմել է 460 մլն. ռուբլի (1914 թ. համադրելի գներով)¹⁴²: 1918 թ. վերջերին թուրքերի հետ քաշվելուց հետո միայն Ալեքսանդրապոլի գավառին հասցված նյութական վնասները, ըստ քաղաքագլուխ Լևոն Սարգսյանի հաղորդած

¹⁴² ՀՀ ՊԿՊԱ, Ֆ.200, g.1, q.291, p.49:

տվյալների, հասնում էր 2 մլրդ. ռուբլու (1918թ. համադրելի գներով)¹⁴³: Պատերազմի և այլ պատճառներով Հայաստանի ավերված տնտեսությունը վերականգնելու համար ֆինանսների նախարար Ա. Էնֆիաջյանի մոտավոր հաշվարկներով կպահանջվեր 25 տարի¹⁴⁴: Չմեղա ցրտի պայմաններում արևելահայությունը իր հարյուր հազարավոր արևմտահայ գաղթական եղբայրների ու քույրերի հետ հայտնվեց սովի ոսկրոտ ճիրաններում:

Նոր տարում՝ 1919թ. հունվարի 3-ից, վերսկսվեցին խորհրդի աշխատանքները: Հայ-վրացական պատերազմը նոր էր ավարտվել: Մահացու շրջափակման պայմաններում սովն ահռելի չափերի էր հասել: Սովի հետ միասին տարածվում էր համաճարակը: Երևանում կային բժավոր տիֆով 2100 հիվանդներ: Այս նիստում խորհուրդն օրենք ընդունեց խնամատարության նախարարությանը 1 մլն. ռուբլի բաց թողնելու մասին՝ բժավոր տիֆի համաճարակի դեմ պայքարելու համար¹⁴⁵: Սովն ու համաճարակը օրական իլյում էին մոտ 2000 կյանք:

Ստեղծված վիճակի համար քննադատության հիմնական թիրախ էր դարձել Քաջագնունու կաբինետը: ՀՅԳ-Բյուրոյի անդամ Ս. Վրացյանի խմբագրած «Չանգ» պաշտոնաթերթի առաջնորդողներից մեկում կարդում ենք. «Թե՛ մայրաքաղաք Երևանում և թե՛ գավառում մենք իշխանություն չունենք դեռ: Ամեն տեղ կան բավական առատ շինովնիկներ ու միլիցիոներներ, որոնք թուղթ են գրում, ռոճիկ են ստանում, որոնցից շատերը կաշառք են ուտում, մարդ են ծեծում, զեղծումներ են կատարում, բայց պաշտոնություն պետական մտքով, կազմակերպված իշխանություն, ադմինիստրացիա չունենք, դժբախտաբար»¹⁴⁶: Հիմնական կառավարող կուսակցության պաշտոնաթերթը փաստեր էր բերում պաշտոնյաների զեղծումների ու շահատակությունների վերաբերյալ¹⁴⁷:

Քաջագնունու կաբինետից առավել ևս դժգոհ էին «ծախ» կուսակցությունները: Նրանց մամուլում առանձնապես մեծ դժգոհություն էր արտահայտվում կառավարության ֆինանսա-տնտեսական գործունեությունից, պարենավորման ու գաղափականության խնդիրներում ցուցաբերվող անտարբերության նկատմամբ: Հայ մենշևիկների պաշտոնաթերթ «Կայծ» Քաջագնունու կաբինետը որակում էր որպես «իմպոտենտ»¹⁴⁸: «Չախ» խմբակցությունները քննադատում էին նաև կառավարության արտաքին քաղաքականությունը, մասնավորապես հայ-վրացական պատերազմի հարցում հավասարապես մեղադրում էին նաև Հայաստանի կառավարությանը: Պարենային սուր ճգնաժամի կապակցությամբ խորհրդարանի հունվարյան նիստերից մեկում պատ-

¹⁴³ «Ժողովրդի ձայն», Թիֆլիս, 26 դեկտեմբերի 1918թ.:

¹⁴⁴ Նույն տեղում:

¹⁴⁵ ՀՀ ՊԿՊԱ, Ֆ.202, ց.1, գ.41, ք.3:

¹⁴⁶ «Չանգ», 14 փետրվարի 1919թ.:

¹⁴⁷ «Չանգ», 31 հունվարի 1919թ.:

¹⁴⁸ «Կայծ», 8 դեկտեմբերի 1918թ.:

գամավորներ Թ. Ավդալբեկյանը (սոց.-դեմ.) և Դ. Ջուրյանը (Էսէռ) նույնիսկ խորհրդարան մտցրեցին կառավարության հրաժարականի հարցը¹⁴⁹: Խորհրդի հունվարի 25-ի նիստում «ձախերը» բանաձև ներկայացրին Քաջագունու խառը կաբինետին անվտանգություն հայտնելու մասին: Նրանք պահանջում էին փոխել կառավարության ներքին և արտաքին կոշտ քաղաքականությունը հարևանների և ներքին թուրքերի նկատմամբ, վարել ավելի մեղմ ու զիջող քաղաքականություն¹⁵⁰: Սակայն բանաձևը մերժվեց ՀՅԴ և ՀԺԿ գերակշիռ ձայներով:

Հաշվի առնելով Հայաստանի տնտեսական ու հատկապես պարենալիսն աղետալի վիճակը՝ հայ-վրացական պատերազմի հետևանքով առաջացած շրջափակումը, Հայաստանի խորհուրդը 1919թ. փետրվարի 4-ի նիստում որոշեց հանրապետության վարչապետ Հ. Քաջագունուն գործուղել Եվրոպա ու Ամերիկա՝ համաձայնության (Անտանտի) պետություններից և ԱՄՆ-ից խնդրելու օգնություն՝ պարեն և առաջին անհրաժեշտության ապրանքներ¹⁵¹: Գործուղման ձախսերի համար հատկացվեց 550 հազ. ռուբլի¹⁵²:

Անշուշտ, անձամբ վարչապետին արտասահման գործուղելու գործում կային քաղաքական մոտիվներ. ՀՅԴ կուսակցության ղեկավարությանը այնքան էլ դուր չէր գալիս Քաջագունու վարած լոյալ ներքին ու արտաքին քաղաքականությունը: Հ. Քաջագունին աշխատում էր կուսակցությանը հեռու պահել պետական կառավարման գործերին խառնվելուց: Այդ իսկ պատճառով էլ արտասահման գործուղելը դարձավ պատրվակ նրան հեռացնելու կառավարության գործնական ղեկավարի պաշտոնից:

Բայց մյուս կողմից պետք է տեսնել, որ 1919թ. սկզբներին Հայաստանում ճարակած սոսկալի սովը, ցուրտը, համաճարակը պահանջում էին կառավարությունից ամենաբարձր մակարդակով քայլեր ձեռնարկել այս ու այն տեղից կենսագոյության միջոցներ հայթայթելու: Իրոք, հանրապետության պարենալիսն վիճակը շատ ծանրացավ հատկապես այն բանից հետո, երբ 1918թ. վերջերին (դեկտեմբերի 6-ին) թուրքական զորքերը, Արևելյան Հայաստանից հետ քաշվելով, իրենց հետ տարան կամ ոչնչացրին հացամթերքն ու պարենը, որպեսզի կոտորածներից փրկված հայությունը այժմ էլ սովից ոչնչանա: Կ. Պոլսի ամերիկյան օգնության բաժնի պաշտոնական գործակալը այդ օրերին հեռագրում էր. «Ոչ մի տեղ հաց չկա: Երևանում 45000 մարդ մնացել է առանց հացի: Քաղաքի որբանոցները և զորքը սարսափելի դրության մեջ են: Իգդիրի շրջանում չի մնացել ո՛չ ձի, ո՛չ շուն, ո՛չ կատու, ո՛չ ուղտ և ո՛չ - մի այլ կենդանի: Տեսա կանանց, որոնք իրար ձեռքից խլում են սատկած ձիու միսը: Մի շաբաթ ևս և տասը հազար մարդկային կյանք կորած են...»¹⁵³:

¹⁴⁹ «Ձանգ», 7 փետրվարի 1919թ.:

¹⁵⁰ «Կայծ», 13 փետրվարի 1919թ.:

¹⁵¹ ՀՀ ՊԿՊԱ, ֆ.198, ց.1, գ.15, ք.116:

¹⁵² ՀՀ ՊԿՊԱ, ֆ.200, ց.1, գ.86, ք.27:

¹⁵³ ՀՀ ՊԿՊԱ, ֆ.200, ց.1, գ. 131, ք.38:

Տվյալներ կան, որ սովի հետևանքով Սուրմալուի գավառի բնակչության 60 տոկոսը մահացել էր¹⁵⁴: Մեռնում էր հիմնականում բնավեր եղած ու սովահար արևմտահայ գաղթականությունը:

1919 թ. փետրվարի 20-ին խորհրդարանի հանձնարարությամբ Սուրմալուի գավառ գործուղվեց խորհրդարանական մի հանձնաժողով՝ կազմված հինգ խմբակցությունների մեկական ներկայացուցիչներից: Սուրմալուն պարենային տեսակետից գտնվում էր, թերևս, ամենաաղետալի վիճակում: Հանձնաժողովին տրված էր ամենալայն լիազորություններ՝ ծանոթանալու գավառի վիճակին, ստուգելու պաշտոնատար մարմինների գործունեությունն ու հաշիվները և հանցանք կամ զեղծում նկատելու դեպքում դրանց հեղինակներին անհապաղ պաշտոններից հեռացնելու¹⁵⁵:

Հանձնաժողովի աշխատանքը տևեց տասը օր: Նա եղավ Իգդիրում, Կողբում և մի քանի գյուղերում, ուր տեղում ուսումնասիրեց պարենավորման և առհասարակ գործերի վիճակը, լսեց տեղի բազմազգ /հայ, թուրք, քուրդ/ ազգաբնակչության բազմաթիվ ու բազմաբնույթ բողոքներն ու ցավերը և աշխատեց հնարավորին չափ ընթացք ու լուծում տալ գավառի ու նրա բնակչության պահանջներին:

Նկատենք, որ Հայաստանում բնակվող թուրք ազգաբնակչությունը համեմատաբար ապահովված էր հացով, իսկ նրա դրկից հայությունը զանգվածորեն մեռնում էր սովահարությունից և ոչ մի օգնություն չէր ստանում նրանից: Տեղացի մահմեդական ազգաբնակչությունը հաց ու պարեն չէր տալիս սովահար հային ու եզրուն: Նրանք դա պատճառաբանում էին նրանով, որ Նախիջևանից ու Կարսից իրենց թուրք ղեկավարները հրամայել էին, որ «Հային հաց չտալ, հային սովամահ անել...»¹⁵⁶: Հասկանալի է, որ այս հանգամանքը պետք է բացասաբար անդրադառնար երկու ժողովուրդների հետագա փոխհարաբերությունների վրա:

Ահավոր սովի պայմաններում անհատ մարդկանց ու կազմակերպությունների կողմից հանրապետություն ներկրվող մթերքների մուտքը խրախուսելու նպատակով կառավարությունը (առանց սպասելու խորհրդարանի համապատասխան օրենքին) որոշում կայացրեց այն մասին, որ ՀՀ սահմանները փոխադրվող բոլոր տեսակի մթերքները ենթակա չեն բռնագրավման ու հարկման¹⁵⁷:

1919 թ. հունվարի 25-ի խորհրդարանի նիստում պարենավորման նախարարի տված զեկուցումից պարզվում է, որ Հայաստանում առկա բնակչության առնվազն կեսը բոլորովին հաց չունեի, իսկ մինչև նոր բերքահավաք պահանջվում էր 5,2 մլն. փութ ցորեն¹⁵⁸: Եվ պատահական չէր, որ այդ տակալի

¹⁵⁴ ՀՀ ՊԿՊԱ, Ֆ.200, ց.1, գ. 422, թ. 25:

¹⁵⁵ «Չանգ», 21 մարտի 1919թ.:

¹⁵⁶ «Չանգ», 12 փետրվարի 1919թ.:

¹⁵⁷ «Արձագանք», Եկատերինոդար, 17 փետրվարի 1919թ.:

¹⁵⁸ ՀՀ ՊԿՊԱ, Ֆ.198, ց.1, գ.15, թթ.88-89:

ծնունդն ընթացքում սովին, ցրտին, համաճարակին և այլ աղետների զոհ գնաց մոտ 150 հազ., իսկ որոշ տվյալներով 180 հազ. մարդ՝ հիմնականում գաղթականություն¹⁵⁹:

Ահա, մի երկու խոսքով այսպիսին էր կացությունը, որը և թելադրում էր կառավարական պատվիրակություն արտասահման գործուղելու անհրաժեշտությունը: Հայաստանի խորհրդի փետրվարի 18-ի նիստում հաստատվեց վարչապետի գրավոր առաջարկությունը՝ իր բացակայության ժամանակամիջոցում ներք. գործոց նախարար Ալ Խատիսյանին վարչապետի պաշտոնակատար նշանակելու մասին: Բացառությամբ էսէռների՝ մյուս խմբակցությունները հավանություն տվեցին վարչապետի առաջարկությանը¹⁶⁰:

Ստեղծված պայմաններում մինչ վարչապետը կգործուղվեր արտասահման, խորհրդարանի նախագահ Ավ. Սահակյանը մեկնեց Թիֆլիս՝ մեծ տերությունների ներկայացուցիչներից օգնություն հայցելու¹⁶¹: Միաժամանակ, խորհրդարանը որոշում ընդունեց պարենավորման նպատակով դիմել Փարիզի միջազգային պարենավորման կոմիտեին և նույն նպատակով պատվիրակություն ուղարկել Հյուսիսային Կովկաս՝ այնտեղից որոշ օգնություն ստանալու¹⁶²:

Ինչպես տեսնում ենք, խորհրդարանն ու կառավարությունը պարենավորման ուղղությամբ որոշ քայլեր ձեռնարկեցին: Սակայն դրանք բավականին ուշացած էին:

4. Հայկական հարցը և արտաքին քաղաքականության խնդիրները

Թեև արտաքին քաղաքականությունը գործադիր իշխանության՝ կառավարության իրավասության ոլորտ է, բայց և այնպես՝ օրենսդրական կտրվածքով խորհրդարանը հաճախ անդրադարձել է այս բնագավառի հիմնախնդիրներին:

Ամենից առաջ խորհրդարանը արձագանքեց 1918թ. սեպտեմբերին Բաքվում տեղի ունեցած հայերի կոտորածին: Խորհրդի հոկտեմբերի 26-ի նիստում, Ավ. Սահակյանի նախագահությամբ, քննվեց օրինագիծ՝ Բաքվի աղետյալ հայերին 200 հազ. ռուբլի նպաստ տալու մասին¹⁶³: ՀՅԴ խմբակցության առաջարկով խորհուրդը անբավարար համարեց 200 հազարը և միաձայն որոշեց օգնության չափը հասցնել 500 հազար ռուբլու¹⁶⁴: Այդ նպաստի տնօ-

¹⁵⁹ Ա. Խատիսյան, *նշվ. աշխ., էջ 118*, Ս. Վրացյան, *նշվ. աշխ., էջ 192*:

¹⁶⁰ «Ժողովուրդ», 28 փետրվարի 1919:

¹⁶¹ «Հառաջ», 6 հունվարի 1920թ.:

¹⁶² «Չանգ», 7 փետրվարի 1919թ.:

¹⁶³ ՀՀ ՊԿՊԱ, Ֆ.198, ց.1, գ.15, ք.1:

¹⁶⁴ Նույն տեղում, ք.6, Ֆ.200, ց.1, գ.86, ք.10:

րինման ու Բաքվի աղետյալներին բաշխման գործը հանձնարարվում է Ադրբեջանում նոր նշանակում ստացած Հայաստանի դիվանագիտական ներկայացուցիչ Տիգրան Բեկզադյանին: Միաժամանակ, խորհուրդը, հիմք ընդունելով էսէռական խմբակցության բանաձևը, իր բողոքի ձայնը բարձրացրեց՝ նշավակելու այն գազանությունները, որոնք թուրք վայրենի հրոսակները գործադրել էին Բաքվի խաղաղ ազգաբնակչության նկատմամբ:

Բաքվի հայերի սեպտեմբերյան ջարդերի առնչությամբ նախարար-նախագահ Հ. Քաջազնունին պաշտոնական տեղեկանք է տալիս այդ մասին¹⁶⁵: Բաքվի ողբերգության կապակցությամբ խորհրդի նիստում էսէռ և սոց.-դեմ. պատգամավորների կողմից քննադատական մեղադրանքներ ուղղվեցին Հայաստանի կառավարության հասցեին, որ նա գտնվել է անտարբեր ու պասիվ դիտողի դերում, երբ 1918 թ. ամռանը թուրքական զորքերը Հայաստանի հյուսիսով՝ Գիլիջանով, շարժվում էին դեպի Բաքու: Բուլշևիկ պատգամավոր Ա. Մելիքյանի և ձախակողմյան մյուս պատգամավորների կողմից նման մեղադրանքները գնահատելուց առաջ նախ պետք է հստակ պատկերացնել, թե ռազմա-քաղաքական ինչպիսի ծանր ու անկայուն վիճակում էր հայտնվել Բաթումի պայմանագիրը նոր ստորագրած նորանկախ, փոքրիկ, թույլ ու անօգնական Հայաստանի Հանրապետությունը: Գտնում ենք, որ ճիշտ էր վարվում Քաջազնունու կարիները, երբ աշխատում էր խոհեմ ու հավասարակշիռ քաղաքականությամբ Հայաստանը գերծ պահել Թուրքիայի հետ հնարավոր զինաբախումից ու սադրանքից, քանզի հակառակ դեպքում այն կարող էր վերջանալ ավելի մեծ ողբերգությամբ՝ ամբողջ արևելահայության բնաջնջումով:

Իր հերթին, պատմական անաչառությունը պահանջում է ասել, որ Անդրկովկասի բուլշևիկների առաջնորդ Ստ. Շահումյանի գլխավորած Բաքվի կոմունան մի քանի ամիս շարունակ կարողացավ իր վրա գրավել թուրքական գլխավոր հարվածային ուժերը և դրանով իսկ օբյեկտիվորեն նպաստել Հայաստանի Հանրապետության ամրակայմանը: Այս առնչությամբ ճիշտ է նկատել Ս. Վրացյանը. «Առանց Բաքվի, Հայաստանի դեպքերը կարող էին այլ ընթացք ստանալ»¹⁶⁶:

Պատմական ճշմարտություն է նաև այն փաստը, որ 1918թ. գարնանը Բաքվի քաղաքական անցքերի և դեպի Բաքու թուրքական զորքերի հարձակման ամբողջ վեց ամիսների ընթացքում տեղի է ունեցել տեղի բուլշևիկների և դաշնակցականների ռազմաքաղաքական համագործակցություն՝ ընդդեմ թուրքերի: Մեր կարծիքով, հիմնավոր ու պատճառաբանված չէ խորհրդային հեղինակների՝ Ծ. Աղայանի, Ա. Կադիչևի, Խ. Բաղայանի, Ե. Սարգսյանի և այլոց այն պնդումը, թե Բաքվի կոմունայի անկման և 26 կոմիսարների գնդակահարման պատճառներից էր «դաշնակների դավաճանական գործունեութ-

¹⁶⁵ ՀՀ ՊԿՊԱ, Ֆ.198, ց.1, գ.15, քթ.3-4, «Ժողովուրդ», 6 նոյեմբերի 1918թ.:

¹⁶⁶ Ս. Վրացյան, Հայաստանի Հանրապետություն, Բեյրութ, 1958, էջ 157:

յունը»¹⁶⁷: Նշենք, որ առաջին անգամ նման մեղադրանքով հանդես եկավ Հայկական գործերի կոմիսար Վ. Ավանեսովը՝ 1918թ. վերջերին տրված ռադիոգրով¹⁶⁸: Եթե թուրքական ինտերվենցիայի (ներխուժման) ժամանակ դաշնակցական առանձին գործիչներ (Մ. Արզումանյան, Ս. Հարությունյան) բանակցությունների փորձեր են արել թուրքերի հետ, ապա միայն այն բանի համար, որպեսզի հնարավորին չափ մեղմեն թուրքերի կողմից հայերի կոտորածները: Պրոֆ. Խ. Բաղալյանի այն պնդումը, թե, ի կատարումն Բաթումի պայմանագրի 11-րդ հոդվածի, Բաքվի հայ ազգային խորհուրդը պետք է քաղաքից դուրս բերեր հայկական զորամասերը¹⁶⁹, այս կապակցությամբ ուղղակի հիշեցնենք, որ ՀՅԳ-Բաքվի կենտրոնական կոմիտեությունը և նրա ազդեցության տակ գտնվող Բաքվի հայ ազգային խորհուրդը նախ բողոքել են Բաթումի դաշնագրի դեմ, չեն ենթարկվել դրա որոշումներին և կուսակցության ապակենտրոն սկզբունքի համաձայն, հաշվի առնելով իրենց տեղական պայմաններն ու առանձնահատկությունները՝ փաստորեն գործել են ինքնուրույն՝ շարունակելով համագործակցել Կոմունայի զինված ուժերի հետ: ՀՅԳ-ի կողմից այդ պայքարը ղեկավարում էին Բյուրոյի անդամներ՝ Ռոստոմը և Ա. Գյուլխանդանյանը: 1918 թ. հուլիսի 25-ի Բաքվի սովետի ընդլայնված նիստում Ստ. Շահումյանի արած հայտարարությունից իսկ երևում է, որ ընդհուպ մինչև Կոմունայի անկումը՝ Բաքվի դաշնակցականները ճանաչել են խորհրդային իշխանությունը թե՛ Ռուսաստանում և թե՛ Բաքվում և աջակցել նրան¹⁷⁰: Իսկ թե ինչու ընկավ Կոմունան, դա արդեն Դաշնակցության և Հայաստանի կառավարության մեղքը չէր: Կոմունայի պարտության պատճառները պետք է փնտրել Հյուսիսային Կովկասից ու Խորհրդային Ռուսաստանից նրա կտրվելու, ընդհանուր շրջափակման և ներքին պաշարների ու հնարավորությունների սպառման մեջ:

* * *

Հայաստանի խորհրդարանի և քաղաքական կուսակցությունների համար 1918թ. վերջերին արտաքին ոլորտի ամենասուր խնդիրներից էր հայվրացական սահմանային վեճը: Լռու և Ախալքալաքի շրջանների համար տարածքային այս վեճը դարձավ մի տեսակ հայվրացական «Էլզաս-Լոթարինգիա»: Սպառելով խնդրի խաղաղ, քաղաքական կարգավորման բոլոր

¹⁶⁷ Ծ. Աղայան, Հոկտեմբերյան սոցիալիստական ռևոլյուցիան և Բաքվի 1918թ. Սովետական իշխանությունը, Ե., 1948, էջ 24-25, Ա. Բ. Кадышев, Интервенция и гражданская война в Закавказье, М., с. 128-129, Խ.Հ.Բաղալյան, Դաշնակների կոնտռոլյուցիոն գործունեության մի քանի փաստերի մասին /1918-1920թթ./ Ե., 1955, էջ 16-17, Ե. Ղ. Սարգսյան, Թուրքիան և նրա նվաճողական քաղաքականությունը Անդրկովկասում 1914-1918, Ե., 1964, էջ 405 եւ ուրիշներ:

¹⁶⁸ «Հոկտեմբերյան սոց. մեծ ռևոլյուցիան...», էջ 256-258:

¹⁶⁹ Խ.Հ.Բաղալյան, Գերմանա-թուրքական օկուպանտները Հայաստանում 1918թ. Ե., 1962, էջ 37, նույնի, Դաշնակների կոնտռոլյուցիոն գործունեության մի քանի փաստերի մասին /1918-1920թթ./, Ե., 1955, էջ 17-18:

¹⁷⁰ Ստ. Շահումյան, ԵԼԺ, հ. 5, Ե., 1978, էջ 216:

պաշարները, այն վերաճեց երկշաբաթյա զինաբախման, որը նույնպես վերջնականորեն չլուծեց կնճիռը:

Չինաբախման պատճառն այն էր, որ 1918թ. հունիսին վրացական զորքը Գերմանիայի աջակցությամբ մուտք գործեց Բորչալուի գավառի Լոռու շրջանը և ժամանակավորապես գրավեց այն, իբրև թե կանխելու թուրքերի առաջխաղացումը դեպի Թիֆլիս: Իսկ երբ 1918թ. վերջին թուրքերը հետ քաշվեցին Անդրկովկասից, վրացիները ոչ միայն իրենց զորքերը դուրս չբերեցին Լոռու գոտուց, այլև սկսեցին բռնություններ գործադրել բնակչության մեծամասնությունը կազմող հայության նկատմամբ¹⁷¹: Վրաստանում Հայաստանի հավատարմատար Ա. Ջամալյանի վրաց վարչապետ Ն. Ժորդանիային տված այն հարցին, թե երբ է վրացական զորքը դուրս բերվելու ժամանակավորապես գրավված Լոռու շրջանից, վարչապետը պատասխանում է, որ «ժամանակավոր» բառը ոչինչ չի նշանակում և որ Լոռին իրենց ձեռքին է գտնվում՝ «իբրև պատմական Վրաստանի մի մաս»¹⁷²: Պետք է ասել, որ վրաց քաղաքական շրջանների մոտ արմատացած էր այն թյուր մտայնությունը, թե ցարիզմի կամայական վարչական բաժանումներով ստեղծված Թիֆլիսի նահանգը /այդ թվում Լոռին և Ախալքալաքը/ ամբողջությամբ վրացական պատմական տարածք է: Ի դեպ՝ նույնպիսի համոզմունք ու հավակնություն ունեյր նաև Ադրբեջանը նախկին Ելիզավետպոլի նահանգի, ավելին՝ Երևանի նահանգի մի շարք գավառների նկատմամբ:

ՀՀ դիվանագիտական առաքելությունը Վրաստանում 1918թ. հոկտեմբերի 17-ին Հայաստանի արտ. գործ. նախարարին ուղղված գրությունում հայտնում էր, որ «Վրաց կառավարությունը մտադրություն ունի գրավելու Ախալքալաքի գավառը և սպասում է թուրքերի հեռանալուն: Արդեն նշանակել են պաշտոնավորների»¹⁷³: Եվ սա այն դեպքում, երբ գավառի ազգաբնակչության 77 տոկոսը կազմում էին հայերը և միայն 6,5 տոկոսը վրացիները¹⁷⁴:

Եվ ահա 1918թ. աշնանը հայ-վրացական հակամարտության խորացման պայմաններում խորհրդարանը իր նիստերում մի քանի անգամ անդրադարձավ այդ խնդրին: Չեռնարկված քայլերի մասին զեկուցում տվեց և պատգամավորների հարցերին պատասխանեց վարչապետ Հ. Քաջազունին: Օրինակ, հոկտեմբերի 26-ի թիվ 31 նիստում 27 ձայնով ընդունվեց հետևյալ որոշումը. «Հայ-վրացական խնդիրը խաղաղ ճանապարհով լուծելու նպատակով Հայաստանի խորհուրդը հանձնարարում է կառավարությանը բանակցություններ սկսել վրաց կառավարության հետ՝ կոնֆերանս գումարելու սահմանագիծը որոշելու համար»¹⁷⁵: Դեկտեմբերի 14-ին ընդունված բանաձևում

¹⁷¹ ՀՀ ՊԿՊԱ, ֆ.200, ց.1, գ.99, քթ.3, 24:

¹⁷² Նույն տեղում, ք.6:

¹⁷³ Նույն տեղում, ք.19:

¹⁷⁴ Նույն տեղում, ք.20:

¹⁷⁵ «Հորիզոն», 10 նոյեմբերի 1918թ., «Բանբեր Հայաստանի արխիվների», 1990, թիվ 3, էջ 129:

վրաց խորհրդարանը հույս էր հայտնում, որ «կառավարությունը բոլոր միջոցները կծեռնարկի, որպեսզի պաշտպանի պետությունը այն թշնամիներից, որոնց միակ ցանկությունը երկու հարևան ժողովուրդների միջև արյունալի ընդհարումներ ու երկրում անիշխանություն առաջացնելն է»¹⁷⁶: Այստեղ դժվար է կռահել, թե վրաց խորհրդարանը «թշնամի» ասելով ո՞ւմ նկատի ուներ: Կարծում ենք, ամենից ավելի հավանական է, որ նկատի ուներ «ՀՅ Դաշնակցություն» կուսակցությանը ու նրա կառավարությանը և ավելի քիչ հավանական է՝ Թուրքիային և կամ Ռուսաստանին:

Այդուհանդերձ, խորհրդարանների խաղաղասիրական կոչերը արդյունք չտվեցին: Քաղաքական, խաղաղ միջոցներով չկարողանալով լուծել Լոռի-Ախալքալաքի տարածքային վեճը, մի քանի նոտաների փոխանակումից հետո սկսվեց պատերազմ՝ Հայաստանի և Վրաստանի միջև: Չնայած ձայների մեծամասնությամբ խորհրդարանը հավանություն տվեց կառավարության վարած քաղաքականությանը, սակայն այնտեղ բացորոշ ի հայտ եկան երկու հակադիր հոսանքներ: Ազգային թեր՝ ՀՅԴ- և ՀԺԿ խմբակցությունների մեծամասնությունը կառավարությունից պահանջում էին ավելի վճռական քայլեր, իսկ ոչ ազգային՝ ձախակողմյան խմբակցությունները, հանդես գալով պատերազմների մերժման պացիֆիստական դիրքերից, հավասարապես քննադատում էին Հայաստանի և Վրաստանի կառավարություններին՝ գտնելով, որ անթույլատրելի է հարցի ուժային լուծումը: Այդ օրերին հայ սոցիալ-դեմոկրատ մենչևիկների օրգան «Կայծը» հավասարապես քննադատում էր հայ և վրաց ազգայնամուլներին: «Նացիոնալիստական կրքերը,- գրում էր Արկունեղը,- մեզանում բորբոքման այն աստիճանի են հասել, որ մի «Կոբերի» (կիսակայարան Լոռիում -Ա.Հ.) կամ «Շահալուի» խնդիրը կարող է նորեն տակնուվրա անել մեր երկիրը և վտանգել մասնավորապես հայ ժողովրդի գոյությունը»¹⁷⁷: Մեկ այլ տեղ «Կայծը» դաշնակցականների սարքած ավանտյուրա էր համարում հայ-վրացական պատերազմը, որ «կարող էին ձեռնարկել միայն դաշնակցականների մման անհեռատես ու հակաժողովրդական քաղաքական գործիչները»¹⁷⁸: Որ հայ սոց.- դեմոկրատները ավելի հակված էին դեպի վրաց մենչևիկները, երևաց նրանից, որ երբ Անգլիայի և Ֆրանսիայի անդրկովկասյան ներկայացուցիչները պահանջեցին, որ վրացական զորքը մնա իր տեղում՝ Խրամ գետի ափին, իսկ հայկական զորքերը հետ քաշվեն Լոռու գրավյալ տարածքներից մինչև իրենց ելման դիրքերը՝ Չալալօղլի-Քոլագերան գիծը, խորհրդարանի ղեկավարների 26-ի միստում երեք կուսակցությունների (ՀՅԴ, ՀԺԿ, Էսեռ) խմբակցությունները բողոքեցին դաշնակցների առաջարկած պայմանի դեմ: Սինչոեռ սոց.-դեմ. խմբակցությունը «հանուն խաղաղության հաստատման» առաջարկեց ընդունել դաշնակցների առաջարկը¹⁷⁹: Պայքա-

¹⁷⁶ *Документы и материалы..., с. 467.*

¹⁷⁷ «Կայծ», 9 նոյեմբերի 1918թ.:

¹⁷⁸ «Կայծ», 29 դեկտեմբերի 1918թ.:

¹⁷⁹ «Կայծ», 29 դեկտեմբերի 1918թ.:

րելով հայ և վրաց ազգայնականների դեմ՝ հայ սոցիալ-դեմոկրատների նպատակն էր մերձեցնել ու միավորել Անդրկովկասի ու Ռուսաստանի ժողովուրդներին, միջազգային դեմոկրատիային: Ըստ մենչևիկ գործիչների՝ ստացվում է, որ գերազանցապես հայաբնակ Լոռու և Ախալքալաքի հայության օրինական շահերի ու անվտանգության պաշտպանությունը և Վրաստանի զավթողական ձգտումներին արգելափակոց դնելը նացիոնալիզմ է հայերի կողմից ու հավասարաբեք վրացականին:

Արդեն ընթացող ռազմական գործողությունները դադարեցնելու և կոնֆլիկտը հարթելու նպատակով Լոռի մեկնեց խորհրդարանական հանձնաժողով: Նրանում ընդգրկված էին Գ. Տեր-Խաչատրյանը (ՀԺԿ), Ս. Հարությունյանը (ՀՅԳ), Ս. Խաչատրյանը (ՀՅԳ), Ա. Խոնդկարյանը (ԷսԷՌ), Ս. Մամիկոնյանը (անկուս.) և գորավար Ղորղանյանը¹⁸⁰: Խորհրդարանական պատվիրակությունը, անշուշտ, օգտակար դեր խաղաց արյունահեղության շուտափույթ դադարեցման գործում:

Այն բանից հետո, երբ 1919թ. հունվարին անգլո-ֆրանսիական զինվորական հրամանատարության ներկայացուցիչների միջնորդությամբ Լոռին հայտարարվում է չեզոք գոտի, ու տեղի է ունենում ռազմագերիների փոխանակում, դրանից հետո երկու դրկից հանրապետությունների միջև հարաբերություններն սկսեցին նորմալանալ ու նույնիսկ բարելավվել: 1919թ. փետրվարի 28-ին երկու հանրապետությունները պաշտոնապես ճանաչում են միմյանց անկախությունը¹⁸¹:

ՀՀ արտաքին քաղաքականության գլխավոր խնդիրը եղել է Հայկական հարցի լուծումը: Ինչպես հայտնի է, 1918թ. հոկտեմբերի 30-ին Մուղրոսի զինադադարով Թուրքիան կապիտուլյացվեց և պարտավորվեց իր զորքերը դուրս բերել նաև Անդրկովկասից ու Հայաստանից: 1918թ. նոյեմբերի 11-ին կապիտուլյացիայի ենթարկվեց նաև Գերմանիան և դրանով ավարտվեց Առաջին աշխարհամարտը: Բաթումի պայմանագիրը իր ուժը պահպանեց մինչև համաշխարհային պատերազմի ավարտը՝ 1918թ. նոյեմբերը: Այս առնչությամբ տեղին ենք համարում հիշեցնել, որ իրականությանը չի համապատասխանում պրոֆ. Խ. Բաղալյանի այն փաստարկը, թե 1918թ. օգոստոսի սկզբին Հայաստանի խորհրդարանը վավերացրել էր Բաթումի պայմանագիրը և իբրև այդ առթիվ տեղի է ունեցել գորահանդես¹⁸²: Իրականում այդ պայմանագիրը չի վավերացվել ո՛չ Հայաստանի և ո՛չ էլ Թուրքիայի խորհրդարանների կողմից: Այն չի ընդունվել նաև Բրեստի պայմանագիրը ստորագրած պետությունների կողմից: Բաթումի պայմանագրի մասին խոսք է եղել միայն Հայաստանի կառավարության հայտագրում, որը, սակայն, միջազգային պայմանագրի վավերացման արարողակարգ չէ:

¹⁸⁰ «Ժողովուրդ», 22 դեկտեմբերի 1918թ.:

¹⁸¹ ՀՀ ՊԿ ՊԱ, Ֆ.200, ց.1, գ.95, ք.99:

¹⁸² Խ. Հ. Բաղալյան, Գերմանա-թուրքական օկուպանտները Հայաստանում 1918թ., Երևան, 1962, էջ 46:

Առաջին աշխարհամարտի ավարտից հետո Հայաստանի խորհրդարանի քննարկումների նյութ դարձավ Հայկական հարցը: Իմանալով, որ շուտով, 1919թ. սկզբին, Փարիզում բացվելու է խաղաղության կոնֆերանս որոշվեց՝ որպես հաղթանակած Անտանտի «փոքր դաշնակից», Հայաստանի պատվիրակություն ուղարկել Եվրոպա՝ ներկայացնելու համար հայկական պահանջները: 1918թ. դեկտեմբերի սկզբին Հ. Օհանջանյանը Լոզանից հեռագրում էր Հայաստանի կառավարությանը և խորհրդարանին. «Դաշնակիցները, հայերին ընդունելով իբրև իրենց կողմից կռվող տարր, ճանաչում են Հայաստանի անկախությունը և իրավունք են տալիս մասնակցելու կոնֆերանսին: Շուտով ուղարկեցեք պատգամավորներ պետք եղած մանդատներով»¹⁸³: Թեև Հայաստանը Փարիզի խաղաղության կոնֆերանսին պաշտոնապես հրավիրված չէր, սակայն հանրապետության պահանջներն այնտեղ ներկայացնելու համար դեկտեմբերի 3-ին խորհուրդը ձայների մեծամասնությամբ որոշեց Եվրոպա ուղարկել պատվիրակություն, որի ղեկավար նշանակվեց Ավետիս Ահարոնյանը¹⁸⁴: Խորհրդի մի քանի փակ նիստերում քննության առնվեցին Հայաստանի կառավարության կողմից Եվրոպա պատվիրակություն ուղարկելու և դրա կարգավիճակի (իրավասության սահմանների) հետ կապված հարցերը: Տրվեցին հրահանգներ, որոնք պետք է դրվեին պատվիրակության գործունեության հիմքում¹⁸⁵:

Դարձյալ ՀՅԳ և ՀԺԿ խորհրդարանական խմբակցությունների համաձայնությամբ որոշվեց, որ Փարիզի խաղաղության կոնֆերանս մեկնող պատվիրակության կազմը և նրան տրվելիք ղեկավար հրահանգները պետք է որոշի ոչ թե խորհրդարանը, այլ՝ կառավարությունը: Այս բանի դեմ բռուն կերպով բողոքեցին «ձախերը»¹⁸⁶: Նրանք իրենց բողոքը հիմնավորում էին այն բանով, որ գերագույն իշխանությունը խորհրդարանն է և ոչ թե կառավարությունը, ուստի՝ երկրի ու ժողովրդի համար կարևորագույն հարցերի վճռման իրավունքը վերապահվում է խորհրդարանին: «Կենտրոն» և «աջակողմյան» խմբակցությունները անհանգստանալու հիմքեր չունեին, քանզի կառավարությունը կազմված էր իրենց ներկայացուցիչներից: Վերջիններս սկսեցին ավելի հաճախ հաշվի չնստել ձախակողմյան խմբակցությունների հետ և պետության ու ժողովրդի համար կարևոր հարցերը վճռելու իրավունքը հանձնել կառավարությանը, որպեսզի «ձախերը» այդ գործում, որևէ մասնակցության ու միջատության հնարավորություն չունենան:

Կառավարող և խորհրդարանում կայուն մեծամասնություն կազմող «կենտրոն», և «աջակողմյան» խմբակցությունները սկսեցին ավելի հաճախակի դիմել նման քայլերի, որպեսզի մեկուսացնեն «ձախերին» երկրի քաղա-

¹⁸³ «Ժողովուրդ», 11 դեկտեմբերի 1918թ.:

¹⁸⁴ Ռ. Հովհաննիսյան, Հայաստանի Հանրապետություն, Հ.1, էջ 251, (անգլերեն), նաև «Լրաբեր» 1994, թիվ 1, էջ 102:

¹⁸⁵ «Ժողովուրդ», 4 և 6 դեկտեմբեր 1918թ.:

¹⁸⁶ «Կայծ», 8 դեկտեմբերի 1918թ.:

քական կյանքին մասնակցելուց: Այս գործելակերպի համար, մեր կարծիքով, հիմք հանդիսացավ նաև արտաքին նպաստավոր այն հանգամանքը, որ 1918 թ. աշնանը, հայ ժողովրդի դիտերին թշնամի Օսմանյան Թուրքիայի պարտությունից հետո Հայաստանի կառավարությունը ինքնավստահություն ձեռք բերեց և սկսեց այլևս բանի տեղ չդնել «ճախերին»՝ Հայաստանի և հայ ժողովրդի քաղաքական ճակատագրի պատասխանատվությունը կիսելու իմաստով: Ինքնին հասկանալի է, որ նման գործողությունների հետևանքով ինքնաբերաբար նեղացվում ու սահմանափակվում էր գերագույն իշխանության՝ խորհրդարանի դերը: Խորհրդարանը միայն ձայների մեծամասնությամբ որոշում կայացրեց պատվիրակության նախատեսվելիք ծախսերի համար բաց թողնել 700 հազ. ռուբլի վարկ: ԷսէՆ և սոցիալ-դեմոկրատ խմբակցությունները պահանջեցին, որ այդ գումարը կրճատվի կիսով չափ՝ թողնելով 340 հազ. ռուբլի¹⁸⁷: Եվ սա այն դեպքում, երբ Վրաստանի նույնատիպ պատվիրակության կարիքները հոգալու համար վրաց պառլամենտը որոշել էր հատկացնել, 1,5 մլն. ռուբլի¹⁸⁸:

1918 թ. դեկտեմբերի 5-ին և 7-ին նախարարների խորհուրդը, լսելով վարչապետի զեկուցումը Եվրոպա պատվիրակություն ուղարկելու մասին, որոշեց ստեղծել պատվիրակություն հետևյալ կազմով. Ա. Սևարոնյան (նախագահ, ՀՅԳ), Մ. Պապազյանյան (ՀԺԿ) և Հ. Օհանջանյան (ՀՅԳ), վերջինս գտնվում էր Բեռլինում և նրանց պետք է միանար Փարիզում: Միաժամանակ, հաստատվեց պատվիրակության գործունեության հրահանգը¹⁸⁹: Նշենք, որ պատվիրակության հետ Եվրոպա մեկնեցին նաև արևմտահայ ներկայացուցիչներ՝ Վ. Փափազյանը և Տ. Թերզիբաշյանը¹⁹⁰: Ընդհանուր թվով պատվիրակությունը խորհրդականների, քարտուղարների և այլ օժանդակ աշխատակիցների հետ միասին կազմել է 14 անդամ¹⁹¹: Խորհրդի էսէնական և սոց. դեմոկրատական խմբակցությունները շատ էին ուզում ընդգրկվել պատվիրակության կազմում և մասնակցել բանակցություններին¹⁹²: Դրա համար էլ նրանք պահանջում էին ընդլայնել պատվիրակության կազմը: Սակայն հաշվի առնելով, որ սոցիալ-դեմոկրատները և էսէնները իրենց քաղաքական դիրքորոշումներով ու գաղափարական մտտեցումներով, ըստ էության, դեմ էին Հայ Գատին, նրանց ներկայացուցիչների առկայությունը արհեստական խոչընդոտներ ու բարդություններ կարող էր ստեղծել պատվիրակության կանոնավոր ու արդյունավետ աշխատանքի համար, մերժվեց նրանց առաջարկը: Սահմանվեց պատվիրակության իրավասությունների շրջանակը:

¹⁸⁷ «Ժողովուրդ», 25 դեկտեմբերի 1918 թ.:

¹⁸⁸ «Նոր հորիզոն», 1 դեկտեմբերի 1918 թ.:

¹⁸⁹ ՀՀ ՊԿ ՊԱ, ֆ. 200, ց. 1, գ. 105, ք. 80, Հ. Ա. Ավետիսյան, նշվ. աշխ. էջ 328:

¹⁹⁰ «Կայծ» 30 հունվարի 1919 թ.:

¹⁹¹ «Ժողովուրդ», 25 դեկտեմբերի 1918 թ.:

¹⁹² «Հատաջ», Թիֆլիս, 14 հունվարի 1919 թ.:

ՀՀ պատվիրակության խնդիրն էր՝ իրենց առաջարկություններով, խնդրանքներով, ծանոթություններով, հանրային նպաստավոր կարծիք ստեղծելու միջոցով, հաղթած տերությունների ուշադրությունը հրավիրել Հայկական հարցի վրա: Դեկտեմբերի 7-ին պատվիրակությանը հրահանգ տրվեց Փարիզի խաղաղության վեհաժողովում պաշտպանել Սիացյալ և Անկախ Հայաստանի գաղափարը, այսինքն՝ Անդրկովկասի հայկական շրջաններից և տաճկահայ նահանգներից ստեղծել մեծ Հայաստան: Տաճկաստանից պահանջվելու էին հայկական վեց վիլայեթները առանց ոչ հայաբնակ ծայրագավառների ու սեփական ելքով դեպի ծով: Ընդ որում՝ առանձին ծանոթագրությամբ պատվիրակությանը լիազորում էին, որ տարածքային պահանջները ըստ կարիքի կարող են կրճատվել՝ ընդունելով նվազագույնը երեք վիլայեթ (Վան, Բաղեշ և Էրզրում) առանց ոչ հայաբնակ ծայրագավառների: Ի դեպ, դեպի ծով տանող ելքին տրվելու էր ավելի կարևորություն, քան տարածքային մեծությանը¹⁹³: Դաշնակցության որոշ գործիչներ՝ Ռ. Տեր-Սիմասյանը, Հ. Քաջազունին հանդես էին գալիս ավելի համեստ պահանջներով: Վերջինս նույնիսկ գտնում էր, որ պետք չէ դեպի ծով ելք պահանջել, իսկ Կիլիկիայի մասին առհասարակ խոսք չկար: Համեմատության համար ասենք, որ եթե ՀՅԴ հիմնականում գոհանում էր ավելի չափավոր սահմաններով, ապա Ժողովրդականները, որոնք կոալիցիայի մեջ էին Դաշնակցության հետ, պնդում էին ծովից ծով Հայաստանի վրա՝ Կիլիկիայի հետ միասին:

Սիաժամանակ, ՀՀ պատվիրակությանը հանձնարարվեց համագործակցել Պողոս Նուբար փաշայի գլխավորած Արևմտահայ Ազգային պատվիրակության հետ և միասնաբար պաշտպանել Հայոց Դատը:

Դեկտեմբերի 4-ին Գևորգ Ե կաթողիկոսը 1912 թ. իր իսկ կողմից նշանակված Հայ Ազգային պատվիրակության ղեկավար Պողոս Նուբար փաշային հղած նամակով իրազեկ էր պահում վերջինիս, որ ՀՀ կառավարության կողմից մի պատվիրակություն է ուղարկվում Եվրոպա՝ առաջիկա միջազգային կոնգրեսում Հայ Դատը պաշտպանելու և դրան արևմտական լուծում տալու առաքելությամբ: Կաթողիկոսը հորդորում է փաշային երկու պատվիրակություններով միախորհուրդ գործելու և Հայ արդար դատը հաղթական հանգրվանին հասցնելու¹⁹⁴:

1919 թ. հունվարի 18-ին Փարիզում բացվեց խաղաղության վեհաժողովը: Հայաստանի պատվիրակությունը Փարիզ հասավ փետրվարի սկզբին: Հասնելով Փարիզ՝ հենց սկզբից էլ սառնություն ու հակամարտություն առաջացավ ՀՀ և Պողոս Նուբարի պատվիրակությունների միջև, որոնք էլ անկասկած իրենց բացասական ազդեցությունն ունեցան Հայկական հարցի դրական լուծման ընթացքի վրա: Հայկական երկու պատվիրակությունների միջև առկա սառնությունը ուղղակի անդրադարձն էր այն շերտանստվածքի, որ գո-

¹⁹³ ՀՀ ՊԿՊԱ, Ֆ. 200, ց. 1, գ. 183, ք. 7, Ալ. Խատիսյան, ՀՀ ծագումը և զարգացումը, Բեյրութ, 1968, էջ 117:

¹⁹⁴ «Ժողովուրդ», 27 դեկտեմբերի 1918 թ.:

յություն ունէր արևելահայութեան՝ ի դեմս Արարատյան Հանրապետության (ինչպես որ արևմտահայ շատ գործիչներ անվանում էին Հայաստանի Հանրապետությանը) և Կովկասի արևմտահայ գաղթականության ու առհասարակ դրասաշխարհի գաղութահայության միջև: Պետք է նկատել, որ այդ շրջանում մի տեսակ խորթություն ու խուլ դժգոհություն էր գոյացել արևելահայության և արևմտահայության միջև: Վերջիններս, ինչպես հարկն է, մասնակից չէին հանրապետության պետական և հասարակական կյանքին: Արևմտահայերի այն ժամանակվա տրամադրություններին արտահայտող Անդրանիկը, Բաթումի դաշնագրից հետո, հարկադրված իր գործնաստվ և 25 հազար գաղթականներով հեռացել էր 12 հազ. քառ. կիլոմետրանոց հանրապետության սահմաններից և ամրացել Չանգեզուրում՝ օտարոտի /սնբարյացական/ դիրք գրավելով, «թուրքերի ձեռքով ստեղծված» Հայաստանի Հանրապետության նկատմամբ¹⁹⁵: Ի կատարումն Բաթումի հաշտության պայմանագրի 5-րդ հոդվածի՝ 1918 թ. հուլիսի 6-ին Հայկական կորպուսի հրամանատար գեմ.-լեյտենանտ Թ. Նազարբեկյանի հրամանով Անդրանիկն իր ջոկատով հեռացվել էր Հայկական կորպուսի կազմից¹⁹⁶:

Արևմտահայության համար ավելի մեծ հեղինակություն էր Պողոս Նուբարը, քան ՀՀ կառավարությունը: Այս մտայնության մեջ 1919 թ. փետրվարի 6-13-ը Երևանում հրավիրվեց Արևմտահայերի 2-րդ համագումարը, որի պատգամավորները ընտրվել էին գաղթականներից՝ ընդամենը 55 մարդ: Համագումարի օրակարգը հիմնականում նվիրված էր արևմտահայ գաղթականության հետագա ճակատագրի հիմնահարցին: Այդ համագումարում զարգացվեց նաև արևելահայ և արևմտահայ հատվածների միավորմամբ մեկ միասնական պետության ստեղծման գաղափարը: Այնտեղ ընդունվեց քաղաքական բանաձև **Ազատ և Միացյալ Հայաստան** ստեղծելու մասին: Պահանջվում էր նաև դատարանով պատժել Հայոց Մեծ Եղեռնի դահիճներին¹⁹⁷:

Սկզբնական փուլում Հայկական հարցի լուծումը վեհաժողովում կարծես որևէ կասկած չէր հարուցում: Միայն հարցն այն էր, թե քանի նահանգ և ինչ տարածք պետք է միացվեր Հայաստանին: 1919 թ. փետրվարի 12-ին հայկական երկու պատվիրակությունները մշակեցին և ընդունեցին հայկական բաղձանքներն արտահայտող մի հուշագիր (memorandum), որով պահանջվում էր ստեղծել Միացյալ և Անկախ Հայաստան մեկ ամբողջական տարածքի վրա: Արևմտահայ յոթը նահանգները՝ Էրզրումի, Վանի, Բիթլիսի, Դիարբեքի, Խարբերդի, Սվազի և Տրապիզոնի մի մասը՝ դեպի ծով ելքի համար, Կովկասահայաստանը Արցախի հետ միասին և Կիլիկիայի չորս սանջակները, մի խոսքով լայնատարած մի պետություն՝ Սև ծովից մինչև Միջերկրական¹⁹⁸:

¹⁹⁵ Ս. Վրացյան, Հայաստանի Հանրապետություն, Բեյրութ, 1958, էջ 254:

¹⁹⁶ ՀՀ ՊԿՊԱ, Ֆ. 200, ց. 1, գ. 112, ք. 17:

¹⁹⁷ Ս. Վրացյան, նշվ. աշխ., էջ 254-258:

¹⁹⁸ ՀՀ ՊԿՊԱ, Ֆ. 200, ց. 1, գ. 291, ք. 28:

1919 թ. փետրվարի 26-ին Ա. Ահարոնյանը և Պողոս փաշան մասնակցեցին Տասի խորհրդի նիստին և ներկայացրին հայկական պահանջները¹⁹⁹: Հայկական միացյալ պատվիրակությունը կոմ.Ֆերանսին ներկայացրեց նաև վերոհիշյալ նահանգների սահմաններով գծված ապագա Մեծ Հայաստանի համապատասխան քարտեզը²⁰⁰: Հայկական պահանջների հուշագիրը վավերացվեց 1919 թ. փետրվարի 24-ից մինչև ապրիլի 21-ը Փարիզում գումարված Արևմտահայ Ազգային համագումարում²⁰¹:

Խաղաղության վեհաժողովին ներկայացվող հայկական պահանջների փաստաթղթի տակ կար ինչպես Պողոս փաշայի, այնպես էլ Ա. Ահարոնյանի ստորագրությունը: Վերջինս ՀՀ կառավարության կողմից լիազորված էր պաշտպանելու առավելագույնը արևմտահայ 6-7 նահանգներից մինչև նվազագույնը 3-4 նահանգ: Եվ ահա Փարիզում գաղութահայության ճնշմամբ և ընդհանուր ոգևորության պայմաններում նա ստորագրում է դաշնակից տերություններին ներկայացվող ծովից ծով Հայաստան ստեղծելու պահանջների հուշագրի տակ: Ավելացնենք, որ, բացի գաղութահայ ռամկավարներից, Միացյալ Հայաստանի գաղափարը Կիլիկիայի հետ միասին, հետևողականորեն պաշտպանում էին նաև գաղութահայ հնչակյանները²⁰²: Ծովից ծով Հայաստան ստեղծելու պահանջին կողմ էին նաև գրեթե բոլոր արևմտահայ դաշնակցականները²⁰³:

Բացի Միացյալ և մեծ Հայաստան ստեղծելու պահանջից, այդ փաստաթղթում խոսվում էր Հայաստանի մանդատի, նրա Ազգերի լիզա մտնելու, պատերազմից կրած վնասների դիմաց հատուցումներ ստանալու մասին: Վերոհիշյալ պահանջ-առաջարկները հիմնավորելու համար հուշագրում փաստական տեղեկություններ էին բերվում հայերի տեղահանությունների, կոտորածների, բռնագրավումների և նրանց կրած ամեն տեսակ զրկանքների մասին²⁰⁴: Օրինակ, Հայաստանի պատվիրակությունը Փարիզի խաղաղության վեհաժողովին էր ներկայացրել աշխահամարտի տարիներին հայ ժողովրդի կրած նյութական վնասների չափը, որը կազմել էր 14 մլրդ. ֆրանկ²⁰⁵:

Նկատի ունենալով, որ խաղաղության վեհաժողովում Մեծ տերություններից Հայաստանի նկատմամբ առանձնապես մեծ հետաքրքրություն էր հանդես բերում ԱՄՆ-ը, հայկական պատվիրակությունները ցանկություն հայտնեցին Միացյալ, Անկախ և Ազատ Հայաստանի հովանավորությունը (խնամակալությունը, մանդատը) հանձնել ԱՄՆ-ին կամ էլ նոր կազմվելիք Ազգերի լիգային: Մասնավորապես ԱՄՆ-ի նախագահ Վուդրո Վիլսոնը շատ

¹⁹⁹ Ա. Ահարոնյան, *Սարդարապատից մինչև Սեյր և Լոզան, Պոսթըն, 1943, էջ 10*:

²⁰⁰ «Արձագանք», *Եկատերինոդար, 21 մարտի 1919 թ.*:

²⁰¹ ՀՀ ՊԿՊԱ, Ֆ. 200, ց. 1, գ. 35, ք. 149:

²⁰² «Երիտասարդ Հայաստան», 28 օգոստոսի 1920 թ.:

²⁰³ «Ասպարեզ», 28/29 մայիսի 1992 թ.:

²⁰⁴ ՀՀ ՊԿՊԱ, Ֆ. 200, ց. 1, գ. 291, ք. 28, «Վեմ», 1934, թիվ Ե/5, էջ 30:

²⁰⁵ ՀՀ ՊԿՊԱ, Ֆ. 200, ց. 1, գ. 291, ք. 231:

էր հետաքրքրվում Հայաստանով և հույս կար, որ ԱՄՆ-ը կստանձնի Հայաստանի մանդատը: Ա. Մհարոնյանը իր քաղաքական օրագրում 1919 թ. մարտի 28-ի ամսաթվի տակ նշում էր, որ «Ամբողջ Հայաստանը՝ Կիլիկիայից մինչև Կովկաս տրվելու էր Ամերիկայի մանդատի տակ»²⁰⁶: Ապրիլի 24-ի թվակիր մի զեկուցագրի մեջ նույն Ա. Մհարոնյանը հայտնում էր, որ «Ամերիկայի թե՛ հասարակական կարծիքը, և թե՛ նախագահ Վ. Վիլսոնը մեր մանդատի ջերմ պաշտպաններից են: Արգելքը շարունակում է մնալ Մոնրոյի սկզբունքը»²⁰⁷: Այս զեկուցագրից մի քանի օր առաջ՝ ապրիլի 17-ին Վ. Վիլսոնը, ընդունելով հայ պատվիրակներ՝ Մհարոնյանին և Պողոս փաշային, հավաստիացրել էր, որ «Եթե երբևէ Ամերիկան որևէ երկրի մանդատը ընդունելու լինի, ապա դա կլինի անպայման Հայաստանը»²⁰⁸: 1919 թ. մայիսի 14-ին Չորսի խորհուրդը որոշեց Հայաստանի մանդատը տալ ԱՄՆ-ին: Ազգերի լիգան ևս որոշում է Հայաստանի մանդատը հանձնել ԱՄՆ-ին: Ծրագրվում էր, որ մանդատի տևողությունը պետք է լիներ 10 տարի, որը երկկողմ համաձայնությամբ կարող էր երկարաձգվել: Հայաստանի մանդատը ստանձնելու դեպքում՝ ԱՄՆ-ը Հայաստան պետք է ուղարկեր 50 հազար ամերիկյան զինվոր՝ երկիրը պաշտպանելու համար²⁰⁹: Բայց Ա. Մհարոնյանի տեղեկացմամբ՝ 1919 թ. սեպտեմբեր-հոկտեմբերից արդեն ձայներ էին լսվում Ամերիկայի կողմից Հայաստանի մանդատը ստանձնելու կասկածելիության մասին²¹⁰: Օրինակ՝ Մեծ Բրիտանիայի արտգործ. նախարար Լորդ Քերզոնը մի առիթով Պ. Նուբար փաշային հայտնել էր, որ Ամերիկյան Հայաստանի մանդատը չի ընդունի²¹¹: Իրոք, 1920 թ. հունիսի սկզբին Ամերիկյան սենատը՝ 52 ձայնով ընդդեմ 33-ի մերժեց ընդունել Հայաստանի մանդատը²¹²: Ոմանք դա պատճառաբանել են նրանով, որ Հայաստանը Ազգերի լիգայի անդամ չէ²¹³: Մի այլ վավերագրի իրազեկմամբ՝ Հայաստանի մանդատը չընդունվելու գլխավոր դրդապատճառը եղել է զորավար Ջ. Հարբորտի ներկայացրած զեկուցագիրը, որում պարունակած նյութը և տրված եզրակացությունը չեն եղել հօգուտ մանդատի²¹⁴: Պետք է նկատի ունենալ, որ Հայաստանի մանդատը ընդունելու դեպքում՝ ԱՄՆ-ը հինգ տարում պիտի ծախսեր 757 մլն. դոլար²¹⁵:

Հայկական հարցի կապակցությամբ էական է հայ քաղաքական կուսակցությունների արտահայտած դիրքորոշումները Հայաստանի մանդատի և նրա քաղաքական կողմնորոշման հարցերում: Հայ քաղաքական կուսակ-

²⁰⁶ Ա. Մհարոնյան, *Սարդարապատից մինչև Սեւր և Լոզան, Պոսթըն, 1943, էջ 19*:

²⁰⁷ ՀՀ ՊԿՊԱ, ֆ. 200, ց. 1, գ. 35, թ. 118:

²⁰⁸ Նոյն տեղում:

²⁰⁹ ՀՀ ՊԿՊԱ, ֆ. 200, ց. 1, գ. 548, թ. 119, նաև «Աշխատավոր» 30 ապրիլի 1920 թ.:

²¹⁰ Ա. Մհարոնյան, *նշվ. աշխ.*, էջ 29:

²¹¹ Ա. Մհարոնյան, *նշվ. աշխ.*, էջ 31:

²¹² ՀՀ ՊԿՊԱ, ֆ. 200, ց. 1, գ. 576, թ. 133:

²¹³ Նոյն տեղում, թ. 176:

²¹⁴ Նոյն տեղում, ց. 2, գ. 7, թ. 1:

²¹⁵ Հայաստանը միջազգային դիվ... փաստաթղթերում, Ե, 1972, էջ 611:

ցությունների մեծամասնությունը՝ ՀՅԳ, ՀԺԿ, Հայ ռամկավարները, «սպեցիֆիկները» այդ ժամանակ արտահայտվում էին Հայաստանի արևմտյան կողմնորոշման (արևելման) օգտին, իսկ սոցիալ-դեմոկրատները և էսէռները ապավինում էին միայն ռուսական հովանավորությանը:

Այսպիսով, Հայկական հարցում ՀՀ պատվիրակությունը գործել է նախարարների խորհրդի տված հրահանգի շրջանակներում: Սակայն նա, հայ ազգային պատվիրակության հետ միասին, պաշտպանել է Միացյալ և Անկախ Հայաստանի ստեղծման առավելագույն պահանջը:

ԳԼՈՒԽ ԵՐՐՈՐԳ- ԱՌԱՋԻՆ ԽՈՐՀՐԳԱՐԱՆԻ ՕՐԵՆՍԳՐԱԿԱՆ ԳՈՐԾՈՒՆԵՈՒԹՅՈՒՆԸ

1. Օրինաստեղծ աշխատանքը

Ինչպես ընդունված է ամբողջ աշխարհում, խորհրդարանների գործունեության հիմնական առանցքը, ինչին որ կոչված են դրանք, հանդիսանում է օրինաստեղծ աշխատանքը, անհրաժեշտ իրավական դաշտի ստեղծումը, որը և պետք է ապահովի տվյալ երկրի բնականոն կենսագործունեությունը: Խորհրդարանը կյանքի, ժամանակի պահանջների թելադրանքով ստեղծում է ինչպես իր սեփական մշակած օրենքները, այնպես էլ ընդօրինակում ու հարմարեցնում է դրաի շատ օրենքներ:

Անկախության հռչակումից հետո, չնայած հանրապետության տնտեսական և քաղաքական դժնդակ պայմաններին, այնուամենայնիվ, նորակազմ խորհրդարանն ու կառավարությունը առանձին ճիգեր գործադրեցին եվրոպական ժողովրդավարական երկրների օրինակով կազմակերպելու և քիչ թե շատ բնականոն հունի մեջ դնելու Հայաստանի պետական և հասարակական կյանքը: Անհրաժեշտ էր երկրում հաստատել իրավական նորմերից բխող կարգուկանոն: Սակայն այդ ճանապարհին առկա էին մի շարք օբյեկտիվ և սուբյեկտիվ, նույնիսկ հոգեբանական խոչընդոտներ ու դժվարություններ: Էական դժվարություններից մեկն այն անիշխանական հոգեբանությունն էր, որ տիրում էր Հայաստանի բնակչության մի սովոր հաստվածի մեջ: Եվ դա զարմանալի չէր: «Երկարատև պատերազմը,- գրում էր իրավաբան, խորհրդարանի պատգամավոր Վարդգես Ահարոնյանը իր հուշերից մեկում,- սովը, ռուս պետականության փլուզումը, Հայաստանի նեղ սահմանների վրա կախված արտաքին վտանգը՝ այս բոլորը հիմնիվեր խախտել էր բնակչության մեջ հարգանքը դեպի օրենքը»¹:

¹ Վ. Ահարոնյան, Գատարանը Հայաստանի Հանրապետության մեջ /«Հայրենիք», 1939, թիվ 7, էջ 127/:

1917-1918 թթ. Ռուսական կայսրության փլուզման հետևանքով ինչպես Անդրկովկասում, այնպես էլ Հայաստանում պետաիրավական նախկին հիմնարկները սնծապես քայքայվել էին: Քանի որ ՀՀ որպես պետական միավոր անջատվել էր փաստորեն նախկին Ռուսական կայսրությունից և համարվում էր նրա իրավահաջորդը (քաղաքացիական), ուստի՝ այստեղ ավանդույթի ուժով ու ինքնիշխանությամբ դեռևս պետք է զգացվեր նախկին շատ օրենքների պահպանման անհրաժեշտությունը: Այս գիտակցությամբ էլ, թեև որոշ ուշացումով, 1918 թ. դեկտեմբերի 6-ին Հայաստանի խորհուրդն իր 42-րդ նիստում, գործնականում, առանց քննարկման, հաստատեց օրենսդրական հանձնաժողովի ներկայացրած օրինագիծն այն մասին, որ «Հայաստանի Հանրապետության տարածքի վրա ժամանակավորապես գործադրվում են նախկին ռուսական կայսրության, ժամանակավոր կառավարության, Անդրկովկասի կոմիսարիատի և Սեյմի օրենքները՝ Հայաստանի խորհրդի փոփոխումներով ու լրացումներով»²: Այսպես՝ մի քանի օր անց 1918 թ. դեկտեմբերի 13-ի խորհրդի հաստատած «Զինվորական աստիճանաբաշխման մասին» օրենքով ՀՀ-ում ժամանակավորապես պահպանվեցին սպայական և դասային այն աստիճանները, որ գոյություն ունեին ռուսական բանակում: Զինվորական աստիճանաբաշխման իրավունքը վերապահվեց կառավարությանը³:

Խորհրդարանի և կառավարության առջև ծառայած անհետաձգելի խնդիրներից էր դատական իշխանության ձևավորումը, դրա հայացումը և ժողովրդավարացումը: Դեկտեմբերի 6-ին Հայաստանի խորհուրդը հաստատեց արդարադատությանը վերաբերող ևս մի քանի օրենքներ: Հայաստանի նորակազմ հանրապետությունում շարունակում էին գործել ռուսական տիրապետությունից ժառանգություն մնացած երկու կարգի դատարաններ՝ քաղաքացիական և զինվորական, չհաշված, իհարկե, ժամանակավորները: Իր հերթին՝ քաղաքացիական դատարանները երկու կարգի էին՝ **սպորիկ** և **վերիկ**: Ստորին կամ Հաշտարար դատարանը իրավասու էր լուծելու քրեական փոքր գործեր՝ առավելագույնը մինչև վեց ամսվա բանտարկության կամ 500 ռուբլու տուգանքի պատժաչափով: Իսկ վերին կամ Շրջանային դատարանը կոչված էր լուծելու ծանր հանցագործությունները և քաղաքացիական խոշոր հայցերը: Զինվորականների գործերով զբաղվում էր զինվորական դատարանը: Այսպիսին էր վիճակը ցարիզմի օրոք, որը գրեթե նույնությամբ պահպանվեց ՀՀ-ում: Դեկտեմբերի 6-ին հաստատվեց արդարադատության նախարար Ս. Հարությունյանի (ՀԺԿ) կազմած «Դատական հիմնարկությունների մասին» օրինագիծը, որով ռուսական օրենքների հիմունքներով Հայաստանում մտցվում էին հետևյալ դատական ատյանները.

² ՀՀ ՊԿՊԱ, ֆ. 200, ց. 1, գ. 86, ք. 15, «Հայաստանի խորհրդի հաստատած օրենքները 1918 - 1919 թթ.», մաս 1, Երևան, 1919, էջ 22, «Ժողովուրդ», 13 դեկտեմբերի 1918 թ., «Կայծ», 26 դեկտեմբերի 1918 թ.:

³ ՀՀ ՊԿՊԱ, ֆ. 200, ց. 1, գ. 86, քթ. 17-18, «Զանգ», 5 հունվարի 1919 թ.:

1) Հաշտարար դատարան՝ հանրապետությունում կար ընդամենը 25 այդպիսի դատարան:

2) Երևանի շրջանային դատարան՝ քաղաքացիական և վարչական բաժանմունքներով⁴:

3) Գատական վճռաբեկ պալատ և գերագույն ատյան՝ Սենատ՝ իրենց երկու համապատասխան բաժանմունքներով՝ քաղաքացիական և քրեական⁵:

4) Երդվյալ ատենակալների դատարան, որը գործելու էր Երևանի շրջանային դատարանին կից՝ որոշ քրեական գործերի համար⁶:

Ավելի ուշ 1919 թ. ապրիլի 3-ի հաստատված օրենքով Երևանի շրջանային դատարանին կից հիմնվեց նաև կարևորագույն գործերի գծով քննիչի պաշտոն⁷: Ահա այսպիսին էր ՀՀ դատաստանական ատյանների համակարգը: Այս դատարաններից գատ՝ ժամանակի ընթացքում ստեղծվեցին նաև այլ դատարաններ՝ արտակարգ և ռազմադաշտային, որոնք, սակայն, հիմնվում էին հանգամանքների ստիպողական թելադրանքով և ունեին ժամանակավոր բնույթ:

Չնայած այն բանին, որ արդարադատության նախարար Ս. Հարությունյանը գտնում էր, որ դատական ատյանների բարձր պաշտոնյաներին պետք է նշանակի գործադիր իշխանությունը՝ կառավարությունը, բայց և այնպես Հայաստանի խորհուրդը ձայների մեծամասնությամբ որոշում է, որ դրանց ընտրի (նշանակի) խորհրդարանը⁸: Բացի այդ՝ խորհրդարանը 27 կողմով որոշում է, որ երդվյալ ատենակալներ կարող են լինել միայն տղամարդիկ, քանզի հայ ամոթխած և մահապետական սովորություններով ապրող կիներ դեռևս պատրաստ չէ մնան պաշտոնավարության համար (արդարադատ վճիռ կայացնելու)⁹:

Ավելի վաղ՝ խորհրդարանի հոկտեմբերի 28-ի թիվ 27 օրենքով սահմանվել էր, որ, փոփոխություններ կատարելով քրեական, զինվորական և քաղաքացիական դատավարության օրենքների (օրենսգրքի) համապատասխան հոդվածներում, «Նորին կայսերական մեծության» փոխարեն այսուհետ դա-

⁴ 1920 թ. գարնանը շրջանային դատարաններ հիմնվեցին Ալեքսանդրապոլում և Կարսում (*Տես*՝ «ՀՀ օրենքների հավաքածու 1920 թ.», էջ 53):

⁵ Նախկինում Հայաստանի տարածքում այսպիսի բարձրագույն դատական ատյաններ չկային: Գատական ատյանը /*Судебная палата*/ գտնվում էր փոխարքայության մայրաքաղաք Թիֆլիսում, իսկ Սենատը՝ կայսրության մայրաքաղաք Պետերբուրգում: Այժմ, երբ Հայաստանը դարձել էր ինքնուրույն պետականություն, անհրաժեշտ էր, որ նա ունենար իր սեփական բարձրագույն դատական ատյանները:

⁶ «Ժողովուրդ», 13 եւ 29 դեկտեմբերի 1918 թ., «Հայրենիք», 1939, թիվ 7, էջ 129-130, Ս. Վրացյան, նշվ. աշխ., էջ 524:

⁷ «Հայաստանի խորհրդի հաստատած օրենքները (1918-1919 թթ.), մաս 1, Երևան, 1919, էջ 56:

⁸ «Ժողովուրդ», 18 դեկտեմբերի 1918 թ.:

⁹ Նույն տեղում:

տավճիռները կայացվում ու հրապարակվում են. «Հանուն Հայաստանի Հանրապետության»¹⁰:

Հայաստանում դատական բարեփոխումների առաջնահերթ խնդիրներից էր դատավարության հայացումը, դատական օրենսգրքերի հայերեն թարգմանումը, դատավարության և դատավճռի հայերեն կայացումը: Հայացման գործընթացը համեմատաբար հեշտ կատարվեց հաշտարար դատարաններում և ավելի դժվար՝ շրջանային և զինվորականում:

Երկրի Ժողովրդավարացման և իրավակարգի հաստատման ճանապարհին էական քայլ պետք է համարել այն, որ 1918 թ. սեպտեմբերի 17-ին Ն. Գ. նախարար Ա. Մանուկյանի կողմից գավառական բոլոր կոմիսարներին իջեցված շրջաբերականով դադարեցվեցին և ուժը կորցրած համարվեցին Երևանի նախկին Ազգային խորհրդի կողմից մասնավոր և պաշտոնատար անձանց անունով տրված արտակարգ լիազորությունները, վկայականները, վավերագրերը և այլ թղթերը¹¹: Այսուհետ այդ անձնավորությունները կարող էին գործել միայն ընդհանուր հիմունքներով՝ իրենց վերապահված օրենքի շրջանակներում:

Հանրապետությունում օրինականությունը վերականգնելու և կարգուկանոն հաստատելու նպատակով խորհրդի առաջին նիստերից մեկում Ն. Գ. նախարար Արամի ներկայացմամբ քննության է առնվում «Անօրինական զենք կրողների զինաթափման, մասնավոր զենքերի ու զինամթերքների առգրավման ու պետականացման մասին» օրինագիծը: Հիմնավորելով այս օրինագծի անհրաժեշտությունն ու հրատապությունը՝ Ա. Մանուկյանը տեղեկացնում էր, որ հանրապետությունում հաշվվում է մոտ 60 հազարից մինչև 150 հազար հատ զենք¹²: Մարդկանց ձեռքում նման քանակությամբ զենքի առկայությունը առաջ էր բերում ներքին անկայունություն, ազգամիջյան արյունահեղություններ: Ամենուրեք կարելի էր հանդիպել մեծ ու փոքր բազմապիսի զինված խմբերի: Մարդկանց միջև սովորական վեճերը հաճախ ուղեկցվում էին արյունահեղությամբ ու սպանություններով: Օրինակ՝ Ախտալի շրջանում մեկ գառան պատճառով կոտորվել էին երեք ընտանիք: Տեղում կարգը վերականգնելու համար շրջան էր բերվել մեկ գումարտակ զորք¹³:

Բռնագրավելով անօրինական պահվող զենքը՝ կառավարությունը երկակի հույսեր էր տաժում. մի կողմից ամրապնդել երկրի ներքին կայունությունը, իսկ մյուս կողմից մասնավոր անձանցից բռնագրավված զենքով զինել նորաստեղծ հայկական բանակը: Ժողովրդի զինաթափման հետ միաժամանակ երկրում պետք է ուժեղացվեր միլիցիայի կազմը, իսկ հանրապետության սահմանները պետք է ամուր պաշտպանվեին զորքի կողմից:

¹⁰ «Հայաստանի խորհրդի հաստատած օրենքները 1918-1919 թթ.», մաս 1, Երևան, 1919, էջ 16-17:

¹¹ «Ժողովուրդ», 19 սեպտեմբերի 1918 թ.:

¹² «Ժողովուրդ», 29 օգոստոսի 1918 թ.:

¹³ Նույն տեղում:

Նախարարության ներկայացրած օրինագիծը հողվածական քննարկման ենթարկվեց խորհրդարանում: Բնակչության ձեռքից մասնավոր գեների առգրավման ու պետականացման խնդիրը տարակարծություններ ու բանավեճ առաջացրեց խորհրդարանում: Ներկայացված օրինագծին կտրականապես դեմ արտահայտվեցին սոցիալ-դեմոկրատները, մասամբ նաև ժողովրդականները¹⁴: Պատգամավոր Ա. Մելիքյանը, օրինակ, գտնում էր, որ «ամեն քաղաքացի իրավունք ունի գեներ ունենալ և պաշտպանել իր հեղափոխական իրավունքները»¹⁵: Որքան էլ տարօրինակ հնչի՝ օրենքի և օրինականության մասին շաղակրատող սոցիալ-դեմոկրատները հարցադրում էին անում՝ «ինչպե՞ս թե ժողովրդին զինաթափ անել»¹⁶: Օրինագծի քննարկումը ընթացավ երեք նիստով, կատարվեց երեք հողվածական ընթերցում և որոշ ուղղումներով օգոստոսի 29-ի (թիվ 11-րդ) նիստում այն ընդունվեց ձայների մեծամասնությամբ (կողմ՝ 20, դեմ՝ 9)¹⁷:

Հիմք ընդունելով այս օրենքը՝ ՆԳ նախարարի կարգադրությամբ յուրաքանչյուր շրջանում կազմվելու էին հատուկ հանձնախմբեր՝ գրավվելիք գեներն ու զինամթերքները ստանալու և ցուցակագրելու համար: Ձեռքը կանովին չհանձնելու դեպքում գործադրվելու էին հարկադրական միջոցներ: Ձինաթափման ժամանակ արգելվում էր խուզարկություններ կատարել: Բռնագրավման ենթակա չէին միայն որսորդական փամփշտակալ չունեցող հրացանները և սառը տեսակի գեները: Համաձայն օրենքի՝ պարտազանցները վարչական կարգով ենթարկվելու էին բանտարկության մինչև երեք ամիս կամ տուգանքի մինչև 3000 ռուբլու չափով¹⁸:

Ի լրումն այս օրենքի՝ 1919 թ. հունվարի 13-ին որոշում է կայացվում, որպես պետական գույք, գրավել, անկախ նրանց ձեռքբերման եղանակներից՝ թրերը, բեբուֆները, ինչպես նաև մոսին և լեբելի հրացանների սվինները»¹⁹: Մակայն առաջ գնալով ասեմք, որ այս օրենքը հետևողականորեն չկենսագործվեց: Հետագայում էլ մեծ քանակությամբ անօրինական գեներ մնաց շատ հանցավոր տարրերի ձեռքում, որոնք էլ միջոց էին դառնում զանազան քրեածին ու անիշխանական գործողությունների համար:

Խորհրդարանի իրավասության մեջ էր մտնում բանտարկյալներին ներում շնորհելը կամ նրանց պատիժը մեղմացնելը²⁰: Խորհրդարանը ձայների մեծամասնությամբ մերժեց «Մահապատժի մասին» օրինագիծը, որի գոր-

¹⁴ «Ժողովուրդ», 2 սեպտեմբերի 1818 թ.:

¹⁵ «Ժողովուրդ», 29 օգոստոսի 1918 թ.:

¹⁶ «Վեմ», 1934, թիվ Ը, էջ 90:

¹⁷ «Ժողովուրդ», 5 սեպտեմբերի 1918 թ.:

¹⁸ Հայաստանի խորհրդի հաստատած օրենքները 1918-1919թթ., մաս 1, Երևան, 1919, էջ 2-4, «Ժողովուրդ», 12 սեպտեմբերի 1918թ.:

¹⁹ ՀՀ ՊԿՊԱ, Ֆ. 200, ց. 1, գ. 86, թ. 22, «Հայաստանի խորհրդի հաստատած օրենքները 1918-1919 թթ.», մաս 1, Երևան, 1919, էջ 42:

²⁰ «Հայաստանի խորհրդի հաստատած օրենքները 1918-1919 թթ.», մաս 1, Երևան, 1919, էջ 57-58:

ծաղրուճը նման արտակարգ իրապայմաններում հավանաբար անհրաժեշտությամբ էր: Դեմ քվեարկողների թվում ձախերի հետ միասին եղել են նաև ժողովրդականները: Տեղեկացնենք, որ վերջիններիս 1917 թ. սեպտեմբերին ընդունած առաջին ծրագրում կետ կար այն մասին, որ մահապատիժը դատական պրակտիկայից անպայման և ընդմիջտ պետք է հանվի²¹: Ի դեպ՝ համեմատության համար ասենք, որ Վրաց ժամանակավոր խորհրդարանը, ուր մեծամասնություն էին կազմում սոցիալիստները, ընդունել էր մահապատիժի մասին օրինագիծը²²: Նույնը իր ժամանակին մտցրել էր նաև Ա. Կերենսկու գլխավորած ժամանակավոր կառավարությունը Ռուսաստանում: Իսկ Հայաստանում համանման օրենքի գործադրումը մերժվեց: Չախակողմյան խմբակցությունները այս օրինագիծը մերժելիս՝ ունեին իրենց քաղաքական նկատառումները, իսկ աջակողմյան ժողովրդականները ելնում էին զուտ հումանիստական դիրքերից:

Ծանր հանցանքների համար մահապատիժ մտցնելը ուներ սկզբունքային նշանակություն: Օրինագիծը, օրինակ, մահապատիժ էր նախատեսում ՀՀ պետական դավաճանության, զոյություն ունեցող պետական կարգը բռնի ուժի միջոցով փոփոխման, բացահայտ ապստամբության, ռազմադաշտը լքելու և թշնամու մոտ փախչելու և այլ հանցանքների դեպքում: Հասկանալի է, որ ձախակողմյան խմբակցությունները պետք է դեմ քվեարկեին, որպեսզի իրենք կառավարող քաղաքական ուժի ու իշխանությունների դեմ պայքարի իրավական լայն ու անվտանգ դաշտ ունենան: Այնուամենայնիվ, 1919 թ. հուլիսի 24-ին ՀՀ կառավարության որոշմամբ ընդունվեց «Մահապատիժի մասին» օրենքը, որի համաձայն երկրում որպես պատժի առավելագույն չափ՝ մտցվեց մահապատիժ՝ գնդակահարումով²³: Նույն թվականի երկրորդ կեսից, երբ շրջանառության մեջ մտավ հայկական դրամը՝ պետական դրամանիշը, կեղծողներին համար ևս սահմանվեց մահապատիժ²⁴:

* * *

Խորհրդարանի օրենսդրական աշխատանքի կարևոր ոլորտներից էին տնտեսական ու մասնավորապես մենաշնորհային քաղաքականության խնդիրները:

1918 թ. սեպտեմբերի 11-ին Հայաստանի խորհուրդն ընդունեց օրենք «Բամբակի մենավաճառության մասին»²⁵: Համաձայն օրենքի՝ ՀՀ տարածքի վրա բամբակի առևտուրը հայտարարվում էր պետական մենաշնորհի (մոնոպոլիա): Բամբակատերը պարտավոր էր յոթ օրվա ընթացքում՝ ակցիզային հարկերի վարչությանը տեղեկություն հայտնել իր բամբակի քանակության և տեղի մասին: Օրենքը խախտողներին սպառնում էր տուգանք մինչև 15 հա-

²¹ «Ժողովուրդ», 26 սեպտեմբերի 1918 թ.:

²² «Աշխատանքի դրոշակ», 5 հուլիսի 1918 թ.:

²³ ՊԿՊԱ, Ֆ. 206, ց. 1, գ. 29, թ. 26:

²⁴ ՀՀ ՊԿՊԱ, Ֆ. 198, ց. 1, գ. 58, թ. 114:

²⁵ ՀՀ ՊԿՊԱ, Ֆ. 198, ց. 1 գ. 15, թ. 28, Ֆ. 200, ց. 1 գ. 86, թ. 3:

գար ռուրլի, բամբակի բռնագրավում և դատաստանական կարգով բանտարկություն մինչև վեց ամիս ժամկետով: Նկատենք, որ բանտարկությունները կատարվում էին վարչական կարգով Ն. Գ. նախարարության կողմից: Օրենքի ընդունման օրվանից արգելվում էր բամբակի արտահանությունը Հայաստանի սահմաններից²⁶:

Ի լրումն բամբակի մենաշնորհի մասին 1918 թ. սեպտեմբերի 11-ի օրենքի՝ դրա վերաբերյալ հետագայում ընդունվեցին մի քանի լրացուցիչ օրենքներ՝ 1918 թ. նոյեմբերի 25-ի, դեկտեմբերի 3-ի, 1919 թ. փետրվարի 7-ի և այլն²⁷: Մասնավորապես նոյեմբերի 25-ի՝ բամբակի մենաշնորհի մասին լրացուցիչ օրենքով սահմանվում էր, որ բոլոր բամբակատերերը պարտավոր են մինչև 1918 թ. դեկտեմբերի 31-ը պետական մենավաճառքի պահեստներին հանձնել իրենց մոտ եղած ամբողջ բամբակը, հակառակ դեպքում՝ այն կդիտվի ապօրինի, թաքցված և հարքունիս կգրավվի: Ընդամենի ֆինանսների նախարարությանը իրավունք էր վերապահվում թաքցված բամբակը հայտնաբերողներին վարձատրել այդ բամբակի արժեքի երկու երրորդի չափով²⁸:

Բամբակի մենաշնորհային գնի վերաբերյալ խորհրդարանում սուր բանավեճեր (դեբատներ) ընթացան խմբակցությունների միջև: ՀՅԳ և ՀԺԿ խմբակցությունները միասնաբար առաջարկում էին բամբակի հումքը բամբակատերերից գնել փութը 103 ռուբլով: Մինչդեռ, «ձախերը» մասնավորապես սոց.-դեմ. խմբակցությունը, առարկելով «աջակողմյանի» և «կենտրոնի» այդ «բուրժուական», «կուլակային» առաջարկին, պահանջում էին բամբակի մենաշնորհային գնման գները իջեցնել՝ փութը մինչև 30 ռուբլի, այսինքն՝ ավելի քան երեք անգամ²⁹: Ինքնին հասկանալի է, որ նման գների դեպքում բամբակատերը իր հումքը կը թաքցներ և ոչ մի կերպ չէր վաճառի պետությանը, էլ չենք ասում, որ նա շահագրգռված չէր լինի հաջորդ տարի բամբակամշակությամբ զբաղվել: Այնուամենայնիվ, ձախերի «ճնշման» տակ կողմերը զալիս են փոխզիջումնային համաձայնության. բամբակի փթի մենաշնորհային գինը սահմանվում է՝ մաքրած և մամլածին 49 ռ. 50 կոպ., ոչ մամլածինը՝ 43 ռ. 50 կոպ. և հունդավորինը՝ 25 ռ.³⁰: Միաժամանակ, օրենքը պահանջում էր, որ բամբակատերը իր տարաներով, պարկերով և փոխադրամիջոցներով պետք է հումքը անվճար փոխադրեր պետական պահեստներ: «Սպեցիֆիկ» Բ. Իշխանյանի գլխավորած վիճակագրական բաժանմունքի ներկայացրած տվյալներով իշխանությունների ձեռնարկած միջոցառումների հետևանքով, ընդամենը չորս ամսում (1919 թ. նոյեմբեր -1920 թ. փետրվար) Հայաստանից

²⁶ «Հայաստանի խորհրդի հաստատած օրենքները 1918-1919 թթ.», մաս 1, Երևան 1919, էջ 4-5, ՀՀ ՊԿՊԱ, Ֆ. 200, ց. 1, գ. 86, թ. 4:

²⁷ ՀՀ ՊԿՊԱ, Ֆ. 202, ց. 1, գ. 41, թ. 16:

²⁸ ՀՀ ՊԿՊԱ, Ֆ. 202, ց. 1, գ. 333, թ. 26:

²⁹ «Կայծ», 24 նոյեմբերի 1918 թ.:

³⁰ ՀՀ ՊԿՊԱ, Ֆ. 202, ց. 1, գ. 333, թ. 26, «Հայաստանի խորհրդի հաստատած օրենքները 1918-1919 թթ.», մաս 1, Երևան, 1919, էջ 26:

արտահանվել է 49929 փութ բամբակ³¹: Բամբակի մենաշնորհ մտցնելը հիմնավորվում էր տարադրամ ձեռք բերելու անհրաժեշտությամբ, մի արժույթ, առանց որի հնարավոր չէր ՀՀ արտասահմանյան հիմնարկությունները պահել, ինչպես նաև երկրի համար այնքան անհրաժեշտ իրեր ու ապրանքներ ներմուծել: Մյուս կողմից բամբակի խնդիրը ինչ-որ տեղ նաև Հայաստանի թեթև արդյունաբերության զարգացման հարց էր³²: Պետք է ասել, որ բամբակի առևտրի մենաշնորհի վերաբերյալ վերահսկողությունը պահպանվեց մինչև վերջ՝ մինչև հանրապետության անկումը³³: Դա երևում է նրանից, որ թեև Հայաստանի երկրորդ գումարման խորհրդարանը 1920 թ. մարտի 22-ին ընդունել էր նոր օրենք, համաձայն որի բամբակի մենաշնորհի օրենքը չպետք է տարածվեր 1920 թ. բամբակի բերքի վրա, այսինքն՝ փորձ արվեց կասեցնել մենաշնորհը³⁴, սակայն 1920 թ. օգոստոսի 6-ին Բյուրո-կառավարությունը դարձյալ օրենք ընդունեց վերականգնել մենաշնորհը: Այնտեղ ասվում էր. «Բամբակի մենաշնորհի գործերի վերաբերյալ վերականգնել նախկին կոնտրոլի դրությունը»³⁵: Մենաշնորհի իրականացման համար սեպտեմբերի 15-ին բացվեց 20 մլն. ռուբլու վարկ³⁶:

Հարկ է ընդգծել, որ տնտեսական առումով բամբակի պետական մենաշնորհը բացասաբար էր անդրադառնում բամբակագործության զարգացման վրա, որովհետև պետական մենաշնորհի վաճառքի պայմաններում խթան, շահագրգռվածություն չկար դրա ընդարձակման և ինտենսիվացման համար: Իր ժամանակին Աշ. Հովհաննիսյանը, տալով բամբակի պետական մենաշնորհի քաղաքականության գնահատականը, նշում էր, որ այն արմատախիլ էր անում գյուղատնտեսության այդ ճյուղը, ցամաքեցնում իր իսկ վայրուտային ֆոնդի աղբյուրները³⁷: Դրամի արագ արժեզրկման պայմաններում շատ գյուղացիական տնտեսություններ գերադասում էին բամբակի փութը 49 ռ. 50 կոպեկով մթերելու փոխարեն, այն օգտագործել որպես անասնակեր³⁸: Տվյալներ կան այն մասին, որ կառավարության մենաշնորհային քաղաքականության պատճառով հազարավոր փթերով բամբակ գյուղացին կամ վերավաճառող կապալառուն նման ցածր գներով պարզապես չէին մթերում պետությանը, որովհետև, եթե ֆինանսների նախարարության սահմանված գներով բամբակը իրենց պահեստներից փոխադրեին պետական պահեստարանները, ապա դրա արդյունքում հազիվ փոխադրման ծախսերը կհանեին: Ուստի և բամբակ-

³¹ ՀՀ ՊԿՊԱ, Ֆ. 200, ց. 1, գ. 427, ք. 117:

³² «Ժողովուրդ», 11 դեկտեմբերի 1918 թ.:

³³ ՀՀ ՊԿՊԱ, Ֆ. 200, ց. 1, գ. 86, ք. 3:

³⁴ ՀՀ ՊԿՊԱ, Ֆ. 198, ց. 1, գ. 58, ք. 9:

³⁵ Նույն տեղում, ք. 60:

³⁶ Նույն տեղում, ք. 190:

³⁷ Ա. Հովհաննիսյան, Հայաստանի հեղափոխության հուլիսն ու հոկտեմբերը, Երևան, 1923, էջ 6:

³⁸ «Ժողովուրդ», 4 մարտի 1920 թ.:

կի մի զգալի մասը մնում էր տեղում և փտում³⁹: Այս ամենի հետևանքով գնալով կրճատվում էին բամբակի ցանքատարածությունները, ուստի և՛ ստացվող հումքը: Այսպես, օրինակ, եթե 1914 թ. պատերազմից առաջ Հայաստանի սահմաններում տարեկան ցանվում էր 35-ից մինչև 40 հազար դեյսյատին և ուրից ստացվում էր տարեկան միջին հաշվով 500-ից մինչև 600 հազար փութ մաքուր բամբակ, ապա 1920 թ. ցանվել էր ընդամենը 1500 դեյսյատին՝ Սուրմալուի և Էջմիածնի գավառներում⁴⁰:

Բամբակից գատ՝ մենավաճառի քաղաքականություն էր իրականացվում այլ մթերատեսակների վրա: 1918 թ. հոկտեմբերի 1-ի նիստում ընդունված թիվ 16 օրենքով ՀՀ մտցվեց գետնախնձորի մենաշնորհ: 0,5 մլն. փութ գետնախնձորի գնման համար բաց թողնվեց 13,4 մլն. ռ. վարկ: Արգելվեց գետնախնձորի ազատ առևտուրը և դրա արտահանումը հանրապետության սահմաններից դուրս: Այն խախտողները ենթարկվում էին դատաստանական կարգով բանտարկության մինչև 3 ամիս կամ տուգանքի մինչև 3000 ռուբլի⁴¹: Նույնատիպ պատժի էին ենթարկվում կարտոֆիլի պետական գնման օրենքը խախտողները: Պետությանը անհրաժեշտ էր 0,5 մլն. փութ կարտոֆիլ: Կառավարությունը փութը գնում էր 20 ռուբլով⁴²:

Մի այլ նիստում խորհուրդը օրինագիծ է ընդունում Դիլիջանի անտառների խոզակաղինն ու աճարի պտուղը հավաքելու՝ առաջինն՝ անասուններին կերակրելու, իսկ երկրորդը՝ ճարպ պատրաստելու համար⁴³: Հանձնարարվեց Ն. Գ. նախարարության պարենավորման բաժանմունքին՝ Դիլիջանի շրջանի անտառներում 50 հազար փութ խոզակաղին և նույնքան /50 հազ. փութ/ էլ աճարի սերմ հավաքելու, որի համար բաց թողնվեց 650 հազ. ռուբլի⁴⁴: Մտցվեց նաև խաղողի մենաշնորհ: Խաղողի ստիպողական գնումները այգետերերից նպատակ էին հետապնդում, հանրապետությունում շաքարի սղոթյան պատճառով բանակի և այլ կարիքների համար դոշաբ պատրաստել: Խաղողի գնման պետական գին էր սահմանվել փութը 40 ռուբլի⁴⁵: Խորհրդի ընդունված մեկ այլ օրենքով կրկնապատիկ բարձրացվեցին ոգելից խմիչքների և խաղողի գինիների ակցիզային հարկերը⁴⁶:

1918 թ. երկրորդ կեսին հանրապետութիւնում շատ սուր էր կանգնած աղի պրոբլեմը: Բանն այն էր, որ Հայաստանի բոլոր աղահանքերը (Կաղզվանի,

³⁹ «Հայաստանի ծայն», 9 նոյեմբերի 1919 թ.:

⁴⁰ ՀՀ ՊԿՊԱ, Ֆ. 200, ց. 1, գ. 511, թ. 114:

⁴¹ ՀՀ ՊԿՊԱ, Ֆ. 199, ց. 1, գ. 4, թ. 3, Ֆ. 200, ց. 1, գ. 86, թ. 7:

⁴² «Ժողովուրդ», 6 հոկտեմբերի 1918թ.:

⁴³ «Կառավարության լրաբեր», 15 հոկտեմբերի 1918 թ.:

⁴⁴ ՀՀ ՊԿՊԱ, Ֆ. 200, ց. 1, գ. 86, թ. 11:

⁴⁵ «Հայաստանի կոռպերացիա», 15 փետրվարի 1919 թ., էջ 117:

⁴⁶ «Հայաստանի խորհրդի հաստատված օրենքները 1918-1919 թթ.» մաս 1, Երևան, 1919, էջ 8-9:

Կողքի Նախիջևանի և այլն) գտնվում էին թշնամու տիրապետության տակ: Այդ իսկ պատճառով օրակարգ մտցվեց նաև աղի մենաշնորհի հարցը⁴⁷:

Խորհրդարանում և նրա պատերից դուրս մենաշնորհի ու բռնագրավումների քաղաքականությանը առանձնապես տոն էին տալիս սոցիալ-դեմոկրատները⁴⁸: Օրինակ, նրանք պահանջում էին ոչ միայն մտցնել բամբակի մենաշնորհ, այլև բռնագրավել այն:

Հայաստանի խորհրդում բամբակի գնման, գների չափի որոշման կամ թե ուղղակի բռնագրավման հարցերը ոչ թե զուտ տնտեսական բնույթի խնդիրներ էին, այլ քաղաքական, փաստորեն դասակարգային հաշիվներ մաքրելու խնդիր. բամբակատեր բուրժուազիայի ու բանվոր դասակարգի միջև: Բայց իրականում Հայաստանում դույզն-ինչ ոչ բուրժուազիա կար և ոչ էլ իսկական բանվոր դասակարգ: Խորհրդարանական քննարկումների ընթացքից երևում է, որ մենաշնորհի կամ բռնագրավումների հարցերում ՀՅԳ խմբակցությունը ավելի հակված էր պաշտպանելու մենաշնորհը, իսկ ժողովրդականները՝ ո՛չ մենաշնորհը և ո՛չ էլ առավել ևս բռնագրավումները: Վերջիններս պաշտպանում էին ազատ առևտրի գաղափարը⁴⁹:

1918 թ. սեպտեմբերի 4-ի նիստում սոցիալ-դեմոկրատների խմբակցությունը, պարենավորման խնդրում նկատի ունենալով մոտալուտ սովի վտանգը, հացահատիկի պետականացման պահանջ դրեց: Հաշվի առնելով Խորհրդային Ռուսաստանի փորձը՝ պատգամավոր Ա. Մելիքյանը գտնում էր, որ կառավարությունը պետք է իր ձեռքը վերցնի պետության մեջ բոլոր մթերքները և դրանք հավասարաբար ձևով բաշխի բոլորին⁵⁰: Նա պաշտպանում էր մենաշնորհը և ոչ թե ազատ առևտուրը, քանզի նրա կարծիքով՝ ազատ առևտուրը մենաշնորհ էր միայն մի խումբ շահամուլների (սպեկուլյանտների) համար: Կառավարությունը ևս պաշտպանեց հացի մենաշնորհի սկզբունքը: Ն.Գ. Մախարար Արամ Մանուկյանի տեղեկացմամբ՝ սեպտեմբերի սկզբի սովյալներով պետական պահեստում կար 35042 փութ ցորեն⁵¹: Նախարարը հացի ազատ առևտուրը աննպատակահարմար էր համարում այն պատճառով, որ պետությունը ի վիճակի չէր խափարը մի քանի հազար ռուբլով հաց գնելու և գործին ու գաղթականությանը կերակրելու համար:

1918 թ. երկրորդ կեսին խորհրդարանի օրենսդրական աշխատանքներում պետական մենաշնորհին վերաբերող օրինագծերը կազմեցին բավականին մեծ թիվ: Բայց պետք է ասել, որ մենաշնորհի քաղաքականությունը ոչ միշտ էր հետևողականորեն իրականացվում: Խորհրդարանը, իհարկե, ընդունում էր համապատասխան օրենքներ, սակայն փաստերը ցույց են տալիս, որ կառավարությանը չէր հաջողվում դրանք հետևողականորեն կենսագործել:

⁴⁷ «Կառավարության լրաբեր», 15 հոկտեմբերի 1918 թ.:

⁴⁸ «Ժողովուրդ», 15 սեպտեմբերի 1918 թ.:

⁴⁹ «Բանբեր Հայաստանի արխիվների», 1990, թիվ 3, էջ 110:

⁵⁰ «Կառավարության լրաբեր», 10 սեպտեմբերի 1918թ.:

⁵¹ Նույն տեղում:

Այսպես, օրինակ, Հայաստանի գյուղատնտեսության մեջ տիրող վիճակին քաջատեղյակ «Հայաստանի կոոպերացիա» երկշաբաթաթերթը իր համարներից մեկում տեղեկացնում էր, որ բրնձի և չալթուկի մենավաճառ հայտարարելու օրից անցել է բավականին ժամանակ, սակայն կառավարությունը հավաքել է բրնձի միայն աննշան մասը: 1918 թ. վերջերին ՀՀ սահմաններում ստացված մոտ 350 հազ. փութ չալթուկից կառավարությունը 1,5 ամսվա ընթացքում բնակչությունից գործնականում բռնագանձել էր ընդամենը 5000 փութ⁵²:

Հարկադիր մթերումների գործը համեմատաբար բարվոք էր ցորենի ուղղությամբ: 1918 թ. հունիսի 4-ի Բաթումի պայմանագրով Հայաստանին անցած տարածքի բնակչությունը հավաքել ու ամբարել էր մոտ 2,5 մլն. փութ (տվյալները կտրացված են): Մենաշնորհի հետևանքով պետականացվել էր մոտ 200 հազար փութ⁵³: Գյուղացիները իրենց ստացած բերքի մի մասը զարտուղի ճանապարհներով փութը 150-180 ռուբլով կարողացան վաճառել հիմնականում գաղթականությանը և քաղաքի ունևորներին⁵⁴:

Տալով մենաշնորհի ու բռնագրավումների քաղաքականության գնահատականը՝ մյուս կողմից պետք է ասել, որ դրանք ընդհանուր առմամբ հեռանկարային տնտեսական քաղաքականության տեսակետից ճիշտ չէին: Նման քաղաքականությունը չէր խթանում արտադրողների անձնական շահագրգռվածությունն ու ձեռներեցությունը: Բայց մյուս կողմից ազգաբնակչության համար ստեղծված արտասովոր ծանր պայմաններում դա հարկադիր քայլ էր: Այնուամենայնիվ, կարծում ենք, որ եթէ հացամթերքի և մի քանի այլ կենսաապահովման միջոցների ժամանակավորապես պետական մենաշնորհի հայտարարելը ինչ-որ ձևով արդարացվում էր, ապա մյուսներինը՝ բամբակինը, խաղողինը և այլն, սխալ էր: Գյուղատնտեսական առանձին մթերքների ու հումքի, ինչպես նաև արդյունաբերական առանձին ապրանքների վաճառքի ու արտահանման մենաշնորհը առաջ էր բերում ներքին սպեկուլյացիա, որից օգտվում էին շահամոլ մարդիկ՝ պետական մենաշնորհը դարձնելով որպես սեփական հարստացման միջոց: Շահամոլության դեմ պայքարի նպատակով ավելի ուշ սահմանվեցին բանտարկություններ և մեծ գումարի տուգանքներ: Հատկապես պարենի, վառելիքի, դեղորայքի և այլ կենսական անհրաժեշտ ապրանքների շահադիտական, չափազանց բարձր գներով վաճառքի կամ գները միտումնավոր բարձրացնելու նպատակով թաքցնելու դեպքում ֆինանսների նախարարությունը կարող էր հարուցել քրեական գործ⁵⁵: Չպետք է անտեսել նաև այն հանգամանքը, որ մենաշնորհն ու բռնագրավումները իրականացնելիս՝ տեղում թույլ էին տրվում անօրինականություններ ու շահատակություններ:

⁵² «Հայաստանի կոոպերացիա», 1 փետրվարի 1919թ. (թիվ 3), էջ 81-82:

⁵³ «Հայաստանի կոոպերացիա», 15 փետրվարի 1919թ. (թիվ 4), էջ 117:

⁵⁴ Նույն տեղում:

⁵⁵ ՀՀ ՊԿՊԱ, Ֆ. 202, գ.1, գ.333, թ. 176:

Առանձին շրջաններում և գյուղերում գյուղացիությունը տրտնջում ու դժգոհություն էր հայտնում հացի պետական մենաշնորհից: Օրինակ՝ 1918թ. աշնանը նման դժգոհություն են հայտնել Գարաչիչակի (Ծաղկաձորի) տեղա-մասի Ռ-նոգամալ և Վերին Ախտա գյուղերի բնակիչները⁵⁶: Վավերագրերից մեկում տեղեկանում ենք, թե Մետրոպ անունով մի խմբապետ իր 300 հեծյալ-ներով ինչպիսի անօրինականություններ է արել Ռ-նոգամալ գյուղում: «Հնարա-վոր չէ նկարագրել, թե ինչ սարքեցին այստեղ այդ յանիչարները. բռնագրավե-ցին հացը, ալյուրը, գարին, խոտը, պահանջեցին ոչխար, հավ, սարքեցին բռնություն, նույնիսկ Վանուշ Սարիբեկովից վերցրին կինը և տարան... թալա-նեցին գյուղը, ծեծեցին շատերին»⁵⁷: Հիշյալ գյուղի հասարակությունը բողո-քագիր է ներկայացրել Հայաստանի խորհրդարան և սոցիալ-դեմոկրատ խմբակցության միջոցով պահանջել քննության առնել բռնագրավումների ժա-մանակ պաշտոնյաների և զորամասերի թույլ տված անօրինությունների հար-ցը: Հացամթերքի բռնագրավումներ կատարելու համար սովորաբար գավառ-ներ ու գյուղեր էին ուղարկվում բազմաթիվ լիազորներ ու նրանց ենթակա պաշտոնյաներ, որոնք տեղում գյուղացու ընտանիքի կազմի համեմատ որոշ քանակի ցորեն թողնելով, մնացածը պետականացնում էին: Այդ ընթացքում տեղի էին ունենում խժոժություններ, զեղծումներ, ժողովրդական հուզումներ⁵⁸: «Լիազորների ճնշումը,- փաստում էր կառավարող կուսակցության պաշտո-նաթերթ «Չանգը»,- չափ ու սահման չունի. ծեծում են ամենքին՝ և՛ կոմիսա-րին, և՛ հասարակ գյուղացուն: Գյուղացին չգիտի ի՞նչ անե, ո՞ւմ դիմել, ռեկվի-զիցիաները այնքան են հաճախ կրկնվում, որ գյուղացու մոտ ոչ կարտոֆիլ, ոչ խոտ և ոչ էլ կաղամբ է մնացել, մի կողմ թողած ցորենը»⁵⁹: Նման քաղաքակա-նությունը կարելի է ասել, որ շատ բանով հիշեցնում էր այդ նույն ժամանակ Խ. Ռուսաստանում իրականացվող ռազմական կոմունիզմի պարենմաս-նատրման քաղաքականությունը:

Երևանի նահանգային պարենային բաժնի վարիչը զինվորական նա-խարարին ուղղված գրություններից մեկում հայտնում էր. «Ձինվորական իշ-խանությունները գյուղերում ինքնագլուխ բռնագրավում են (реквизируют) հացը և չնայած մեր պահանջներին ու բողոքներին՝ դրանք չեն դադարում և զնալով ընդունում են ավելի սպառնալից չափեր»⁶⁰: Շատ հաճախ բռնագրա-վումները կատարվում էին սահմանված կարգի (օրենքի) կոպիտ խախտում-ներով: Տեղերում թույլ էին տրվում չարաշահումներ, անօրինություններ ու բռնություններ: Հաճախ էլ օգտվելով տեղերում անբավարար վերահսկողու-թյունից, կարգուկանոնից՝ իրենց հերթին բռնագրավումներ (ավելի ճիշտ՝ կողո-պտումներ) էին կատարում առանձին անկանոն զինյալ կազմավորումներ

⁵⁶ ՀՀ ՊԿՊԱ, Ֆ.404, ց.1, գ.17, թթ.1-4:

⁵⁷ Նույն տեղում, ք.6:

⁵⁸ «Հորիզոն», 9 հոկտեմբերի 1918 թ.:

⁵⁹ «Չանգ», 27 հոկտեմբերի 1918թ.:

⁶⁰ ՀՀ ՊԿՊԱ, Ֆ.201, ց.1, գ.102, ք.1:

(մաուզերիստներ), որոնք, ոտնակոխ անելով ամեն մի օրենք ու օրինականություն, կատարում էին բռնագրավումներ, անիրավություններ, սպանություններ՝ ահ ու սարսափ տարածելով ամենուրեք: Միայն Էջմիածնի գավառում կային մեկ տասնյակից ավելի նման անկանոն զինյալ խմբեր⁶¹: Երևանի նահանգական գործերի կառավարիչը ՆԳ նախարար Արամին ուղղված գրությունում տեղեկացնում էր, որ աշխարհագրային (պարտիզանական) զնդի թվով հինգ սպաներ, չճանաչելով ոչ մի իշխանություն և օրենք, ինքնագլուխ հնձել են արտերը և յուրացրել հացահատիկը⁶²:

Անօրինություններ էին անում ոչ միայն աշխարհագրայինները, այլև, առանձին դեպքերում, կանոնավոր զորքը և տեղական իշխանությունները: Օրինակ՝ զինվորները քաղցից մղված կողոպտել ու ավերել էին Էջմիածնի գավառի Ալիբեկյու և Բեորփաքլու գյուղերի այգիները⁶³: Ջառ գյուղի բնակիչները բողոքել են զինվորների բռնությունների դեմ, իսկ Բաշգառնի գյուղի բնակիչները՝ պարենավորման վարչության դեմ, նորմայից ավելի ցորեն պահանջելու կապակցությամբ⁶⁴: Եղվարդ գյուղից «Ժողովուրդ» թերթի խմբագրությանը հասցեագրված մի նամակում տեղեկացվում է հետևյալը. «Հացահատիկի ստիպողական առգրավման համար Եղվարդ էր ժամանել մի զորախումբ պուլիմետոներով (զնդացիրներով-Ա.Հ.): Խուզարկությունների ընթացքում բռնագրավվածի համար ստացականներ չեն տալիս, գրավում են ինչ իրանց դուր է գալիս՝ յուղ, թխած հաց, ցորեն: Ոմանք հուսահատությունից ինքնասպանության փորձեր արեցին»⁶⁵: Կարելի է բերել այսօրինակ բազմաթիվ փաստեր, բայց եղածն էլ բավական է համոզվելու համար, թե որքան ծանր էր անդրադառնում մենաշնորհի և դրան ուղեկից բռնագրավումների քաղաքականությունը առանց այն էլ թշվառ վիճակում գտնվող գյուղացիական տնտեսությունների վրա:

Խորհրդարանը հարցապնդումների ժամանակ հաճախակի անդրադառնում էր տեղերում թույլ տրված շահատակությունների խնդրին: Առանձնապես սուր իրավիճակ էր ստեղծվել Էջմիածնի գավառում: 1918թ. սեպտեմբերի 17-ի (թիվ 19-րդ) նիստում խորհրդարանը, չզոհանալով զինվորական և ներքին գործերի նախարարների տված բացատրություններով, Էջմիածնի գավառում տեղի ունեցած դժգոհությունների և ընդհարումների մասին, որոշեց ստեղծել արտակարգ լիազորություններով խորհրդարանական հատուկ քննիչ հանձնաժողով (Ա. Ղազարյան, Գ. Ենգիբարյան, Մ. Աղաջանյան և Ա. Խոնդկարյան կազմով) և գործուղել Էջմիածին՝ տեղում քննություն կատարելու և հարկ եղած դեպքում շրջանի պաշտոնյաներին աշխատանքից հեռացնելու⁶⁶:

⁶¹ ՀՀ ՊԿՊԱ, Ֆ.201, ց.2, գ.625, ք.13:

⁶² Նույն տեղում, ց.1, գ.102, ք.7:

⁶³ «Ժողովուրդ», 12 սեպտեմբերի 1918թ.:

⁶⁴ «Ժողովուրդ», 19 սեպտեմբերի 1918թ.:

⁶⁵ «Ժողովուրդ», 26 սեպտեմբերի 1918թ.:

⁶⁶ «Ժողովուրդ», 22 սեպտեմբերի 1918թ.:

Միաժամանակ, խորհուրդն ընդունեց մի քանաձև, որով հանձնարարվում էր կառավարությանը և ի մասնավորի զինվորական ու Ն.Գ. նախարարություններին, կտրուկ միջոցներ ձեռք առնել Էջմիածնում հասարակական կարգն ու խաղաղությունը վերականգնելու նպատակով:

Գյուղատնտեսական մթերքների պետական մենաշնորհներից ու մասնակի բռնագրավումներից զատ՝ թույլ էին տրվել մաս բնակարանների, վառելանյութի, մասնավոր պահեստների, քարվանսարանների, կրպակների և նույնիսկ մասնավոր մանուֆակտուրաների ու գործարանների բռնագրավումներ: Այսպես, օրինակ, 1918թ. նոյեմբերի 27-ին բռնագրավվել են որոշ այլազգիների՝ Աբրամովի, Մեխտիևի և ուրիշների մանուֆակտուրաները՝ բանակի ու որբերի կարիքների համար⁶⁷: 1920թ. հուլիսին պետականացվեց Ն. Շուստովի զինուկոնյակի գործարանը՝ իր ողջ շարժական և անշարժ գույքով ու կայքով⁶⁸:

1919-1920 թթ. ընթացքում խորհրդարանը բնակարանների բռնագրավման վերաբերյալ որոշ փոփոխություններով 4-5 անգամ օրենք ընդունեց: Բռնագրավումների անկանոն կարգը աստիճանաբար հստակեցվեց և դրա իրավունքը վերապահվեց միմիայն քաղաքային ինքնավարություններին⁶⁹:

ՀՀ համար մնան ծանր ու դժվարին ժամանակներում խորհրդարանը իր օրինաստեղծ աշխատանքում զբաղվում էր ոչ միայն տնտեսական բնույթի խնդիրներով, այլև հոգևոր, մշակութային հարցերով:

Խորհրդարանը մի քանի ընթերցումով քննության առավ դպրոցական հանձնաժողովի մշակած օրինագիծը՝ «դպրոցների մասին»: Այնտեղ պաշտպանվում էր այն ճիշտ գաղափարը, որ դպրոցը պետք է քաղաքականությունից հեռու լինի, այսինքն՝ ապաքաղաքականացվի ու ապակուսակցականացվի: Օրենքում ասվում էր, որ ՀՀ դպրոցը դադարում է պետության մենաշնորհ լինելուց, և որ յուրաքանչյուր ոք իրավունք ունի սեփական միջոցներով դպրոց բացել⁷⁰: Օրենքը պաշտպանում էր ապակենստրոն, ազատ դպրոցի գաղափարը: Հարկադրանք չգործադրելով ծխական դպրոցների նկատմամբ՝ միաժամանակ առաջին քայլերը սկսեցին ձեռնարկվել նախկին պետական դպրոցների ազգայնացման ուղղությամբ: 1918թ. սեպտեմբերի 10-ին խորհրդարանը գրեթե միաձայն որոշեց ունենալ հանրային կրթության առանձին նախարարություն⁷¹: Չանսալով եղած դժվարություններին՝ 1918թ. հոկտեմբերի 1-ից սկսվեց նոր ուսումնական տարին: Խորհրդարանը, դպրոցական հանձնաժողովի ներկայացմամբ, սահմանեց մասն ուսուցիչների վարձատրության չափը:

⁶⁷ ՀՀ ՊԿՊԱ, Ֆ.200, ց.1, գ.178, ք.1:

⁶⁸ ՀՀ ՊԿՊԱ, Ֆ.199, ց.1, գ.193, քք.2-4:

⁶⁹ ՀՀ ՊԿՊԱ, Ֆ.202, ց.1, գ.333, քք.90-91:

⁷⁰ «Հորիզոն», 18 հոկտեմբերի 1918թ.:

⁷¹ «Հորիզոն», 9 հոկտեմբերի 1918թ.

Թե՛ քաղաքային և թե՛ գյուղական դպրոցների համար այն տարեկան կազմում էր 6000 ռուբլի, այսինքն՝ ամսական 500 ռուբլի⁷²:

1919 թ. մայիսին մշակվեց օրինագիծ լեզվի մասին⁷³: Այն կազմել էր կառավարության նախաձեռնությամբ ստեղծված երեք հոգանոց մասնաժողովը՝ Գ. Խոջամիրյան, Գ. Խատիսյան և Կ. Հովհաննիսյան կազմով⁷⁴: Օրինագիծը կազմված էր 13 հոդվածից: Այնտեղ հռչակվում էր, որ հանրապետության սահմաններում պետական-պաշտոնական լեզուն համարվում է հայերենը: Օրինագիծը պարտավորեցնում էր պետական պաշտոնատար անձանց մեկ տարվա ընթացքում տիրապետելու հայերենին (բանավոր և գրավոր): Բացի այդ, գերատեսչություններում, հաստատություններում, հիմնարկ-ձեռնարկություններում, բանակում և այլուր հաղորդակցման, քաղաքացիների ընդունելությունների անցկացման, գրագրության և գործավարության լեզուն դարձյալ լինելու էր միայն հայերենը: Պաշտոնատար անձանց լեզվի իմացությունը ստուգելու համար հիմնվելու էին հանձնաժողովներ: Հայոց լեզու չիմացողները ենթարկվելու էին քննության և անհաջողության դեպքում ազատվելու պաշտոնից: Լեզվի կանոնները չկատարելու դեպքում՝ յուրաքանչյուր հիմնարկություն կամ քաղաքացի կարող էր բողոք ներկայացնել: Դատարանի վճիռը պարտադիր էր բոլորի համար⁷⁵: Հաշվի առնելով, որ օրինագծի առանձին հոդվածներ ունեն լրացման և հստակեցման կարիք, փաստաթուղթը վերադարձվեց լրամշակման:

Լեզվի մասին օրինագծի վերջնական հաստատումը տեղի ունեցավ ավելի ուշ՝ երկրորդ գումարման խորհրդարանի կողմից 1919 թ. դեկտեմբերի 26-ին:

Լեզվի մասին օրենքի կարևորությունն ու հրատապությունն այն էր, որ Հայոց անկախ պետության մեջ շարունակում էր տիրապետող մնալ ռուսաց լեզուն: «Սինիստրություններից սկսած մինչև հետին պաշտոնատներում, մտահոգ գրում էր «Չանգը», - իշխողը ռուսերենն է, գրագրությունը ռուսերեն, խնդիրները ընդունվում են ռուսերեն, պատասխանները տալիս՝ ռուսերեն: Իսկ, օրինակ, զինվորական նախարարության մեջ հայերեն լեզուն ուղղակի հալածված է»⁷⁶:

Հարկ է նշել, որ արդարադատությունը ևս կատարվում էր ռուսերեն: Պետական պաշտոնյաներից շատերը մայրենի լեզվին լավ չէին տիրապետում կամ պարզապես անձանոթ էին դրան: Կամա թե ակամա գոյանում էր մի տեսակ լեզվական պատնեշ ու խորթություն կառավարության, պաշտոնության և հասարակ ժողովրդի միջև: Հատկապես այդ վիճակից մեծ չափով

⁷² «Հորիզոն», 9 հոկտեմբերի 1918թ.:

⁷³ ՀՀ ՊԿՊԱ, ֆ. 199, ց. 1, գ. 14, մաս 1, քք. 125-126:

⁷⁴ ՀՀ ՊԿՊ Ա, ֆ. 199, ց. 1, գ. 14, մաս 1, ք. 126:

⁷⁵ Նույն տեղում, քք. 125-126:

⁷⁶ «Չանգ», 24 հունվարի 1919 թ.:

տուժում ու նեղվում էր արևմտահայ գաղթականությունը, որը հասկանալի պատճառներով բոլորովին անհաղորդ էր ռուսերեն լեզվին:

Պաշտոնական լեզվի գործավարությունների հայացման գործում ոչ պակաս դժվարություն էին ստեղծում օտար տերմինները. լայն գործածություն չունեին կամ պարզապես չկային դրանց հայերեն համարժեքները: Օտար տերմինները հայացնելու և հայոց լեզուն օտարաբանությունից մաքրելու նպատակով Թիֆլիսում հիմնվեց մի հանձնաժողով՝ Ստ. Լիսիցյանի նախագահությամբ: Հանձնաժողովը ձեռնամուխ եղավ համանման բառարանի կազմմանը: Խորհրդարանը 150 հազար ռուբլու վարկ բացեց՝ իրավաբանական, բժշկա-սանիտարական, տեխնիկական և գիտական-դպրոցական տերմինների բառարան կազմելու և հրատարակելու համար⁷⁷:

1919 թ. հունվարի 17-ին Հայաստանի խորհրդարանը հաստատեց «ՀՀ տոն օրերի մասին» օրինագիծը: Սահմանվեցին ընդհանուր պետական ու ազգային-կրոնական հետևյալ տոները՝ Նոր տարվա, Ծննդյան և Սկրտության, Մեռելոցի, Վարդանանց և Բարեկենդանի, Տեառնընդառաջի, Լուսավորչի մուտն ի Վիրապ, Չատկի երկուշաբթի և երեքշաբթի, Աշխատանքի, Համբարձման, Թարգմանչաց, Վարդավառի, Ս. Աստվածածնի և այլն⁷⁸:

Ամբողջ հանրապետությունում տոների կապակցությամբ ոչ աշխատանքային (հանգստյան) օրեր սահմանվեցին՝ հունվարի 1-ը, 6-ը, ռուսական մեծ հեղափոխության՝ փետրվարի 27-ը (ն. տ. մարտի 12-ը), մայիսի 1-ը, օգոստոսի 1-ը (խորհրդարանի բացման օրը), երկու ճրագալույցների օրը⁷⁹:

Բացի վերոհիշյալ ընդհանուր տոներից՝ ռուսների և մահմեդականների համար պաշտոնապես գրանցվում ու թույլատրվում են մաս նրանց կրոնական և այլաբնույթ տոները: Հանրապետության բազմազգ բնակչության համար ազգային-կրոնական տոների հաշվառումը և օրենսդրորեն սահմանումը վկայում էր հանրապետությունում խղճի ու դավանանքի ազատության և ընդհանրապես ՀՀ ժողովրդավարական բնույթի մասին:

Հայաստանում պակասում էին շատ օրենքներ: Այդպիսին էր, օրինակ, մամուլի մասին օրենքը: Սակայն բոլոր տիպի (խորհրդարանական և ոչ խորհրդարանական) կուսակցությունների համար առկա էին ազատ խոսքի ու գործունեության հնարավորություններ: Հանրապետությունում փաստորեն չկար գրաքննություն: Արդյունքում ստացվում էր այնպես, որ առանձին թերթեր ոչ միայն հակապետական քարոզչության համար չէին հետապնդվում ու պատիժ չէին կրում, այլև երբեմն ակամա և անպատիժ տպագրում էին ռազմական բնույթի գաղտնիքներ: Այսպես, օրինակ, ՀՅԴ Վրաստանի ԿԿ-ի և Թիֆլիսի կոմիտեի օրգան «Նոր աշխատավորը» տպագրել էր, իսկ ՀՅԴ Շիրակի ԿԿ-ի պաշտոնաթերթ «Շիրակի աշխատավորը» արտատպել էր տեղե-

⁷⁷ ՀՀ ՊԿՊԱ, ֆ. 202, ց. 1, գ. 52, ք. 14:

⁷⁸ ՀՀ ՊԿՊԱ, ֆ. 200, ց. 1, գ. 86, ք. 26, ֆ. 202, ց. 1, գ. 46, մաս 1, ք. 4, «Հայաստանի խորհրդի հաստատած օրենքները», էջ 49-50:

⁷⁹ ՀՀ ՊԿՊԱ, ֆ. 198, ց. 1, գ. 15, ք. 79, ֆ. 199, ց. 1, գ. 27, քք. 114-115:

կություն այն մասին, որ Հայաստանում կառուցվում է երկու գրահագնացք «բրոնկիկ»⁸⁰:

Կային զանգվածային լրատվության այնպիսի միջոցներ, որոնք գտնվում էին կառավարության հսկողության տակ: Այդպիսի ամենագլխավոր միջոցը Հայաստանի հեռագրական գործակալությունն էր (ՀՀԳ): Այն հիմնվել էր խորհրդի 1918թ. դեկտեմբերի 18-ի օրենքով⁸¹, որը գործում էր կառավարությանը կից ու դեկավարվում էր նրա հրահանգներով, այսինքն՝ անկախ չէր:

1919 թ. սեպտեմբերի 20-ին բացվում է Երևանի ռադիոկայանը⁸², որի կառուցման համար խորհրդարանը 1918թ. նոյեմբերի 16-ի ընդունած օրենքով թույլատրել էր բաց թողնել 200 հազ. ռուբլի վարկ⁸³: Որոշ աղբյուրներում այդ գումարը նշված է 20 հազ. ռուբլի, որը սխալ է կամ վրիպակ⁸⁴:

Ն.Գ. նախարար Արամ Մանուկյանի կարգադրությամբ հանձնարարվեց փոստ-հեռագրական հիմնարկություններին, որ 1918թ. նոյեմբերի 1-ից Հայաստանի տարածքում, բոլոր հեռագրատներում հեռագրերը գրվեն և ընդունվեն հայերեն, ինչպես նաև ռուսերեն լեզուներով⁸⁵: 1919թ. փետրվարին Հայաստանը փոստ-հեռագրական կոնվենցիաներ է կնքում Վրաստանի և Ադրբեյջանի հետ, որոնք մարտի 11-ին միաձայն կերպով հաստատվում են Հայաստանի խորհրդում⁸⁶:

Հայաստանի խորհրդի իրավասությունների մեջ էր մտնում այն, որ նա հաստատում էր միջպետական պայմանագրեր, կոնվենցիաներ, լիազորում էր կառավարությանը ուրիշ պետությունների հետ բանակցություններ վարելու, պայմանագիր-համաձայնագրեր կնքելու, դիվանագիտական միսիաներ (ներկայացուցչություններ) ու պատվիրակություններ հաստատելու և այլն:

Հարկ է նշել, որ խորհրդի կազմը և կառուցվածքը այնքան էլ չէին նպաստում նրա օրինաստեղծ աշխատանքին:

Բացի օրենսդրական գործունեությունից՝ Խորհրդի պատգամավորները տարբեր ժամանակներում խմբերով այցելել են գավառները (Էջմիածին, Ղամարլու, Սուրմալու, Ղարաբլիլիսա, Շիրակ, Նոր-Բայազետ և այլն) և տեղերում ծանոթացել ազգաբնակչության, գաղթականության, զորքի վիճակին ու կարիքներին և իրենց օգտակար առաջարկություններով ու դիտողություններով նպաստել կառավարության ու տեղական իշխանությունների աշխատանքների բարելավմանը: 1918-1919 թթ. սովի ու համաճարակի ժամանակաշրջանում, ինչպես արդեն ասվել է, արտախորհրդարանական լայն գործունեություն էր տանում բժշկա-սանիտարական հանձնաժողովը՝ շրջելով գա-

⁸⁰ ՀՀ ՊԿՊԱ, Ֆ.201, ց.1, գ.39, ք.148:

⁸¹ Նույն տեղում, Ֆ.200, ց.1, գ.86, ք.18:

⁸² Նույն տեղում, ք.68:

⁸³ ՀՀ ՊԿՊԱ, Ֆ.200, ց.2, գ.105, ք.69:

⁸⁴ Նույն տեղում, գ.86, ք.13:

⁸⁵ «Ժողովուրդ», 19 սեպտեմբերի 1918թ.:

⁸⁶ ՀՀ ՊԿՊԱ, Ֆ.200, ց.1, գ.95, ք.99 (1):

վառներում ու գյուղերում⁸⁷: Խորհրդարանը շաբաթական առնվազն մեկ անգամ լսում էր կառավարության զեկույցը սովի ու համաճարակի վերաբերյալ:

ՀՅԳ խմբակցությունը, իրեն համարելով հանրապետությունում տիրող իրավիճակի համար գլխավոր պատասխանատու մարմին, ստեղծել էր ներքին գործերի խնդիրներով զբաղվող մի ենթահանձնաժողով, որի նպատակն էր՝ հետևել Հայաստանի ներքին կյանքին ու համապատասխան միջոցներ ձեռնարկել պայքարելու նեգատիվ երևույթների դեմ: Խմբակցությանը կից գործող այս մարմնին կարող էր դիմել տեղեկություններ իմացող ցանկացած քաղաքացի⁸⁸: Նման ձեռնարկը, ինչ խոսք, ուներ հասարակական կարծիքի ուժեղացման, հասարակության առողջացման, ամեն տեսակ չարաշահումներն ու ապօրինությունները կանխարգելող նպատակներ:

2. Խորհրդարանի ֆինանսավարկային գործունեությունը

Խորհրդարանի գործունեության կարևոր ոլորտներից էին բյուջեն, ֆինանսավարկային քաղաքականությունը: Հանրապետության իշխանությունները մեծ ձգտում ունեին ստեղծելու սեփական ֆինանսական համակարգ, հանգամանք, որն անկախ պետականության կարևոր երաշխիքներից է: Սկզբնական շրջանում քանի որ շատ դժվար էր ինքնուրույն ֆինանսական համակարգ ստեղծելը, միառժամանակ պահպանվեց ֆինանսական միությունը Անդրկովկասի երեք հանրապետությունների միջև: Շրջանառության մեջ էր Անդրկովկասյան դրամը՝ բռները: Դեռ Անդրկովկասյան կոմիսարիատի և Մեյմի օրոք բաց էր թողնվել 300 մլն ռուբլի, որի պատասխանատվությունը ընկնում էր բոլոր երեք հանրապետությունների վրա: Բայց քանի որ այդ գումարն արդեն սպառվել էր, 1918թ. հունիսի 20-ին Հայաստանի և Վրաստանի կառավարությունների միջև կնքվում է ֆինանսատնտեսական պայմանագիր համատեղ 200 մլն ռուբ. բռն բաց թողնելու մասին⁸⁹: Այդ գումարը բաշխվելու էր հետևյալ կերպ՝ Վրաստանին՝ 120 մլն. ռուբ., իսկ Հայաստանին 80 մլն - ռուբ.⁹⁰: Կողմերը բռները շրջանառությունից կարող էին հանել 1919թ. դեկտեմբերի 31-ից ոչ շուտ⁹¹: Իսկ այդ ընթացքում պետք է քայլեր ձեռնարկվեին սեփական դրամանիշ մտցնելու ուղղությամբ:

Հայաստանի և Վրաստանի կողմից 200 մլն ռուբլի բռներ բաց թողնելու կապակցությամբ Ադրբեջանի կառավարությունը բողոք հայտնեց, որ առանց իր գիտության ու համաձայնության է նման համաձայնագիր կայացվել, մինչդեռ ինքը ունի բռների մասնաբաժնի իրավունք: Ադրբեջանական կողմի բողո-

⁸⁷ «Շողովուրդ», 13 հոկտեմբերի 1918թ.:

⁸⁸ «Զանգ», 8 հունվարի 1919թ.:

⁸⁹ ՀՀ ՊԿՊԱ, Ֆ.200, ց.1, գ.12, ք.40:

⁹⁰ «Հորիզոն», 20 հունիսի 1918թ.:

⁹¹ ՀՀ ՊԿՊԱ, Ֆ.200, ց.1, գ.12, ք.40:

քից հետո՝ սեպտեմբերի 6-ին, երեք հանրապետությունների լիազորները համաձայնագիր են ստորագրում շրջանառության մեջ եղած բռնների նկատմամբ պատասխանատվության և լրացուցիչ 280 մլն ռուբլու դրամանիշներ տպագրելու մասին: Նախատեսվում էր 280 մլն ռուբլուց 120 մլն-ը թողնել Վրաստանին, իսկ 80-ական մլն. ռուբլին Հայաստանին ու Ադրբեջանին⁹²:

Ավելի ուշ՝ նոյեմբերի 15-ին, Վրաստանը և Ադրբեջանը լրացուցիչ պայմանագիր են կնքում, որով որոշվում է բաց թողնել նոր, լրացուցիչ բռներ՝ 160 մլն ռուբլու չափով՝ 80 մլն.-ը Վրաստանին և 80-ը Ադրբեջանին⁹³: Իսկ Հայաստանին իրավունք էր վերապահվում, եթե ինքը անհրաժեշտ կհամարեր լրացուցիչ բռներ ստանալու, ապա կարող էր համապատասխան պայմանագիր կնքել Վրաստանի և Ադրբեջանի հետ: Վերոհիշյալ ֆինանսատնտեսական համաձայնագրերից դժվար չէ նկատել, որ դրանք, որպես կանոն, կնքվել են Վրաստանի համար ավելի նպաստավոր պայմաններով:

Հայաստանի խորհրդարանը 1918 թ. դեկտեմբերի 17-ին ընդունած օրենքով իրավունք տվեց Հայաստանի կառավարությանը Վրաստանի և Ադրբեջանի հետ հավասար իրավունքներով նոր բռներ թողարկելու համար⁹⁴: 1919թ. փետրվարի 10-ին համաձայնություն կայացվեց Հայաստանի և Վրաստանի միջև բռների երրորդ խմբաքանակը 320 մլն ռուբլու չափով թողարկելու մասին, որից 160-ը բաժին էր հասնելու Հայաստանին⁹⁵: Արդեն 1919թ. կեսերից շրջանառության մեջ են մտցվում արտասահմանում տպված հայկական դրամանիշերը (չեկերը), որոնք համարժեք էին անդրկովկասյան բռներին⁹⁶: Թե՛ անդրկովկասյան բռները, և թե՛ հայկական դրամանիշերը պետության կողմից ոսկու ֆոնդով և համապատասխան ապրանքային զանգվածով ապահովված չէին և դրանց շարունակական ենթիսխաների հետևանքով դրամը մեծ արագությամբ արժեզրկվում էր:

Գալով խորհրդարանի բյուջետային աշխատանքին՝ պետք է ասել, որ նրա գործունեության շրջանում չի եղել հանրապետության տնտեսական ու սոցիալական զարգացման հստակ ծրագիր, փաստորեն չկար նաև հիմնավորված տարեկան ամբողջական պետբյուջե, որը քննարկվեր ու հաստատվեր Խորհրդի կողմից: Պետական ծախսերը կատարվում էին համաձայն **նսխահաշիվների**, որը կազմում էր կառավարությունը և հաստատում խորհրդարանը: Այստեղից էլ խորհրդի կողմից այս կամ այն նպատակի համար նախատեսվող վարկային հատկացումները ստանում էին օրենքի տեսք, անգամ եթե այդ գումարը կազմեր մի քանի հազար ռուբլի: Մտացվում էր այնպես, որ խորհրդարանը օրենքների տեսքով պարբերաբար որոշումներ էր ընդունում՝ վարկ բաց թողնելու մասին: Խորհրդարանի կողմից հաստատված տարեկան

⁹² «Հորիզոն», 11 սեպտեմբերի 1918թ.:

⁹³ ՀՀ ՊԿՊԱ, Ֆ.200, գ.1, գ.84, ք.7:

⁹⁴ «Հայաստանի խորհրդի հաստատած օրենքները», մաս 1, Երևան 1919, էջ 32:

⁹⁵ «Կայծ», 13 փետրվարի 1919թ.:

⁹⁶ ՀՀ ՊԿՊԱ, Ֆ. 199, գ.1, գ.14, մաս 2, ք.74:

նախահաշիվների այդ ամբողջությունն էլ փաստորեն կազմում էր հանրապետության տարեկան պետբյուջեն:

Այդպիսով, բյուջեն ձևավորվում էր նախահաշիվների միջոցով: Նախահաշիվները բաժանվում էին երկու մեծ խմբի՝ սովորական և արտակարգ ծախսերի: Շատ դեպքերում էլ խորհրդարան էին մտցվում, անհետաձգելի դեպքերի ու հանգամանքների թելադրանքով, նախահաշվից դուրս պահանջվող լրացուցիչ վարկեր տրամադրելու հարցեր, որոնք պետական վերահսկիչի համապատասխան եզրակացությունից հետո սովորաբար հաստատվում էին:

Պետբյուջեի եկամտի հիմնական աղբյուրը հարկերն ու տուրքերն էին, որոնք ևս սահմանվում էին խորհրդարանի կողմից: Հայաստանի խորհրդի 1918թ. նոյեմբերի 6-ի թիվ 36 օրենքով 1919թ. հունվարի մեկից ամեն կարգի առևտրաարդյունաբերական ձեռնարկումների համար սահմանվեց տուրքի այսպիսի չափ. մինչ 25 հազ. ռուբլու շահույթ ապահովող ձեռնարկությունների համար՝ 12 տոկոս, իսկ 25 հազ. ռուբլուց ավելիի դեպքում՝ մինչև 15 տոկոս⁹⁷:

Խորհրդարանը ֆինանսական քաղաքականությունը իրականացնելիս՝ ելնում էր ոչ այնքան հանրապետության ֆինանսատնտեսական հնարավորությունից, որքան կատարվելիք հատկացման նպատակահարմարությունից: Դրա համար էլ որպես կանոն ավելի մեծ էին լինում ծախսերը, քան եկամտները: Անկուսակցական գործիչ Գ. Չալխուշյանի հայտնած տվյալներով՝ 1918 թ. սեպտեմբերի մեկից մինչև 1920 թ. հունվարի մեկը Հայաստանի զանձարանը ունեցել էր մուտք 30 մլն, իսկ ծախք 300 մլն հայկական չեկերով⁹⁸: Չնայած դրսից ստացվող առանձին ֆինանսատնտեսական օգնություններին, այնուամենայնիվ, հանրապետությունում ծախսերը միշտ գերազանցել են եկամտները: Այսինքն՝ ֆինանսաբյուջետային հաշվեկշիռը եղել է բացասական: «Չանգ» պաշտոնաթերթը գրում էր, որ խորհրդարանի ֆինանսական հանձնաժողովը «մինչև այժմ ոչ մի գաղափար չունի պետական մուտքերի մապին»⁹⁹:

Ֆինանսաբյուջետային խնդրում խորհրդարանի և կառավարության միջև երբեմն ծագում էին ընդհարումներ: Կառավարության ներկայացրած նախահաշիվների հաստատումով կամ մերժումով էլ կարելի պարզել, թե խորհրդարանը ինչպիսի վերաբերմունք է ցույց տվել կառավարությանը:

Սովորաբար ֆինանսները այն գլխավոր լծակն են, որով խորհրդարանը իրենից կախվածության մեջ է դնում կառավարությանը: Բայց հաճախ կառավարությունը, խախտելով սահմանված կարգը, աշխատում էր ազատվել այդ կախվածությունից, և դա նրան հաջողվում էր: Բանն այն է, որ խորհրդարանի հաստատած ֆինանսական նախահաշիվները մասնավորեցված էին, այսինքն՝ համապատասխան պարագրաֆներով ու հոդվածներով ունեին ի-

⁹⁷ «Հայաստանի խորհրդի հաստատած օրենքները 1918-1919 թթ.», մաս 1, Երևան, 1919, էջ 21-22:

⁹⁸ Գ. Չալխուշյան, Ի՞նչ էր և ի՞նչ պիտի լինի մեր ուղին, Վիեննա, 1923, էջ 12:

⁹⁹ «Չանգ», 5 հունվարի 1919 թ.:

րենց ֆինանսական ծախքերի կոնկրետ հասցեատերերը: Նման տարբերակված բաժանումը, ինչ խոսք, հեշտացնում էր վերահսկման գործը: Բայց հաճախ էր պատահում, որ կառավարությունը, ձգտելով իրեն ազատել խորհրդարանի կաշկանդող կապանքներից, խախտում էր խորհրդարանի սահմանած կարգը՝ նախահաշվի մի պարագրաֆում հաստատագրված գումարը ծախսում էր մեկ ուրիշ հոդվածի տակ: Այսինքն՝ կառավարությունը նախահաշվում սահմանված գումարները ծախսում էր իր հայեցողությամբ այնպես, ինչպես ինքն էր նպատակահարմար գտնում: Հենց այս հողի վրա էլ կառավարության և խորհրդարանի միջև ծագում էին առանձին կոնֆլիկտային իրավիճակներ: Օրինակ՝ 1918թ. աշնանը կառավարությունը, առանց պառլամենտի գիտության ու թույլտվության, գետնախնձոր գնելու գումարներից Ն. Գ. նախարարության պարենավորման բաժանմունքին էր տրամադրել 8,5 մլն ռուբլի Վրաստանից, Հյուսիսային Կովկասից և Ուկրաինայից հաց (ալյուր), ծխախոտ, շաքար և այլ մթերքներ գնելու համար¹⁰⁰: Բացի այդ արձանագրվել են այնպիսի դեպքեր, երբ կառավարությունը, առանց խորհրդարանի թույլտվության, գումարներ էր ծախսում (հատկապես ռազմական բնույթի) և հետին թվով միայն խորհրդին համապատասխան օրինագծեր էր ներկայացնում¹⁰¹:

Ֆինանսաբյուջետային քաղաքականության ոլորտում թույլ էին տրվում այլ խախտումներ ու շեղումներ: Իսկ այն պահերին, երբ խորհրդարանի լիազորությունները լրիվ ծավալով անցնում էին կառավարությանը (դա տեղի ունեցավ 1919թ. գարնանը, մեկ ամսով և 1920թ. վեց ամսով), այդ ընթացքում ինքնըստինքյան ստացվում էր այնպես, որ կառավարությունն ինքն էր իրեն ֆինանսավորում:

Այնուամենայնիվ, յուրացնելով եվրոպական ժողովրդավարական երկրների ֆինանսավարկային քաղաքականության սկզբունքները, ՀՀ-ում ևս սկսեցին աստիճանաբար արմատավորվել այդպիսիք: 1919թ. հունվարի 3-ին Հայաստանի խորհուրդը հաստատեց օրենք՝ 1919թ. ֆինանսատնտեսական նախահաշիվների կազմման, քննարկման ու հաստատման կարգի մասին: Այնտեղ սահմանվում էր հետևյալը: Յուրաքանչյուր նախարարության եկամուտների ու ծախսերի իր նախահաշիվները կազմում և մինչև փետրվարի 1-ը ներկայացնում էր ֆինանսների նախարարություն: Յուրաքանչյուր նախարարություն էլևմտի նախահաշվի նախագիծը ենթարկում էր նախնական քննության միջգերատեսչական նախահաշվային հանձնաժողովում¹⁰²: Վերջինս բաղկացած էր տվյալ նախարարության, ֆինանսների նախարարության և պետական վերահսկողության լիազորի ներկայացուցիչներից: Նախահաշիվները քննող միջգերատեսչական հանձնաժողովի նախագահին նշանակում էր ֆինանսների նախարարը: Հիշյալ երեք գերատեսչությունների ներկայացու-

¹⁰⁰ «Կայծ», 28 նոյեմբերի եւ 1 դեկտեմբերի 1918թ.:

¹⁰¹ «Կայծ», 26 հունվարի 1919թ.:

¹⁰² «Հայաստանի խորհրդի հաստատած օրենքները 1918-1919թ.», մաս 1, Երևան, 1919, էջ 38:

ցիչները, եթե համաձայնության էին գալիս, ապա նախահաշվի նախագծին հավանության էր տրվում, իսկ եթե ծագում էին տարաձայնություններ, ապա նրանցից յուրաքանչյուրը, այդ մասին տեղյակ պահելով իր վերադասին, նախահաշվի նախագծին կցում էր իր սեփական (մասնավոր) եզրակացությունը:

Նախահաշվային հանձնաժողովի կողմից քննարկված նախահաշիվների նախագիծը ի մի էր բերվում ֆինանսների նախարարությունում և համապատասխան եզրակացությամբ ուղարկվում նախարարների խորհուրդ: Նախարարների խորհուրդը, քննարկելով ու հարթելով վիճելի հարցերը, հավանություն էր տալիս նախահաշիվների նախագծին և դրանք կրկին վերադարձնում ֆինանսների նախարարություն: Վերջինս էլ հավանության արժանացած այդ համահավաք տվյալների հիման վրա կազմում էր պետական տարեկան եկամուտների ու ծախսերի (եկամտի) ամբողջական նախագիծը: Գրանից հետո եկամտի (բյուջեի) նախագիծը ներկայացվում էր նախարարների խորհուրդ և այնտեղ հավանության արժանանալուց ու պետական վերահսկիչի համապատասխան եզրակացությունից հետո՝ ոչ ուշ քան 1919թ. մարտի 20-ը մտցվում էր Հայաստանի խորհուրդ՝ քննարկման ու հաստատման համար: Հայաստանի խորհրդարանի կողմից հաստատվելուց հետո այն դառնում էր օրենք և դրվում գործողության մեջ¹⁰³:

Առաջ գնալով ասենք, որ այս նույն օրենքի պահանջներով կազմվեց նաև եկամտի 1920թ. պետական տարեկան նախահաշիվը միայն այն տարբերությամբ, որ դրա կազմում քննարկման ու հաստատման նախապատրաստական փուլը պետք է տեղի ունենար 1919 թ. նոյեմբերի 10-ից մինչև դեկտեմբերի 20-ը¹⁰⁴:

1919 թ. նոյեմբերի 17-ին երկրորդ գումարման խորհրդարանի «ֆինանսական նախահաշիվների և պետական եկամտացույցը կազմելու, քննելու և հաստատելու մասին» հաստատած լրացուցիչ օրենքով.

ա) 1920 թ. բյուջետային տարին հաշվվում էր նույն տարվա հունվարի մեկից.

բ) նախարարությունների և պետական վերահսկողության եկամուտքի նախահաշիվների նախագծերը միաժամանակ ուղարկվում են ֆինանսների նախարարություն՝ յոթ օրինակ և պետական վերահսկողություն մեկ օրինակ՝ 1919 թ. նոյեմբերի 10-ից ոչ ուշ¹⁰⁵: Միաժամանակ, ղեկավարվելով ռուսական նախկին պետության մեջ գոյություն ունեցող օրենքների ժողովածուի (СВОД — ЗАКОНОВ), հ. I, մաս 1, հոդված 116-ով, եթե պետական եկամտացույցը (բյուջեն) մինչև նախահաշվային ժամանակաշրջանի (բյուջետային տարվա) սկիզբը չի հաստատվում, ապա ուժի մեջ է մնում նախորդ տարվա եկամտացույցը¹⁰⁶: Ի դեպ, միջազգայնորեն ընդունված և ՀՀ կիրառվող այս կարգը (օ-

¹⁰³ ՀՀ ՊԿՊԱ, Ֆ.202, ց.1, գ.41, ք.4:

¹⁰⁴ Նույն տեղում, գ.48, ք.83:

¹⁰⁵ ՊԿՊԱ Ֆ.202, ց.1, գ.333, ք.23:

¹⁰⁶ ՀՀ ՊԿՊԱ, Ֆ.202, ց.1, գ.63, ք.51:

րենքը) տեղ է գտել նաև ժամանակակից ՀՀ նորահաստատ սահմանադրության թիվ 76 հոդվածում¹⁰⁷:

ՀՀ ֆինանսների նախարարության արխիվային ֆոնդի (202) նյութերի ուսումնասիրությունը ցույց է տալիս, որ ձգձգումների պատճառով խորհրդարանը չի հասցրել նախատեսված ժամկետում քննել ու հաստատել տարեկան կամ կիսամյակային պետբյուջեի ֆինանսական նախահաշիվը: Այսպես՝ 1919 թ. ապրիլի 30-ին ֆինանսների նախարարը զեկուցում էր նախարարների խորհրդին, որ առ այսօր 1919 թ. ծախքերի նախահաշիվը չի քննվել ու հաստատվել Հայաստանի խորհրդում, ուստի, համաձայն սահմանված օրենքի, նախարարությունը շարունակում է գործել 1918 թ. նախահաշիվով¹⁰⁸: Մասնավորապես, 1919 թ. հունվար-ապրիլ ամիսների համար պետական հիմնարկությունները պետք է օգտվեին 1918թ. սեպտեմբեր-դեկտեմբեր ամիսների համար բացված վարկերի չափով¹⁰⁹:

Ցավոք, արտասովոր ծանր պայմաններում հայտնված ու չափազանց կարճատև կյանք ապրած ՀՀ-ը չկարողացավ և չէր էլ կարող բնականոն օրենսդրական ու ֆինանսատնտեսական կյանք ունենալ:

3. Հողային խնդիրը

Նախքան հողային հարցի խորհրդարանական քննարկումներին անցնելը համառոտակի կանգ առնենք կուսակցությունների ագրարային ծրագրերի վրա: Ինչպես հայտնի է, դեռ ռուսական առաջին հեղափոխության տարիներին, երբ առանձնապես շատ սուր էր կանգնած ագրարային-գյուղացիական հարցը, քաղաքական շատ կուսակցություններ հենց այդ հեղափոխության փորձով մշակեցին կամ ավելի հստակեցրին իրենց ագրարային ծրագրերը:

Համառուսական սոցիալիստ-հեղափոխականների կուսակցությունը (Էստեռները), որը կազմակերպորեն ձևավորվել էր 1902թ. սկզբին մարդնիկական տիպի մի շարք խմբակների ու կազմակերպությունների միավորումից, իրենից ներկայացնում էր գյուղացիական տիպի կուսակցություն: Սրանք 1906թ. հունվարին իրենց առաջին համագումարում մշակեցին վերջնական ագրարային ծրագիրը¹¹⁰:

Էստեռները ագրարային հարցում առաջ էին քաշում ու պաշտպանում հողի **սոցիալիզացիայի** (համայնացման) գաղափարը: Սրա իմաստն այն էր, որ

¹⁰⁷ «ՀՀ Սահմանադրություն», Ե., 1995, էջ 36-37:

¹⁰⁸ ՀՀ ՊԿՊԱ, Ֆ.202, ց.1, գ.52, ք.17:

¹⁰⁹ Նույն տեղում, ք.18:

¹¹⁰ В. Н. Гинев, Аграрный вопрос и мелкобуржуазные партии в России в 1917г., Ленинград, 1977, с. 12-13 и 34.

պետք է բռնագրավվեին ամեն տիպի կալվածատիրական ու մասնատիրական հողերը և տրվեին համայնքների և տեղական ինքնակառավարման մարմինների տնօրինությանը: Այսինքն՝ վերացվելու էր հողի մասնավոր սեփականությունը և այն հայտարարվելու էր համաժողովրդական սեփականություն: Եւ այդ համաժողովրդական հայտարարված հողը հավասարական սկզբունքով, աշխատանքային ու սպառողական նորմաներով տրվելու էր ամբողջ գյուղացիությանը՝ նրանից օգտվելու համար¹¹¹: Նախատեսվում էր ժամանակ առ ժամանակ կատարել հողերի վերաբաժանություն ու հավասարեցում: Էսէռների ծրագրում հատկանշականն այն էր, որ նրանք ուզում էին վերացնել միայն հողի մասնավոր սեփականությունը՝ պահպանելով, սակայն, արտադրության մյուս միջոցների մասնավոր սեփականությունը: Այլ կերպ ասած՝ նրանք պաշտպանում էին միայն հողի սոցիալիզացիան, բայց ոչ արտադրության համայնացումը (ինչպես որ ծրագրում էին բոլշևիկները): Էսէռների նման մտահանգումը ելնում էր կոնկրետ այդ ժամանակվա գյուղացիության մեծամասնության այն պահանջից, որ իրենք երազում են հողի սոցիալիզացիայի մասին, սակայն անվստահությամբ և նույնիսկ թշնամաբար են վերաբերվում արտադրության սոցիալիզացիային: Գյուղացիական այս պահանջը այնքան պոպուլյար ու գերիշխող էր, որ պատահական չէ, որ գյուղացիական 242 նակագների ձևով այն նույնիսկ դրվեց 1917թ. հոկտեմբերի 26-ի (ն.տ.նոյեմբերի 8-ի) «Հողի մասին» հայտնի դեկրետի հիմքում:

Ռուսական առաջին հեղափոխության տարիներին ՀՅԳ-ն տեսնելով, որ Էսէռների ագրարային ծրագիրը ամենից ավելի է մոտ ու հոգեհարազատ գյուղացիության մեծամասնության ցանկությանը և ձգտումներին, ինքը ևս պաշտպանեց հողի սոցիալիզացիայի գաղափարը և այն ամրագրեց կուսակցության 1907թ. Վիեննայի 4-րդ ընդհանուր ժողովում ընդունված երկրորդ ծրագրում: ՀՅԳ-ն վազազույն ծրագրի Անդրկովկասին վերաբերող տնտեսական պահանջներում առաջադրվում էր հետևյալը.

1. Հողի սոցիալիզացիա (համայնացում)
2. Հողը դադարում է մասնավոր սեփականության և առուծախի առարկա լինելուց
3. Արքունի, կրոնական, կալվածատիրական հողերը դարձնել ժողովրդի սեփականություն
4. Հողից օգտվելու իրավունքը պատկանում է աշխատավորներին, աշխատավորական սկզբունքով:
5. Հողը պատկանում է համայնքին և տեղական ինքնակառավարման մարմիններին և այլն¹¹²:

¹¹¹ Ս. Նեկրասով, Ինչպիսի կարգեր են հարկավոր ժողովրդին, Ս.- Պետերբուրգ, 1907, էջ 30:

¹¹² «Ծրագիր Հ.Յ.Գ-աշնակցության», Թիֆլիս, 1917, էջ 27, «Հորիզոն», 1 հուլիսի 1917թ., «Արև», 28 ապրիլի 1917թ.:

Այդ նշանակում է, որ Գաշնակցությունը ագրարային խնդրում որպես էսեռական տիպի սոցիալիստական կուսակցություն՝ հողային-գյուղացիական խնդրում արտահայտվել է հողի համայնացման օգտին: Հողի համայնացման ու հավասարեցման մեջ գյուղացիությունը տեսնում էր սոցիալական արդարության երաշխիք: Այլ է խնդիրը, թե հետագայում այն կյանքում ինչպես կիրառործվեր: Մի խոսքով՝ ՀՅԳ հողային ծրագիրը, նմանվելով էսեռականին, հակոտնյա է եղել հողի մասնավոր սեփականությանը, առք ու վաճառքին, որովհետև աշխատավոր գյուղացիության մեծամասնությունը ինչպես Ռուսաստանում, այնպես էլ Հայաստանում այն ժամանակներում, մի շարք հանգամանքների թելադրանքով, դեմ էր արտահայտվում հողի մասնավոր սեփականությանը: Հայ գյուղացիությունը հիմնականում հավանություն է տվել Գաշնակցության, ասել է թե՛ էսեռների հողային ծրագրին: Բայց այդ ծրագրի գործադրումը կյանքում այլ ընթացք ստացավ:

Ռուսական սոցիալ-դեմոկրատական կուսակցության երկու թևերը՝ մենշևիկները և բոլշևիկները, դարձյալ ռուսական առաջին հեղափոխության տարիներին վերջնականորեն ձևակերպեցին և ավարտուն տեսք տվեցին իրենց ագրարային ծրագրերին: Եթե մենշևիկները հանդես էին գալիս հողի **մունիցիպալացման**, ապա բոլշևիկները՝ հողի **ազգայնացման** պահանջով: Մենշևիկյան մունիցիպալիզացիայի ծրագրի էությունն այն էր, որ կալվածատիրական հողերը մասնակի հետզման միջոցով պետք է վերցվեին նրանց տերերից և հանձնվեին տեղական ինքնակառավարման մարմիններին (մունիցիպալիտետներին), որոնք էլ իրենց հերթին հողը վարձակալության կտային գյուղացիներին: Սրանց կողքին պահպանվելու էր հողի սեփականատեր գյուղացիների կարգախումբը: Ռուսական Մոց.-դեմ. կուսակցության բոլշևիկյան թևը հանդես էր գալիս կալվածատիրական, եկեղացական և այլ տիպի հողերի անվերապահ բռնագրավման ու ազգայնացման, այսինքն՝ պետականացման պահանջով:

Երբ համեմատում ենք էսեռների հողի սոցիալիզացիայի և բոլշևիկների ազգայնացման ծրագրերը, ապա տեսնում ենք զգալի նմանություն և նույնքան էլ տարբերություն դրանց միջև: Ե՛վ հողի ազգայնացումը, և՛ «սոցիալիզացիան» ենթադրում են հողի մասնավոր սեփականության վերացում: Բայց եթե ազգայնացման ժամանակ հողը դառնում է պետական սեփականություն, ապա սոցիալիզացիայի ժամանակ այն անցնում էր համայնքների, կոոպերատիվների, տեղական ինքնակառավարման մարմինների տնօրինությանը: Էսեռները դեմ էին հողի պետականացմանը նրա համար, որպեսզի այն չընկներ պետական բյուրոկրատական ապարատի ձեռքը և չարաշահման չենթարկվեր¹¹³: Եվ պետք է ասել, որ, իրոք, նրանք ճիշտ էին իրենց մտավախություններին մեջ:

¹¹³ В. Н. Гинев, указ. соч., с.35; Программы политических партии в России, М., 1917, с. 53:

1906 թ. Էսեռների կուսակցության ներսում առաջացավ մի խումբ, որը պաշտպանեց հողի ազգայնացման պահանջը: Մրանք շուտով առանձնացան Էսեռներից և հիմնեցին «Ժողովրդական սոցիալիստների» (Էնէսների) ինքնուրույն կուսակցությունը¹¹⁴: Համառուսական Էսեռական, սոցիալ-դեմոկրատական՝ մենշևիկյան և բոլշևիկյան կուսակցությունների հայկական հատվածները (կազմակերպությունները) հետևողականորեն պաշտպանում էին իրենց մայր կուսակցությունների ծրագրային պահանջները ինչպես ռազմավարական ու մարտավարական այլ խնդիրներում, այնպես էլ ագրարային հարցում:

Ինչ վերաբերում էր ՀԺԿ, ապա նրա հողային ծրագիրը ուներ երկակի բնույթ: Իրենց առաջին ծրագրում սրանք մի կողմից հանդես էին գալիս կալվածատիրական, ուղեղային, կաբինետային, վանքապատկան, խոշոր մասնատիրական հողերի սոխիպողական (հարկադրական) բռնագրավման և ըստ աշխատանքային նորմաների երկրագործ ընտանիքներին բաժանելու օգտին¹¹⁵, իսկ մյուս կողմից պահպանվելու էին մանր հողատերերի, ազարակատերերի, գործարանների տարածքներում եղած զեմստվային և այլ հիմնարկությունների հողատիրման իրավունքները: Մասնավոր սեփականատերերի հողերը պետք է գնվեին պետության հաշվին՝ արդարացի գներով¹¹⁶: Որքան էլ անսովոր հնչի, բուրժուական համարվող այս կուսակցությունը դեմ է արտահայտվել առք ու վաճառքին¹¹⁷:

Արտախորհրդարանական քաղաքական ուժերից հողային խնդրի լուծման ամբողջական և հստակ ծրագիր չունեին «սպեցիֆիկները»: Մրանք թույլատրելի էին համարում թե՛ պետական և թե՛ մասնավոր հողային սեփականության ձևերը: Օրինակ՝ Գ. Անանունը Հայաստանում հողային հարցի լուծման ճանապարհին թույլատրելի էր համարում հողի պետականացումը և դրանք տեղական վարձակալության տալը հող մշակողներին՝ «խրախուսելով թե՛ կոլեկտիվ և թե՛ անհատական ձեռներեցությունը»¹¹⁸: Պետական հողատիրության կողքին Անանունը անհրաժեշտ էր գտնում նաև «նպաստել մասնավոր հողատիրության ինստիտուտի գոյությանը՝ նպատակ ունենալով խրախուսել մարդկանց մասնավոր ձեռներեցությունը»¹¹⁹: ՄԳ Հնչակյանները հողային խնդրում պաշտպանում էին մենշևիկների մունիցիպալացման գաղափարը¹²⁰:

Ինչպես տեսնում ենք, հայ քաղաքական կուսակցությունները, առաջնորդվելով իրենց կուսակցությունների ագրարային ծրագրերով, տարակարծիք էին հողային խնդրի լուծման ուղիների ու բովանդակության հարցում: Այսպես՝ հայ մենշևիկները պաշտպանում էին հողի մունիցիպալացման ծրա-

¹¹⁴ В. Н. Гинев, *Աշխ.*, էջ 36:

¹¹⁵ «Ծրագիր Հայ ժողովրդական կուսակցության», Ե., 1919, էջ 11-12:

¹¹⁶ «Ժողովուրդ», 29 սեպտեմբերի 1918թ.:

¹¹⁷ «Ծրագիր...», էջ 11:

¹¹⁸ «Հայաստանի կոոպերացիա», 30 նոյեմբերի 1919թ. (թիվ 19), էջ 581:

¹¹⁹ «Հայաստանի կոոպերացիա», 30 նոյեմբերի 1919թ., էջ 582:

¹²⁰ ՀՀ ԶԲԿՓ ՊԿԱ, Ֆ.4045, ց.1, գ.196, ք.7:

գիրը, ՀՅԳ-ն և էսէռները հողի համայնացման գաղափարը, իսկ Հայ ժողովրդականները վճռականորեն դեմ էին հողերի բռնագրավմանը և համայնացմանը: Վերջիններս պաշտպանում էին հողի մասնավոր սեփականությունը, բայց ոչ կալվածատիրական հողատիրությունը: Տեսակետերի այս բազմազանությունը խանգարում էր հողային խնդրի արագ լուծմանը: Համեմատության համար ասենք, որ հողային հարցի լուծումը Վրաստանում ավելի իրատես դրվեց և լուծման ավելի գործնական քայլեր արվեցին, քան Հայաստանում: 1918թ. նոյեմբերին հիմնական կառավարող վրաց սոց.-դեմ. կուսակցության խորհրդակցություններից մեկում որոշվեց հրաժարվել մենշևիկյան մունիցիպալիզացիայի ծրագրից և հողը որպես **մասնավոր սեփականություն ոչ բարձր գներով վաճառել գյուղացիներին**¹²¹: Այսինքն՝ ընտրվեց հողային հարցի լուծման ստոլիպինյան ուղին: Թույլատրվելու էր հողի ազատ առք ու վաճառք: Հիմնավորելով իրենց այս քայլը՝ վրաց մենշևիկների առաջնորդ Ն. Ժորդանիան գտնում էր, որ ստեղծված պայմաններում անկարելի է մունիցիպալիզացիան կյանքում իրականացնել: Այդ իսկ պատճառով 1918թ. նոյեմբերին գումարված վրաց մենշևիկների 8-րդ խորհրդաժողովը որոշեց՝ պետության հողային ֆոնդը վերածել կտորների (պարցելների) ու մատչելի գներով տալ գյուղացիներին որպես սեփականություն¹²²: Այդ վճռի դեմ բողոքեցին վրաց էսէռները, ազգային-դեմոկրատները, սոցիալիստ-ֆեդերալիստները, բայց գուր: Այն գործադրվեց, բայց ոչ, իհարկե, հստակորեն և հետևողականորեն:

Հողային խնդիրը այլ ընթացք ունեցավ Հայաստանում: Թեև խորհրդարանում հիմնականում տոն տվող ՀՅԳ խմբակցությունը էսէռականի հետ միասին պաշտպանում էր հողի սոցիալիզացիայի գաղափարը, սակայն, երբ խոսք էր գնում դրան օրենքի ուժ տալու և կենսագործելու մասին, ապա ՀՅԳ խմբակցության մեծամասնությունը ձեռնպահ էր մնում: Նույն կերպ հողերի համայնացմանը դեմ էր արտահայտվում նաև կառավարությունը՝ գտնելով, որ դեռևս վաղաժամ է անցնել նման քաղաքականության: Բոլոր խմբակցությունները, թերևս, մեկ հարցում միական էին, դա այն էր, որ պետք է վերացվեր կալվածատիրական հողատիրությունը: Հայ խմբակցությունների դրսևորած հետևողականությունը այս խնդրում պետք է բացատրել քաղաքական այն հանգամանքով, որ Հայաստանում մշակելի ու լավորակ հողերը գտնվում էին գերազանցապես մահմեդական կալվածատերերի ձեռքում, ուստի և պետք էր դրանց գրկել իրենց այդ տնտեսական հենարանից: Հայ ժողովրդականները նույնպես գտնում էին, որ կալվածատիրական հողերը պետք է հանձնել ժողովրդին¹²³:

Այսպիսով՝ հայ քաղաքական գրեթե բոլոր կուսակցությունները արտահայտվել են կալվածատիրական հողատիրության վերացման և հողի պետա-

¹²¹ «Նոր հորիզոն», 24 նոյեմբերի 1918թ., «Ժողովրդի ձայն», Թիֆլիս, 20 նոյեմբերի 1918թ.:

¹²² «Նոր հորիզոն», 24 նոյեմբերի 1918թ.:

¹²³ «Ժողովրդի ձայն», Թիֆլիս, 12 նոյեմբերի 1918 թ.:

կան կամ ինքնավարական-համայնքային սեփականության պայմաններում, դրանք երկրագործ բնակչությանը, ըստ աշխատանքային և սպառողական նորմաների, բաժանելու օգտին: Նրանք թույլատրելի են համարել հողի մասնավոր սեփականություն միայն փոքր չափերով (ցածր նորմաներով) և պայմանով, որ այն պետք է մշակվեր միայն երկրագործի և իր ընտանիքի անդամների սեփական աշխատանքով:

Հայաստանի բնակչությանը սովահարությունից փրկելու և երկրի արտադրողական ուժերը վերականգնելու ու խթանելու ամենահուսալի ուղին նախ սեփական գյուղատնտեսության զարգացումն էր: Իսկ դրա համար անհրաժեշտ էր հողային խնդրին սկզբունքային ու վերջնական լուծում տալ:

Ամենից առաջ նշենք, որ հողային հարցում առաջին պլանում կանգնած էր ոչ թե հողասակավությունը, այլ հողակարգավորումը, գյուղացիությանը անհրաժեշտ սերմացուով և գյուղատեխնիկայով ապահովելը: Օրինակ՝ խորհրդարանական հանձնաժողովներից մեկը՝ պատգամավոր Ս. Թորոսյանի գլխավորությամբ, ուսումնասիրելով Էջմիածնի ու Սուրմալուի գավառները, հանգել էր այն հետևության, որ հողային խնդրում «մտահոգիչը ոչ այնքան հողասակավությունն էր, որքան սերմացու չլինելը»¹²⁴: Պարզվել է, որ եղած հողերի միայն չնչին մասն է ցանված եղել: Որ Հայաստանի Հանրապետությունում հողային խնդիրը սուր բնույթ չուներ, փաստում էր նաև իշխող կուսակցությանը ոչ համակիր «սպեցիֆիկ» Գ. Անանունը և ուրիշներ¹²⁵: «Հողի պակասությունը չէ մեզ հաղթող երևույթը,- գրում էր Գ. Անանունը,- այլ հայկական սակավամարդությունը»¹²⁶: Շիրակի նահանգապետ Կ. Սասունին հայտնում էր, որ «Հայաստանում հողի պակաս չկար»¹²⁷: Բանն այն է, որ հանրապետության սահմաններում թուրք-մահմեդական տարրերի աստիճանական արտագաղթի հետևանքով գոյացել էին մեծ քանակությամբ անմշակ ու ամալացող հողեր: Խնդիրը միայն սահմանված կարգով ու նորմաներով դրանք կարիքավոր ազգաբնակչությանը բաշխելն էր և մշակության համար համապատասխան պայմանների (սերմացուի, գործիքների, ոռոգման և այլն) ապահովումը:

Գալով հողային խնդրի խորհրդարանական քննարկումներին՝ պետք է ասել, որ հողային օրենսդրության բացակայության պայմաններում, ի սկզբանե խորհուրդը որոշեց առաջնորդվել 1917 թ. դեկտեմբերի 16-ի Անդրկովկասյան կոմիսարիատի և 1918 թ. մարտի 7-ի Անդրկովկասյան Սեյմի ընդունած արքունական, նախկին ուղելային, եկեղեցական, վանքապատկան, մասնավոր հողատերերի (կավաճատերերի), ինչպես նաև հիմնարկությունների և իրավական անձերի կավաճաքների բռնագրավման մասին հողային օրենքնե-

¹²⁴ ՀՀ ՊԿՊԱ, ֆ.198, ց.1, գ.2, ք.48:

¹²⁵ «Նոր սերունդ», 17 մարտի 1920թ.:

¹²⁶ «Հայաստանի կոոպերացիա», 30 սեպտեմբերի 1919թ., էջ 581:

¹²⁷ Կ. Սասունի, Սայիսյան խոռովությունը և թաթարական ապստամբ շրջանները, Պեյ-րուք, 1968, էջ 152-153:

րով¹²⁸: Մասնավորապես Սեյմի մարտի 7-ի թիվ 203 օրենքը սահմանում էր հետևյալը.

1. Բացի այն հողաբաժիններից, որ հիշված են ներկա օրենքի 2-րդ հոդվածում, մնացած բոլոր մասնատիրական հողերը ձրիաբար գրավվում են և կազմում հողային ֆոնդ.

2. Գրավման ենթակա կալվածքների տերերին թողնվում են հողաբաժիններ հետևյալ չափերով. ա) եթե գրավող կալվածքը գտնվում է մի շրջանում, ուր արժեքավոր կուլտուրաների տնտեսություն է վարվում՝ 7 դեսյատին. բ) հացահատիկային տնտեսության շրջանում՝ 15 դեսյատին. գ) գերազանցապես անասնապահական տնտեսության շրջանում՝ 40 դեսյատին¹²⁹:

Ծանոթագրության կարգով տեղեկացնենք, որ հողային կոմիտեներին իրավունք էր տրվում, կախված տեղական պայմաններից, կատարել հողային հավելում հետևյալ չափով՝ առաջին կարգախմբինը՝ մինչև 10 դես., երկրորդինը՝ մինչև 20 և երրորդինը՝ մինչև 50 դեսյատին¹³⁰:

Համաձայն այդ օրենքի՝ բռնագրավման ենթակա մնացած ավելցուկ հողերը վերածվելու էին պետական հողային ֆոնդի և հողային կոմիտեների կողմից աշխատանքային ու սպառողական նորմաներով (չափաբաժիններով) տրվելու էին աշխատավոր գյուղացիության կարիքները բավարարելու համար:

Ինչպես տեսնում ենք, Սեյմի մարտի 7-ի հողային օրենքը առհասարակ չէր վերացնում հողի մասնավոր սեփականության ինստիտուտը, նախկին կալվածատերերին լիովին չէր հողագրկում, այլ միայն հարկադրաբար կրճատում էր նրանց ունեցածի չափը՝ սահմանելով մինչև 7, 15 և 40 դեսյատին:

Ավելացնենք, որ Սեյմի մարտի 7-ի օրենքի Հայաստանում կիրարկման դեպքում հողային մեծ ֆոնդ չէր գոյանա: Բանն այն է, որ, ինչպես հայտնի է, Անդրկովկասյան նահանգների մեջ կալվածատիրական հողատիրությունը Երևանի նահանգում թույլ էր զարգացած: Կովկասյան տարեցույցի 1907թ. տվյալներով՝ Երևանի նահանգում (նահանգի վեց գավառներում, առանց Նախիջևանի գավառի) մասնավոր կալվածատիրական հողերը կազմել են ընդամենը 79475 դեսյատին (կլորացրած ընդամենը 80 հազար դեսյատին) հողային սեփականություն¹³¹: Եթե նկատի ունենանք, որ նահանգի հողատերերը եղել են հիմնականում մանր հողային սեփականատերեր և որ այդ 80 հազար դեսյատինից պետք է դուրս հանվեն ամեն սեփականատիրոջը հասնելիք չափաբաժինները՝ առնվազն 7,15 և 40 դեսյատինով, ապա այդ 80 հազար դեսյատին հողային ֆոնդը կարող էր շուրջ կիսով չափ կրճատվել:

¹²⁸ ՀՀ ՊԿՊԱ, Զ.203, գ.1, գ.753, ք.8, «Հորիզոն», 10 մարտի 1918 թ.:

¹²⁹ Сборник приказов, инструкций и разъяснений по министерству земледелия, сост. Асатиани, Тифлис, 1918, с. 46; «Հայաստանի կոոպերացիա», 15 հունիսի 1919 թ., (թիվ 12), էջ 375:

¹³⁰ Сборник законов..., с. 46.

¹³¹ Кавказский календарь на 1907г., Тифлис, 1906, с. 72-80.

Հիմք ընդունելով Անդրկովկասյան Մեյմի հողային օրենքը՝ Հայաստանի պայմանների համար խորհրդարանը 1918թ. դեկտեմբերի 7-ին հատուկ որոշումով գրեթե նույնությամբ ընդունեց Մեյմի հիշյալ հողային օրենքը: Այսինքն՝ նախկին կալվածատերերին թողնվում էին հողաբաժիններ միայն հետևյալ չափերով. ա) արժեքավոր կուլտարաների մշակության շրջաններում՝ 7 դեսյատին. բ) հացահատիկային տնտեսության շրջաններում՝ 15 դեսյատին և գ) անասնապահական շրջաններում 40 դեսյատին¹³²: Գյուղատնտեսության և պետգույքերի գլխավոր վարչությանը կից հիմնվեց հողային գլխավոր կոմիտե (նախագահն էր Թ. Տոշյանը), իսկ տեղերում՝ գավառական հողային կոմիտեներ, որոնք և պետք է կատարեին կալվածատիրական, եկեղեցական, վանքապատկան և այլ մասնատիրական տիպի կալվածքների գրավման և դրանք հողագործի ու սակավահող բնակչությանը վերաբաժանման գործը: Բացի այդ, ընդունվեց ժամանակավոր հողային կոմիտեների կանոնադրություն:

Համաձայն կանոնադրության՝ վերոհիշյալ նորմաներից ավել հողերը անհատույց վերցվում էին նրանց նախկին տերերից և հանձնվում հողային կոմիտեների իրավասությանը: Հողային կոմիտեները՝ որպես դեմոկրատական իշխանության մարմիններ, պետք է որոշեին հողագործի և սակավահող գյուղական բնակչության քանակը և ըստ աշխատանքային ու սպառողական նորմաների (ըստ կարիքի և մշակելու հնարավորության)՝ բաժանել ժողովրդին¹³³:

Սակայն պետք է նշել, որ հողային կոմիտեների կողմից կալվածատիրական, եկեղեցապատկան և այլ մասնատիրական հողերի բռնագրավման ու պետականացման գործը կատարվում էր շատ դանդաղ ու անկանոն կերպով¹³⁴: Հողային վերափոխումների խնդրով մտահոգ էսեռների կուսակցության պաշտոնաթերթը իր համարներից մեկում, զետեղելով Հողային գլխավոր կոմիտեի հայտարարությունը, տեղեկացնում էր, որ արդեն կազմակերպված են գավառական հողային կոմիտեներ, և նրանք սկսել են ի կատար ածել հողային բարեփոխումների վերաբերյալ օրենքները¹³⁵: Այդ ամենը հայտարարությունների կարգով կարծես նորմալ էր ընթանում, սակայն իրական կյանքում հողերի բռնագրավումների իրագործումը հանդիպում էր մի շարք դժվարությունների ու արգելափակոցների:

Այստեղ հարկ է ուշադրություն դարձնել մի շատ էական հանգամանքի վրա: Հողային խնդրի ձգձգման ու անորոշության պատճառներից մեկն այն էր, որ, եթե հանրապետության հողային իրավասության մարմինները անցնեին, օրինակ, եկեղեցական ու վանքապատկան հողերի բռնագրավման, այդ

¹³² ՀՀ ՊԿՊԱ, Ֆ.203, ց.2, գ.129, ք.4:

¹³³ «Հորիզոն», 4 հունվարի 1918 թ.:

¹³⁴ ՀՀ ՊԿՊԱ, Ֆ.198, ց.1, գ.2, ք.48:

¹³⁵ «Սոցիալիստ հեղափոխական», 21 օգոստոսի 1919թ.:

նշանակում էր, որ պետք է բռնագրավվեին նաև Ս. Էջմիածնի կալվածքները: Մինչդեռ հանրահայտ է, որ այդ կալվածքների եկամուտներով էին պահվում Գևորգյան ճեմարանը, մատենադարանը, տպարանը, թանգարանը և այլն: Ուստի՝ խլել այդ հողերը նշանակում էր գրկել հայ ազգին իր նվիրական հիմնարկություններից: Նման քայլը կարող էր առաջ բերել ժողովրդի ընդվզում, ինչպիսին որ տեղի ունեցավ ցարիզմի օրոք՝ 1903-1905 թթ. ընթացքում: Հասկանալի է, որ Դաշնակցությունը հազիվ թե գնար նման քայլի: Եղավ մի պահ, երբ առանձին «տաք գլուխների» պատճառով, որոշ սառնություն ու օտարացում նկատվեց եկեղեցու և իշխանությունների միջև: Բայց դա հարթվեց: Կառավարությունը չգնաց ինքնասպանության: ՀԺԿ, որը նույնպես ազգային էր, գտնում էր, որ վանքապատկան հողերը առայժմ պետք է մնան անձեռնմխելի (չնայած իրենց ծրագրերում խոսվում էր դրանց բռնագրավման մասին) և հողային հարցի վերջնական ու համապարփակ լուծումը թողնել Հայոց ապագա Սահմանադիր ժողովին¹³⁶: Որոշվում է Էջմիածնապատկան կալվածքները չբռնագրավել¹³⁷: Այստեղ մենք տեսնում են երկվություն ու հակասություն հիմնական կառավարող կուսակցության որդեգրած ագրարային ծրագրի և գործնական քաղաքականության միջև:

Հողային խնդրի ձգձգման պատճառներից մեկն էլ այն էր, որ ՀՀ սահմանները վերջնականապես որոշված չէին: Դրա համար էլ իշխանությունները գտնում էին, որ հնարավոր չէ հողային ֆոնդի քանակը ճիշտ որոշել և հաստատուն հողային վերաբաժանություն կատարել: Այդ իսկ պատճառով շատերը գտնում էին, որ պետք է բավարարվել հողային ժամանակավոր օրենքներով ու մասնակի բարեփոխումներով մինչև որ կլուծվի Հայկական հարցը, կիրավիրվի Միացյալ Հայաստանի Սահմանադիր ժողովը, և այն ժամանակ հողային խնդիրը արմատական ու համապարփակ լուծում կստանա: Ինքնին հասկանալի է, որ վերը նշված հանգամանքները առաջ էին բերում անորոշություն հողային խնդրի լուծման գործում:

Անարդյունավետ էր հողային կոմիտեների աշխատանքը¹³⁸: Սրանք չունեին ավելցուկ հողերի գրավման և կարիքավոր գյուղացիներին հատկացման հստակ ծրագիր: Էլ չենք խոսում, որ իրենց աշխատանքի ընթացքում երբեմն թույլ էին տրվում չարաշահումներ ու անարդարություններ: Այսպես, օ-

¹³⁶ «Ժողովուրդ», 25 հոկտեմբերի 1918թ.:

¹³⁷ «Հորիզոն», 31 դեկտեմբերի 1917թ.:

¹³⁸ Ավելի ուշ՝ 1920 թ. հունիսի 4-ի հողային օրենքով անգործության մատնված հողային կոմիտեները փոխարինվեցին գյուղնախարարի կողմից նշանակվող հողային հատուկ մարմիններով, որոնք ունեին ավելի լայն իրավասություններ: Երեքական հոգուց բաղկացած հողային այս մարմինները ևս կոչված էին իրականացնելու մասնատիրական և լքյալ հողերի պետականացման, դրանք սակավահող գյուղացիներին բաշխման, գաղթականության տեղավորման, տեղերում ծագած հողային վեճերի կարգավորման և այլ խնդիրներ: Այս ուղղությամբ որոշ գործնական քայլեր կատարվեցին, սակայն հետագա քաղաքական դեպքերը թույլ չտվեցին շարունակել հողային բարեփոխումների գործընթացը:

րինակ, ՀՅԳ- Էջմիածնի շրջանային կոմիտեի պաշտոնաթերթը տեղեկացնում է, որ Էջմիածնի և Սուրմալուի գավառների հողային կոմիտեն հողերի գրավումները փոխանակ կատարելու խոշոր կալվածատերերից, դրանք իրականացում է միայն առանձին մանր հողատերերի նկատմամբ, որոնց տարածքը չի գերազանցում 12-14 դեսյատին¹³⁹: «Մենք զարմանում ենք,- հարց է տալիս թերթը,- թե հողային կոմիտեն ինչո՞ւ է մի կողմ թողել հենց իր կողքին ընկած վանքապատկան 500 դեսյատին հողերը և Շադրուի Աթարբեկյանների հարյուրավոր դեսյատին տարածությամբ կալվածքները... և ընկել է հեռավոր գյուղեր ու ընդունում է մանր հողեր»¹⁴⁰: «Սեզ համար,- եզրահանգում էր «Արարատյան աշխատավորը», - մի բան է պարզ, որ մեր հիշատակված հողային կոմիտեն գործունյա և աշխատունակ չէ»¹⁴¹: Կառավարությունը նախատեսել էր Աթարբեկյանների 460 դեսյատին կալվածքը դարձնել փորձագուցադրական հողամաս¹⁴²:

Այնուամենայնիվ, կիսատ-պռատ կերպով Նոր Բայազետի, Կոտայքի, Ծաղկաձորի, Էջմիածնի շրջաններում հողային կոմիտեների կողմից կատարվեցին հողերի մասնակի պետականացման և բաշխման ձեռնարկներ¹⁴³: Այսպես, պատմական մի տեղեկանքից իմանում ենք, որ մինչև 1919թ. վերջերը հողային կոմիտեները ընդունել էին 21 մասնատիրական և 7 վանքապատկան կալվածքներ՝ ընդամենը 8775 դեսյատին 1439 քառ. սաժեն¹⁴⁴:

Չնայած հողային հարցի համապարփակ լուծումը ձգձգվում էր, բայց խորհրդարանն ու կառավարությունը աչքաթող չէին անում գյուղատնտեսության զարգացման համար անհրաժեշտ իրավական և ֆինանսական պայմանների ստեղծումը: Բացի հողային բարեփոխումների ուղղությամբ ձեռնարկված մասնակի քայլերից՝ խորհրդարանն ու կառավարությունը մտահոգ էին գյուղացիական տնտեսությունները անհրաժեշտ սերմացուով և գյուղտեխնիկայով ապահովելու խնդրում:

Հանրապետության իշխանությունները քաջ գիտակցում էին, որ երկրի համար կենսական նշանակություն ունեւ գյուղատնտեսության զարգացումը, մասնավառդ, որ շատ թարմ էր 1918-1919 թթ. ձմռան աղետալի սովի հիշողությունը: Արդեն 1919թ. մարտի 29-ի օրենքով, գյուղատնտեսական աշխատանքները սկսվելուն պես 50 մլն ռուբլի վարկ բացվեց սերմացու և գյուղատնտեսական գործիքներ (ինվենտար) ձեռք բերելու համար¹⁴⁵: 1919թ. սեպտեմբերին Երևանում բացվեց երկրագործական գործիքների ու մեքենաների կենտրոնական պահեստ¹⁴⁶: 1919թ. ամռանը արտասահմանից ստացվեցին 15 հազար

¹³⁹ «Արարատյան աշխատավոր», 2 հոկտեմբերի 1919 թ.:

¹⁴⁰ «Արարատյան աշխատավոր», 2 հոկտեմբերի 1919 թ.:

¹⁴¹ Նույն տեղում:

¹⁴² ՀՀ ՊԿՊԱ, Ֆ.200, ց.1, գ.422, ք.27:

¹⁴³ Ռուբեն, նշվ. աշխ. հ.Է, Լոս Անձելես, 1952, էջ 298:

¹⁴⁴ ՀՀ ՊԿՊԱ, Ֆ.200, ց.1, գ.422, ք.27:

¹⁴⁵ ՀՀ ՊԿՊԱ, Ֆ.200, ց.1, գ.86, ք.28, գ.422, ք.27:

¹⁴⁶ Նույն տեղում, գ.422, ք.27:

գերանդիներ ու մանգաղներ և մատչելի գներով վաճառվեցին ազգաբնակչությանը¹⁴⁷։ Օգնությունը հիմնականում կատարվում էր դրսից։ 1919 թ. դեկտեմբերին խորհրդարանը առանձին օրենքով թույլատրում է ֆինանսների նախարարին արտասահմանից գնվելիք սերմացուի և պարենային այլ մթերքների համար 300 մլն. ռուբլու արտաքին փոխառություն կնքել՝ տասից ոչ ավել տոկոսով¹⁴⁸։ Գյուղատնտեսական գործիքներ գնելու նպատակով 1920թ. մարտի 1-ին խորհրդարանը բացեց 50 մլն. ռուբլու վարկ։ 1920թ. գարնանացանի սերմացու հայթայթելու համար փետրվարի 16-ի օրենքով բացվեց 227500 հազար ռուբլու նախահաշվով վարկ¹⁴⁹։ Մայիսին հանրապետության գյուղնախարարությունը ձեռք բերեց 9 տրակտոր և այլն¹⁵⁰։

Այս ամենով հանդերձ, ՀՀ-ում այլևայլ խնդիրների նման հողային խնդիրը ևս ամբողջությամբ վերցրած մնաց չլուծված։ Սրա հիմնական պատճառները պետք է փնտրել ոչ միայն կառավարության ու խորհրդարանի ցուցաբերած հապաղման ու անվճռականության, այլ նաև հանրապետության կարճատև կյանքի (ժամանակի սղության), երկրի սոցիալ-քաղաքական զարգացման անորոշության, իսկ վերջում՝ դեպքերի ու իրադարձությունների աննպաստ զարգացման մեջ։

4. Գաղթականության հարցերը խորհրդարանում

ՀՀ ներքին կյանքի բարդ հիմնահարցերից էր գաղթականության ու որբերի խնդիրը, որը մշտապես գտնվել է խորհրդի ուշադրության կենտրոնում։ Այդ նպատակով ստեղծվել էր առանձին՝ «գաղթականության» հարցերի հանձնաժողով։ Գաղթականության խնդրով էին զբաղվում նաև նախարարների խորհրդի խնամատարության և ներքին գործերի նախարարությունները։

Խորհրդում պարբերաբար լսվել են գաղթականության վիճակի, տեղաբաշխման, պարենավորման, խնամքի, աշխատանքի և այլ հարցեր։ 1918 թ. սեպտեմբերի 1-ի նիստում գաղթականության խնդրի շուրջ հանգամանալի զեկուցումով հանդես եկավ պատգամավոր Ռ. Տեր-Սիմապյանը¹⁵¹։ Այստեղ 31 կողմով անցնում է սոց.- դեմ. խմբակցության առաջարկած բանաձևը, որով պահանջվում էր շուտափույթ օգնություն հասցնել որբերին և կազմակերպել գաղթականությանը աշխատանքի մեջ ներգրավման գործը¹⁵²։

¹⁴⁷ Նույն տեղում, Ֆ.199, ց.1, գ.43, ք.129։

¹⁴⁸ Նույն տեղում, Ֆ.202, ց.1, գ.333, ք.44։

¹⁴⁹ Նույն տեղում, ք.80։

¹⁵⁰ ՀՀ ՆՊ ՊԿԱ, Ֆ.102, ց.1, գ.10, ք.31։

¹⁵¹ «Կառավարության լրաբեր», 6 սեպտեմբերի 1918թ.։

¹⁵² Նույն տեղում։

1918 թ. սեպտեմբերի 28-ին խորհուրդն ընդունեց ևս մի օրենք «Կարիք ունեցող գաղթականների խնամատարության մասին»: Համաձայն այս օրենքի՝ աշխատունակ գաղթականներին տրվելու էր աշխատանք, իսկ անաշխատունակներին՝ նպաստ: Բացի այդ (թիվ 15 օրենքով)՝ յուրաքանչյուր գաղթական ընտանիքի, պետական ազատ, լքված ու անտեր հողերի հաշվին, տրվում էր հողակտոր աշխատող ձեռքերի թվի համեմատ և այլն¹⁵³: Մեկ այլ օրենքով (հոկտեմբերի 8-ի) նախատեսվում էր գաղթական կանանց համար բացել պետական ջուլիականոցներ, որոնք պետք է ապահովվեին համապատասխան բամբակահումքով ու սարքավորումներով¹⁵⁴:

Հայաստանի խորհրդի 1918 թ. հոկտեմբերի 11-ի նիստում դարձյալ լավեց գաղթականության հարցը: Պաշտոնապես արձանագրված 330 հազ. հոգուց շտապ օգնության կարիք ունեին 10 հազ. որբեր, 25 հազար անճարներ, 1000 հաշմանդամներ (անկյալներ), 26,5 հազար մասնակի օգնության կարիք ունեցողներ¹⁵⁵: Կառավարության կազմած նախահաշվով 10 հազար որբի ծախսերը հոգալու համար ամսական պահանջվում էր 1,5 մլն ռուբլի: Գաղթականի դրամական նպաստը օրական կազմում էր 60 կոպ. (մեկ շնչի հաշվով): Գաղթականների սոցիալական պաշտպանվածության համար որպես նվազագույն չափաբաժին յուրաքանչյուր շնչին օրական տրվում էր կես ֆունտ ալյուր¹⁵⁶: 1918 թ. հոկտեմբերի 1-ից մինչև 1919 թ. հունվարի 1-ը գաղթականությանը ցույց տրվելիք օգնության ծախսերը, ըստ կառավարության կազմած նախահաշվի, կազմել էին 12736250 ռուբլի (շուրջ 13 մլն. ռուբլի)¹⁵⁷:

Բացի օրենսդրական ակտեր ընդունելուց՝ խորհրդարանը ժամանակ առ ժամանակ շրջաններ էր գործուղում հանձնախմբեր՝ տեղում մոտիկից ծանոթանալու գաղթականության վիճակին ու խորհրդարանին համապատասխան եզրակացություններ ու առաջարկություններ ներկայացնելու համար: Այսպես՝ 1918 թ. դեկտեմբերին խորհրդարանական հանձնախմբեր գործուղվեցին Սուրմալուի և Ղամարլուի շրջաններ, ուր գաղթականության դրությունը շատ ավելի ծանր էր: Խորհրդարանի փոխնախագահ Գ. Տեր-Խաչատրյանի (ՀԺԿ) առաջարկով որոշվում է Սուրմալու և Ղամարլու գործուղվող պատգամավորական հանձնախմբերին լիազորել «տեղում անել կարգադրություններ կառավարության միջոցով»¹⁵⁸:

Թշվառ գաղթականությանը շուտափույթ և անհրաժեշտ օգնություն ցույց տալու համար 1918թ. երկրորդ կեսից ՀՀ տարածքը բաժանվել էր տասը գաղթականական շրջանների: Նկատենք, որ Հայաստանում և Կովկասում գտնվող հայ գաղթականության թվաքանակի վերաբերյալ եղած տվյալները

¹⁵³ ՀՀ ՊԿՊԱ, Ֆ.200, գ.1, գ.86, թ.6, Ֆ.199, գ.1, գ.4, թթ.2-3:

¹⁵⁴ ՀՀ ՊԿՊԱ, Ֆ.200, գ.1, գ.86, թ.7:

¹⁵⁵ «Կառավարության լրաբեր», 15 հոկտեմբերի 1918 թ.:

¹⁵⁶ «Հատաջ», 6 ապրիլի 1920 թ.:

¹⁵⁷ ՀՀ ՊԿՊԱ, Ֆ.200, գ.1, գ.36, թ.9:

¹⁵⁸ «Չանգ», 5 հունվարի 1919 թ.:

հաճախ տարբեր են: Դրա հիմնական պատճառն այն է, որ արևմտահայ գաղթականն ու արևելահայ փախստականը, ըստ քաղաքական հանգամանքի, գտնվել են անընդհատ տեղաշարժերի մեջ, էլ չենք հաշվում այն, որ գաղթականության առանձին խմբեր էլ արտագաղթել էին Անդրկովկասից կամ էլ ներգաղթել այնտեղ: Դրա համար էլ հաշվառող մարմինները հնարավորություն չեն ունեցել գաղթականության թվաքանակի վերաբերյալ ստույգ և հաստատուն տվյալներ տալ: Խնամատարության նախարարության 1918թ. դեկտեմբերի 6-ի թվագրված թիվ 1 բյուլետենի համաձայն՝ Հայաստանի տարածքում առկա գաղթականության թիվը կազմել է մոտ 350 հազար մարդ. 1) Երևանում (իր արվարձաններով)՝ 75 հազ. գաղթական, 2) Աշտարակի շրջ.՝ 30, 3) Ախտա-Ելենովկա՝ 22, 4) Բաշգառնիի՝ 15, 5) Նոր Բայազետի՝ 38, 6) Գարալագյազի՝ 36, 7) Բաշ-Ապարանի՝ 35, 8) Էջմիածնի՝ 70, 9) Ղարաքիլիսայի՝ 16 և 10) Գիլիջանի՝ 13 հազար մարդ, ընդամենը՝ 350 հազար գաղթական¹⁵⁹: Որոշ հաշվումներով 1918 թ. երկրորդ կեսին գաղթականությունը կազմել է ՀՀ ողջ ազգաբնակչության շուրջ 45 տոկոսը¹⁶⁰:

Գաղթականությանը կարելի էր բաժանել երկու խմբի (մասի)՝ արևմտահայ և արևելահայ գաղթականների: Արևելահայ գաղթականներին կարելի է անվանել փախստականներ: Ըստ «Հոսանք» թերթի հրապարակած տվյալների՝ առկա ողջ գաղթականներից 180 հազարը արևելահայ էին, իսկ 170 հազարը՝ արևմտահայ¹⁶¹: Արևելահայ գաղթականները հիմնականում ներկայացնում էին 1918 թ. թուրքական արշավանքի և արևելահայ մի շարք շրջանների՝ Կարսի, Ալեքսանդրապոլի, Շարուր-Նախիջևանի, Սուրմալուի, Թալինի, Սարդարապատի, Ղարաքիլիսայի և այլնի բռնագավթման հետևանքով իրենց բնակության վայրերից արտագաղթածները, որոնք դարձել էին փախստական-գաղթական: Սակայն, երբ 1918 թ. վերջերից աշխարհամարտում պարտված թուրքերը հետ են քաշվում Անդրկովկասից ու Արևելյան Հայաստանից, արևելահայ փախստականները կրկին վերադառնում են թուրքերից մաքրված իրենց նախկին բնակության վայրերը: Մինչդեռ արևմտահայ տարագիրները, որոնց մի զգալի մասը դեգերում էր նաև Վրաստանում և Հյուսիսային Կովկասում, կայուն բնակություն չէր կարողանում գտնել ու ներքուտ սպասում էր հայկական հարցի արդարացի լուծմամբ վերադառնալ իր հայրենիք՝ «Երկիր»: Քանի որ Հայկական հարցի լուծումը ձգձգվում էր, ապա մնում էր գաղթականության տեղավորման խնդիրը լուծել հանրապետության տարածքում: Իսկ դա մասամբ հնարավոր էր լինում շնորհիվ այն հանգամանքի, որ տարբեր դրդապատճառներով Հայաստանից արտագաղթում էին շատ այլազգիներ՝ գերազանցապես թուրք-թաթարներ: Ուստի և դրանց ամայացած գյուղերն ու բնակավայրերը զբաղեցնում էր արևմտահայ գաղթականությունը:

¹⁵⁹ ՀՀ ՊԿ ՊԱ, Ֆ.199, գ.22, ք.4, «Հոսանք», 14 նոյեմբերի 1918 թ.:

¹⁶⁰ «Ժողովուրդ», 12 սեպտեմբերի 1918 թ.:

¹⁶¹ «Հոսանք», 14 նոյեմբերի 1918 թ.:

Կառավարության ու խորհրդարանի առանձնահատուկ հոգածության առարկա էր որբերի խնդիրը: 1918թ. հոկտեմբերի 11-ի նիստում ընդունված օրենքով գաղթական որբերի խնամքի և դաստիարակության գործը պետությունը վերցրել էր իր վրա: Այդ գործի անմիջական վարույթը հանձնվել էր հանրային խնամատարության նախարարությանը: Վերջինս համակարգում բացվել էր հատուկ որբանոցային բաժին: Որբանոց էին ընդունվում մինչև 15 տարեկան ծնողազուրկ կամ անխնամակալ երեխաները¹⁶²:

Դժնդակ պայմաններում հայտնված գաղթականության վիճակը փոքրինչ բարելավելու համար խորհրդարանը և խնամատարության նախարարությունը համագործակցում էին իրար հետ: Խնամատարության նախարար Ալ. Խատիսյանը կազմել էր գաղթականության խնդրին վերաբերող գործունեության ծրագիր, որին հավանություն է տրվում խորհրդի 1918 թ. դեկտեմբերի 11-ի նիստում¹⁶³:

1918թ. վերջին (դեկտեմբերին) խնամատարության նախարարության հավաքած տվյալներով՝ Հայաստանում կային մոտ 40 հազար թափառական ու անտեր որբեր, որոնցից տակավին հաշվառման և պետական ու բարեգործական կազմակերպությունների խնամքի տակ էին վերցվել ընդամենը 15612-ը: Հանրապետությունում կային շուրջ հինգ տասնյակի հասնող որբանոցներ, որոնցից ամենամեծը Ալեքսանդրապոլինն էր՝ 1219 որբով¹⁶⁴:

1919 թ. մայիսի 1-ից խնամատարության նախարարության ենթակայության որբանոցները իրենց ավելի քան 14 հազ. որբերով ու կահավորանքով հանձնվում են Ամերիկյան նպաստամատույց կոմիտեի խնամակալությանը¹⁶⁵: Հայաստանի կառավարության հետ կայացրած համաձայնությամբ՝ օգնության Ամերիկյան կոմիտեն իր վրա էր վերցրել բոլոր որբանոցների ծախսերը¹⁶⁶: Միաժամանակ, ջանքեր գործադրվեցին նոր որբանոցներ բացելու ուղղությամբ:

Բացի պետական հաշվառման մեջ գտնվող որբերից՝ կային նաև թափառական որբեր: Այսպես, օրինակ, Կարսի մարզի Բեզլի Ահմեդ և Նախիջևան տեղամասերում կային 1500-ի չափ անապաստան որբեր, իսկ Իջևանի շրջանում մոտ 200¹⁶⁷: Նախատեսվում էր անապաստան որբերին ևս հանձնել պետական որբանոցներին:

Խորհրդարանի տեսադաշտում էր ոչ միայն գաղթականության ու հատկապես որբերի խնամքի ֆինանսական ապահովության, այլև նրանց աշխատանքի մեջ ներգրավելու գործը: Այսպես, օրինակ, 1919 թ. դեկտեմբերին արդեն երկրորդ խորհրդարանի հաստատած մի օրենքով, խնամատա-

¹⁶² ՀՀ ՊԿՊԱ, Ֆ.200, ց.1, գ.86, ք.8:

¹⁶³ «Չանգ», 5 հունվարի 1919թ.:

¹⁶⁴ ՀՀ ՊԿՊԱ, Ֆ.199, ց.1, գ.22, ք.8, 84:

¹⁶⁵ ՀՀ ՊԿՊԱ, Ֆ.202, ց.1, գ.41, ք. 90:

¹⁶⁶ ՀՀ ՊԿՊԱ, Ֆ.202, ց.1, գ.131, ք.133բ:

¹⁶⁷ «Հատաջ», 6 ապրիլի 1920թ.:

րության և աշխատանքի նախարարության միջոցով, նախատեսվում էր 2550 որբերի համար բացել 35 արհեստանոց. 7-ը՝ հյուսնության, 8-ը՝ կոշկակարության, 8-ը՝ կարուձևի, 4-ը՝ ձեռնարվեստի, 3-ը՝ գուլպայագործի և 5-ը՝ ջուլհականոցի¹⁶⁸:

1919 թ. սեպտեմբեր-դեկտեմբեր ամիսների հաշվով՝ որբախնամ նպատակների համար խնամատարության և աշխատանքի նախարարության անունով բացվում է շուրջ 65 մլն ռուբլու վարկ¹⁶⁹:

Անշուշտ, գաղթականության խնամատարության ոլորտում իշխանության առանձին օղակներ ու անհատ պաշտոնավորներ թույլ էին տալիս չարաշահումներ: Ցավոք, մնան երևույթներ դրսևորվում էին կյանքի այլ բնագավառներում: Բայց, կարծում ենք, իրավացի չեն այն քննադատները, ովքեր մնան չարաշահումները անվերապահորեն վերագրում են ամբողջ կառավարությանը, իշխանության բոլոր մարմիններին ու պաշտոնավորներին: Պետական իշխանության մարմիններում աշխատում էին մեծ թվով ազնիվ ու իրենց գործին անձնուրացորեն մվիրված մարդիկ, որոնք օրնիբուն տառապում էին ժողովրդի հոգսերով ու կարիքներով, անմիջապես շփվում էին նրա հետ, երբեմն վարակվում էին համաճարակային հիվանդություններով և նրանց շրջանում ևս հաճախակի էին մահվան դեպքերը: Այդպիսի պայծառ դեմքերից մեկն էր, օրինակ, նախարար Արամ Մանուկյանը:

Գաղթականության սովոր գանգվածներ կային Վրաստանում, Հյուսիսային Կովկասում և այլուր: Խորհրդարանը, կառավարությունը միջոցառումներ էին ձեռնարկում գաղթականությանը Վրաստանից, Հյուսիսային Կովկասից, Բաքվից, Իրանից, Հյուսիսային Միջագետքից հայրենիք փոխադրելու ուղղությամբ: Վրաստանի սահմաններում գտնվող հայ գաղթականությանը օգնություն ցույց տալու համար խորհրդարանի հոկտեմբերի 23-ի թիվ 29-րդ - նիստում ընդունվում է օրինագիծ Վիրահայ Ազգային խորհրդին 5 մլն ռուբլի միանվագ նպաստ տրամադրելու մասին¹⁷⁰: Իսկ նոյեմբերի 16-ին խորհրդի 37-րդ նիստում հաստատվում է մի օրինագիծ, որով արտագործնախարարության հաշվեհամարով բացվում է 300 հազար ռուբլու վարկ Իրանում գտնվող հայ գաղթականներին օգնելու համար¹⁷¹:

Հայաստանի խորհրդարանն ու կառավարությունը զբաղված էին ոչ միայն արևմտահայ, այլև անդրկովկասյան (Ադրբեջանի և Վրաստանի) տարբեր շրջաններում հայ ազգաբնակչության անվտանգության ապահովման և անհրաժեշտության դեպքում նրանց հայրենիք ներգաղթեցնելու խնդիրներով: Ադրբեջանի իշխանությունների վարած հայահալած ու ջարդարարական քաղաքականության հետևանքով գաղթականական (փախստա-

¹⁶⁸ ՀՀ ՊԿՊԱ, ֆ.202, ց.1, գ.333, թթ.41-42:

¹⁶⁹ ՀՀ ՊԿՊԱ, ֆ.200, ց.1, գ.86, բ.69, ֆ.202, ց.1, գ.333, բ.41:

¹⁷⁰ «Հայաստանի խորհրդի հաստատած օրենքները 1918-1919թթ.», մաս 1, Երևան, 1919, էջ 19-20:

¹⁷¹ «Կայծ», 21 նոյեմբերի 1918թ.:

կան) խմբեր էին գոյացել վերոգրյալ հանրապետության գավառներում: Ուստի՝ կենսական անհրաժեշտություն էր դարձել այս կարգախմբի հայ փախստականներին ներգաղթեցնել և վերաբնակեցնել Հայաստանում: Միայն Նուխիի, Արեշի, Շամախու, Գյոքչայի և Գուբայի գավառներից 20 հազար հայերի Հայաստան տեղափոխելու ծախսերի համար 1919 թ. ամռանը օրենք է ընդունվում 9, 7 մլն ռուբլի վարկ բացելու մասին¹⁷²: 1919 թ. կառավարության, հայրենակցական միությունների և գաղթականների թափած ջանքերի շնորհիվ Հայաստան ներգաղթեցին միայն 16431 մարդ¹⁷³: Տարբեր խանգարիչ հանգամանքների պատճառով չհաջողվեց իրագործել հայերի զանգվածային ներգաղթ:

1919 թ. կեսերից ինչպես ողջ հանրապետության սոցիալ-տնտեսական ու քաղաքական կյանքում, այնպես էլ գաղթականության շրջանում կայունացման որոշ միտումներ նկատվեցին. մի կողմից ամերիկյան ալյուրը մեղմեց սովը (հաշվառված գաղթականը կայուն կերպով ստանում էր կես ֆունտ հաց), մյուս կողմից՝ 1919 թ. գարնանից ընդարձակվեցին ՀՀ սահմանները, որոնք գաղթական բնակչության վերաբաշխման ու բնակեցման ավելի մեծ հնարավորություններ էին ստեղծում: Արդեն 1919թ. սեպտեմբերին ընդունված քաղաքացիների գորակոչի մասին օրենքը տարածվեց նաև արևմտահայերի վրա¹⁷⁴: Եվ վերջապես Փարիզում բացված խաղաղության կոնֆերանսը հույսեր էր ներշնչում, որ դրականապես կլուծվի Հայկական հարցը և արևմտահայերը հնարավորություն կստանան վերադառնալ Երկիր և վերականգնել ու շենացնել ավերված օջախները:

5. Խորհրդարանը և կուսակցությունները բնակչության սոցիալական պաշտպանվածության մասին

Գրամի արժեզրկման ու ապրանքների թանկացման հետ կապված, խորհրդարանն ու կառավարությունը պարբերաբար կատարում էին բյուջետային հիմնարկությունների աշխատողների աշխատավարձի հավելումներ (ինդեքսացիա): Այդ բանը կատարվում էր խորհրդարանի ընդունած օրենքներին համապատասխան: Օրինակ, 1919թ. ապրիլ ամսին բյուջետային աշխատողներին տրվեց լրացուցիչ մեկամսյա աշխատավարձ: Գրա համար խորհրդարանը թույլ տվեց ֆինանսների նախարարությանը բացել 4,3 մլն. ռուբլու

¹⁷² ՀՀ ՊԿՊԱ, Ֆ.245, ց.1, գ.7, ք.24:

¹⁷³ ՀՀ ՊԿՊԱ, Ֆ.205, ց.1, գ.575, ք.1:

¹⁷⁴ ՀՀ ՊԿՊԱ, Ֆ.202, ց.1, գ.333, ք.8:

վարկ¹⁷⁵: Նույն թվականի մայիս ամսին պետական ծառայողների աշխատավարձը բարձրացվեց 50 տոկոսով¹⁷⁶:

Ժամանակ առ ժամանակ խորհրդարանն ու կառավարությունը նպաստի կարգով որոշ հատկացումներ էին կատարում սոցիալական անպաշտպան շերտերին: Այդ բանի կարիքը առանձնապես մեծ չափով զգացվեց 1918-1919թթ. ձմռան ծանր սովի ու համաճարակի շրջանում: 1919թ. հունվարի 8-ին խորհրդարանն օրենք հաստատեց խնամատարության նախարարության անունով 1620 հազար ռուբլի վարկ բացել Հայաստանի տարածքի չքավոր ազգաբնակչությանն օգնություն ցույց տալու համար¹⁷⁷: 1919 թ. հունվարին խնամատարության նախարարության ներկայացրած օրինագծով Երևանի չքավոր ազգաբնակչությանը տաք կերակուր բաժանելու և այլաբնույթ օգնություն ցույց տալու վերաբերյալ բաց է թողնվում 1,6 մլն. ռուբլի¹⁷⁸: Օրինագիծը ընդունվում է միաձայն: 1919 թ. ապրիլի 3-ին դարձյալ խնամատարության նախարարության անունով բացվեց 3 մլն ռուբլի վարկ՝ համաճարակի դեմ պայքարելու նպատակով¹⁷⁹:

Խորհրդարանական քննարկումների ժամանակ ընկերային բնույթի հարցեր ու հարցապնդումներ ամենից ավելի մտցնում էին «ձախակողմյան» խմբակցությունները: Օրինակ՝ 1918թ. նոյեմբերի 8-ի նիստում սոց.-դեմ. խմբակցությունը առաջարկություն արեց ՀՀ բոլոր պետական պաշտոնյաների ու ծառայողների աշխատավարձի նվազագույն չափը սահմանել ամսական 400 ռուբլի¹⁸⁰: Այս առաջարկության քննությունը հետաձգվեց անորոշ ժամանակով: Նվազագույն աշխատավարձի բարձրացման մասին սոց.-դեմ. խմբակցության արած առաջարկին որպես մասնակի լուծում՝ 1919թ. հունվարի 7-ին խորհրդի նիստում որոշվեց պետական ծառայողների աշխատավարձը ավելացնել 30 տոկոսով, դրա նվազագույն չափը սահմանել 200 ռուբլուց ոչ պակաս¹⁸¹: «Չախերը» ժողովրդի սոցիալական կենսապայմանների բարելավման ու բարձրացման ուղղությամբ պահանջներ էին դնում, զգայացունց ելույթներ ունենում: Բայց նրանց չէին հետաքրքրում հանրապետության ֆինանսական հնարավորությունները:

ՀՀ-ում գոյություն ուներ բյուջետային հիմնարկությունների ու հաստատությունների աշխատանքի վարձատրության 15 աստիճանանոց սանդղակ: Այդ սանդղակի գագաթին կանգնած էր հանրապետության վարչապետը, այնուհետև գալիս էին նախարարները, խորհրդարանի պատգամավորները, պետական միջին պաշտոնյաները և այլն: Առաջ գնալով ասենք, որ 1920թ. մար-

¹⁷⁵ ՀՀ ՊԿՊԱ, Ֆ.202, ց.1, գ.41, ք.31:

¹⁷⁶ Նույն տեղում, ք.38:

¹⁷⁷ «Հայաստանի խորհրդի հաստատած օրենքները 1918-1919թ.», մաս 1, Երևան, 1919, էջ 39:

¹⁷⁸ «Կայծ», 30 հունվարի 1919 թ.:

¹⁷⁹ «Հայաստանի խորհրդի հաստատած օրենքները...», էջ 55:

¹⁸⁰ «Կայծ», 17 նոյեմբերի 1918թ.:

¹⁸¹ «Կայծ», 30 հունվարի 1919թ.:

տի 3-ին երկրորդ խորհրդարանն օրենք ընդունեց պատգամավորների կարգախումբը, սկսած 1919թ. սեպտեմբերի 1-ից, 13-րդ կատեգորիայի 3-րդ կարգից փոխադրել 14-րդ կատեգորիայի 3-րդ կարգը: Դրա հետևանքով յուրաքանչյուր պատգամավորի սննդադրամը ամսական ավելացավ 1350 ռուբլով¹⁸²:

Քանի որ տեղական պատերազմների, հայ ժողովրդի կրած զրկանքների և այլ հայտնի պատճառների հետևանքով Հայաստանի տնտեսությունը քայքայվել էր, այն վերականգնելու և առաջ մղելու համար ժամանակ էր պահանջվում: Ուստի՝ հասկանալի էր, որ չէր կարող խոսք լինել սեփական միջոցներով ու հնարավորություններով հանրապետության բնակչության սոցիալական կայուն պաշտպանվածության մասին: Ստեղծվել էր մի կացություն, որտեղ խոսքը գնում էր ոչ այնքան ժողովրդի սոցիալական պաշտպանվածության ու որոշակի կենսամակարդակ ապահովելու, որքան պարզապես մարդկանց սոսկ ֆիզիկական գոյությունը մի կերպ պահպանելու մասին: Խնամատարության նախարարության հաղորդած տվյալներով՝ բնակչության ու հատկապես գյուղացիության մի զգալի մասը նյութական առումով փաստորեն գտնվում էր զաղթականի վիճակում և պետությունից ստանում էր նպաստ: 1919թ. նպաստ ստացող չքավոր ազգաբնակչության թիվը կազմել է 271041 մարդ, որոնցից յուրաքանչյուրը զաղթականի պես օրական ստացել է կես ֆունտ ալյուր¹⁸³: Նման չափով ալյուրի բաժանումը բնակչությանը որպես նպաստ ամսական պետգանձարանի վրա նստում էր ավելի քան 25 մլն. ռուբլի: Եթե սրան գումարենք նաև նպաստ ստացող զաղթականներին, ապա կստացվի, որ նպաստի կարոտ սոցիալական այս չքավոր շերտերին մի կերպ հացով կերակրելու համար ամսական պահանջվել է ավելի քան 54 մլն ռուբլի¹⁸⁴:

Կարելի է ասել, որ ստեղծվել էր մի վիճակ, երբ հանրապետության ազգաբնակչության շուրջ 40-50 տոկոսը որպես կարիքավոր կամա թե ակամա ապրում էր պետության գանձարանի հաշվին: Այստեղից հասկանալի է դառնում, թե ինչպիսի ծանր կացության առջև էր կանգնած Հայաստանի կառավարությունը: Նման պայմաններում մնում էր ապավինել դրսի՝ արտասահմանյան երկրների ու պետությունների մարդասիրական ու բարեգործական օգնությանը: Պետք է ասել, որ աշխարհամարտից նոր դուրս ելած շատ պետություններ, այդ թվում նաև արևմտաեվրոպական, իրենք էլ առանձնապես բարվոք վիճակում չէին: Դրանցից առանձնանում էր, թերևս, միայն ԱՄՆ-ը: Հենց նա էլ եղավ Հայաստանին հիմնական պարենային օգնություն ցույց տվողը: Սկսած 1919թ. գարնանից Հայաստան հասցվեց 1,3 մլն փութ (569 վագոն) ալյուր և 257 հազ. փութ ցորեն¹⁸⁵: Հայաստան բերվեցին նաև մեծ քանակ-

¹⁸² ՀՀ ՊԿՊԱ, Ֆ.202, ց.1, գ.106, ք.12, գ.580, ք.4:

¹⁸³ «Հատաջ», 6 ապրիլի 1920թ.:

¹⁸⁴ Նույն տեղում:

¹⁸⁵ Ս. Վրացյան, Հայաստանի Հանրապետություն, Բեյրութ, 1958, էջ 242:

կությամբ հագուստ, կտորեղեն, դեղորայք, խտացրած կաթ, շաքար, կակաո և այլ մթերքներ: Տեղեկացնենք, որ 9 ամսվա ընթացքում (1919թ. հունիսից մինչև 1920թ. փետրվար) Հայաստան ներմուծված ավելի քան 5,5 մլն փութ համախառն ապրանքներից 4,2 մլն փութը կամ ընդհանուրի 77 տոկոսը կազմել են միայն ամերիկյան ապրանքներն ու մասնավորապես ամերիկյան օգնության այլուրը¹⁸⁶:

Բացի այդ, ինչպես արդեն ասվել է, Ամերիկյան նպաստամատույց կոմիտեն իրականացնում էր 15000 որբերի խնամքը, որոնց վրա ծախսվել էր 90 մլն. ռուբլի: Իսկ մինչ ամերիկյան պարենային օգնությունը կհասներ Հայաստան, նախորդ վեց ամիսների ընթացքում սովից, հիվանդություններից ու ցրտից հանրապետությունում մահացավ մոտ 150 հազար¹⁸⁷, իսկ որոշ տվյալներով՝ 180 հազար մարդ¹⁸⁸: Գնահատելով ամերիկյան մարդասիրական օգնության նշանակությունը՝ պետք է ասել, որ ինչպիսին էլ որ եղած լինի ԱՄՆ-ի քաղաքական դերը Հայկական հարցում, այնուամենայնիվ, հայ երախտապարտ ժողովուրդը երբեք չպետք է մոռանա ամերիկյան հայափրկիչ օգնությունը:

Այս տեսակետից կեղծ ու զրպարտչական պետք է համարել, օրինակ, պատմաբան Խ. Բաղայանի, էլի առանձին հեղինակների քարոզչական այն պնդումը, երբ «անգլո-ամերիկյան գիշատիչ իմպերիալիզմի» դեմ պայքարի մոլուցքով տարված, ոչ միայն ուրանում են ԱՄՆ-ի ցուցաբերած օգնությունը հայ ժողովրդին, այլև գտնում, որ ամերիկացիները կողոպտում էին Հայաստանը¹⁸⁹, և որ «Ամերիկյան իմպերիալիստները իրենց կողոպտիչ քաղաքականությամբ գերազանցում էին անգլո-ֆրանսիական իմպերիալիստներին»¹⁹⁰: Այնուհետև պրոֆ. Խ. Բաղայանը հայտարարում է, որ ամերիկյան արյունոտ իմպերիալիզմը «հազարավոր անմեղ մանուկների (նկատի ունի որբերին- Ա. Հ.) զրկելով սեփական հայրենի հողից, բռնի կերպով փոխադրում էր օվկիանոսի մյուս ափը, որպես ստրուկներ Ռուս-ստրիտի մոնոպոլիստների համար»¹⁹¹: Ավելին՝ հեղինակի կույր ատելությունը այնտեղ է հասնում, որ ընդամենը պատահական, չստուգված ու չհաստատված մեկ տեղեկանքի հիման վրա արվում է հետևյալ պատասխանատու եզրահանգումը. «Ամերիկյան իմպերիալիստները ոչ միայն Հայաստանի երեխաներին մասսայաբար քշում էին Ամերիկա, որպես ստրուկներ, այլև ժողովրդի մեջ առաջ էին բերում մեծ թվով զոհեր՝ թունավորումների ճանապարհով»¹⁹²: Կարծում ենք, վերոհիշյալ

¹⁸⁶ ՀՀ ՊԿՊԱ, Ֆ.200, ց.1, գ.427, ք.117:

¹⁸⁷ Այ. Խատիայան, նշվ. աշխ., էջ 118:

¹⁸⁸ Ս. Վրացյան, նշվ. աշխ., էջ 192, 251:

¹⁸⁹ Խ. Հ. Բաղայան, Անգլո-ամերիկյան գիշատիչ իմպերիալիզմի ազդեցիվ քաղաքականությունը Հայաստանում 1919-1920թթ., Ե., 1951, էջ 55-56:

¹⁹⁰ Խ. Հ. Բաղայան, նշվ. աշխ., էջ 60:

¹⁹¹ Նույն տեղում, էջ 60-61:

¹⁹² Նույն տեղում, էջ 61:

քաղվածքները չի կարելի գնահատել այլ կերպ, քան մարտնչող մարքսիստի հիվանդագին դատողություն:

6. Բանակի և պաշտպանության հարցերը խորհրդարանում և կուսակցությունները

Ազգային և ոչ ազգային կուսակցությունները խորհրդարանում հակա-դիր մոտեցում ունեին հայկական ուժեղ բանակ ունենալու խնդրում: ՀՅԳ և ՀԺԿ խմբակցությունները, հաշվի առնելով Հայաստանի աշխարհաքաղաքական դիրքը, ոչ միայն արտահայտվում էին ուժեղ բանակ ունենալու օգտին, այլև բոլոր հնարավոր միջոցներով օժանդակում դրան: Սրան հակառակ՝ «ձախակողմյան» խմբակցությունները, պատճառաբանելով ու շահարկելով ժողովրդի նյութական (սոցիալական) ծանր պայմանները, ուղղակի դեմ էին քվեարկում բանակի համար ֆինանսական հատկացումներ տրամադրելուն: Ահա թե ինչ է գրում «Խոսքը» մենչևիկ Հ. Ազատյանի խոսքերով. «Ժողովուրդը քաղցած է, գուրկ աշխատավոր ձեռքերից, իսկ նրա պառլամենտը հնարավոր է համարում ինչ-ինչ նպատակների համար 16 հազար մարդուց բաղկացած զորք պահել՝ ամսական նրա վրա մոտ յոթ միլիոն ռուբլի ծախսելով: Մեր զորքի քանակն ու նրա վրա արված ծախսերը Հայաստանի համար ոչ թե շռայլություն պետք է համարել, այլ ժողովրդի շահերի դեմ ուղղված մի անորակելի հանցանք»¹⁹³: Ըստ Հ. Ազատյանի՝ հանցանք էր համարվում բանակ պահելու համար ծախսեր անելը:

Ինչո՞ւ էին «ձախերը» նման բացասական վերաբերմունք ցուցաբերում բանակի խնդրում: Նրանց պատկերացմամբ՝ հայկական բանակը գործիք է դաշնակցական կառավարության ձեռքին հարևան հանրապետությունների ու ժողովուրդների նկատմամբ «ավանտյուրիստական» քաղաքականություն իրագործելու ճանապարհին: «Ձախերը» գտնում էին, որ պետական միջոցները պետք է ծախսել պարենավորման գործի վրա և ոչ թե ռազմական¹⁹⁴: Ավելին՝ Հ. Ազատյանը պահանջում էր ըստ էության ցրել զորքը և դրա փոխարեն մտցնել, այսպես կոչված, ժողովրդական միլիցիայի համակարգ:

Ձախակողմյան խմբակցությունների առաջարկությամբ՝ 1919թ. հունվարի 7-ին խորհուրդը օրինագիծ ընդունեց հայկական բանակի մասնակի գորացրման մասին: Հաստատված օրինագծով 25 տարեկանից բարձր հասակ ունեցող զինվորները գորացրվում են¹⁹⁵: ՀՅԳ և ՀԺԿ ազգային խմբակցությունները ընդառաջ գնացին նման քայլի այն պատճառով, որ թուրքական գոր-

¹⁹³ «Կայծ», 22 հունվարի 1919թ.:

¹⁹⁴ «Կայծ», 13 փետրվարի 1919թ.:

¹⁹⁵ «Կայծ», 30 հունվարի 1919թ.:

քը հետ էր քաշվել, հայ-վրացական պատերազմը ավարտվել էր և այդ ժամանակ Հայաստանին իրական լուրջ վտանգ չէր սպառնում:

Ուսումնասիրության և պաշտպանական հարցերի քննարկման կապակցությամբ հաճախ հրավիրվել են խորհրդարանի հայ պատգամավորների խորհրդակցություններ: Այդպիսի մի խորհրդակցություն է գումարվել 1919թ. մարտի 16-18-ին¹⁹⁶: Լսելով ՀՀ կառավարության նախագահի պաշտոնակատար Ալ. Խատիսյանի զեկուցումը՝ «Հայաստանի սահմաններին սպառնացող վտանգի և զորքի անկազմակերպ վիճակի մասին» որոշվում է լրացուցիչ 10 մլն ռուբլու վարկ հատկացնել բանակի վերակառուցման և զորացման համար: Բացի այդ, երկրի պաշտպանության գործը արագացնելու համար կառավարությանը տրվում են լայն իրավունքներ¹⁹⁷:

Այս խորհրդակցության հրավիրման նախաձեռնողն ու տոն տվողը ՀՅԳ խմբակցությունն էր: Երկրի պաշտպանության ամրակայման և զորքի վերակառուցման մասին ՀՅԳ խմբակցության կազմած որոշման նախագիծն էլ դրվեց խորհրդակցության աշխատանքի հիմքում: Խորհրդակցությունում ՀՅԳ խմբակցության բանաձևը պաշտպանեց ՀԺԿ խմբակցությունը, իսկ սոց.-դեմ. և էսեռները մերժեցին երկրի պաշտպանության ամրապնդմանն ուղղված ձեռնարկները: Վերջիններս ցուցադրաբար հեռացան խորհրդակցությունից¹⁹⁸: Նման պարագաներում է երևում այս կամ այն կուսակցության և նրա ընդդիմության պատասխանատու կամ անպատասխանատու լինելը: Հասկանալի է, որ «ձախ» ընդդիմության դիրքորոշումը չէր ծառայում հայրենիքի պաշտպանության շահերին: Գնալով խմբակցությունների միջև առկա նման հակասությունները ավելի էին խորացնում խորհրդարանի ճգնաժամը:

7. Խորհրդի ճգնաժամը և արձակումը

Խորհրդարանում հաճախակի տեղի են ունեցել կոնֆլիկտային միջադեպեր: Հայաստանի խորհրդի փաստորեն ոչ ընտրովի պատգամավորական կազմը իրապես չէր արտահայտում քաղաքական ուժերի հարաբերակցությունը ազգաբնակչության մեջ: Խորհուրդն իր կազմով փաստորեն չունեի ժողովրդական ներկայացուցչություն և չէր արտահայտում ժողովրդի հավաքական կամքն ու ըմբռնումները: Օրինակ՝ սոց.-դեմոկրատները և էսեռները խորհրդում ունեին պատգամավորներ, սակայն նրանք լայն աջակցություն չունեին ժողովրդի կողմից:

Խորհրդարանն իր շուրջ տասնամյա գործունեության ընթացքում համարձակություն չունեցավ բարձրաձայն (հրապարակավ) հայտարարել Հա-

¹⁹⁶ ՀՀ ՊԿ ՊԱ, ֆ.199, ց.1, գ.27, քք.193-194:

¹⁹⁷ Նույն տեղում, ք.194:

¹⁹⁸ Նույն տեղում:

յաստանի անկախության մասին, քանզի նրա պատգամավորների առնվազն կեսը գիտակցաբար և անգիտակցաբար մերժում էր Հայաստանի անկախությունը:

Որ Հայաստանի խորհրդում, ըստ կուսակցությունների, պատգամավորների քանակական հարաբերակցությունը չէր արտացոլում իրականությունը, երևում էր նաև 1918 թ. վերջերին տեղի ունեցած Երևանի քաղաքային դումայի ընտրություններից: ՀՅԳ-ն այդ ընտրությունների ժամանակ ստացավ երկու անգամ ավելի ձայն, քան մյուս երեք կուսակցությունները միասին վերցրած¹⁹⁹: Ինչպես արդեն ասվել է, առանձնապես սոցիալական հենարան չունեին էսեռական և սոց.-դեմոկրատական խմբակցությունները: Քաղաքային դումայի ընտրությունների արդյունքով նախատեսված 60 տեղերից սոցիալիստական «ձախ» թևը (էսեռ և սոց.-դեմ.) ստացավ ընդամենը 4 տեղ²⁰⁰:

1919 թ. սկզբներին ակնհայտ հակասություն էր առաջացել հասարակայնության և խորհրդարանի պատգամավորության կազմի միջև: Դեռ 1919 թ. հունվարի կեսերից խորհրդարանում և նրա պատերից դուրս ձայներ էին լսվում նրա արձակման մասին: Հունվարի 17-ին «Չանգում» տպագրվում է առաջնորդող «Խորհրդարանը արձակել» խորագրով²⁰¹: ՀՅԳ- և ՀԺԿ, խորհրդարանում ստեղծելով կայուն մեծամասնություն, գործնականում այլևս հաշվի չէին նստում «ձախերի» հետ: Պատահում էր, որ նախարարները պարզապես չէին պատասխանում «ձախակողմյան» խմբակցությունների հարցումներին ու հարցապնդումներին²⁰²:

Այդ իսկ պատճառով 1919 թ. սկզբներից անհետաձգելի խնդիր դարձավ խորհրդի արձակումը և նոր ժողովրդավարական ընտրությունների ճանապարհով ընտրովի խորհրդարանի ձևավորումը: Խորհրդի և հասարակայնության միջև այդ առճակատման գազաթնակետը հանդիսացավ 1919 թ. փետրվարի 28-ին խորհրդարանում տեղի ունեցած միջադեպը²⁰³: Այդ օրը քվորում չլինելու պատճառով խորհրդարանի հերթական նիստը չկայացավ: Սակայն էսեռների առաջարկով ընդդիմությունը որոշեց հրավիրել մասնավոր խորհրդակցություն: Տեղեկանալով այդ մասին՝ խորհրդարանի դահլիճում գտնվող հասարակայնության ներկայացուցիչները սպառնալիքների և ուժի գործադրման միջոցով ձախողում են խորհրդակցության կայացումը: Ամբոխի միջից լսվում են բացականչություններ. «Չե՛նք ուզում այսպիսի խորհրդարան», «Մենք պահանջում ենք ընտրովի խորհրդարան», «Դո՛ւրս, ինքնակոչ պատգամավորներ»²⁰⁴: Այդ օրերին խորհրդարանի նախագահ Ավ. Սահակյանը գտնվում էր Թիֆլիսում: Խորհրդարանի փոխնախագահ, էսեռ Դ. Չուր-

¹⁹⁹ «Աես», Փարիզ, 1934, թիվ Ե., էջ 50:

²⁰⁰ ՀՀ ՊԿՊԱ, Ֆ.203, ց.1, գ.230, ք.29:

²⁰¹ «Չանգ», 17 հունվարի 1919 թ.:

²⁰² «Կայծ», 7 հունվարի 1919 թ.:

²⁰³ ՀՀ ՊԿՊԱ, Ֆ.404, ց.1, գ.35, ք.1:

²⁰⁴ «Աշխատավոր», 26 մարտի 1919 թ., «Կայծ», 16 մարտի 1919 թ.:

յանը ուժով հեռացվում է ամբիոնից: Ընդդիմադիր մամուլը հայտնում է, որ Գ. Չուբյանին ամբիոնից հեռացնելու նպատակով երկու կողմնակի անձնավորություններ, նույնիսկ, մաուզեր են հանել, լիցքավորել ու պահել նրա վրա²⁰⁵: Մի քանի պատգամավորների միջամտությունից հետո կրքերը հանդարտվում են և գրգռված հասարակությունը ցրվում է: Սրանով էլ ավարտվում է խորհրդարանի փետրվարյան միջադեպը: Անշուշտ, սա լուրջ ահազանգ էր Հայաստանի խորհրդի ճգնաժամի ու արձակման մասին:

Փետրվարյան միջադեպից մի քանի օր անց՝ 1919թ. մարտի 4-ին, ՀՅԳ Երևանի քաղաքային կոմիտեն հանրապետությունում խորհրդարանի նոր ընտրություններ անցկացնելու վերաբերյալ Հայաստանի քաղաքացիներին ուղղված ընդարձակ դիմում-կոչ հրապարակեց: Նրանում մասնավորապես ասվում էր. «Եթե թանկ է ձեզ համար ձեր իրավունքը, պահանջեցե՛ք, որ այս պառլամենտը ցրվի և նրա տեղը հրավիրվի, ամենամոտիկ ժամանակներում, նոր, ընտրովի և ժողովրդական պառլամենտ»²⁰⁶:

Խորհրդարանի միջադեպը և նրա ցրելու մասին լուրերը ցավագին կերպով ընդունեցին ձախակողմյան կուսակցությունները: Էսէռների կուսակցության Երևանի կոմիտեն հրապարակեց մի թռուցիկ, որում միջադեպի համար մեղադրվում էր ՀՅԳ կուսակցությունը, որ իբր նա է հասարակությանը գրգռել խորհրդարանի սոցիալիստական թևի դեմ: ՀՅԳ Երևանի քաղաքային կոմիտեն պատասխան հայտարարությամբ հերքեց Էսէռների մեղադրանքը՝ պահանջելով փաստացի ապացույցներ²⁰⁷: Նույն կերպ կառավարող կուսակցությանը մեղադրեցին նաև սոցիալ-դեմոկրատ մենչևիկները²⁰⁸:

Մյուս կողմից այս տխուր միջադեպը կարելի է որակել որպես ոտնձգություն խորհրդարանի, նրա պատգամավորների անձեռնմխելիության իրավունքի վրա: Բայց սրա կողքին կրկին հիշեցնենք, որ Հայաստանի խորհուրդը ընտրովի խորհրդարան չէր: Այնտեղ մատած էին ընդամենը կուսակցությունների ներկայացուցիչները:

Հիշեցնենք, որ եթե սկսեց գործել Հայաստանի խորհուրդը, նա չուներ մշակված որևէ կանոնակարգ կամ օրենք՝ իր գործունեության ժամկետի վերաբերյալ: Հայաստանում չկար նախագահ կամ թագավոր, որ, ասենք, աշխարհի մյուս երկրների օրինակով արձակեր խորհրդարանը: Մնում էր, որ նա ինքը արձակեր իրեն: Միայն նա կարող էր խորհրդարանի ընտրությունների մասին օրենք ընդունել և նոր ընտրություններ նշանակել:

1919 թ. գարնանը խորհրդարանի ներսում առաջացել էին սուր հակասություններ, որոնք էլ բացասաբար էին անդրադառնում նրա աշխատանքների արդյունավետության վրա: Այդ պատճառով 1919 թ. ապրիլի 27-ին խորհուրդն օրենք ընդունեց՝ իր աշխատանքները մեկ ամսով դադարեցնելու և այդ

²⁰⁵ «Պայքար», 15 մարտի 1919թ.:

²⁰⁶ ՀՀ ՀԲԿՓ ՊԿԱ, Ֆ.4047, ց.1, գ.137, թ.2:

²⁰⁷ «Չանգ», 14 մարտի 1919թ.:

²⁰⁸ «Կայծ», 16 մարտի 1919թ.:

ընթացքում խորհրդարանի իրավունքները կառավարությանը հանձնելու մասին²⁰⁹։ ՀՅԳ-ն և ՀԺԿ խմբակցությունների առաջարկած համատեղ օրինագիծը քաղկացած էր երեք կետից.

1. Խորհրդի աշխատանքները դադարեցնել մեկ ամսով, 2. դադարի միջոցին խորհրդի բոլոր իրավունքները հանձնել կառավարությանը և 3. հանձնարարել կառավարությանը արտակարգ կարևորության դեպքում հրավիրել խորհրդի արտակարգ նիստ²¹⁰։

Տեղեկացնենք, որ այսպիսի պրակտիկա (խորհրդարանը արձակուրդ ուղարկելու վերաբերյալ) առաջինը կիրառվել էր Ադրբեջանում, երբ նրա անկախության հռչակումից անմիջապես հետո՝ հունիսի կեսերին, օրենսդիր մարմնի իրավունքով Գ-անձակում գումարվող նրա Ազգային խորհուրդը քաղաքական բարդ ու անկայուն հանգամանքների թելադրանքով, Ադրբեջանի փաստական տեր Նուրի փաշայի ցուցումով, արձակվեց և ամբողջ իշխանությունը (գործադիր և օրենսդիր) հանձնվեց Ֆ. Խամիտյանի նորակազմ կառավարությանը²¹¹։ Եվ վերջապես թուրքերի և ապա անգլիացիների կողմից Բաքուն գրավվելուց հետո միայն 1918 թ. դեկտեմբերի 1-ին (շուրջ 6 ամիս անց) թարմացված ու համալրված կազմով (120 պատգամավորներով) վերաբացվեց Ադրբեջանի Ազգային խորհուրդը (խորհրդարանը)՝ Մ. Ռասուլզադեի նախագահությամբ։ Ի դեպ՝ Ադրբեջանի խորհրդարանի 120 պատգամավորական տեղերից 21-ը զբաղեցնում էին հայերը²¹²։

Կնշանակի՝ Հայաստանի խորհրդարանի աշխատանքների ժամանակավոր դադարի աշխատածը նորություն չէր և այն ժամանակների արտակարգ իրավիճակների թելադրանքով այդպիսի քայլի հավանաբար դիմել են նաև ուրիշ երկրները։

Ս. Վրացյանը վկայում է, որ Հայաստանի խորհրդի այս արձակուրդով փաստորեն վերջ տրվեց նրա գործունեությանը, թեև մայիսի վերջին և հունիսի սկզբին գումարվեց ևս մի քանի նիստ²¹³։ Այդ մեկ ամսվա ընթացքում (ապրիլի 27-ից մինչև մայիսի 27-ը կռալիցիոն կառավարությունը հասցրել էր ընդունել ու հրապարակել 99 օրենք։ Ընդ որում՝ դրանցից 96-ը նախարարների խորհրդում ընդունվել էր միաձայն և միայն 3-ը՝ ձայների մեծամասնությամբ։ Կառավարության հաստատած օրենքներից 70-ը իր ժամանակին անցել էին խորհրդարանի հանձնաժողովների քննարկումների խոհանոցով²¹⁴։ Բայց այդ մեկամսյա արձակուրդը ամենևին էլ չհաղթահարեց խորհրդարանի ճգնաժամը։

²⁰⁹ ՀՀ ՊԿՊԱ, Ֆ. 200, ց. 1, գ. 86, ք. 32։

²¹⁰ «Հայաստանի խորհրդի հաստատած օրենքները 1918-1919 թթ.», մաս 1, Ե., 1919, էջ 61, «Կայծ», 15 հունիսի 1919 թ.։

²¹¹ «Աշխատանքի դրոշակ», 23 հունիսի 1918 թ., «Կայծ», 13 փետրվարի 1919 թ.։

²¹² «Ժողովրդի ձայն», Թիֆլիս, 3 դեկտեմբերի 1918 թ.։

²¹³ Ս. Վրացյան, Հայաստանի Հանրապետություն, Բեյրութ, 1958, էջ 253։

²¹⁴ ՀՀ ՊԿՊԱ, Ֆ. 200, ց. 1, գ. 35, ք. 88։

Սովորաբար քաղաքակիրթ, խորհրդարանական երկրներում օրենքներն ընդունում է օրենսդիր մարմինը՝ խորհրդարանը: Բայց հեղափոխական, անցման ժամանակաշրջաններում չի բացառվում, որ ժամանակավորապես օրենքներ ընդունի նաև կառավարությունը: Օրինակ, մինչև օրենսդիր մարմնի ձևավորումը այդպիսի քայլի են դիմել Ռուսաստանի Ժամանակավոր կառավարությունը, խորհրդային կառավարությունը, Անդրկովկասյան կոմիսարիատը և այլն: Սակայն Հայաստանի պարագայում արտասովորն այն էր, որ կառավարությունը յուրացնում էր արդեն գործող օրենսդիր մարմնի լիազորությունները՝ նրան ուղարկելով հարկադիր արձակուրդ: Ինչպես կտեսնենք հետագայում, Հայաստանի խորհրդի սպրիլի 27-ի մեկամսյա արձակուրդը վատ նախադեպ հանդիսացավ Հայաստանի հետագա խորհրդարանական գործունեության համար:

Եվ ահա Հայաստանի կառավարությանը տրված՝ խորհրդարանի օրենսդրական լիազորությունների մեկամսյա ժամկետի վեջրին օրերին ընդունվեցին երկու շատ սկզբունքային և առարկությունների տեղիք տվող ակտեր, որոնք էլ ավելի խորացրին խորհրդարանական ճգնաժամը և ի վերջո դարձան նրա արձակման հիմնական շարժառիթը: Նկատի ունենալով, որ մոտենում է Հայաստանի անկախության առաջին տարեդարձը ու հաշվի առնելով մի շարք ներքին ու արտաքին հասունացած անհետաձգելի հանգամանքներ, կառավարությունը համարձակություն վերցրեց իր վրա ընդունելու երկու պատասխանատու օրենքներ՝ «Միացյալ և Անկախ Հայաստանի անկախության մասին» և սրանից բխող «Հայաստանի խորհրդի համալրման մասին»:

1919 թ. մայիսի 26-ին նախարարների խորհուրդը ընդունեց օրենք «Միացյալ և Անկախ Հայաստանի անկախության մասին»: Օրենքն ընդունվել էր կառավարության անդամների հետևյալ ձայնատվությամբ՝ 5 կողմ, 1 դեմ և 1 ձեռնպահ²¹⁵: Հաջորդ օրը՝ մայիսի 27-ին, դրան հաջորդեց մյուս օրենքը (ակտը) «Հայաստանի խորհրդի համալրման մասին»: Օրենքն ընդունվել էր 6 ձայնով ընդդեմ 2-ի²¹⁶: Այս վերջին ակտը կազմում էր առաջինի տրամաբանական շարունակությունը: Կառավարությունը ելնում էր այն գաղափարից, որ Միացյալ Հայաստանը պիտի ունենար նաև միացյալ խորհրդարան: Այսինքն՝ ՀՀ խորհրդարանը պետք է համալրվեր արևմտահայ ներկայացուցիչներով:

1919 թ. մայիսի 28-ին Հայաստանի անկախության առաջին տարեդարձի օրը՝ որպես պատմական հարմար պահ, պաշտոնապես կատարվեց համապատասխան հայտարարություն: Երկու ակտերն էլ հրապարակվեցին մայիսի 28-ին: Փաստական անճշտություն պետք է համարել այն, որ «Հայ ժողովրդի պատմության» ակադեմիական հրատարակության 7-րդ հատորում

²¹⁵ «Ժողովուրդ», 11 հունիսի 1919 թ.:

²¹⁶ Նույն տեղում:

1919 թ. մայիսի 28-ի պատմական ակտի մասին որոշման ընդունումը վերագրվել է ոչ թե Հայաստանի կառավարությանը, այլ խորհրդարանին²¹⁷:

Անխակության տարեդարձի տոնակատարության կապակցությամբ կազմակերպված Հայաստանի խորհրդի ու կառավարության հանդիսավոր նիստում, որն ի դեպ նախագահել է կրթության նախարար Գ. Մելիք-Ղարազյոզյանը (ՀԺԿ), վարչապետի պաշտոնակատար Ալ. Խատիսյանն իր բացման խոսքից հետո կարդաց հետևյալ պաշտոնական հայտարարագիրը (հռչակագիրը). «Հայաստանի ամբողջությունը վերականգնելու և ժողովրդի լիակատար ազատությունն ու բարգավաճումն ապահովելու համար Հայաստանի կառավարությունը, համաձայն բովանդակ հայ ժողովրդի միահամուռ կամքի և ցանկության, հայտարարում է, որ այսօրվանից Հայաստանի բաժան-բաժան մասերը մշտնջենապես միացած են իբրև անկախ պետական միություն:

Ուղիղ մեկ տարի առաջ ռուսահայերի համագումարից ընտրված Հայոց ազգային խորհուրդը հայտարարեց իրեն Անդրկովկասյան հայկական գավառների բարձրագույն իշխանություն: Ազգային խորհրդի կազմած կառավարությունն այդ քաղաքական ակտի մասին պաշտոնապես պետությունների ներկայացուցիչներին հայտնելուց հետո այս մի տարվա մեջ փաստորեն հաստատել է իր իշխանությունը Անդրկովկասի հայկական գավառներում:

1919 թ. փետրվար ամսին Երևան քաղաքում կայացած Արևմտահայ երկրորդ համագումարը հանդիսավոր կերպով հայտարարեց, որ նա Հայաստանը միացյալ և անկախ է ճանաչում: Այժմ Անդրկովկասում և Օսմանյան կայսրության սահմաններում գտնված պապենական հայկական հողերի միացման և անկախության այս ակտը կատարելով, Հայաստանի կառավարությունը հայտարարում է, որ Միացյալ Հայաստանի պետական ձևն է ռամկավար հանրապետությունը, և որ ինքը հանդիսանում է միացյալ Հայաստանի Հանրապետության կառավարությունը:

Հայաստանի կառավարությունը սույն ակտը հրատարակում է 1919 թ. ապրիլի 27-ի պառլամենտի որոշմամբ կառավարությանը տրված հատուկ լիազորությունների հիման վրա»:

Նախարարների խորհրդի նախագահի և արտ. գործ. նախարարի փոխանորդ՝ Ալ. Խատիսյան
Ներք. գործ. նախարարի փոխանորդ՝ Ս. Մանասյան
Զինվորական նախարար՝ գոր. Զր. Արարատյան
Արդարադատության նախ. փոխանորդ՝ Հ. Չմշկյան
Հանր. կրթ. նախարարի փոխանորդ՝ Գ. Մելիք-Ղարազյոզյան
Խնամատարության նախարար՝ Ս. Թորոսյան
Պարենավորման նախարար՝ Զ. Վերմիշյան
Ելևմտյան նախ. փոխանորդ՝ Գ. Ջաղեթյան
Գործերի կառավարիչ՝ Գ. Խատիսյան

²¹⁷ «Հայ ժողովրդի պատմություն» (Հայկ. ՍՍՀ ԳԱ հրատ.) հ. 7, Երևան, 1967, էջ 52:

28 մայիսի 1919 թ., ք. Երևան²¹⁸:

Ինչպես տեսնում ենք, հայտարարագրի տակ ստորագրել են նաև Ժողովրդական կուսակցության նախարարները: Սակայն Գ. Մելիք-Վարպազյանն իր հուշերում գրում է, որ ինքը Միացյալ Հայաստանի ակտի ընդունման օրը ներկա չի եղել կառավարության նիստին²¹⁹: Ալ. Խատիսյանի ընթերցած այս հայտարարագիրը ընդունվեց որոտընդոտ կեցցեներով ու ծափողջույններով: Ապա նույն ճառը և հայտարարագիրը կարդացվեց ֆրանսերեն լեզվով դաշնակից պետությունների ներկայացուցիչների համար²²⁰:

1919 թ. մայիսի 28-ի անկախության օրը Երևանում անցկացվեց շքերթ, զորահանդես, տոնախմբություններ, հայտարարվեց համաներում (ամնիստիա), հուշարձանի կառուցման մրցանակաբաշխություն, հանգանակվեց 100 հազար ռուբլի «Ազատության գոհերին» հուշարձան կառուցելու համար²²¹: Ավելի ուշ՝ օգոստոսի 29-ին, Ս. Աստվածածնի վերափոխման օրը, Ամենայն Հայոց կաթողիկոս Գևորգ Ե. ս. պատարագ մատուցելով՝ օրհնեց ու սրբագործեց Միացյալ և Անկախ Հայաստանի տոնը: Միաժամանակ, Մայր Աթոռ ս. Էջմիածնի կողմից Հայաստանի անկախության փոխառության ֆոնդին նվիրաբերվեց 1 մլն ռուբլի²²²:

Հայաստանի կառավարության մայիսի 28-ի ակտը առանձին շրջաբերականով ողջունեցին ՀՅԳ բյուրոն, ՀՅԳ «Երկրի» Կենտրոնական կոմիտեն, կուսակցության այլ ղեկավար մարմիններ: ՀՅԳ բյուրոյի հայտարարության մեջ ասված է. «ՀՅԳ Բյուրոն պատմական վարկյանի խոր գիտակցությամբ ջերմապես ողջունում է Հայաստանի միացման և անկախության ակտի պաշտոնական հայտարարությունը»²²³:

Միացյալ և Անկախ Հայաստանի մասին ակտը ուրախությամբ ողջունեցին պետական և հասարակական շատ կազմակերպություններ, այդ թվում՝ Հայաստանի կոուպերատիվների միությունը՝ Հայկոպը²²⁴: Անհետաքրքիր չէ նշել, որ Հայաստանի անկախության առաջին տարեդարձը հեռագրով շնորհավորել են Ադրբեջանի խորհրդարանն ու կառավարությունը²²⁵: Մայիսի 28-ի Հայաստանի երկու հատվածների միացման մասին կառավարության հայտարարությունը սրտագին ողջունեց նաև Արևմտահայ գործադիր մարմինը²²⁶:

²¹⁸ ՀՀ ՊԿՊԱ Ֆ. 199, ց. 1, գ. 56, թ. 15, Ֆ. 200, ց. 1, գ. 35, թ. 84, գ. 282, թ.10, նաև «Միացյալ և Անկախ Հայաստան, Կ. Պոլիս, 1919, էջ 86-87:

²¹⁹ Բանբեր Հայաստանի արխիվների, Ե., 2002, թիվ 1, էջ 94:

²²⁰ «Միացյալ և Անկախ Հայաստան», Կ. Պոլիս, 1919, էջ 80-81:

²²¹ ՀՀ ՊԿՊԱ, Ֆ. 200, ց. 1, գ. 291, թ. 404, Ֆ. 199, ց. 1, գ. 14, մաս 1, թ. 112:

²²² ՀՀ ՊԿՊԱ, Ֆ. 199, ց. 1, գ. 176, թ. 22:

²²³ «Միացյալ և Անկախ Հայաստան», Կ. Պոլիս, 1919, էջ 88:

²²⁴ «Հայաստանի կոուպերացիա», 1 հուլիսի 1919 թ. (թիվ 13), էջ 384:

²²⁵ ՀՀ ՊԿՊԱ, Ֆ. 201, ց. 1, գ. 43, թ. 25:

²²⁶ «Միացյալ և Անկախ Հայաստան», Կ. Պոլիս, 1919, էջ 92:

Այս ակտի գերնպատակը՝ մեկ ազգ, մեկ հայրենիք, մեկ կառավարություն գաղափարի որպես պետական քաղաքականության աստիճանական իրագործումն էր: «Այդ ակտի նպատակն էր,- մտահանգում էր Ս. Վրացյանը,- արագացնել հայ ժողովրդի երկու հատվածների միությունը և հայտարարել ի լուր աշխարհի հայ ժողովրդի անհողորդ կամքը՝ անկախ պետական կյանքով ապրելու»²²⁷: Արված հայտարարությունը պետք է արմատապես գործնական քայլերով: Նախատեսվում էր, բանակցելով արևմտահայ քաղաքական շրջանակների հետ, կազմել միացյալ Հայաստանի կառավարություն և միացյալ խորհրդարան²²⁸: Այս պատմական նշանակություն ունեցող հայտարարությունը ՀՅԳ և ՀՀ կառավարության հանպատրաստի ինքնագործունեության արդյունք չէր, այլ նախապատրաստվել էր քայլ առ քայլ, նախընթաց պատմաքաղաքական դեպքերի ու իրադարձությունների տրամաբանությամբ: 1918 թ. դեկտեմբերի սկզբին խորհրդարանի և կառավարության որոշումով Եվրոպա մեկնող ՀՀ պատվիրակությանը հանձնարարական էր տրվել Փարիզի խաղաղության համաժողովում պաշտպանել Միացյալ և Անկախ Հայաստանի գաղափարը²²⁹: Չորավար Գ. Դորդանյանը հայտնում է, որ Փարիզում գտնվող Ազգային պատվիրակության նախագահ Պողոս Նուբար փաշան ավելի վաղ՝ 1918 թ. նոյեմբերի 30-ին, «Դաշնակիցներին հաղորդել էր Միացյալ Հայաստանի անկախ պետության ստեղծման մասին»²³⁰:

Մեկ այլ հաղորդագրությամբ իրագեկվում է, որ 1918 թ. դեկտեմբերի 17-ին դաշնակից երկրների գիտությամբ Պողոս Նուբար փաշան արել է Արևմտյան Հայաստանի (վեց վիլայեթների) և Կիլիկիայի միացյալ անկախության հայտարարություն և այդ հիման վրա նույնիսկ կազմվել կառավարություն: Այս կապակցությամբ ռամկավար գործիչ ու պատմաբան Ա. Գարբինյանը հետևյալ պարզաբանումն է անում: Ազգային պատվիրակությունը գտնում էր, որ Տաճկահայաստանի և Ռուսահայաստանի հարցերը չպետք է միացնել իրար և նման ձևով կատարել միացյալ Հայաստանի հայտարարությունը: Պ. Նուբարը պատճառաբանում էր, որ քանի դեռ Ռուսաստանը իր վերջնական խոսքը չի ասել Ռուսահայաստանի խնդրում, ուստի «Տաճկահայաստանի հարցը պետք է անջատ պահել, որպեսզի դաշնակից պետությունները ռուսական հարցը պատճառ չդարձնեն տաճկահայ դատի լուծման ձգձգման համար»²³¹:

Պողոս փաշայի և արևմտահայ շատ գործիչների մտավախությունն այն էր, որ վաղ թե ուշ Ռուսաստանը պիտի գրավի Հայաստանը²³²: Փաշայի այս բացատրությունից կարելի է հասկանալ այն, որ նա ուզում էր հասնել

²²⁷ Ս. Վրացյան, *Բանակցություններ Ազգային պատվիրակության և ՀՀ միջև, Պոսթըն, 1920, էջ 6:*

²²⁸ Նույն տեղում:

²²⁹ ՀՀ ՊԿՊԱ, Ֆ. 200, ց. 1, գ. 183, ք. 7:

²³⁰ «Աեմ», 1934, Ե., էջ 29-30:

²³¹ Ա. Գարբինյան, *նշվ. աշխ., էջ 419:*

²³² Մ. Գ. Ծիզմեճյան, *նշվ. աշխ., էջ 397:*

Տաճկահայաստանի (եթե հնարավոր էր նաև Կիլիկիայի հետ) ինքնուրույն անկախության հռչակմանը, ինքն էլ դառնար նրա վարչապետը: Այս ակնկալությամբ էլ կազմվեց նույնիսկ կառավարություն: Պողոս փաշայի գլխավորած կաբինետում ընդգրկվել էին Գաբրիել Նորատունկյանը (արտ. գործ. նախարար), Ռսկան Մարտիկյանը (ներք. գործ. նախ.), Արշակ Չոպանյանը (կրթության և արվեստի նախ.) և ուրիշներ²³³: Հասկանալի է, որ այս ամենը կատարվեց և մնաց փաստորեն թղթի վրա: Այս առթիվ Ա. Ահարոնյանը Փարիզից արտ. գործ. նախարար Ս. Տիգրանյանին ուղղված 1919 թ. ապրիլի 24-ի թվագիր նամակում հայտնում էր. «Ձեզ հեռագրել եմ, որ այստեղ Պողոս փաշայի կառավարություն գոյություն չի ունեցել և չունի»²³⁴

Սրան հակառակ Արևմտահայ ազգային պատվիրակությունը օտարոտի վերաբերմունք ցուցաբերելով դեպի իրական Հայաստանի Հանրապետությունը՝ Արևմտյան Հայաստանը հակադրում էր ՀՀ-ը: Պողոս փաշան ՀՀ գոյությունը համարում էր նույնիսկ վնասակար Հայկական դատի համար²³⁵: Այդ հիման վրա նա նույնիսկ դիմակայել է օտար պետությունների կողմից ՀՀ ճանաչմանը՝ գտնելով, որ «դա իբր կարող է թուլացնել Տաճկահայաստանի դատը: Իսկ այդ գործում փաշային օգնել է նաև Անդրանիկը»²³⁶: Ինքնին հասկանալի է, որ նման դիրքորոշումն ու վերաբերմունքը չէր կարող նպաստել Հայկական հարցի ամբողջական լուծմանը: Հայ ժողովրդի իրական կառավարությունն ու ուժը ոչ թե Փարիզում էր, այլ բուն Հայաստանում:

Աշխարհամարտի հաղթական ավարտից ու Թուրքիայի պարտությունից հետո Հայաստանի իշխանությունները պաշտպանեցին Միացյալ Հայաստանի գաղափարը և հնարավորության սահմաններում ձեռնամուխ եղան դրա իրագործմանը: Միացյալ Հայաստանի (այսինքն՝ Հայաստանի Արևելյան և Արևմտյան հատվածների միավորման մասին) գաղափարին ժամանակի պարբերական մամուլում առաջին անգամ հանդիպում ենք 1918 թ. դեկտեմբերին: ՀԺԿ Երևանի կոմիտեի պաշտոնաթերթ «Ժողովրդի» դեկտեմբերի 8-ի համարում «Ազատ Հայաստան» խորագրով հրապարակման մեջ որոշակիորեն արծարծվում էր Միացյալ և Ազատ Հայաստանի գաղափարը. «Միացյալ և Ազատ Հայաստան՝ դա կլինի արմատական լուծումը Հայկական հարցի, դա կլինի ամենանպատակահարմարը թե՛ միջազգային խաղաղության և թե՛ հայ ժողովրդի շահերի տեսակետից»²³⁷: Միացյալ և Ազատ Հայաստանի գաղափարը առաջին անգամ հրապարակավ հռչակեց ու պաշտպանեց 1919 թ. փետրվարի 6-13-ին Երևանում հրավիրված Արևմտահայերի երկրորդ համագումարը, որը ներկայացնում էր շուրջ 200 հազար արևմտահայերի:

²³³ «Արձագանք», Եկատերինոդար, 10 հունվարի 1919 թ.:

²³⁴ «Դաշնակցական կառավարության դոկումենտներից», Ե., 1922, էջ 10:

²³⁵ Ս. Վրացյան, Հայաստանի Հանրապետություն, Բեյրութ, 1958, էջ 274:

²³⁶ ՀՀ ՊԿՊԱ, Ֆ. 200, գ. 1, գ. 431, թ. 62:

²³⁷ «Ժողովուրդ», 8 դեկտեմբերի 1918 թ.:

Համագումարում ձայների մեծամասնությամբ ընդունված քաղաքական բանաձևի թիվ 5 կետով հանձնարարվում էր նորընտիր Գործադիր մարմնին՝ «գործնական քայլեր անել Արարատյան Հանրապետության կառավարության և խորհրդարանի հետ Միացյալ, Ազատ Հայաստանի անկախությունը հայտարարելու և մեկ համազգային միություն իրականացնելու համար»²³⁸։ Բանաձևի այս կետին դեմ են արտահայտվել միայն Ռամկավար կուսակցության հինգ անդամները։ Վերջիններս որպես բողոքի նշան հայտարարություն արեցին և հրաժարվեցին մասնակցել համագումարի հետագա աշխատանքներին²³⁹։ Այս կապակցությամբ նրանք հանդես եկան մի ընդարձակ հողված-հայտարարությամբ «Ինչո՞ւ հեռացանք արևմտահայ Բ համագումարից» վերտառությամբ, որում փորձում էին պարզաբանել ու հիմնավորել համագումարից իրենց հեռանալու դրդապատճառները»²⁴⁰։ Բայց պետք է ասել, որ գաղթականության խնդրում ՀՅԴ և Հայ ռամկավար կուսակցությունները հիմնականում համագործակցել են իրար հետ։

Ինչևէ, ձայների մեծամասնությամբ բանաձևը ընդունվեց և ինը հոգուց բաղկացած նորընտիր Գործադիր մարմինը պետք է բանակցեր Պողոս Նուբարի, ՀՀ կառավարության ու խորհրդարանի հետ Միացյալ, Ազատ Հայաստանի պետական-օրենսդրական հիմքերը ստեղծելու նպատակով։

Արևմտահայերի համագումարը փետրվարի 13-ի իր վերջին նիստում ողջույնի նամակով դիմում է հանրապետության վարչապետին, որում մասնավորապես ասվում էր. «Համագումարը հավատացած է, որ Արարատյան Հանրապետության կառավարությունը կը փութա օր առաջ հայտարարել Միացյալ, Ազատ Հայաստանի անկախությունը և գործնական քայլեր առնել միացումը իրականացնելու համար կյանքի մեջ»²⁴¹։

Համագումարը նույն բովանդակությամբ դիմել է նաև Հայաստանի խորհրդարանին՝ հավատացած լինելով, որ խորհրդարանը չի ուշացնի իր որոշումը²⁴²։ Համագումարից հետո նորընտիր գործադիր մարմինը դիմեց Հայաստանի կառավարությանը՝ առաջարկելով «հայտարարություն անել Միացյալ Հայաստանի մասին»²⁴³։ Ահա սրանք էին այն հիմնական կովաններն ու շարժառիթները, որոնք մղեցին կառավարությանը Հայաստանի երկու մասերի միացման վերաբերյալ հայտարարություն անելու։

Կառավարության մյուս քայլը խորհրդարանը արևմտահայ ներկայացուցիչներով համալրելն էր։ Դրա համար ևս կային հիմքեր։ Տաճկահայ գաղթականությունը իրեն խորթացած էր զգում Արարատյան Հանրապետությունում, և ինչպես հարկն է, չէր մասնակցում երկրի հասարակական-քաղաքա-

²³⁸ «Համառոտ տեղեկագիր Արևմտահայ երկրորդ համագումարի», Ե., 1919 էջ 13-14։

²³⁹ «Ժողովուրդ», 28 փետրվարի 1919 թ.։

²⁴⁰ «Վան-Տոսպ», 31 մարտի 1919 թ.։

²⁴¹ «Համառոտ տեղեկագիր...» էջ 17, Ս. Վրացյան, Բանակցություններ ազգային պատվիրակության և ՀՀ միջև, Պոսթրեն, 1920, էջ 4-5։

²⁴² «Համառոտ տեղեկագիր...», էջ 18։

²⁴³ ՀՀ ՊԿՊԱ, ֆ. 199, ց. 1, գ. 14, մաս 1, թ. 30։

կան կյանքին: Նրանք գտնում էին, որ «Հայաստանի կառավարությունը հավասար աչքով չի նայում ռուսահայ և տաճկահայ գաղթականությանը»²⁴⁴: Դեռ 1918 թ. վերջերին արևմտահայ գործիչ Արսեն Կիտուրը դժգոհություն էր արտահայտում այն բանից, որ տաճկահայը չունի իր ձայնը ՀՀ խորհրդարանում, «որ կարող լիներ խոսելու իր ցավերի մասին»²⁴⁵:

Նախարարների խորհրդի կողմից մայիսի 27-ին հաստատված և հաջորդ օրը հրապարակված օրենքով, որպես երկու Հայաստանների իրական միացման արտահայտություն, որոշվեց Հայաստանի խորհրդի կազմը համալրել արևմտահայերի 12 ներկայացուցիչներով: Օրենքում ասված էր. «Հրավիրել Հայաստանի խորհրդի նիստերին մասնակցելու որպես խորհրդի լիիրավ անդամներ՝ Արևմտահայ գործադիր մարմնի կողմից ընտրված 12 ներկայացուցիչներ»²⁴⁶: «Մշակ» թերթը տեղեկացնում էր, որ դեռ մարտ ամսին ՀՅԳ - Հայաստանի կազմակերպությունը և ՀՅԳ խորհրդարանական խմբակցությունը հարց էին բարձրացրել 12 արևմտահայ ներկայացուցիչներ խորհրդարանում ներգրավելու մասին²⁴⁷:

Նախատեսված էր, որ արևմտահայ 12 պատգամավորների ներգրավումից հետո խորհրդարանը պիտի ունենար միայն մեկ նիստ՝ կառավարությանը նոր լիազորություններ տալու համար և պիտի ցրվեր՝ տեղի տալով նոր ընտրովի խորհրդարանին²⁴⁸: Իհարկե, նախատեսված էր նաև կառավարության ակտերի վավերացումը խորհրդարանում: Սակայն դեպքերն այնպես զարգացան, որ անհնարին դարձավ «ակտի» քննարկումը, իսկ մի քանի օր անց խորհրդարանը ինքնալուծարման ենթարկվեց:

Բայց այստեղ մտահոգություն է առաջացնում այն հանգամանքը, որ վերոհիշյալ արևմտահայ 12 ներկայացուցիչները ըստ կուսակցական պատկանելության եղել են դաշնակցականներ կամ նրանց հարողներ: Մինչդեռ մենք գիտենք, որ Կովկաս ապաստանած արևմտահայ գաղթականության մեջ զգալի կշիռ ու ազդեցություն ունեին Հայ ռամկավարները և անաչառ մոտեցման դեպքում այդ 12 անդամների թվում պետք է որ լինեին նաև ռամկավարներ: Բայց քանի որ նրանք հեռացել էին համագումարից և Արևմտահայ նորընտիր գործադիր մարմինը բաղկացած էր միայն դաշնակցական ներկայացուցիչներից, ուստի և նրա ընտրած 12 ներկայացուցիչներն էլ կուսակցական պատկանելությամբ դաշնակցականներ էին կամ ՀՅԳ համակիրներ: Դրանք էին՝ Կարո (Արմեն) Սասունին, Վաղարշակ Յոխիկյանը, Արսեն Կիտուրը, Վահագն Զրնոյանը, Հմայակ Մանուկյանը, Արմենակ Մաքսապետյանը

²⁴⁴ ՀՀ ՀԶԿՓ ՊԿԱ, Ֆ. 4047, ց. 1, գ. 144, թ. 2:

²⁴⁵ «Կայծ», 29 դեկտեմբերի 1918 թ.:

²⁴⁶ ՀՀ ՊԿՊԱ, Ֆ. 199, ց. 1, գ. 14, մաս 1, թ. 114, գ. 27, թ. 213, Ֆ. 200, ց.1, գ. 282, թ. 9:

²⁴⁷ «Մշակ», 20 մարտի 1919 թ.:

²⁴⁸ «Միացյալ և Անկախ Հայաստան», Կ. Պոլիս, 1919, էջ 96:

նը, Զավեն Կորկոտյանը, Վարդան Առաքելյանը, Հայկ Կոստյանը, Վան-Փուշը, Հայրապետ Հայրապետյանը և Արտաշես Միրզոյանը²⁴⁹:

Մեր կարծիքով, անշուշտ, իրավական, էլ չենք ասում բարոյական տեսակետից պատշաճ չէր ու կառավարության իրավասությունից միանգամայն դուրս էր խորհրդարան ինչ-որ թվով պատգամավորներ հրավիրելու մասին որոշում կայացնել: Եթե մայիսի 28-ի միացման ակտը այսպես թե այնպես կարելի էր օրինական համարել այն մեկ անգամ ևս վավերացնելով խորհրդարանում, ապա ոչ մի կերպ չի կարելի արդարացնել կառավարության որոշումը 12 արևմտահայ ներկայացուցիչներ խորհրդարան ներգրավելու մասին:

Այդուհանդերձ, որոշումն արդեն կայացվել էր ու դարձել իրողություն:

Ինքնին հասկանալի է, որ կառավարության որոշմամբ 12 թուրքահայ ներկայացուցիչների մուտքը խորհրդարան ապահովում էր ՀՅԳ-ի կայուն մեծամասնությունը, որն էլ մեծ անհանգստություն ու վրդովմունք առաջ բերեց ընդդիմության շրջանում: Միացյալ և Անկախ Հայաստանի հայտարարությունը ու արևմտահայ 12 պատգամավորների հրավերքը Հայաստանի խորհուրդ մեծ աղմուկով դիմավորեցին «աջ» և «ձախ» կուսակցությունների ներկայացուցիչները:

1919 թ. հունիսի 4-ին խիստ լարված պայմաններում տեղի ունեցավ խորհրդարանի նիստը: Այդ նիստին մասնակցում էին նաև 12 արևմտահայ ներկայացուցիչները, որոնց խորհրդարան մտնելուն դեմ էին ՀԺԿ, սոց.-դեմ. և էսեռական խմբակցությունները: Արդեն նախապես կազմած հայտարարություններով ամբիոն են բարձրանում առաջինը սոց.-դեմ. խմբակցության պատգամավոր Գ. Ղարաջյանը²⁵⁰, իսկ հետո՝ ՀԺԿ կողմից պատգամավոր Գ. Տեր-Խաչատրյանը: Նրանք իրենց կուսակցության ու խմբակցության անունից հայտարարեցին, որ կառավարությունը կատարել է ապօրինի քայլ, փաստորեն պետական հեղաշրջում, ուստի իրենք այսօրվանից հրաժարվում են խորհրդի աշխատանքներին մասնակցելուց²⁵¹:

Հայ ժողովրդական կուսակցության հայտարարության մեջ մասնավորապես ասվում էր. «Կառավարության արած քայլը ոչ միայն պետական հեղաշրջում և հարված է սահմանադրության դեմ, այլ այդ քայլը նույնիսկ խորհրդարանի իրավասությունից վեր է... Այդ ապօրինության հետևանքով ժողովրդական կուսակցությունը չի ճանաչում Հայաստանի խորհուրդը և կառավարությանը որպես օրինական մարմիններ: Ֆրակցիան հեռանում է խորհրդարանից և հետ է կանչում ժողովրդական նախարարներին կառավար-

²⁴⁹ «Աշխատանք», 7 հունիսի 1919 թ., «Միացյալ և Անկախ Հայաստան», Կ. Պոլիս, 1919, էջ 81:

²⁵⁰ ՌՄԳԲԿ (մենչեխկ) հայ հատվածը հրապարակեց նաև կոչ ուղղված հայ ժողովրդին, որում Դաշնակցական Հայաստանի կառավարության մեկ տարին բնութագրվում էր որպես կործանարար, կորստաբեր ու արկածախնդրական հայ ժողովրդի համար (Տես՝ ՀՀ ՊԿՊԱ, ֆ. 404, ց. 1, գ. 8, թթ. 1-3):

²⁵¹ ՀՀ ՀԶԿՓ ՊԿԱ, ֆ. 1022, ց. 2, գ. 121, թ. 1, ՀՀ ՊԿՊԱ, ֆ. 393, ց. 2, գ. 118, թ. 1, «Ժողովուրդ», 6 հունիսի 1919 թ.:

րությունից և հայտարարում է ակտիվ բոյկոտ խորհրդարանական ընտրությունների դեմ²⁵²:

Արդեն հունիսի կեսերին ժողովրդական նախարարները պաշտոնապես դուրս եկան կառավարությունից ու դրանով վերջ տրվեց ՀՅԳ-ՀԺԿ կոալիցիային: Նշենք, որ 1919 թ. մայիսի վերջի և հունիսի սկզբի խորհրդարանական ճգնաժամի շրջանում ՀԺԿ Հայաստանի կոմիտեի անդամ, ՀՀ արդարադատության նախարարի օգնական Հարություն Չմշկյանը, պաշտոնասիրությունից մղված, ընդունելի համարեց արևմտահայ 12 ներկայացուցիչների մուտքը խորհրդարան և իր դիմումի համաձայն հեռացավ իր կուսակցության շարքերից: Դրանից հետո, որպես վարձատրություն, նա ստացավ նախարարի պաշտոն²⁵³: Իսկ ՀԺԿ Երևանի կոմիտեն որոշեց կուսակցության կարգապահությունը խախտելու համար Հ. Չմշկյանին վտարել կուսակցության շարքերից:

Հայտարարությունների ընթերցումից հետո, որպես բողոքի նշան, ժողովրդական և սոց.-դեմ. պատգամավորները թողեցին խորհրդարանը ու ցուցադրաբար հեռացան դահլիճից: ՀԺԿ և սոց.-դեմոկրատներին հետևեցին Էսեռները: Նախ սոց.-հեղափոխական խմբակցության անունից արտակարգ հայտարարություն անելու համար ձայն է խնդրում Լ. Թումանյանը, բայց նախագահը մերժում է ձայն տալ, որովհետև մինչ այդ արդեն խոսք էր խնդրել վարչապետի պաշտոնակատարը և նա արդեն գտնվում էր ամբիոնի մոտ: Այդուհանդերձ, պատգամավոր Լ. Թումանյանը, խախտելով աշխատակարգը, տեղից սկսում է բարձրաձայն կարդալ իրենց հայտագիրը՝ խանգարելով Ալ. Խատիսյանին: Դահլիճում բարձրանում է աղմուկ, ժխոր, որից հետո Էսեռները նույնպես թողնում և հեռանում են դահլիճից: Էսեռները ևս քննադատում էին կառավարության արարքը, բայց, ինչպես հետո կտեսնենք, նրանք, ի տարբերություն ժողովրդականների և սոց.-դեմոկրատների, մասնակցեցին նոր խորհրդարանի ընտրություններին: Էսեռների հեռանալուց հետո դահլիճում մնում են միայն ՀՅԳ խմբակցությունը և արևմտահայ 12 ներկայացուցիչ պատգամավորները: Այդ օրը մահմեդական խմբակցությունը նիստին բողոքովին չէր ներկայացել: Այսուհանդերձ, նիստը շարունակվում է: Վարչապետի պաշտոնակատար Ալ. Խատիսյանն իր ելույթում սկսում է բացատրություններ տալ, թե ինչու կառավարությունը հանդես եկավ նման ակտերով²⁵⁴: «ՀՀ սահմանները, մատնանշում էր հռետորը, հասել են նախկին Թուրքիայի սահմանները. Կարսի նահանգի 3/4-ը մեր ձեռքին է, բացի Ախալցխայի շրջանից, որ վրացիների ձեռքին է և Օլթին, որ ժամանակավորապես գտնվում է տեղական մահմեդականների ձեռքը: Պետք էր արևմտահայ գաղթականությանը բնակեցնել իր երկրում: Դրդապատճառներից մեկն էլ այն էր, որ «Դաշնակից-

²⁵² ՀՀ ՊԿՊԱ, ֆ. 292, ց. 1, գ. 2, թ. 1, Լ. Թութունջյան, Հ.Յ.Գ. իրրես պետական գործոն, Կ. Պոլիս, 1921, էջ 41-42:

²⁵³ ՀՀ ՊԿՊԱ, ֆ. 404, ց. 1, գ. 38, թ. 2:

²⁵⁴ Լ. Թութունջյան, նշվ. աշխ., էջ 42:

ների» մոտ կասկած կար, թե ՀՀ չի ձգտում բացարձակ անկախության, և որ նա իբր վարանում է Ռուսաստանից կտրվել»²⁵⁵: Վարչապետի պաշտոնակատարը միացման հայտարարության անհրաժեշտությունը բացատրում էր նաև նրանով, որ շուտով անցկացվելու են խորհրդարանի ընտրություններ և ուստի հարկավոր էր, որ արևմտահայ գաղթականությունը իրեն զգար որպես իր միացյալ հայրենիքի լիարժեք քաղաքացին ու տերը²⁵⁶: Հայտարարության ընդունման դրդիչ հանգամանքներից մեկն էլ պետք է համարել այն, որ կառավարությունը մտավախում էր, որ նման կազմով խորհրդարանը հազիվ թե ընդուներ Միացյալ և Անկախ Հայաստանի ակտը: Խատիսյանը պարզաբանում էր, որ Հայաստանի երկու հատվածների միավորման ակտի պաշտոնական հայտարարումից հետո բնականաբար պետք է որ խորհրդարանի կազմում ընդգրկվեին արևմտահայերի ներկայացուցիչները և դրա համար կառավարությունը խորհրդարան հրավիրեց արևմտահայ 12 ներկայացուցիչների²⁵⁷:

Այնուհետև նա կանգ է առնում ՀՀ ներքին ու արտաքին քաղաքականության հիմնախնդիրներին: Ելույթի վերջում Ալ. Խատիսյանը հայտարարում է, որ կառավարությունը գիտակցում է իր արածը և պատասխանատու է դրան²⁵⁸: Հայաստանի կառավարության գլխավոր հիմնափաստարկն այն էր, որ ներկայիս իրական ՀՀ պետք է դառնար Միացյալ և Անկախ Հայաստանի միջուկը:

Հայաստանի կառավարության կողմից Միացյալ Հայաստանի անկախության մասին հայտարարած ակտը ու միաժամանակ 12 արևմտահայ պատգամավորների խորհրդարան հրավիրելը ներքաղաքական ուժեղ պայքար առաջ բերեց հատկապես Հայաստանի երկու ազդեցիկ՝ ՀՅԴ- և ՀԺ կուսակցությունների միջև: Մրանց միջև սկսված պայքարը դուրս եկավ խորհրդարանի և կառավարության շրջանակներից: Այդ օրերին ՀԺԿ պաշտոնաթերթեր՝ «Ժողովրդի ձայնը» և «Ժողովուրդը» հանդես եկան մեղադրանքներով: Ժողովրդականների թիֆլիսյան հատվածի օրգան «Ժողովրդի ձայնը» սխալ ու ապօրինի էր համարում հատկապես այն, որ «կառավարությունը իրեն համարում է Միացյալ ՀՀ կառավարություն»²⁵⁹: «Կազմել Միացյալ Հայաստանի կառավարություն,-շարունակում էր թերթը,- միմիայն ռուսահայերից, առանց թուրքահայերի մասնակցության, արդեն ոչ միայն անզույշ քայլ է, այլև աններելի վարմունք»²⁶⁰:

Իսկ ՀԺԿ երևանյան հատվածի պաշտոնաթերթ «Ժողովուրդը» կառավարական ակտերը որակեց որպես «պետական հեղաշրջում»²⁶¹: Մեր կարծիքով, կառավարության ընդունած վերոհիշյալ ակտերը պետական հեղաշր-

²⁵⁵ «Միացյալ և Անկախ Հայաստան», Կ. Պոլիս, 1919, էջ 94:

²⁵⁶ Նույն տեղում, էջ 95:

²⁵⁷ ՀՀ ՊԿՊԱ, Ֆ. 200, ց. 1, գ. 35, ք. 87:

²⁵⁸ «Ժողովուրդ», 11 հունիսի 1919 թ.:

²⁵⁹ «Ժողովրդի ձայն», 3 հունիսի 1919 թ.:

²⁶⁰ Նույն տեղում:

²⁶¹ «Ժողովուրդ», 4 հունիսի 1919 թ.:

ջում չի կարելի դիտել այն մասով, որ խորհրդարանն այդ ժամանակ իր օրենսդիր լիազորությունները հանձնել էր կառավարությանը: Եվ ասենք, օրինակ, չի կարելի Հայաստանի կառավարության այս քայլը համեմատել ցարական կառավարության 1907 թ. հունիսի 3-ի օրենքի հետ, երբ վարչապետ Պ. Ստոլիպինը, առանց օրենսդիր մարմնի՝ Պետական դումայի տված լիազորությունների ու գիտության, օրենք հրապարակեց 2-րդ Պետական դուման արձակելու և 3-րդը՝ հրավիրելու մասին:

Ժողովրդականները արևմտահայության իրավունքների ու ջանքերի բռնաբարում համարեցին հայտարարության այն հատվածը, որտեղ ՀՀ ներկա կառավարությունը իրեն հռչակում էր «Սիացյալ և Անկախ Հայաստանի կառավարություն»՝ անտեսելով Ազգային պատվիրակության ու նրա ղեկավար Պողոս Նուբար փաշայի գոյությունը: Այստեղ կարծում ենք, որ ժողովրդականներին մտահոգում էր ոչ այնքան խնդրի իրավաբաղաբական կողմը, որքան այն, որ Սիացյալ Հայաստանի կառավարության ղեկին հավակնում էր իրենց քույր կուսակից ու պաշտելի Պողոս Նուբարը: Եվ նրանք ցանկանում էին այդ բաղձալի պաշտոնին տեսնել ոչ թե դաշնակցականի, այլ ռամկավար Պողոս փաշային: Մեզ թվում է, թե այս տարածայնությունների հիմքում ընկած էին ավելի շատ կուսակցական ու անձնական հաշիվները, քան թե համապետական ու համազգային գերագույն շահերը: Հիշեցնենք, որ ՀԺԿ-ը իր ստեղծման պահից ամենից ավելի մտահոգ էր ռուսահայ ու կովկասահայ հիմնախնդիրներով, բայց, ի հեճուկս Հայ ռամկավարների՝ սկսեց ավելի ու ավելի կարևորել արևմտահայ դատը և նրանց հետ հանդես գալ միասնաբար՝ որպես հակակշիռ ՀՅ Դաշնակցությանը:

Որպես ստեղծված վիճակից դուրս գալու ելքը՝ Ժողովրդականները առաջարկում էին այն, որ Հայաստանի ներկա կառավարությունը խորհրդարանի միջոցով պաշտոնապես դիմի Փարիզի արևմտահայ Ազգային գործադիր մարմնին ու պատվիրակությանը և առաջարկի հայության երկու հատվածների ներկայացուցիչներից կազմել ժամանակավոր կառավարություն և հրավիրել Սիացյալ Հայաստանի հիմնադիր /Սահմանադիր/ ժողով²⁶²: Հայ ժողովրդականները գտնում էին, որ խորհրդարան հրավիրված արևմտահայ 12 ներկայացուցիչները ընտրված են միայն Հայաստանի սահմաններում ապաստանած մոտ 200 հազ. արևմտահայերի կողմից, որոնք ներկայացնում են արևմտահայության ընդամենը մի հատվածը և հեռու ամբողջ թրքահայության արտահայտիչը լինելուց: Ըստ ժողովրդականների՝ գաղութահայության շահերի գլխավոր արտահայտիչը Փարիզի Արևմտահայ գործադիր մարմինն է, առանց որի հետ համաձայնության գալու՝ անընդունելի ու անօրինական են ներկայիս ՀՀ կառավարությանը Սիացյալ Հայաստանի կառավարություն համարելը և Երևանի արևմտահայ գործադիր մարմնի կողմից 12 արևմտահայերի՝ որպես Սիացյալ Հայաստանի խորհրդարան ուղարկելը:

²⁶² ՀՀ ՊԿՊԱ, ֆ. 200, ց. 11, գ. 35, ք. 116, «Ժողովրդի ձայն», 3 հունիսի 1919 թ., «Ժողովուրդ», 4 հունիսի 1919 թ.:

Ժողովրդականների մերժողական դիրքի գլխավոր պատճառն այն էր, որ Երևանի արևմտահայ գործադիր մարմինը բաղկացած էր դաշնակցականներից, իսկ Փարիզի արևմտահայ գործադիր մարմինը՝ գերազանցապես ռամկավարներից՝ Պ. Նուբար փաշայի գլխավորությամբ: Այստեղ պարզից էլ պարզ է, որ հետապնդվում էին զուտ կուսակցական շահեր: ՀՅԴ-ն և ՀԺԿ միջև դիմակայությունն ավելի ուժեղացավ այն բանից հետո, երբ Մ. Պապաջանյանի ստորագրությամբ Փարիզից ստացվեցին հրահանգներ, որոնցում պահանջում էր իր կուսակցից ժողովրդականներից «շարժվել համաձայն Պ. Նուբարի ցուցմունքների»²⁶³:

Արտախորհրդարանական կուսակցություններից ՀՀ կառավարության մայիսի 28-ի հայտարարությանը բողոք արտահայտեց Ժողովրդականներին զաղափարակից Հայ ռամկավար կուսակցության Հայաստանի կազմակերպությունը: Սրանց կենտրոնական խորհուրդը հունիսի 4-ին բողոք ներկայացրեց խորհրդարանին՝ պահանջելով կասեցնել կառավարության ընդունված երկու ակտերը և հարաբերությունների մեջ մտնել Պ. Նուբարի գլխավորած Փարիզի Արևմտահայ գործադիր մարմնի հետ և փոխադարձ համաձայնությամբ կազմել Սիացյալ Հայաստանի կառավարություն²⁶⁴:

Հայաստանի ռամկավարների օրգան «Վան-Տոսպը» հունիսի 2-ի համարում խոշոր տառերով հայտարարություն էր արել. «Կորչին պառլամենտ մտած թուրքահայ 12 հացկատակները»²⁶⁵: Դժվար չէ նկատել, որ ռամկավարները դեմ էին արևմտահայ 12 ներկայացուցիչներին այն բանի համար, որ կուսակցական պատկանելությամբ նրանք դաշնակցականներ էին:

Մայիսի 28-ի ակտին բողոք արտահայտեցին նաև Մ. Գ. հնչակյանները: Թավրիզում լույս տեսնող «Պայքար» թերթում նրանք դատապարտում էին ՀՅԴ-ն և Հայաստանի կառավարության այդ քայլը՝ հայտարարելով, որ Դաշնակցությունը բռնազավթել է հայ դեմոկրատիայի սրբազան իրավունքը՝ փաստորեն արհամարհելով դրասաշխարհի 2 մլն. հայության քվեն²⁶⁶:

ՀՀ կառավարության ակտերը մեծ անբավականությամբ ընդունեցին զաղութահայ ռամկավարները և անձամբ Պողոս Նուբարի գլխավորած Փարիզի արևմտահայ Ազգային պատվիրակությունը: Պողոս փաշան իրեն վիրավորված զգաց և նույնիսկ փորձ արեց հանդես գալ բողոքի հայտարարությամբ²⁶⁷:

Առաջ անցնելով, ասենք, որ մման պարագայում միջկուսակցական վեճը հարթելու նպատակով որոշվեց Փարիզից պատվիրակություն (Վ. Թեքեյան, Ն. Տեր-Ստեփանյան) ուղարկել Երևան և, բանակցելով Հայաստանի իշ-

²⁶³ Ս. Վրացյան, Բանակցություններ ազգային պատվիրակության և ՀՀ միջև, Պոսթրն, 1920, էջ 13:

²⁶⁴ «Ժողովուրդ», 8 հունիսի 1919 թ., «Վան-Տոսպ», 9 հունիսի 1919 թ.:

²⁶⁵ «Վան-Տոսպ», 2 հունիսի 1919 թ.:

²⁶⁶ «Պայքար», Թավրիզ, 1 հուլիսի 1919 թ.:

²⁶⁷ Ս. Վրացյան, նշվ. աշխ., էջ 6:

խանութիւնները հետ, մշակել Միացյալ Հայաստանի համաձայնության սկզբունքները: Չնայած 1919 թ. երկրորդ կեսին նշված պատվիրակությունը եկավ Հայաստան, տարվեցին բանակցություններ, սակայն կողմերի անզիջողականության պատճառով համաձայնության չկայացավ: Վերը ասվածներից կարելի է անել այն հետևությունը, որ Ժողովրդական և Ռամկավար կուսակցությունները դեմ արտահայտվեցին Միացյալ և Անկախ Հայաստան ստեղծելու մասին պաշտոնական հայտարարությանը ոչ թե այն բանի համար, որ իրենք դեմ են այդ գաղափարին, այլ նրա համար, որ մրցակցելով ՀՅԴ-ի հետ, իրենք էին ձգտում ստանձնել առաջնության դափնին ու տիրել Միացյալ Հայաստանի իշխանության բարձունքներին: Իսկ ինչ վերաբերում էր սոց. դեմ. և էսէռներին, ապա սրանք ոչ միայն չէին ընդունում Միացյալ Հայաստանի գաղափարը, այլև ընդհանրապես դեմ էին Հայաստանի անկախությանը:

1919 թ. մայիսի 28-ի կառավարության պատմական հայտարարությանը՝ Հայաստանի միացման և անկախության մասին քաղաքական բանաձևին, անկախ Հայ ռամկավարների ու ժողովրդականների բացասական վերաբերմունքից, իր սրտագին հավատարմությունն արտահայտեց ՀՀ սահմաններում ապրող արևմտահայ գաղթականների գործադիր մարմինը, որը, ինչպես ասվեց, գտնվում էր ՀՅԴ-ի ազդեցության տակ: Հավատարիմ Արևմտահայ 2-րդ - համագումարում առաջին անգամ բանաձևված Անկախ և Միացյալ Հայաստանի ոգուն, Արևմտահայ գործադիր մարմնի նախագահ Վ. Քրմոյանի և քարտուղար Վ. Յոխիկյանի ստորագրությամբ ՀՀ վարչապետին ուղղված գրությունով լիակատար պատրաստականություն էր հայտնվում՝ «Հայաստանի խորհրդարանի և կառավարության մեջ գործուն մասնակցություն բերելու, Միացյալ Հայաստանի գաղափարն իրականացնելու և հայ ժողովրդի ազատությունն ու բարգավաճումը ամրապնդելու համար»²⁶⁸.

Այն օրը՝ հունիսի 4-ին, երբ ժողովրդականները, սոցիալ-դեմոկրատները և էսէռները ցուցադրաբար հեռացան խորհրդարանից, հաջորդ օրը՝ հունիսի 5-ին, վարչապետի պաշտոնակատար Ալ. Խատիսյանը, արտասովոր ու վտանգավոր ոչինչ չտեսնելով հունիսի 4-ի խորհրդարանական ճգնաժամում, հանգիստ տոնով հեռագրում է Թիֆլիս ՀՀ դիվանագիտական ներկայացուցչությանը. «Այս իրադարձությունը բոլորն ընդունեցին հանգիստ, կյանքը ընթանում է իր հունով, ընտրությունները կկայանան ժամանակին»²⁶⁹:

1919 թ. հունիսի 5-ին կայացավ Հայաստանի խորհրդի վերջին նիստը: Նախագահում էր Ավ. Սահակյանը: Նախարարական օրյակներում էին կառավարության անդամները: Պատգամավորական աթոռները աչից ու ձախից զբաղեցրել էին դաշնակցական պատգամավորները, այդ թվում՝ 12 արևմտահայ ներկայացուցիչ պատգամավորները: Ներկա էին նաև երկու թուրք և 1 եգ-

²⁶⁸ ՀՀ ՊԿՊԱ, Ֆ. 276, ց. 1, գ. 119, ք. 52:

²⁶⁹ Նույն տեղում, ք. 48:

դի պատգամավորներ: Ինչպես միշտ, օթյակները, ամֆիթատրոնը և վերնասահլը լցված էին հասարակայնության ներկայացուցիչներով:

Նիստը բացվեց երեկոյան ժամը 9-ին: Ընդառաջ գնալով 12 արևմտահայերի հարցապնդմանը՝ քննարկվեց արևմտահայությանը դեպի Երկիր ներգաղթի կազմակերպման խնդիրը: Ջեկուցեց խնամատարության նախարար Ս. Թորոսյանը: Տաճկահայ պատգամավորներից ելույթներով հանդես եկան Կարո Սասունին, Հմայակ Մանուկյանը և Արմենակ Մաքսապետյանը: Որոշվեց արագացնել ներգաղթի գործը: Դրանից հետո խորհրդարանը 22 ձայնով որոշում ընդունեց առհասարակ դադարեցնել իր աշխատանքները, քանի որ երկու-երեք շաբաթից հետո պիտի կայանային նոր խորհրդարանի ընտրությունները²⁷⁰:

Խորհրդարանի վաղաժամկետ արձակման գլխավոր պատճառն այն էր, որ ժողովրդական, սոց. դեմ. և էսէռական խմբակցությունները հեռացել էին խորհրդարանից: Եվ չէր մնում այլ բան, քան արձակուրդ հայտարարելով՝ փաստորեն արձակել խորհրդարանը:

Այսպիսով, ստեղծված փակուղային վիճակից դուրս գալու նպատակով էր, որ ընդհատվեցին, իսկ հետո էլ դադարեցվեցին խորհրդի աշխատանքները, իսկ նրա օրենսդրական իրավունքները անցան գործադիր իշխանությանը՝ կառավարությանը: Հունիսի 5-ը համարվում է Հայաստանի խորհրդի փակման օրը: Սակայն արդեն գործում էր նոր խորհրդարանի ընտրությունների կենտրոնական հանձնաժողովը և որոշված էր ընտրությունների օրը: Ահա այսպիսի ավարտ ունեցավ Հայաստանի ոչ ընտրովի անդրանիկ խորհրդարանը:

Քննելով և վերագնահատելով կառավարության մայիսյան հայտարարությունը և նրա շուրջ ծագած առաջին խորհրդարանի ճգնաժամը՝ գալիս ենք այն հետևության, որ, անկախ կառավարությանը տրված օրենսդրական լիազորություններից և անկախ խնդրի հետագա ճակատագրից, իրավական ու բարոյական տեսակետից, այնուամենայնիվ, ավելի ճիշտ կլիներ, որ նման կարևորությամբ հայտարարության ակտը ընդունվեր խորհրդարանի կողմից:

Ի մասնավորի, եթե կարելի էր հաշտվել Միացյալ Հայաստանի մասին հայտարարության հետ, ապա, որքան էլ գորավոր էին վարչապետի պաշտոնակատարի բերած փաստարկներն ու մեկնաբանությունները, իրավաբարոյական տեսակետից, մեղմ ասած, ճիշտ չէր թեկուզ և մեկ օրով խորհրդարան պատգամավոր ընդգրկել առանց նրա գիտության: Դա կառավարության իրավասությունից դուրս էր և այդ ընդունված երկու ակտերն առհասարակ նահանջ էին պառլամենտարիզմի սկզբունքներից: Պետք է նկատի առնել, որ կատարվել էր խորհրդի թվակազմի փոփոխություն, մի պարագա, որի փոփոխման համարձակություն չէր ունեցել անգամ խորհրդարանը: Նախորդ 10 ամիսների ընթացքում խորհրդի կազմը մնացել էր անփոփոխ (46 հոգի): Եվ

²⁷⁰ ՀՀ ՊԿՊԱ, Ֆ. 198, ց. 1, գ. 20, ք. 56, «Հայաստանի խորհրդի հաստատած օրենքները 1918-1919 թթ.», մաս 1, Ե., 1919, էջ 61:

ահա կառավարությունը մեկ հարվածով այն դարձնում է 58: Կարծում ենք, որ այս խնդրում ընդդիմության արտահայտած բողոքն ու դժգոհությունը որոշակի հիմքեր ունեին և առանձին դեպքերում կառավարության հասցեին ուղղված քննադատությունը տեղին էր:

Արդարև, որքան էլ ընդունելի կամ վիճարկելի լինեն այս ճգնաժամի հետ կապված հակամարտող կողմերի թեր և դեմ փաստարկները, մի բան պարզ է, որ այս ամենի հիմնապատճառն այն էր, որ Հայաստանը տակավին չուներ իր հիմնական օրենքը՝ Սահմանադրությունը: Հանրապետությունում սահմանադրության և այլ հիմնարար օրենքների բացակայության պատճառով մերթ խորհրդարանն էր խախտում իր իրավասության շրջանակները՝ ստանձնելով նաև գործադիր մարմնի ֆունկցիաներ, մերթ էլ կառավարությունն էր գործադիր իշխանությանը զուգահեռ ստանձնում օրենսդիր մարմնի լիազորություններ: Խորհրդարանի դերի նսեմացման և գործադիր իշխանության դերի աստիճանական մեծացման միտումը ուժեղացավ հատկապես երկրորդ խորհրդարանի օրոք:

Հանրագումարի բերելով Հայաստանի խորհրդի օրենսդրական գործունեության արդյունքները՝ տեսնում ենք, որ 1918 թ. օգոստոսի 1-ից մինչև դեկտեմբերի 31-ը ընկած ժամանակամիջոցում ընդունվել է ընդամենը 63 օրենք²⁷¹, իսկ 1919 թ. հունվարից մինչև հունիսը ընկած ժամանակամիջոցում կայացել է 27 նիստ, իսկ 5 նիստ չի գումարվել քվորում չլինելու պատճառով: Հաստատվել են 53 օրենք, որոնց մեծ մասը եղել է ժամանակավոր²⁷²: Ամբողջությամբ վերցրած՝ խորհուրդն իր տասնամյա գոյության ընթացքում, մեր հաշվումներով, ընդունել է 116 օրենք: Այդ օրենքներից հիմնականների թվին կարելի է դասել՝ արդարադատության և դատարանակազմության, մենաշնորհի, անօրինական զենքի բռնագրավման, դպրոցների, գաղթականների խնամատարության մասին և այլ օրենքներ:

²⁷¹ «Հայաստանի խորհրդի հաստատած օրենքները 1918-1919 թթ.», մաս 1, Երևան, 1919, էջ 1-37:

²⁷² «Հառաջ» 6 հունվարի 1920 թ., «Հայաստանի հաստատած օրենքները 1918-1919 թթ.», մաս 1, Երևան, 1919, էջ 38-61: ՀՀ ՊԿՊԱ, Ֆ. 200, ց. 1, գ. 86, էջ 32-36:

ԳԼՈՒԽ ԶՈՐՐՈՐԳ- ԵՐԿՐՈՐԳ-ԽՈՐՀՐԳԱՐԱՆԸ ԵՎ ԿՈՒՍԱԿՑՈՒԹՅՈՒՆՆԵՐԸ

1. Խորհրդարանի ընտրությունները և կուսակցությունները

1919 թ. գարնանից ՀՀ վիճակը սկսեց նկատելիորեն կայունանալ ու բարելավվել: Ընդարձակվեցին հանրապետության սահմանները՝ անվանապես իր մեջ ներառելով Արցախից մինչև Օլթի՝ շուրջ 67 հազար քառ. կմ. տարածք: Ամերիկյան այլուրը մեղմեց սովը: Հանրապետության բնակչությունը անցավ համեմատաբար խաղաղ աշխատանքի: Շինականը ուղղեց կորացած մեջքը և սկսեց վարուցանքը: Համայն հայությունը Փարիզի խաղաղության վեհաժողովից սրտատրոփ սպասում էր Հայկական հարցի արդարացի լուծմանը: Դրական տեղաշարժեր նկատվեցին տնտեսական ու կրթամշակութային կյանքում: Այնպես որ՝ հանրապետությունում ակնբախ էին կայունացման միտումները:

Եվ ահա նման պայմաններում օրակարգի հարց դարձավ Հայաստանի նշանակովի խորհրդարանի արձակումը և ժողովրդական ընտրությունների միջոցով նոր, իսկական խորհրդարանի կազմավորումը: Նոր խորհրդարանի ընտրությունների արագացման համար արտաքին ազդակ հանդիսացավ այն, որ 1919 թ. մարտի 12-ին բացվեց Վրաստանի նորընտիր Սահմանադիր ժողովը¹: Նրա հանդիսավոր բացմանը ներկա էր նաև Հայաստանի խորհրդարանի նախագահ Ավ. Սահակյանը:

1919 թ. մարտի վերջին կառավարությունը օրինագիծ ներկայացրեց խորհրդարանի այլընտրանքային ընտրությունների մասին: Մենչևիկյան «Կայծը» տեղեկացնում էր, որ խորհրդարանի ընտրությունների օրինագիծը արդեն պատրաստ է և խորհրդի կողմից ընդունվելուց հետո այն կիրառարկվի²:

Այս կամ այն երկրի ժողովրդավարության, նրանում առկա քաղաքական ազատությունների աստիճանը կարելի է որոշել նաև խորհրդարանի ընտրություններով: Որ ՀՀ ժողովրդավարական երկիր էր՝ ընդունում էին նույնիսկ ընդդիմության առանձին գործիչներ: «Շնորհիվ մեզ մոտ գոյություն ու-

¹ ՀՀ ՊԿՊԱ, ֆ. 200, ց. 1, գ. 291, ք. 76, «Զանգ», 16 մարտի 1919 թ.:

² «Կայծ», 26 մարտի 1919 թ.:

նեցող քաղաքական ազատությունների և ընդհանուր ընտրական սիստեմի,- նշել է ՀԺԿ տեսաբան Հ. Ստեփանյանը,- ժողովուրդը հնարավորություն է ստացել ոչ միայն իր ձայնը լսելի դարձնելու, այլև իր սեփական բախտը տնօրինելու: Կուսակցությունները ակտիվորեն մասնակցում են քաղաքային խորհուրդների, ազգային հաստատությունների և պառլամենտի ընտրություններին»³:

Փետրվարյան հայտնի միջադեպից հետո խմբակցությունների փոխհամաձայնությամբ արդեն կազմվել էր «Հայաստանի խորհրդարանի ընտրությունների մասին» օրինագիծը, որը բաղկացած էր տասը գլուխներից և 111 հոդվածներից⁴: Այնտեղ ներկայացված էին ընտրությունների հետ կապված բոլոր պայմաններն ու պահանջները: Հայաստանի խորհրդարանի ընտրությունների մասին օրենքը մշակելիս՝ հիմք էր ընդունվել ռուսական Սահմանադիր ժողովի ընտրությունների մասին «Պոլոժենիան» Անդրկովկասյան հատուկ կոմիտեի (ՕՁԱԿՈՍ)-ի մտցրած փոփոխություններով⁵: Սահմանվում էր ընտրությունների ժողովրդավարական համակարգ՝ ընդհանուր, ուղղակի, հավասար, համեմատական և գաղտնի քվեարկության միջոցով, առանց ազգի, կրոնի ու սեռի խտրության⁶: Համաձայն խորհրդարանի ընտրությունների մասին օրենքի երկրորդ հոդվածի՝ պատգամավորների թիվը սահմանվում էր 80 մարդ⁷: Ամեն մի ընտրող քաղաքացի կարող էր ընդգրկվել միայն մեկ ընտրացուցակում: Ընտրելու իրավունք ունեին 20 տարին լրացած երկու սեռի բոլոր քաղաքացիները: Ընտրական իրավունք էր տրվում նաև հանրապետությունում գտնվող արևմտահայ գաղթականներին առանց որևէ սահմանափակման⁸: Իսկական զինվորական ծառայության մեջ գտնվողները ընտրություններին մասնակցելու իրավունք չունեին⁹: Նույն կերպ, իսկական զինծառայության մեջ գտնվողները զրկվում էին նաև զեմստվային և քաղաքային ինքնավարության մարմինների ընտրություններին մասնակցելու իրավունքից¹⁰: Սա արվում էր բանակը ապակուսակցականացնելու և զինվորականներին քաղաքական պայքարից հեռու պահելու նպատակով: Նման ընտրակարգ մտցնելիս, մասնավորապես, հաշվի էր առնվել այն հանգամանքը, որ 1917-1918 թթ. ռուսական զորքի քայքայման ու կազմալուծման գործում զգալի են եղել զինծառայողներին ընտրական իրավունք տալը ու ընտրապայքարին մասնակից դարձնելը:

³ Հ. Ստեփանյան, *Հայ ժողովրդական կուսակցությունը համազգային և ապադասակարգային է, Ալեքսանդրապոլ, 1919 թ. էջ 1*:

⁴ ՀՀ ՊԿՊԱ, ֆ. 404, ց. 1, գ. 62, քք. 1-14:

⁵ ՀՀ ՊԿՊԱ, ֆ. 199, ց. 1, գ. 14, մաս 1, ք. 43:

⁶ Ս. Վրացյան, *Հայաստանի Հանրապետություն, Բեյրութ, 1958, էջ 276*:

⁷ «Օրենք Հայաստանի պառլամենտի ընտրությանը», *ս. ս. և ք.*, էջ 1:

⁸ ՀՀ ՊԿՊԱ, ֆ. 199, ց. 1, գ. 14, մաս 1, ք. 43:

⁹ ՀՀ ՊԿՊԱ, ֆ. 404, ց. 1, գ. 62, ք. 1, «Ժողովուրդ», 4 մայիսի 1919 թ.:

¹⁰ ՀՀ ՊԿՊԱ, 199, ց. 1, գ. 14, մաս 1, ք. 127:

Ընտրությունների գործի կազմակերպման ու ղեկավարման համար ստեղծվում են կենտրոնական, գավառական, շրջանային, քաղաքային, գյուղական և թաղամասային ընտրական հանձնաժողովներ: 10-րդ հոդվածով կենտրոնական ընտրական հանձնաժողովի նախագահին ընտրում էր խորհրդարանը: Կենտրոնական ընտրական հանձնաժողովի իրավասությունների մեջ մտնում էին.

ա) Կազմակերպել ու նախապատրաստել քվեաթերթիկները և ընտրացուցակները,

բ) Քննել և հաստատել պատգամավորության թեկնածուների ցանկը,

գ) Ընդհանուր հսկողություն իրականացնել խորհրդարանի ընտրությունների ընթացքի վրա,

դ) Ընտրությունների արդյունքների հիման վրա կազմել պատգամավորական թեկնածուներից պատգամավոր ընտրվածների ցանկը, նրանց տալ վկայական (մանդատ) պատգամավոր ընտրվելու մասին,

ե) Տնօրինել ընտրությունների կապակցությամբ հատկացված պետական վարկերը և միջոցները,

զ) Բոլոր ընտրական հանձնաժողովներից ստացված ընտրությունների արդյունքների, բողոքարկումների և այլնի մասին նյութերը քննել, վիճակագրական մշակման ենթարկել և խորհրդարանի բացումից հետո ողջ գործավարությունը հանձնել նրան¹¹:

Մինչև ընտրությունների օրը քվեաթերթիկները պետք է արդեն կնքված լինեին, դրաի մաքուր կողմից, ընտրական որևէ (կենտրոնական, քաղաքային, շրջանային կամ գյուղական) հանձնաժողովի կնիքով¹²:

Հայաստանի խորհրդարանի ընտրությունները անցկացվելու էին **համամասնական** համակարգով՝ ըստ կուսակցական ցուցակների: Այսինքն՝ յուրաքանչիւր կուսակցություն, հասարակական կազմակերպություն կամ ազգային հոսանք ներկայացնում էր իր թեկնածուների ընդհանուր ցանկը, որն էլ դրվելու էր համաժողովրդական քվեարկության:

Կազմվեց ընտրությունների կազմակերպման ու անցկացման կենտրոնական ընտրական հանձնաժողով հետևյալ կազմով՝ Ս. Խաչատրյան (նախագահ), Դ. Գեղամյան, Ա. Բաբայան և Ա. Խոնդկարյան (անդամներ)¹³: Նշանակվեցին գավառական հանձնաժողովների նախագահները և հրահանգիչները: Հիմնվեցին նաև գավառամասային և գյուղական ընտրական հանձնաժողովները: Գավառներում ընտրական հանձնաժողովներին մեծ աջակցություն էին ցույց տալիս գավառական կոմիսարները: Վերջիններիս «աջակցությունը» ընտրական հանձնաժողովներին այնքան մեծ էր, որ հիմքեր կան ենթադրելու, որ դրանք հնարավոր է ազդած լինեն ընտրությունների արդյունքների վրա:

¹¹ «Օրենք Հայաստանի պառլամենտի ընտրությանը», *ա. տ. և թ., էջ 4-5*:

¹² «Արարատյան աշխատավոր», 13 հունիսի 1919 թ.:

¹³ «Ժողովուրդ», 13 ապրիլի 1919 թ.:

1919 թ. մարտի 31-ին Հայաստանի խորհրդի նիստում ընդունվեց խորհրդարանի ընտրությունների մասին օրենքը: Միաժամանակ հաստատվեց կենտրոնական ընտրական հանձնաժողովին 200 հազ. ռուբլի վարկի բաժնով՝ ընտրությունների ծախսերի համար¹⁴:

Արդեն ապրիլի վերջին կազմվել էին ընտրողների ցուցակները, որոնցում նշված էին 20 տարեկանից բարձր երկու սեռի բնակչությունը: Ցուցակագրված ընտրողների քանակը, առանց Կարսի և Շարուր-Նախիջևանի շրջանների, կազմել է ընդամենը 365780 մարդ¹⁵:

Պատգամավորության թեկնածուները առաջադրվեցին ըստ կուսակցությունների: Արդեն մայիս ամսին խորհրդարանի ընտրություններում ներկայացված էին հետևյալ կուսակցությունների և ազգային փոքրամասնությունների թեկնածուների ցուցակները. թիվ 1. ՀՅԳ՝ 120 պատգամավորության թեկնածու, 2. ՀժԿ՝ 60, 3. Էսեռական՝ 35, 4. քրդական՝ 2, 5. ասորական՝ 6. Արագածոտնի անկուս. գյուղաց. միություն՝ 18, և թիվ 7. մահմեդական (թուրքական)՝ 16¹⁶: Այսպիսով, խորհրդարանի ընտրություններում պաշտոնապես ներկայացված ու գրանցված էին քաղաքական կուսակցությունների ու հասարակական-ազգային խմբերի ընդամենը յոթ ցուցակ:

Սկսված ընտրարշավում առաջատարը ՀՅԳ կուսակցությունն էր ու նրա 120 հոգանոց պատգամավորական թեկնածուների ցանկը: Ընտրապայքարում ՀՅԳ առաջադրած կարգախոսներն էին. 1. «Միացյալ և Անկախ Հայաստան», 2. «Ամբողջ իշխանությունը աշխատավոր ժողովրդին», 3. «Հողը՝ աշխատավորին» , 4. «Գործը՝ գործազուրկին», 5. «Հացը՝ ժողովրդին», 6. «Ժողովուրդների համերաշխություն և եղբայրություն» և այլն:

Պոտենցիալ առումով ՀՅԳ-ի գլխավոր մրցակիցը ՀժԿ-ն էր: Սակայն ինչպես արդեն ասվել է, 1919 թ. մայիսի 28-ին կառավարության հայտնի հայտարարությանը հաջորդած դեպքերով, հունիսի սկզբից, ժողովրդականները, ինչպես նաև սոցիալ-դեմոկրատները (մենշևիկ և բոլշևիկ) խորհրդարանական ընտրություններին բոյկոտ հայտարարեցին:

Հայ սոց.-դեմ. մենշևիկների բոյկոտի դրդապատճառներից մեկն հավանաբար այն պետք է համարել, որ քաղաքային և տեղական ինքնավարությունների ընտրությունների փորձով իրենք էլ էին համոզվել, որ խորհրդարանի ընտրություններում բավարար հաջողություն չեն ունենա: Բավական է միայն հիշեցնել, որ 1918 թ. դեկտեմբերի 15-ին Երևանի քաղաքային ինքնավարության ընտրություններում, սոց.-դեմոկրատների ու նրանց օրգան «Կաջծի» նա-

¹⁴ ՀՀ ՊԿՊԱ, Ֆ. 199, ց. 1, գ. 27, թ. 128, Ֆ. 202, ց. 1, գ. 41, թ. 25, «Չանգ», 2 ապրիլի 1919 թ., «Նոր աշխատավոր», Թիֆլիս, 24 հունիսի 1919 թ.:

¹⁵ Մ. Վրացյան, նշվ. աշխ., էջ 277, Ռ. Հովհաննիսյան, նշվ. աշխ. հ. 1, էջ 471 (անգլերեն): «Ժողովուրդ» թերթի հայտնած տվյալներով՝ ընտրողների թիվը կազմել է 380 հազ. մարդ, տես՝ «Ժողովուրդ», 18 հունիսի 1919 թ.:

¹⁶ ՀՀ ՊԿՊԱ, Ֆ. 198, ց. 1, գ. 7, թթ. 1-8, «Հայաստանի աշխատավոր», 25 մայիսի 1919 թ.:

խընտրական ուժեղ քարոզչության պայմաններում¹⁷ մենչևիկները ստացել էին ընդամենը մեկ տեղ, այն դեպքում, երբ ՀՅԳ՝ 42, ՀԺԿ՝ 14, էսէՆ՝ 3 տեղ¹⁸:

Ինչ վերաբերում էր բոլշևիկների կողմից խորհրդարանական ընտրությունների բոյկոտին, ապա պետք է ասել, որ մինչև 1919 թ. կեսերը սրանք ՀՀ-ում ե՛ր քանակով, ե՛ր ծավալած գործունեությամբ էական դեր չէին խաղում, որ եթե ընտրությունները չբոյկոտեին էլ, մինևույն է, հազիվ թե կարողանային պատգամավորական որևէ թեկնածու անցկացնել: Այդ ժամանակ Հայաստանում բոլշևիկյան գաղափարներով առաջնորդվող ամենասակտիվ կազմակերպությունը երիտասարդ կոմունիստների «Սպարտակ» միությունն էր: Նախընտրական փուլում «Սպարտակ» կազմակերպությունը ևս կոչ հրապարակեց խորհրդարանի ընտրությունները բոյկոտելու մասին¹⁹:

Պետք է ասել, որ խորհրդարանների բոյկոտի գաղափարը բոլշևիկ-լենինյանների համար նորություն չէր: Դա գալիս էր դեռ ռուսական առաջին Պետական դումայի ընտրությունների ժամանակներից: Հայտնի է, որ հեղափոխական մարքսիստների (կոմունիստների) համար պառլամենտը և պառլամենտարիզմը «իբրև բուրժուական մնացուկ» արդեն համարվում էր անցած էտապ²⁰: Ուստի՝ նրանք գտնում էին, որ պետք էր պայքարել նրա դեմ: Լենինյանների նպատակը դասակարգային իշխանության մարմինների՝ բանվորագյուղացիական և զինվորական խորհուրդների ու պրոլետարիատի դիկտատուրայի հաստատումն էր: Բացի այդ, խորհրդարանի ընտրություններին մասնակցելը նրանք անթույլատրելի էին համարում մասն առնել տեսակետից, որ «այդ կարող է սխալ հասկացվել մասսաների կողմից և ստեղծել տպավորություն, թե կոմունիստները ճանաչում են գոյություն ունեցող դաշնակցական Հայաստանը և ընդունում նրա անջատումը Սովետական Ռուսաստանից»²¹:

Ի տարբերություն սոցիալ-դեմոկրատ բոլշևիկների ու մենչևիկների, անշուշտ, խորհրդարանի ընտրություններում որոշակի թվով տեղեր կշահեք ՀՀ-ում երկրորդ ազդեցիկ կուսակցությունը՝ ՀԺԿ: Սակայն, ցավոք, սա էլ փորձեց ձախտոլել ընտրությունները՝ ելնելով ավելի շատ իր եզոխտական-պատվախնդրական շահերից ու ոչ այնքան հիմնավոր այլ պատճառաբանություններից: Ընտրությունները ձախտոլելու նպատակով, ՀԺԿ Հայաստանի կոմիտեն մի քանի կոչ հրապարակեց: Հայաստանի քաղաքացիներին ուղղված հունիսի 8-ի, 15-ի և 18-ի թվակիր կոչերում ՀԺԿ-ը, ՀՅԳ- կուսակցության ու կառավարության հասցեին ուղղված բազմաթիվ մեղադրանքներից գատ, նշում էր ժողովրդի սովալլուկ, ծանր վիճակը՝ գտնելով, որ այժմ ընտրություններ անցկացնելու ժամանակը չէ, որ այժմ դաշտային աշխատանքների եռուն

¹⁷ «Կայծի» 1918 թ. նոյեմբեր-դեկտեմբեր ամիսների համարները:

¹⁸ Կայծ, 22 դեկտեմբերի 1918թ.:

¹⁹ ՀՀ ՀՔԿԳ ՊԿԱ, Ֆ. 4012, ց. 1, գ. 11, թ. 1:

²⁰ Վ. Ի. Վենին, ԵԼԺ, հ. 41, Ե., 1982, էջ 48:

²¹ Ա. Մելքոնյան, Մայիսյան ապստամբության պատմության հարցի շուրջը, Ե., 1965, էջ 82:

շրջանն է, որ Հայաստանին չեն կցված բոլոր գավառները և որ ընտրություններին չեն մասնակցելու Նախիջևանի, Կարսի, Շարուր-Ղարալագյազի, Ախալքալաքի, Ղարաբաղի և Չանգեզուրի շրջանների ազգաբնակչությունը և այլն²²: Գրեթե նույն պատճառաբանություններով ընտրությունները հետաձգելու պահանջ էին դնում նաև սոց. -դեմ. մենչևիկները, որոնք մայիսի 20-ին հանդես եկան առանձին հայտարարությամբ²³:

Ընտրությունները հետաձգելու վերաբերյալ ընդդիմության առարկությունները պետք է համարել տակտիկական խաղ հենց թեկուզ այն բանով, որ ամիսներ առաջ ընտրությունների ժամկետը սահմանել էր խորհրդարանը՝ գրեթե բոլոր խմբակցությունների համաձայնությամբ²⁴: Մի՞թե այն ժամանակ նրանք չգիտեին, որ հունիս ամիսը գյուղատնտեսական աշխատանքների եռուն շրջան է, և որ Հայաստանի ծանր վիճակը հայտնի էր բոլորին ու մի երկու-երեք ամսում այդ ուղղությամբ երկրում հրաշք չէր կարող կատարվել: Այդ ինչպե՞ս եղավ, որ կառավարության մայիսյան երկու ակտերի ընդունումից հետո նոր գտան, որ հունիսի 21-23-ը ընտրությունների համար հարմար ժամանակ չէ: Այնպես որ՝ ակնհայտ էր ընտրությունները բոյկոտողների միտումը:

Որոշ հեղինակներ (Ս. Վրացյան, Հ. Տեր-Հակոբյան) ընտրություններում չժԿ կողմից կազմակերպված բոյկոտի էական շարժառիթներից մեկն էլ համարում էին այն, որ խորթության ու անհամաձայնության որոշակի շերտանստվածք էր գոյացել այս կուսակցության երևանյան և քիֆլիսյան ղեկավար հատվածների միջև: Դա երևաց նրանից, որ Թիֆլիսում նստած այս կուսակցության ղեկավար կենտրոնը՝ ԿԿ-ը, խորհրդարանական ընտրությունների համար ներկայացրած 65 պատգամավորական թեկնածուների ցանկում առաջին տեղերը հատկացրել էր քիֆլիսցի թեկնածուներին, իսկ վերջին տեղերը՝ երևանցիներին²⁵:

Պատմաբան Ռ. Հովհաննիսյանը գտնում է, որ ժողովրդականների բոյկոտի դրդապատճառներից էր նաև այն, որ «նրանց թեկնածուները, անկասկած, կհավաքեին ոչ ավել քան մի քանի հազար ձայն»²⁶:

Ինչևէ, փաստն այն է, որ Ժողովրդական կուսակցությունը բոյկոտեց խորհրդարանի ընտրությունները: Ընտրությունների նախօրյակին, հունիսի 20-ին ՀԺԿ-ն հանեց իր պատգամավորական թեկնածուների ցանկը, ընտրությունների ցուցակից: Միաժամանակ պարզվում է, որ ՀԺԿ (թիվ 2) ցանկի տակ պաշտոնաթերթում թույլ է տրվել ստորագրությունների անճշտություն, որի համար Կենտրոնական ընտրական հանձնաժողովը դա համարեց ընտ-

²² ՀՀ ՊԿՊԱ, ֆ. 292, ց. 1, գ. 3, ք. 1:

²³ «Կայծ», 20 հունիսի 1919 թ.:

²⁴ «Աշխատավոր», Թիֆլիս, 29 հունիսի 1919 թ.:

²⁵ Ս. Վրացյան, Խորհրդավորներ, Պոսթրն, 1924, էջ 67, 3. Իրազեկ, Մոտիկ անցյալից, Պեյրոթ, 1956, էջ 54:

²⁶ Ռ. Հովհաննիսյան, Աշվ. աշխ., էջ 472 (անգլերեն):

րական օրենքի խախտում²⁷: Այս հիման վրա էլ Կենտրոնական ընտրական հանձնաժողովը ՀԺԿ թեկնածուների ցուցակը հետ վերադարձրեց: Այս կապակցությամբ ՀԺԿ Հայաստանի կոմիտեն բողոք ներկայացրեց Կենտրոնական հանձնաժողովին²⁸:

Պետք է ասել, որ հունիսյան օրերին չափազանց լարված էին հարաբերությունները Ժողովրդական և Գաշնակցություն կուսակցությունների միջև: Բանը հասնում է այնտեղ, որ հունիսի 10-ին Ժողովրդական կուսակցության պատգամավորական նախկին խմբակցության անդամ, ՀԺԿ Երևանի կոմիտեի նախագահ Կ. Գյուլնազարյանը, փողոցում հանդիպելով ՀՅԳ պաշտոնաթերթ «Հայաստանի աշխատավորի» խմբագիր Վ. Խորենուն, ձեռնափայտով երկու հարված է հասցնում նրան: Այդ հիման վրա, մ. գ. նախարարի կարգադրությամբ, Կ. Գյուլնազարյանը ձերբակալվում ու բանտարկվում է²⁹:

Այդպիսով, կողմերը գրավեցին անհաշտ դիրք, և այդպես էլ չհաղթահարվեց կառավարախորհրդարանական ճգնաժամը:

Չայնակցելով ժողովրդականներին՝ խորհրդարանի ընտրությունները բոյկոտելու մարտավարություն վարեցին նաև ռամկավարները: «Վան-Տոսպը» կոչ էր անում. «Քաղաքացիներ, մի՛ մասնակցեք առաջիկա պառլամենտական ընտրություններին»³⁰: Ռամկավարների ազդեցությունը ամենից առաջ մեծ էր արևմտահայ գաղթականության վրա, ուստի և նրանց հայտարարած բոյկոտի ձայնը ուղղված էր հիմնականում գաղթական ազգաբնակչությանը³¹:

Իր հերթին Պողոս Նուբար փաշան հունիսի 13-ին Փարիզից Ամենայն Հայոց վեհափառին ուղղված հեռագրով հավանություն էր տալիս խորհրդարանը բոյկոտելու ժողովրդական-ռամկավարների դիրքորոշմանը և խորհուրդ տալիս թրքահայ գաղթականությանը՝ չմասնակցելու ընտրություններին³²: Այս ֆոնի վրա միանգամայն անհեթեթ է հնչում մտացածին այն դատողությունը, թե «Գաշնակների կառավարությունը որոշել էր արևմտահայերին զրկել պառլամենտի ընտրություններին մասնակցելու ընտրական իրավունքից»³³: Այնինչ իրականում հակառակ երևույթն է տեղի ունեցել: Ընտրությունների մասին օրենքով՝ ընտրելու իրավունք ուներ նաև Հայաստանի տարածքում ապաստանած արևմտահայ գաղթականությունը: Սրա համար իրավական հիմք էր ծառայում 1919 թ. մայիսի 28-ի կառավարության հայտագիրը «Միացյալ և Անկախ Հայաստանի մասին»: Սակայն նրանց մի մասը չմասնակցեց ընտրություններին ոչ թե այն բանի համար, որ կառավարությունը

²⁷ «Կայծ», 29 հունիսի 1919 թ.:

²⁸ ՀՀ ՊԿՊԱ, Գ. 199, գ. 1, գ. 14, մաս 1, ք. 138, Գ. 202, գ. 1. գ. 42, մաս 1, ք. 127:

²⁹ «Ժողովուրդ», 13 հունիսի 1919 թ., «Կայծ», 18 հունիսի 1919 թ.:

³⁰ «Վան-Տոսպ», 16 հունիսի 1919 թ.:

³¹ Նույն տեղում, 23 հունիսի 1919 թ.:

³² Ռ. Հովհաննիսյան, նշվ. աշխ., էջ 572 (անգլերեն):

³³ Հ. Ս. Կարապետյան, Մայիսյան ապստամբությունը Հայաստանում 1920 թ., Ե., 1961, էջ 62:

գրկել էր նրանց խորհրդարանի ընտրություններին մասնակցելու իրավունքից, այլ պարզապես հակադաշնակցական զանազան քարոզիչների գործունեության և հենց իրենց՝ գաղթականության սոցիալ-քաղաքական ծանր կացության թելադրանքով՝ նրանք ուղղակի խուսափում էին քվեարկություններին մասնակցելուց:

Խորհրդարանի ընտրություններում թիվ 3 ընտրացանկով հանդես էր գալիս Հայ սոցիալիստ-հեղափոխականների (Էսէռների) կուսակցությունը: Չնայած Էսէռները նույնպես կողմ էին ընտրությունների հետաձգմանը, բայց նրանք մասնակցեցին դրան: Հարկ է նշել, որ Էսէռների պատգամավորական թեկնածուների ցանկը ազգային կազմի տեսակետից միատարր չէր՝ ինտերնացիոնալ էր՝ 35-ից 29-ը հայ էին, 4-ը՝ ռուս և 2-ը՝ թուրք-թաթար³⁴:

Ի տարբերություն հայ ժողովրդականների ու սոցիալ-դեմոկրատների՝ հայ Էսէռները մասնակցեցին խորհրդարանի ընտրություններին՝ ձգտելով խորհրդարանական տեղեր շահել: Սա, թերևս, այն եզակի կուսակցություններից էր, որ, գործելով Հայաստանում, չէր ընդունում Հայաստանի անկախ պետականությունը: Եվ նրա նախընտրական մրցարշավը ընթանում էր հակաանկախական ու համառուսակաճության կարգախոսներով³⁵: Էսէռները բացահայտ հայտարարում էին. «Եկել ենք Հայաստանի պառլամենտ՝ պահելու այս երկիրը և հանձնելու իր իսկական տիրոջը՝ Ռուսաստանին³⁶: Այս տեսակետից հատկանշական է Էսէռների ընտրապայքարի հետևյալ կարգախոսներից մեկը. «Եթե կամենում ես, որ ռուս թագավորը գա, ծայն տուր թիվ երրորդին»³⁷: Էսէռների ընտրարշավի բնորոշ կարգախոսներից էր նաև «Կովկասյան ժողովուրդների և ռամկավար ֆեդերատիվ Ռուսաստանի եղբայրական միությունը»³⁸: Էսէռների կուսակցության Հայաստանի կոմիտեի հրապարակած նախընտրական կարգախոսներում և քարոզամիջոցներում չկա ոչ մի արտահայտություն կամ ակնարկ Հայաստանի ազատության, անկախության և պետականության պաշտպանության մասին»³⁹: Մնացած հարցերում՝ տնտեսական, ընկերային, ռամկավարական ազատությունների Էսէռները պարզապես կրկնում էին ՀՅԴ՝ նախընտրական կարգախոսները:

Կնշանակի՝ խորհրդարանական ընտրություններին մասնակցող երկու գլխավոր քաղաքական կուսակցությունների՝ ՀՅԴ-ի և Էսէռների սոցիալ-տնտեսական ծրագրերը ըստ էության համընկնում էին, բայց քաղաքական՝ անկախ պետականության խնդրում՝ նրանց դիրքորոշումները և մոտեցումները հակադիր էին:

³⁴ ՀՀ ՊԿՊԱ, ֆ. 198, ց. 1, գ. 7, ք. 3:

³⁵ Ռ. Հովհաննիսյան, Հայաստանի Հանրապետություն, հ. 1, էջ 473 (անգլերեն):

³⁶ «Հայաստանի աշխատավոր», 1 օգոստոսի 1919 թ.:

³⁷ «Ժողովուրդ», 2 հուլիսի 1919 թ.:

³⁸ «Սոցիալիստ հեղափոխական», 22 հունիսի 1919 թ.:

³⁹ «Սոցիալիստ հեղափոխական», 15 և 22 հունիսի 1919 թ.:

Ընտրացանկի հաջորդ՝ թիվ 4-ը զբաղեցնում էին քրդական երկու պատգամավորական թեկնածուները: Այն ներկայացնում էին ընդամենը երկու բեկ, որոնցից մեկը գեներալ-մայոր Ալաշրաֆբեկ Շամշադինովն էր: Իսկ թիվ 5 ցանկը, որ ներկայացրել էր ասորական ազգային խորհուրդը, ուներ երեք պատգամավորության թեկնածու:

Այնուհետև թիվ 6՝ Արագածոտնի անկուսակցական աշխատավորական գյուղացիական միության պատգամավորության թեկնածուների ցանկում ներկայացված էին 18 մարդ, որը գլխավորում էր բժիշկ, Կարբի գյուղի բնակիչ Արտաշես Մելքոնյանը: Հիշյալ 18 թեկնածուներից 13-ը ազգությամբ հայ էին, իսկ 5-ը՝ թուրք-թաթար: Եւ վերջապես թիվ 7՝ թուրքական պատգամավորական թեկնածուների ցանկը կազմված էր 16 հոգուց: Սա միակ ցանկն էր, որ պատրաստված էր արաբատառ թուրքերենով⁴⁰: Այս ցուցակը ներկայացված էր որպես անկուսակցական: ՀՅ Գաշնակցության Էջմիածնի շրջանային կոմիտեի օրգան «Արարատյան աշխատավորը», հավաստում է, որ չնայած թիվ 7 ցուցակը անվանապես համարվում էր անկուսակցական, սակայն «իր էությամբ անկուսակցական չէ: Դա «Մուսավաթն» է դիմակավորված, ձևափոխված: Այդ ցանկի մեջ մտնում է «Մուսավաթի» Երևանի կոմիտեն՝ իր ամբողջ կազմով»⁴¹:

Վերոհիշյալ բոլոր ցուցակները հաստատվել ու հրապարակվել էին Կենտրոնական ընտրական հանձնաժողովի կողմից: Բացի հիշյալ յոթ ցուցակներից, պատգամավորական թեկնածուների առանձին ցուցակ է ներկայացրել նաև Ալեքսանդրապոլի գավառի «գյուղացիական միությունը»: Վերջինս հիմնվել էր 1919 թ. մարտին և գտնվում էր տեղի բոլշևիկյան կազմակերպությունների ազդեցության տակ⁴²: Սակայն Կենտրոնական ընտրական հանձնաժողովը այս ցուցակը չի հաստատել՝ պատճառաբանելով, որ այն ներկայացվել է ուշացումով: Ի պատասխան դրա՝ Ալեքսանդրապոլի գավառի գյուղացիների երկրորդ համաժողովը հունիսի 15-ին որոշում է կայացնում միանալ ժողովրդականներին ու սոցիալ-դեմոկրատներին և բոյկոտել խորհրդարանի ընտրությունները⁴³:

Կուսակցական և ոչ կուսակցական պատգամավորական թեկնածուների ցանկերի համար, ընտրությունների կապակցությամբ, հրապարակայնություն և հարկ եղած վերահսկողություն իրականացնելու տեսակետից առանձնապես էական պետք է համարել խորհրդարանի ընտրությունների մասին օրենքի 10-րդ հոդվածի այն մասը, որում ասվում էր. «Կենտրոնական ընտրական հանձնաժողովի կազմի մեջ, անդամի իրավունքով, մտնում են մեկական հոգի ընտրողների այն խմբերի կողմից, որոնք թեկնածուների առանձին ցանկ

⁴⁰ ՀՀ ՊԿՊԱ, ֆ. 198, ց. 1, գ. 7, քք. 5-8:

⁴¹ «Արարատյան աշխատավոր», 15 հունիսի 1919 թ.:

⁴² Գ. Ա. Գալոյան, Հերոսական մայիսից- հաղթական նոյեմբեր, Ե., 1980, էջ 39, 50:

⁴³ «Շիրակի աշխատավոր», 25 հունիսի 1919 թ., «Կայծ», 22 հունիսի 1919 թ.:

են ներկայացրել»⁴⁴: Այդպիսի ներկայացուցիչներ ընդգրկվում էին նաև համապատասխանաբար գավառական, շրջանային, քաղաքային, գյուղական և քաղամասային հանձնաժողովների կազմում:

Արխիվային նյութերի ուսումնասիրությունը ցույց է տալիս, որ ընտրաբաշարը մայրաքաղաքում և գավառներում ընթացել է բավականին սուր: Այսպես, օրինակ, ընտրողների թվով ամենամեծ շրջան համարվող Էջմիածնի գավառում ընտրապայքարի ժամանակ արձանագրվել են ծեծկռտուքներ, փոխադարձ վիրավորանքներ⁴⁵: Էջմիածնի գավառի ընտրական հանձնաժողովի նախագահը հունիսի 9-ի գրությամբ՝ խնդրում էր գավառի կոմիսարին, որ «ամենակտրուկ կարգադրություն անի իրեն ենթակա պաշտոնյաներին՝ ներազդելու և պատժելու ընտրությունների հայտարարությունները, կուսակցական թեկնածուների ցուցակները և պլակատները պատռողներին»⁴⁶: Գավառի կոմիսարն էլ հրահանգում է գավառամասերի կոմիսարներին կտրուկ միջոցներ ձեռք առնել՝ կանխելու մասն հակաիրավական գործողությունները:

Ընտրությունները կայացան Հայաստանի խորհրդի որոշած օրերին՝ հունիսի 21, 22 և 23-ին: Ինչպես որ նախատեսված էր ընտրությունների մասին օրենքով, կենտրոնական ընտրական հանձնաժողովը տաս օրվա ընթացքում ամփոփելով ընտրությունների արդյունքները՝ հուլիսի 3-ին պաշտոնապես դրանք հրապարակեց մամուլում:

Խորհրդարանի ընտրությունների աղյուսակ⁴⁷:

⁴⁴ «Օրենք Հայաստանի պառլամենտի ընտրությանց», *ա. տ. և ք., էջ 4*:

⁴⁵ ՀՀ ՊԿՊԱ, Ֆ. 216, ց. 1, գ. 61:

⁴⁶ ՀՀ ՊԿՊԱ, Ֆ. 216, ց. 1, գ. 61, ք. 10:

⁴⁷ «Հայաստանի աշխատավոր», 3 հուլիսի 1919 թ.: Խորհրդարանի ընտրությունների հիշյալ աղյուսակը հավանաբար վերջնականը չէ, որովհետև ցուցակագրված 365780 հոգուց այստեղ՝ ընտրությունների մասնակիցների թիվը կազմել է 223092 մարդ, մինչդեռ առանձին աղբյուրներից հայտնի է, որ խորհրդարանի ընտրություններին մասնակցել են 258880 մարդ կամ բոլոր ընտրողների երեք քառորդը (տես՝ «Նոր աշխատավոր», 24 հուլիսի 1919 թ., Ս. Վրացյան, նշվ. աշխ., էջ 278): Ինչևէ, մեր ձեռքի տակ եղած սույն աղյուսակի տվյալներով կարելի է կատարել որոշ ընդհանրացումներ:

	Քաղաքների, գավառների և շրջանների անվանումը	թիվ 1 ՀՅԳ	թիվ 2 ՀԺԿ	թիվ 3 ԷսԷռ	թիվ 4 քրդակ ան	թիվ 5 ասորա կան	թիվ 6 գյուղ. միութ.	թիվ 7 թուր քակ ան	ընդամ ենը
1	Երևան	5690	24	318	-	2	6	101	6141
2	Ալեքսանդրապոլ	3886	35	130	-	-	2	1	4054
3	Նոր Բայազետ	3190	-	5	-	-	-	-	3195
4	Վաղարշաատ	45129	-	811	1	2	2585	1582	50110
5	Կոտայքի /ուչ լրիվ/	5375	-	1448	-	-	10	-	6833
6	Վամարուտի շրջան	10022	-	1178	912	170	10	268	12560
7	Սուրմալուտի շրջքն	9135	-	1648	412	-	74	3273	12567
8	Քարվանսար ա ք. և 3 գյուղ	2681	-	67	-	-	3	-	2751
9	Ն. Ախտայի շրջան	13813	44	815	-	-	-	14	14542
10	Շիրակի շրջան	27260	550	516	-	-	-	902	29228
11	Գարալագյազի /ուչ լրիվ/	10081	103	81	-	-	-	-	10265
12	Ուլուխանուտի շրջան	668	-	-	-	-	1	4684	5353
13	Նոր Բայազետի շրջան	25052	2	40	-	-	22	-	25116
14	Գիլիջանի գավառ	13280	-	1391	-	-	50	2	14723
15	Գարաքիլիսսայի շրջան	23153	-	220	-	-	80	82	23535
	ընդ. գումարը	198415	758	8668	1325	174	2843	1090 9	223092

Աղյուսակից երևում է, որ ընտրությունները կայացել են ներկայացված բոլոր շրջաններում: Ցավոք, մի քանի շրջաններում (Նախիջևան, Շարուր, Կարս,

Չանգեզուր և այլն) հնարավոր չեղավ ժամանակին կազմակերպել ու անցկացնել ընտրությունները: Պատճառն այն էր, որ դրանք նոր էին միացվել ՀՀ-ին կամ էլ քաղաքական անկայուն վիճակը թույլ չէր տալիս: Նախատեսվում էր ՀՀ սահմաններում և նրա սահմաններից դուրս, հանրապետության օրենքների հիման վրա, հետագայում անցկացնել խորհրդարանի լրացուցիչ ընտրություններ 50 նոր պատգամավորական տեղերի համար⁴⁸: Գրանով Միացյալ և Անկախ Հայաստանի խորհրդարանը բաղկացած պիտի լիներ 130 պատգամավորներից: Այդուսակը ցույց է տալիս նաև, որ թիվ 1 ցուցակը (ՀՅԳ) հաղթել է բոլոր ընտրական շրջաններում, բացառությամբ Ուլուխանլուի (Չանգիբասարի), որը բնակեցված էր գերազանցապես թուրք ազգաբնակչությամբ: Հասկանալի է, որ սրանք իրենց քվեն պետք է տալին թիվ 7 թուրքական ցուցակին:

Խորհրդարանի ընտրություններին իրենց մասնակցությունն են բերել նաև արևմտահայ գաղթականները⁴⁹: Սակայն պետք է ասել, որ նրանց մասնակցությունը զանգվածային բնույթ չկրեց: Շատ դեպքերում գաղթական ընտրողները դրսևորել են պասիվություն և չեն ներկայացել ընտրական տեղամաս⁵⁰: Ընտրությունների կապակցությամբ արևմտահայ գաղթականության դրսևորած պասիվության գործում, ինչ խոսք, որոշակի դեր խաղաց նաև Հայ ռամկավարների հայտարարած բոյկոտը: Հարկ է նշել, որ ընտրություններին ակտիվ մասնակցություն չունեցան նաև մահմեդականները:

Ըստ կուսակցական կազմի՝ ընտրությունների արդյունքով ՀՅԳ պատգամավորության թեկնածուներից՝ թիվ 1 ցուցակ, ընտրվել էին 72 պատգամավորներ, էսէռներից՝ թիվ 3 ցուցակ՝ 4, Արագածոտնի անկուսակցական գյուղացիական միությունից՝ թիվ 6-ից՝ 1⁵¹, թիվ 7 ցուցակից երկու թուրք-թաթար և մեկ քուրդ՝ եզդի⁵²: Ընդամենը 80 պատգամավոր: Ստորև ներկայացնում ենք պատգամավորների ցուցակը⁵³:

⁴⁸ «Քաղվածներ ՀՅԳ 9-րդ ընդհ. ժողովի որոշումներից», Ե., 1920, էջ 29:

⁴⁹ ՀՀ ՊԿՊԱ, ֆ. 276, ց. 1, գ. 119, ք. 65:

⁵⁰ ՀՀ ՊԿՊԱ, ֆ. 201, ց. 1, գ. 43, ք. 84:

⁵¹ Թիվ 6 ցուցակից պատգամավոր ընտրվեց Արագածոտնի անկուսակցական գյուղացիական միության «Մինդիկատի» դեկավար, բժիշկ Արտաշես Մեղրունյանը: Սկզբում նա դաշնակցական էր, այն էլ՝ խմբապետ դաշնակցական: Հետագայում, անձնական ընդհարում ունենալով մեկ ուրիշ խմբապետի հետ, խռովեց ու հեռացավ Դաշնակցությունից: Դրանից հետո նա մտավ էսէռների կուսակցության շարքերը: Իսկ ավելի ուշ, չհամակերպվելով էսէռների հետ, հեռացավ նաև այս կուսակցությունից և արդեն խորհրդարանի ընտրությունների ժամանակ ներկայացավ որպես անկուսակցական՝ գլխավորելով թիվ 6՝ Արագածոտնի գյուղացիական միության ցուցակը (տես՝ «Հայաստանի աշխատավոր», 19 հունիսի 1919 թ., «Շիրակի աշխատավոր», 18 հունիսի 1919 թ.):

⁵² Թուրք-մահմեդական պատգամավորները կազմել են երկու հոգի: Մովորաբար պատմական գրականության մեջ քուրդ ժողովրդի այս մեկ ներկայացուցչին դասել են թուրք-թաթար երկու ներկայացուցիչների թվում և ներկայացրել որպես երեք հոգուց կազմված մահմեդական խմբակցություն, որը, սակայն, մեր կարծիքով արդարացի չէ:

⁵³ ՀՀ ՊԿՊԱ, ֆ. 198, ց. 1, գ. 3, ք. 22-23, գ. 32, ք. 5, ֆ. 276, ց. 1, գ. 119, ք. 98-99:

1. Ահարոնյան Ավետիս
2. Աղբալյան Նիկոլ
3. Արղուբյան Հովսեփ
4. Արարատյան Սարգիս
5. Աբեղյան Արտաշես
6. Ավագյան Ներսես
7. Աղաբաբ-բեկով Ասադ-բեկ (թուրք)
8. Բաբալյան Արտաշես
9. Բարսեղյան Պերճուհի
10. Բաբայան Վարուս
11. Բալայան Գերասիմ
12. Բաղայան Հովակիմ
13. Գյուլխանդանյան Աբրահամ
14. Գրիգորյան Սիրաք
15. Յաղջյան Հայկ
16. Յոլյան Ջաքար
17. Ջառաֆյան Լևոն
18. Ջուբյան Դավիթ (Էսէռ)
19. Թադևոսյան Լևոն
20. Թեյմուրով Յուսուֆ - բեկ (եզդի)
21. Թորոսյան Սահակ
22. Թումանյան Լևոն (Էսէռ)
23. Խատիսյան Ալեքսանդր
24. Խատիսյան Գևորգ
25. Խաչատրյան Սմբատ
26. Խոբենի Վահան
27. Խոնդկարյան Արշամ (Էսէռ)
28. Կանայան Դրաստամատ
29. Գազարյան Կորյուն
30. Գազարյան Արշակ
31. Մանասյան Սարգիս
32. Մանուկյան Հմայակ
33. Մաքսապետյան Արմենակ
34. Մելիքյան Հովակիմ
35. Մանուկյան (Ջալյան) Կատարինե
36. Միրաքյան Եմովք
37. Մելքոնյան Արտաշես (գյուղ. միութ.)
38. Միրբաբան Միր-Բաղիբ (թուրք)
39. Մինախորյան Վահան (Էսէռ)
40. Հովհաննիսյան Արշակ
41. Հարությունյան Մարտիրոս
42. Հովսեփյան Արտաշես
43. Նալչաջյան Արամ
44. Նավասարդյան Վահան
45. Նազարյան Արտաշես
46. Շանթ Լևոն
47. Շիրինյան Արշակ
48. Շահինյան Գառնիկ
49. Պետրոսյան Լևոն
50. Պապայան Խոսրով
51. Ջամալյան Արշակ
52. Սահակյան Ավետիք
53. Սահակյան Վառվառե
54. Սասունի Կարո
55. Սարգսյան Եփրեմ
56. Սարգսյան Հայկ
57. Սեպուհ Արշակ
58. Սաֆրաստյան Արամ
59. Վարանդյան Միքայել
60. Վարշամյան Գևորգ
61. Վրացյան Սիմոն
62. Տեր-Դավթյան Հովսեփ
63. Տեր-Մինասյան Ռուբեն
64. Տեր-Միքայելյան Հովհաննես
65. Տեր-Հակոբյան Հակոբ
66. Տիգրանյան Սիրական
67. Տերտերյան Համբարձում
68. Տեր-Հարությունյան Գեղամ
69. Տեր-Թորոսյան Վարդան
70. Տեր-Գևորգյան Միքայել
71. Տեր-Միքայելյան Անուշավան
72. Տեր-Գրիգորյան Սիիրան
73. Փաստրմաճյան Գարեգին
74. Փափազյան Վահան
75. Քաջազմունի Հովհաննես
76. Քաջբերունի Ռուբեն
77. Քալալյան Գառնիկ
78. Օհանջանյան Համազասպ
79. Օհանջանյան Ավետիս
80. Ֆերիտ Ջեմիլ /Տիգրան Ծամհուր/

խորհրդարանի 80 պատգամավորներից 13-ը արևմտահայեր էին, իսկ երեքը՝ կին⁵⁴: Նկատի ունենալով արևմտահայության անորոշ ու յուրահատուկ իրավիճակը՝ կարելի է ասել, որ արևմտահայ պատգամավորները կազմեցին ոչ պաշտոնական խմբակցություն և 1919 թ. ամռանը ՀՅԳ Արևելյան բյուրոյի որոշմամբ լուծարված արևմտահայ գործադիր մարմնի գործերն ու իրավասությունները դրվեցին այդ խմբակցության վրա⁵⁵:

Ինչպես ասվեց, հունիսյան ընտրություններին չմասնակցեցին ժողովրդականները, հայ ռամկավարները և սոց.-դեմոկրատները: Այնուամենայնիվ, թիվ 2 ցուցակին (ՀԺԿ), չնայած հայտարարված բոյկոտին, առանձին ընտրատարածքներում՝ Ալեքսանդրապոլում, Գարալազյազում, Ախտալում, Երևանում ընտրողները որոշ ձայներ են տվել (758) այս կուսակցության պատգամավորական թեկնածուների օգտին: ՇՆմարտությունը պահանջում է ասել, որ եթե Ժողովրդական կուսակցությունը չբոյկոտեր ու մասնակցեր ընտրություններին, ապա անկասկած կշահեին պատգամավորական մի շարք տեղեր:

Հարկ է նշել, որ ժողովրդականները և սոցիալ-դեմոկրատ մենչևիկները, խորհրդարանի ընտրությունների բոյկոտից հետո այլևս գործուն մասնակցություն չունեցան Հայաստանի պետական կյանքին: Բայց և այնպես ՀԺԿ - շարունակում էր մնալ որպես ՀՀ և կովկասահայ երկրորդ ազդեցիկ կուսակցությունը՝ ՀՅԳ-ից հետո: ՀԺԿ խորհրդարանի բոյկոտից հետո, թեև հետ քաշվեց քաղաքական լայն գործունեության ասպարեզից, բայց մյուս կողմից չպետք է անտեսել, որ ժողովրդականները իրենց պատգամավորական ներկայացուցչությունները ունեին հանրապետության քաղաքային դումաներում, գավառական զեմստվոներում: Նրանք տեղական ինքնակառավարման մարմիններում քանակով երկրորդն էին ՀՅԳ-ից հետո: Այնպես որ եթե խորհրդարանում նրանք չունեին խմբակցություն, ապա տեղական իշխանության մարմիններում ժողովրդականները ազդեցիկ ընդդիմություն էին: Նրանք հաճախակի ընդդիմանում ու քննադատում էին գործադիր մարմինների ու գավառական կոմիսարների թույլ տված խախտումներն ու անօրինականությունները, պայքարում էին մենաշնորհի, կառավարության վարած բռնագրավումների քաղաքականության դեմ և այլն:

Այսուհանդերձ, ՀԺԿ, որն իր էությանը ու դավանանքով որակվում էր որպես բուրժուական և ուներ իշխանատենչ հակումներ, ընդհանուր առմամբ անհաջողություն կրեց ու փաստորեն հեռացավ ակտիվ քաղաքական գործունեության ասպարեզից: Կարծում ենք, որ այս իմաստով բնութագրական է «սպեցիֆիկների» նրանց տված հետևյալ գնահատականը. «Այս կուսակցությունը (ՀԺԿ-Ա. Հ.), լինելով բուրժուական իր էությանը ու դավանանքով, մնաց առանց բուրժուազիայի իր կազմով: Քաղաքական տարտամ ու երերուն,

⁵⁴ Պատգամավոր Մանուկյան-Չալյան Կատարինեն հանգուցյալ Արամ Մանուկյանի այրին էր:

⁵⁵ ՀՀ ՀԶԿՓ ՊԿԱ, Ֆ. 4047, ց. 1, գ. 144, բ. 3:

հետևողական ու անհեռատես դիմագծով նա երազում էր միշտ իշխանական բարձրի մասին և այդ նպատակով մղած պայքարը փոխանակ նշանադրած կետին հասցնելու՝ վնասում էր կամ իրեն և կամ պետությանը»⁵⁶: Ի դեպ՝ խորհրդարանական ընտրություններում ձայներ չշահեցին նաև փոքրաթիվ անդամներ ունեցող «սպեցիֆիկները»՝ Սոցիալ-դեմոկրատական բանվորական հայ կազմակերպությունը⁵⁷: Մրանք տակավին չէին կազմակերպվել որպես ինքնուրույն կուսակցություն: Ավելի ուշ՝ 1920 թ. հունվարին, տեղի ունեցավ «սպեցիֆիկների» կուսակցական ձևավորումը, որից հետո նրանք կոչվեցին Հայաստանի սոցիալ-դեմոկրատական բանվորական կուսակցություն (ՀՄԴԲԿ): Բանվորագուրկ Հայաստանի Հանրապետությունում «սպեցիֆիկները» այնքան քիչ հետևողներ ունեին, որ ընտրություններին չներկայացան առանձին ցուցակով:

Ինչպես ասվեց՝ թիվ 3 ընտրացանկով չորս պատգամավորական տեղ ստացավ Էսեռների կուսակցությունը: Տեղին է նշել, որ իրենց անկախ Հայաստանի քաղաքացիներ չհամարող Էսեռներին պատգամավորական չորս տեղերի նվաճման գործում մեծ չափով օգնել է հատկապես Հայաստանում բնակվող ռուս ազգաբնակչությունը: Պատահական չէր, որ սկսած 1919 թ. հունիսից լույս էր տեսնում Էսեռների օրգան «Սոցիալիստ հեղափոխական» շաբաթթերթը նաև ռուսերեն լեզվով⁵⁸: Բնութագրական է նաև այն, որ խորհրդարանում էսեռ պատգամավորները, որպես կանոն, ելույթ էին ունենում ռուսաց լեզվով⁵⁹:

Ընտրապայքարի ընթացքի և արդյունքների ուսումնասիրությունը ցույց է տալիս, որ արձանագրվել են ընտրակարգի խախտման դեպքեր, առանձին կեղծիքներ, հարկադրանք ընտրողների նկատմամբ, անկանոնություններ և այլն, որոնք հավանաբար ազդած պետք է լինեն ընտրությունների արդյունքների վրա: Այս մասին ավելի հանգամանորեն փաստում էր ընդդիմությունը: Ընդդիմադիր մամուլը այլևայլ օրինախախտումների կողքին, մասնավորապես, մատնանշում է այն պարագան, որ դաշնակցական թիվ 1 ցանկի քվեաթերթերը, ի տարբերություն մյուսների, տպված են եղել այլ որակի թղթի վրա՝ մեծ ու հաստ տառերով: Այնինչ համաձայն ընտրությունների մասին օրենքի 50-րդ հոդվածի՝ «ընտրատոմսերը (քվեաթերթերը- Ա.Հ.) արտաքուստ պետք է միակերպ լինեն, որը հաստատում է կենտրոնական ընտրական հանձնաժողովը»⁶⁰: Համաձայն սոց.դեմոկրատների պաշտոնաթերթ «Կայծի» տեղեկացման՝ ՀՅԴ ընտրատոմսը որքան էլ որ ծավլում էր, նույնիսկ հեռվից նկատվում էր, որ Դաշնակցության ընտրատոմսն է⁶¹: Մի այլ ընդդիմության՝ Էսեռների օր-

⁵⁶ ՀՀ ՊԿՊԱ, ֆ. 1022, ց. 7, գ. 72, էջ 8:

⁵⁷ Ս. Վրացյան, Խարխափումներ, Պոսթրն, 1924, էջ 68:

⁵⁸ ՀՀ ՊԿՊԱ, ֆ. 201, ց. 1, գ. 43, ք. 85:

⁵⁹ «Մշակ», 28 նոյեմբերի 1920 թ.:

⁶⁰ «Օրենք Հայաստանի պառլամենտի ընտրությանց, ա.տ.և թ., էջ 14:

⁶¹ «Կայծ», 29 հունիսի 1919 թ.:

զան «Սոցիալիստ հեղափոխական» թերթը հայտնում է, որ «ընտրության օրերին այլուր էին բաժանում թիվ 1-ի (ՀՅԳ-ի-Ա.Հ.) ցուցակին ձայն տվողներին, իսկ կոմիսարներն ու միլիցիոներները մտրակի ուժով էին գյուղացիներին ուղարկում քվեատուփերի մոտ»⁶²: Տեղեկություններ են հայտնվում նաև այն մասին, որ առանձին գավառներում ու գյուղերում (օրինակ՝ Սարդարապատում, Սուրմալուում, Համամլուում), ընտրական տեղամաս է ներկայացել միայն տան մեծը (ծխի գլուխը) ու քվեարկել իր և ընտանիքի մյուս (ընտրական հասակի) անդամների փոխարեն: Որոշ ընտրատարածքներում էլ ընտրությունները սկսվել են ուշացումով: Օրինակ՝ Բաշ Գառնիում դրանք սկսվել են ոչ թե հունիսի 21-ին, այլ ընտրությունների միայն վերջին օրը՝ հունիսի 23-ին⁶³: Արձանագրվել են չկնքված քվեատուփեր և այլն⁶⁴:

Պատահել են նաև այնպիսի դեպքեր, երբ քվեարկություններին մասնակցած են համարվել մարդիկ, որոնք մահացած են եղել, սակայն նրանց անունները պահպանվել էին ընտրացուցակներում⁶⁵: Բայց կարծում ենք, որ շատ դժվար է միանշանակորեն հաստատել կամ ժխտել ընդդիմության մեղադրանքները ընտրությունների ժամանակ թույլ տրված զեղծարարությունների մասին: Մեզ թվում է, որ պարտված կողմը իշխանությունների ու Գաշնակցության կատարած խախտումները մատնանշելիս, անշուշտ, դրանք չափազանցրել է, որը բնականաբար անում է ցանկացած պարտված կուսակցություն, որպեսզի փրկի իր վարկն ու հեղինակությունը ժողովրդի աչքում: Մյուս կողմից էլ ակներև փաստ է այն, որ ընտրությունների ընթացքում, իրոք, թույլ են տրվել զանազան տիպի խախտումներ:

Հայաստանի խորհրդարանի ընտրությունների կապակցությամբ հարկ է նշել, որ առանձին խախտումներ թույլ են տրվել ոչ միայն հիմնական կառավարող ՀՅԳ, այլև Էսէժների կողմից: Օրինակ՝ ընտրությունների առնչությամբ իր պաշտոնական դիրքի չարաշահմամբ ՀՀ ընտրական օրենքի թիվ 96-րդ - հոդվածի խախտում է թույլ տվել պատգամավորության էսէժ թեկնածու Ա. Խոնդկարյանը: Վերջինս, օգտվելով պարենավորման նախարարության մեջ կարևոր պաշտոն զբաղեցնող իր կուսակից ընկերների ծառայությունից, «օգնել է», որպեսզի Սուրմալուի գավառի մի շարք գյուղերի (Հախվերիս, Բլուր, Փանիկ-Ալեիլու և այլն) գյուղացիները ստանան սերմացուի դիմաց մեկ դեսյատինի համար 2000 ռուբլի փող, պայմանով, որ նրանք իրենց քվեները տան թիվ 3 (Էսէժների) ցուցակին⁶⁶: Այս փաստը հավաստող հեղինակ Պ. Ավետիսյանը երաշխավորել է այն ապացուցել: Ընտրությունների արդյունքների ամփոփագրից երևում է, որ թիվ 3 ցուցակը ընդամենը 15 ընտրական շրջանից ու քաղաքից ամենաշատ ձայն (1648) հավաքել էր հենց Սուրմալուի շրջանից:

⁶² «Սոցիալիստ հեղափոխական», 5 հուլիսի 1919 թ.:

⁶³ Նույն տեղում, 10 օգոստոսի 1919 թ.:

⁶⁴ «Կայծ», 2 հուլիսի 1919 թ.:

⁶⁵ «Ժողովուրդ», 2 հուլիսի 1919 թ.:

⁶⁶ «Հայաստանի աշխատավոր», 17 և 20 հունիսի 1919 թ.:

Այնպես որ՝ միակողմանի է ընտրություններում թույլ տրված խախտումների համար մեղադրել միայն Դաշնակցությանը: Պետք է նկատի ունենալ, որ ցանկացած խորհրդարանական ընտրության ժամանակ տեխնիկապես հնարավոր չէ ապահովել ընտրությունների 100 տոկոսանոց անաչառություն: Այդպիսի շեղումներ ավել կամ պակաս չափով դրսևորվել են առաջներում: Այդպիսիք արձանագրվում են նաև մեր օրերում, անգամ ամենաքաղաքակիրթ, դասական պառլամենտական համարվող երկրներում:

ՀՅԳ-ի հաղթանակը խորհրդարանի հունիսյան ընտրություններում միանգամայն օրինակալի էր: Ընտրությունների արդյունքները արտահայտում էին քաղաքական կուսակցությունների ուժերի հարաբերակցությունը հանրապետությունում: Ժողովրդի մեջ ՀՅԳ-ի կշռի ու հեղինակության մասին էին հավաստում ոչ միայն խորհրդարանի ընտրությունները, որը ոմանք համարում էին պատահականություն, այլև տեղական՝ քաղաքային ու գավառային ինքնավարության ընտրությունները: Այսպես, օրինակ, 1918թ. դեկտեմբերի 15-ին կայացած Երևանի Քաղաքային դումայի ընտրությունների արդյունքներով՝ 60 տեղից (չորս կուսակցությունների մասնակցությամբ) Դաշնակցությունը շահել էր 42 տեղ⁶⁷: Իսկ 1919թ. փետրվարի 12-ին Ալեքսանդրապոլի գավառում զենստվային ընտրություններում նախատեսված 45 իրավասու տեղերից 33-ը զբաղեցրել էին դաշնակցականները, մնացածը անկուսակցականներ ու մյուս կուսակցությունների համակրողներ⁶⁸: 1920թ. հունվարին Կարսի քաղաքային ինքնավարությունների ընտրությունները ևս ավարտվել էին ՀՅԳ - կատարյալ հաղթանակով. ընտրված 55 պատգամավորական տեղերից 49 զբաղեցրել են դաշնակցականներ, 4-ը՝ ժողովրդականներ և 2-ը՝ էսեռներ⁶⁹:

Հունիսյան ընտրություններում ՀՅԳ-ի տպավորիչ հաղթանակը վկայում էր նրա լայն ժողովրդականության մասին: Նա դա ապացուցել էր դեռ 1917թ. նոյեմբերին՝ համառուսական Սահմանադիր ժողովի ընտրություններում: Այդ ընտրությունների ժամանակ Դաշնակցության ստացած 558400 քվեները կրկնակի շատ էին, քան հայ քաղաքական մյուս բոլոր կուսակցությունների հավաքած ձայները միասին վերցրած⁷⁰: Հիշեցնենք, որ 1917թ. ՀՅԳ որևէ իշխանություն չուներ, որ իր պաշտոնական դիրքը չարաշահելով և ընտրությունները «կեղծելով»՝ այդքան ձայներ նվաճեր: ՀՅԳ-ն, լինելով նախ և առաջ համազգային իդեալներ ու ձգտումներ ունեցող կուսակցություն, սցիալապես հենվում էր լայն հասարակաշերտերի և ամենից առաջ հայ գյուղացիության, աշխատավորության և մանր արհեստավորության վրա, մի խոսքով՝ նրանց, որոնք կազմում էին Հայաստանի ազգաբնակչության 80-90 տոկոսը⁷¹:

⁶⁷ ՀՀ ՊԿՊԱ, ֆ. 203, ց. 1, գ. 230, ք. 29, «Ժողովուրդ», 18 դեկտեմբերի 1918թ.:

⁶⁸ ՀՀ ՊԿՊԱ, ֆ. 205, ց. 1, գ. 1023, ք. 2:

⁶⁹ «Հառաջ», 23 հունվարի 1920թ.:

⁷⁰ «Ասպարեզ», 28/29 մայիսի 1992թ., Ս. Վրացյան, Հայաստանի Հանրապետություն, Բեյրութ, 1958, էջ 33:

⁷¹ ՀՀ ՊԿՊԱ, ֆ. 200, ց. 1, գ. 498, ք. 28:

Ահա թե ինչով էր պայմանավորված ՀՅԳ-ի հաղթանակը: Մյուս կողմից ՀՅԳ-ի հաղթանակը պայմանավորված էր նաև նրանով, որ այդ ժամանակ ՀՀ-ում, բացի Դաշնակցությունից, չկար ուրիշ ավելի կազմակերպված կուսակցություն:

Այսպիսով, չնայած ընտրությունների ժամանակ թույլ տրված առանձին խախտումներին ու անկանոնություններին, այնուամենայնիվ, խորհրդարանի հունիսյան ընտրությունները պատմական նշանակության իրադարձություն պետք է համարել հայ ժողովրդի հազարամյակների պատմության մեջ: Առաջին անգամ էր, որ հայը ընտրում էր Հայաստանի պետական իշխանության բարձրագույն մարմին: Դրանով էլ նա հաղորդակից էր դառնում ժողովրդավարության տարրերին:

2. Խորհրդարանի բացումը և հանձնաժողովները

Նորընտիր խորհրդարանի հանդիսավոր բացումը տեղի ունեցավ Հայաստանի խորհրդի հրավիրումից ուղիղ մեկ տարի անց՝ 1919թ. օգոստոսի 1-ին: Խորհրդարանի նիստը բացեց նրա ավագագույն անդամ Ավետիք Սահակյանը, քարտուղարն էր կրտսերագույն անդամ Ենովք Միրաքյանը: Բացման օրը ներկա էին 56 պատգամավոր:

Ի տարբերություն առաջին խորհրդարանի, որը պաշտոնապես կոչվում էր «Հայաստանի խորհուրդ», այս նոր ընտրովի օրենսդիր մարմինը կոչվեց «Հայաստանի պառլամենտ»⁷²: Նշենք նաև, որ խորհրդարանի բացման օրը հայտարարությամբ հանդես եկավ ՀԺԿ Հայաստանի կոմիտեն: Նա մեկ անգամ ևս բողոքեց ընտրությունների ժամանակ թույլ տրված ապօրինությունների ու զեղծարարությունների կապակցությամբ, պահանջեց անվավեր համարել հունիսյան ընտրությունները և նշանակել խորհրդարանի նոր ընտրություններ⁷³: Բայց այս բողոքը ընդամենը ինքնահանգստացման միջոց էր և որևէ գործնական նշանակություն այլևս ունենալ չէր կարող:

1919 թ. օգոստոսի 5-ին կայացավ խորհրդարանի պաշտոնական առաջին նիստը, որտեղ հաստատվեցին հունիսի 21-23-ին խորհրդարանական ընտրություններում ընտրված 80 պատգամավորների մանդատները: Մանդատային հանձնաժողովի կողմից գեկույցեց Հ. Բուդաղյանը: Արձանագրվեց, որ մի շարք ընտրատարածքներում (Ղարաքիլիսա, Համամլու, Բաշ Գառնի և այլն) թույլ են տրվել առանձին խախտումներ, սակայն հաշվի առնելով այն հանգամանքը, որ դրանք էապես չեն ազդել ընտրությունների վերջնական արդյունքների վրա, ուստի՝ որոշվեց մանդատները հաստատել, միաժամանակ ընդունել ի գիտություն ընտրությունների առանձին խախտումների ու անկանոնությունների մասին փաստերը:

⁷² ՀՀ ՊԿՊԱ, Ֆ.202, ց.1, գ.46, մաս 2, ք. 137:

⁷³ «Ժողովուրդ», 1 օգոստոսի 1919 թ.:

Այնուհետև մանդատային հանձնախմբի նախագահ Հ. Բուդաղյանի ամփոփ զեկուցումից հետո ընտրվեց խորհրդարանի նախագահությունը: Նախագահ ընտրվեց Ավետիս Ահարոնյանը, փոխնախագահներ՝ Լևոն Շանթը և Սարգիս Արարատյանը, ավագ քարտուղար՝ Հակոբ Տեր-Հակոբյանը, իսկ կրտսեր քարտուղար՝ Արամ Սաֆրաստյանը⁷⁴: Խորհրդարանի նախագահության կազմի քվեարկությունից ձեռնպահ մնացին էսէռները և «Արագածոտնի գյուղացիական միության» ներկայացուցիչը⁷⁵:

Խորհրդարանի գործունեության ընթացքում նախագահության կազմը փոփոխություններ կրեց: Դեպքերի բերումով պատգամավոր Ա. Ահարոնյանը այդպես էլ չվերադարձաւ հայրենիք և չվարեց խորհրդարանի և ոչ մի նիստ: Այստեղ հարց է ծագում. իսկ ինչո՞ւ Ա. Ահարոնյանին ընտրեցին խորհրդարանի նախագահ, երբ նա, գտնվելով արտասահմանում, գլխավորում էր ՀՀ դիվանագիտական պատվիրակությունը: Այս հարցին, կարծում ենք, հստակ է պատասխանել խորհրդարանի ավագ քարտուղար Հ. Տեր-Հակոբյանը: Նա Ա. Ահարոնյանին նախագահ ընտրելը բացատրում էր նրանով, որ խորհրդարանը ցանկանում էր դրանով ՀՀ պատվիրակության նախագահին «ավելի հեղինակություն ու կշիռ տված լինել վեհաժողովի առջև»⁷⁶: Այս նույն միտքն է հաստատում նաև Վ. Փափազյանն իր հուշերում⁷⁷:

Շուտով փոփոխություն կատարվեց խորհրդարանի նախագահության կազմում: Օգոստոսի 10-ին Ա. Արարատյանը ընտրվում է նախարար և բնականաբար ազատվում փոխնախագահի պարտականությունից⁷⁸: Հետագա ժամանակաշրջանում խորհրդարանի փոխնախագահի պարտականություններ են կատարել պատգամավորներ՝ Հովսեփ Արղությանը, Սիրական Տիգրանյանը, Ավետիք Սահակյանը և Հովհաննես Քաջազնունին: Պատգամավոր Ավ. Խոնդկարյանն իր հուշերում տխրությամբ էր վերհիշում իրենց (էսէռական) ներկայացուցչի չընդգրկվելը նախագահության կազմում⁷⁹:

Մինչ նոր վարչապետի ընտրությունը և նոր կաբինետի կազմումը օգոստոսի 5-ի նիստում լավեց վարչապետի պաշտոնակատար Ալ. Խատիսյանի զեկուցումը կառավարության վերջին ամիսների գործունեության, վարած ներքին ու արտաքին քաղաքականության մասին: Վարչապետի պաշտոնակատարը հայտնեց, որ վերջին երկու ամսվա ընթացքում կառավարությունը հրատարակել է 152 օրենք և 300-ից ավելի վարչական կարգադրություն⁸⁰: Դրանից հետո կառավարությունը ցած է դնում իր լիազորությունները խորհրդարանի առջև: Վերջինս ընդունում է կաբինետի հրաժարականը: Օգոստոսի 7-ի

⁷⁴ ՀՀ ՊԿՊԱ, Ֆ. 200, ց. 1, գ. 86, ք. 40, Ֆ. 202, ց. 1, գ. 333, ք. 30:

⁷⁵ «Սոցիալիստ հեղափոխական», 10 օգոստոսի 1919 թ.:

⁷⁶ Յ. Իրազեկ, Մոտիկ անցյալից, Պեյրոթ, 1956, էջ 55:

⁷⁷ Վ. Փափազյան, Իմ հուշերը, հ. 3, Կահիրե 1957, էջ 71-72:

⁷⁸ ՀՀ ՊԿՊԱ, Ֆ. 202, ց. 1, գ. 333, ք. 4:

⁷⁹ «ՀՀ օրենքների հավաքածու 1919թ.» (հրատարակություն պառլամենտի), ա. տ. և ք., էջ 2, «Կեն», 1934, թիվ 2, էջ 80:

⁸⁰ «Սոցիալիստ հեղափոխական», 10 օգոստոսի 1919 թ.:

նիստում՝ նախագահությանը Ս. Արարատյանի (Ահարոնյանը և Շանթը բացակայում էին) նախարար-նախագահ (վարչապետ) ընտրվեց Ալեքսանդր Խատիսյանը և հանձնարարվեց նրան կազմելու հանրապետության նոր կառավարություն⁸¹: Փաստենք, որ վարչապետի հավանական թեկնածուներից էր նաև Ա. Գարոն (Փաստրմաշյանը), որը վայելում էր մեծ հեղինակություն թե՛ արևելահայերի, և թե՛ արևմտահայերի շրջանում⁸²: Նա Հայաստանի դեսպանն էր ԱՄՆ-ում, սակայն քվեարկության դրվեց միայն Ալ. Խատիսյանի թեկնածությունը: Վարչապետի ընտրության արդյունքներն էին՝ 40 կողմ և 8 դեմ:

Տեղեկացնենք, որ շատ պատգամավորներ՝ Ա. Ահարոնյան, Ա. Գարո, Մ. Վարանդյան, Հ. Օհանջանյան, Հ. Արղության, Մ. Հարությունյան, Հ. Քաջազնունի և ուրիշներ, տևական գործուղումների, դիվանագիտական աշխատանքի, պետական պաշտոնավարության և այլ պատճառներով բացակայում էին հանրապետությունից: Սովորաբար քվեարկությունների ժամանակ ձայների համեմատական սակավությունը պետք է բացատրել նաև նրանով, որ տարբեր ժամանակներում ոչ պակաս տասը պատգամավոր՝ նախարարներ կամ նախարարի տեղակալներ էին, որոնք ընդունված օրենքով քվեարկություններին մասնակցելու իրավունք չունեին⁸³: Այդ իսկ պատճառով էլ խորհրդարանական քվեարկության ձայները սովորաբար չէին անցնում 40-50-ից:

Օգոստոսի 10-ի նիստում հաստատվեց կառավարությունը հետևյալ կազմով՝ Ալ. Խատիսյան (նախարար-նախագահ և արտգործնախ.), Ա. Գյուլխանդանյան (ներք. գործ. և արդարադատության), Մ. Արարատյան (ֆինանս. և պարենավ.), Ավ. Սահակյան (խմամ. և աշխատանքի), Ն. Աղբալյան (հանր. կրթ. և արվեստի) և գեներ. Խ. (Քր.) Արարատյան (գորական)⁸⁴: Ինչպես նկատում ենք, կառավարության կազմը կուսակցական պատկանելության տեսակետից միատարր էր՝ բաղկացած զուտ դաշնակցականներից:

Օգոստոսի 15-ի նիստում լսվեց կառավարության հայտագիրը, որում ներկայացված էին նոր կաբինետի ներքին ու արտաքին քաղաքականության հիմնական ուղղություններն ու մոտեցումները: Հայտագրում մասնավորապես ընդգծվում էր. «Նոր կառավարությունը՝ հենված բովանդակ հայ ժողովրդի դարավոր իրավունքի և իդեերի վրա, իր ամբողջ կարողությամբ պիտի պաշտպանի և ձգտի իրականացնել Միացյալ և ամբողջացրած Հայաստանի անկախության գաղափարը»⁸⁵: Տնտեսության բնագավառում Խատիսյանի կաբինետը պարտավորվում էր ըստ ամենայնի խրախուսել օտար ներդրումները Հայաստանում: Հողային խնդրում կառավարությունը պետք է իրագործեր կալվածատիրական, եկեղեցապատկան հողերի ազգայնացում և դրանց բաշխու-

⁸¹ ՀՀ ՊԿՊԱ, Ֆ. 200, ց. 1, գ. 86, ք. 40:

⁸² Ռ. Հովհաննիսյան, Հայաստանի Հանրապետություն, հ. 1, էջ 475 (անգլերեն):

⁸³ ՀՀ ՊԿՊԱ, Ֆ. 202, ց. 1, գ. 333, ք. 10:

⁸⁴ ՀՀ ՊԿՊԱ, Ֆ. 200, ց. 1, գ. 86, ք. 40-41:

⁸⁵ «Հայաստանի աշխատավոր», 16 օգոստոսի 1919թ.:

մը գյուղացիներին՝ աշխատանքային և սպառողական նորմաներով: Կրթության ասպարեզում խնդիր էր դրվում սկզբնական կրթությունը դարձնել ընդհանուր, պարտադիր և ձրի⁸⁶:

Խատիսյանի կաբինետի հայտագրին անվստահություն են հայտնում միայն էսէռները⁸⁷: Նրանք առարկում էին այն բանում, որ արտաքին քաղաքականության բնագավառում կառավարությունը պետք է հրաժարվի արևմտյան կողմնորոշումից և հակվի դեպի Ռուսաստանը: Բացի այդ, նրանք գտնում էին, որ հողերի բաշխման ձևը տակավին չի որոշված, և որ դպրոցների պետականացումը սխալ է կիրառվում կյանքում և այլն: Կառավարության հայտագիրն ընդունվում է 28 ձայնով՝ ընդդեմ 2-ի⁸⁸:

Այդ օրերին նորընտիր վարչապետ Ալ. Խատիսյանը հեռավոր Ամերիկայից ստացավ նախկին վարչապետ Հ. Քաջագունու, ծրագրային բովանդակությամբ ծավալուն մամակը, որում վերջինս խորհուրդներ էր տալիս, թե ինչպիսի քաղաքական ուղեգիծ ցանկալի կլինի, որ վարի նորակազմ կառավարությունը⁸⁹:

Հ. Քաջագունուին իրավամբ համարվում է այն ժամանակվա ՀՀ ամենահեռատես, չափավոր ու հավասարակշիռ քաղաքական գործիչներից մեկը: Վարչապետ եղած ժամանակ, նա առաջնորդվում էր զուտ պետական մտածելակերպով՝ երկրորդական պլան մղելով կուսակցականը: Հ. Քաջագունուին ջանում էր իրեն պատասխանատու զգալ ոչ թե Դաշնակցություն կուսակցության, այլ միայն ժողովրդի ու խորհրդարանի առջև: «Քաջագունու գործուղումը,- փաստում էր Ռ. Տեր-Սիմասյանը,- նշանակում էր ըստ էության հեռացում և Դաշնակցության ազդեցության ուժեղացում»⁹⁰ պետական կառավարման մեջ:

Եվ, ահա, Խատիսյանին ուղղված մամակում Քաջագունուին դնում էր պետական գործերում կուսակցության միջամտության սահմանափակման և աստիճանաբար դուրս մղման անհրաժեշտությունը: «Մենք,- գրում էր նամակի հեղինակը,- դառնալով միակ կառավարող կուսակցություն և տնօրինելով երկրի բախտը՝ չենք կարող միակողմանիորեն սահմանափակվել զուտ կուսակցական, ծրագրային սկզբունքներով, այլ նաև պետք է ելենք մեր երկրի կեցության իրական պայմաններից ու կարիքներից: Մեր գործը պետք է լինի ոչ թե մեր կուսակցության գաղափարների քարոզչությունն ու սկզբունքների ցուցադրումը, այլ երկրի վերաշինումը»⁹¹:

Առաջ գնալով ասենք, որ Ալ. Խատիսյանի կաբինետը հիմնականում հավատարիմ մնաց Հ. Քաջագունու խորհուրդներին: Պետք է ասել, որ Խա-

⁸⁶ Նույն տեղում:

⁸⁷ «Մոցիալիստ հեղափոխական», 30 օգոստոսի 1919թ.:

⁸⁸ «Հայաստանի աշխատավոր», 21 օգոստոսի 1919թ.:

⁸⁹ ՀՀ ՊԿՄ, Ֆ. 200, ց. 1, գ. 431, քթ. 91-94, այս նամակի մասին հանգամանորեն տես՝ Ա. Հակոբյան, Կենսական պետության առանցքները («Երկիր», 7 ապրիլի 1992թ.):

⁹⁰ Ռուբեն, Հայ յեղափոխականի մը հիշատակները, հ. Է, Լոս Անճելըս, 1952, էջ 276:

⁹¹ ՀՀ ՊԿՄ, Ֆ. 200, ց. 1, գ. 431, ք. 91:

տիսյանը ևս Քաջագնունու պես պետական մտածողության գործիչ էր և գտնում էր, որ կուսակցությունը չպետք է միջամտի կառավարության ընթացիկ պետական գործերին: Ռուբենը նկատում է, որ Խատիսյանի կառավարության ընդհանուր տեսակետն ու որդեգրած ուղղությունը մնում էր քաջագնունիական: «Խատիսյանը ձգտում էր չեզոքացնել Բյուրոն ու կուսակցության մարմինները և ավելի շատ հենվել պառլամենտի վրա»⁹²: Բայց պետք է ասել, որ Խատիսյանը այդ բանը՝ չեզոքացումը, կատարում էր շատ զգուշորեն և մեծ տակտով: Նա կուսակցության հանդեպ վարում էր խուսանավման, փափուկ քաղաքականություն: Արդյունքում Խատիսյանը ձգտում էր հենվել ե՛ր խորհրդարանի, ե՛ր կուսակցության, ե՛ր իշխանության վրա:

*

*

*

Խորհրդարանի օրենսդրական աշխատանքի կազմակերպման, օրենքների նախագծերի և այլ առաջարկությունների նախնական քննարկման և դրանց վերաբերյալ խորհրդարանին եզրակացություններ տալու համար ստեղծվեցին 12 հանձնաժողովներ: Պատգամավոր Ա. Ջամայանի ներկայացմամբ ձևավորվեցին հետևյալ հանձնաժողովները⁹³:

1. **Օրենսդրական** (հետագայում Վարչաօրենսդրական), (7 անդամ), Գ. Վարշամյան (նախագահ), Հ. Տերտերյան (քարտուղար), Հ. Բուդաղյան, Ս. Խաչատրյան, Գ. Խատիսյան, Կ. Ղազարյան, Դ. Ջուբյան:

2. **Ֆինանսարյունչեզային** (8 անդամ), Վ. Նավասարդյան (նախագահ), Վ. Տեր-Թորոսյան (քարտ.), Հ. Սարգսյան, Լ. Թադևոսյան, Հ. Յաղջյան, Ա. Գյուլխանդանյան, Վ. Սինախորյան, Ա. Աղաբաբ-բեկով:

3. **Ինքնավարությունների** (7 անդամ), Ա. Ղազարյան (նախ.), Գ. Քալաշյան (քարտ.), Լ. Չառաֆյան, Ն. Ավագյան, Վ. Բաբայան, Լ. Թումանյան, Ա. Մելիքյան:

4. **Պարենավորման** (9 անդամ), Գ. Քալաշյան (նախ.), Լ. Պետրոսյան (քարտ.), Ա. Սահակյան, Ն. Ավագյան, Մ. Տեր-Գևորգյան, Հ. Մանուկյան, Ա. Նազարյան, Մ. Սիրբաբաև, Վ. Սինախորյան:

5. **Հողային** (8 անդամ), Ա. Սահակյան (նախ.), Հ. Սարգսյան (քարտ.), Ս. Գրիգորյան, Ա. Հովհաննիսյան, Հ. Տերտերյան, Ե. Սարգսյան, Ա. Խոնդկարյան, Ա. Մելքոնյան:

⁹² Ռուբեն, նշվ. աշխ., էջ 232:

⁹³ Այս խորհրդարանում ևս հանձնաժողովների ու դրանց նախագահների կազմը կրել են փոփոխություններ:

6. **Աշխատանքի և խնամապարտության** (9 անդամ), Վ. Խորենի (նախ.), Գ. Շահինյան (քարտ.), Ս. Գրիգորյան, Վ. Սահակյան, Յու. Թեյմուրով, Ա. Աբեղյան, Լ. Չառաֆյան, Ա. Հովհաննիսյան, Լ. Թումանյան:

7. **Ներգաղթի և վերաշինության** (7 անդամ), Հ. Տեր-Գավթյան (նախ.), Ռ. Քաջբերունի (քարտ.), Ռ. Տեր-Սինասյան, Կ. Մանուկյան-Չալյան, Ա. Օհանջանյան, Ա. Հովսեփյան (Մալխաս), Հ. Մանուկյան:

8. **Գարոջական-կրթական** (7 անդամ), Ս. Թորոսյան (նախ.), Պ. Բարսեղյան, Ե. Սարգսյան, Վ. Խորենի, Ա. Աբեղյան, Վ. Սահակյան, Գ. Շահինյան:

9. **Զինվորական** (8 անդամ), Ռ. Տեր-Սինասյան (նախ.), Հ. Մելիքյան (քարտ.), Ն. Ադրալյան, Ս. Վրացյան, Ա. Բաբալյան, Ա. Ջամալյան, Վ. Բաբալյան, Ա. Գյուլխանդանյան:

10. **Խմբագրական** (4 անդամ), Ն. Ադրալյան, Ս. Վրացյան, Վ. Նավասարդյան, Գ. Խատիսյան:

11. **Բժշկա-սանիտարական** (6 անդամ), Ա. Բաբալյան (նախ.), Հ. Մելիքյան (քարտ.), Կ. Մանուկյան-Չալյան, Ա. Գազարյան, Հ. Տեր-Գավթյան, Ե. Միրաբյան:

12. **Հանրօգույթ ձեռնարկների ու շինությունների** (4 անդամ), Ա. Հովսեփյան (Մալխաս), Հ. Յաղջյան, Ա. Օհանջանյան, Լ. Թադևոսյան⁹⁴:

Ինչպես տեսնում ենք, խորհրդարանի ութ պատգամավորներից բաղկացած թույլ ընդդիմությունը բավականաչափ կերպով ներկայացված էր հանձնաժողովներում:

Խորհրդարանի հանձնաժողովները հրավիրում էին իրենց առանձին նիստերը: Խորհրդարանի ընդունած ներքին կանոնադրության (աշխատակարգի) համաձայն՝ պահանջվում էր, որ յուրաքանչյուր օրենսդրական գործ (օրինագիծ կամ ակտ) խորհրդարան մտցվի միմիայն համապատասխան հանձնաժողովներում նախապես մշակվելուց, քննության ենթարկվելուց և այնտեղ հավանություն ստանալուց հետո: Ըստ աշխատակարգի՝ օրինագծերը կարող էին խորհրդարանի քննությանը (օրակարգ) դրվել ոչ շուտ քան խմբակցություններին, պատգամավորներին, ինչպես նաև կառավարությանը նախապես բաժանելուց առնվազը երեք օր անց⁹⁵:

Խորհրդարանական աշխատանքի բնորոշ կողմերից մեկն էլ այն էր, որ պետական կառավարման, գործադիր իշխանության հետ առնչվող օրինագծեր ու խնդիրներ, որոնք մշակվել էին հանձնաժողովներում կամ անհատ պատգամավորների կողմից՝ խորհրդարան մտցնելուց առաջ անպայման պետք է ունենային կառավարության կարծիքը՝ համապատասխան եզրակացությամբ: Բայց պետք է ասել, որ օրինաստեղծ աշխատանքի հիմնական կատարողը կառավարությունն էր, քանզի նա, որպես գործադիր իշխանություն,

⁹⁴ ՀՀ ՊԿՊԱ, Ֆ. 198, ց. 1, գ. 32, թթ. 6-11, «Հայաստանի աշխատավոր», 14 օգոստոսի 1919թ.:

⁹⁵ ՀՀ ՊԿՊԱ, Ֆ. 198, ց. 1, գ. 27, թթ. 11 եւ 79:

իր պրակտիկ աշխատանքում զգում էր համապատասխան օրենքների ու օրենսդրական ակտերի պակասը, ուստի և որպես օրվա պահանջ՝ հանդես էր գալիս օրենսդրական նախաձեռնություններով: «Օրենսդրական նախաձեռնության՝ կառավարության նախապատվության իրավունքը,- մեկնաբանում է իրավաբան Հ. Խաչատրյանը,- սովորաբար բացատրվում է նրանով, որ գործադիր իշխանությունը, հենվելով աստիճանավորական մասնագիտական լայն ապարատի վրա, նախագծեր նախապատրաստելու ավելի մեծ հնարավորություններ ունի, քան շարքային պառլամենտականները»⁹⁶: Ինքնըստինքյան հասկանալի է, որ օրենքների հիմնական գործադրողը կառավարությունն է, ուստի և շատ կարևոր էր այդ օրենքների մշակման և ընդունման փուլերում ստանալ կիրառողի՝ կառավարության համաձայնությունը:

Սովորաբար նախարարություններում կազմվում էին օրինագծերը, որոնք քննարկվում էին նախարարների խորհրդի նիստերում: Այնտեղ հավանության արժանանալուց հետո օրինագծերը ներկայացվում էին խորհրդարան, համապատասխան հանձնաժողովներին՝ քննարկման ու եզրակացություններ ստանալու համար: Ընդամին ոչ մի նախարարություն ինքնուրույն չէր կարող օրինագիծ մտցնել խորհրդարան՝ առանց նախարարների խորհրդի համաձայնության (որոշման), 1919 թ. նոյեմբերի 28-ի խորհրդարանի հաստատած օրենքով՝ կառավարության կողմից խորհրդարան մտնող օրինագծերը պետք է ունենային վարչապետի և համապատասխան նախարարի ստորագրությունը, իսկ ֆինանսական հոդված պարունակող օրինագծերը (վարկ, հարկ, բյուջե և այլն), նաև անպայման՝ ֆինանսների նախարարի ստորագրությունը⁹⁷: Օրինագծերը պետք է լինեին հայերեն լեզվով, վեցական օրինակից, նույնքան էլ կից բացատրություններ ու հավելվածներ⁹⁸: Կային օրինագծեր, որոնք առաջին խորհրդարանից՝ Հայաստանի խորհրդից, տեղափոխվեցին երկրորդ խորհրդարան: Դրանց մի մասը անցել էր առաջին խորհրդարանի հանձնաժողովների փորձաքննությունը:

Օրենքը խորհրդարանում հաստատվելուց հետո նրա իսկական օրինակը վավերացվում էր խորհրդարանի նախագահի և ավագ քարտուղարի կողմից և տրվում պաշտոնական հրապարակման⁹⁹: Իսկ օրենքը կամ օրենսդրական ակտը ուժի մեջ էր մտնում հրապարակման օրվանից: Միջազգային իրավական տերմինաբանությամբ այդ արարողակարգը կոչվում է պրոնուլգացիա (պետական ակտի հրապարակում)¹⁰⁰:

Ըստ կանոնակարգի՝ խորհրդարանի նիստերը գումարվում էին երկուշաբթի և ուրբաթ օրերին, որպես կանոն երեկոյան ժամերին: Սահմանվեց նաև պատգամավորների ռոճկաչափը: Համաձայն 1919 թ. հուլիսի 29-ի օրեն-

⁹⁶ Հ. Խաչատրյան, Պառլամենտ և պատգամավոր, Երևան, 1994, էջ 31:

⁹⁷ ՀՀ ՊԿՊԱ, Ֆ. 202, ց. 1, գ. 46, մաս 2, ք. 130, գ. 333, ք. 1:

⁹⁸ ՀՀ ՊԿՊԱ, Ֆ. 202, ց. 1, գ. 46, մաս 2, ք. 134:

⁹⁹ ՀՀ ՊԿՊԱ, Ֆ. 198, ց. 1, գ. 36, ք. 8:

¹⁰⁰ Парламенты, М., 1967, с. 348-352.

քի՝ սկսած նույն թվականի օգոստոսի 1-ից յուրաքանչյուր պատգամավորի համար սննդադրամ (ռոճկաչափ) էր սահմանվում ամսական 2000 ռուբլի՝ հավելելով ևս 100 տոկոս, այսինքն՝ ամսական աշխատավարձը կազմում էր 4000 ռուբլի¹⁰¹:

Հայաստանի ֆինանսական վիճակի վատթարացման և դրամի արագ սղանքի հետևանքով, ինչպես այլ պաշտոնյաների, այնպես էլ պատգամավորների աշխատավարձի չափը սկսեց արագորեն բարձրանալ: 1920 թ. հունվարի 1-ից պատգամավորների աշխատավարձը (սննդադրամը) կազմեց ամսական 6800 ռուբլի¹⁰²: Արդեն 1920 թ. հուլիսի 1-ից խորհրդարանի պատգամավորների, պետական նախարարների և Պետական վերահսկիչի աշխատավարձը կազմում էր ոչ ավել, ոչ պակաս 42 հազար ռուբլի¹⁰³: Նման փաստը ինքնին վկայում է հանրապետության ֆինանսատնտեսական աղետալի վիճակի մասին:

Կազմվում էր խորհրդարանի ծախսերի ամենամսյա նախահաշիվ: Այսպես օրինակ, 1920 թ. հունվար ամսվա ֆինանսական նախահաշվի գումարը կազմել էր 873160 ռուբլի, որից պատգամավորներին որպես սննդադրամ (աշխատավարձ) 544 հազ. ռուբլի, արտակարգ նպաստ՝ 10 հազ. ռուբլի, հանձնաժողովներին օրապահիկ և ճանապարհածախս՝ 41666 ռ., տպագրական ծախսեր՝ 100 հազ. ռ., դիվանի (արխիվի)՝ 68 հազար ռ. և այլն¹⁰⁴: Խորհրդարանին կից հիմնվել ու գործում էր գրադարանը:

3. Ընդդիմությունը երկրորդ խորհրդարանում և նրանից դուրս

Ռամկավար, կենսունակ պետության ամենաբնորոշ գծերից մեկը, անպայման, բազմակուսակցական հիմքի վրա իսկական ընդդիմության ձևավորումն է: Հայաստանի երկրորդ խորհրդարանում պաշտոնական գրանցում ունեին հետևյալ խմբակցությունները. 1) ՀՅ Դաշնակցության՝ 72, 2) սոցիալիստ-հեղափոխական (էսէն)՝ 4, 3) մահմեդական (թաթար)՝ 3 և 4) Արագածոտնի գյուղացիական միության՝ 1 պատգամավոր¹⁰⁵: Իրականում հազիվ թե կարելի էր մեկ պատգամավորից կազմված հոսանքը խմբակցություն անվանել: Սա ուղղակի արված է պայմանականորեն:

Խորհրդարանում մի տեսակ ճահիճի դեր էր կատարում մահմեդական խմբակցությունը: Պետք է ասել, որ 2 թուրք-թաթար ներկայացուցիչները, անտարբեր գտնվելով Հայաստանի ճակատագրի նկատմամբ և պատասխա-

¹⁰¹ ՀՀ ՊԿՊԱ, Ֆ. 199, գ. 1, գ. 27, ք. 223, ֆ. 202, գ. 1, գ. 333, ք. 6:

¹⁰² ՀՀ ՊԿՊԱ, Ֆ. 202, գ. 1, գ. 333, ք. 58:

¹⁰³ Նույն տեղում, ք. 154:

¹⁰⁴ ՀՀ ՊԿՊԱ, Ֆ. 198, գ. 1, գ. 61, քք. 1-2:

¹⁰⁵ ՀՀ ՊԿՊԱ, Ֆ. 198, 3. 1, գ. 41, ք. 1:

նատվությունից ու անախորժությունից խուսափելու նպատակով, որպես կանոն գրավում էին չեզոք, անտարբեր ու խուսափողական դիրք¹⁰⁶։ Իսկ երբեմն-երբեմն նրանք աջակցում էին էսեռներին։

Երկրորդ խորհրդարանում ՀՅԴ խմբակցության հիմնական ընդդիմությունը էսեռական էր՝ իր չորս պատգամավորներով։ Իսկ ինչ վերաբերում էր իրեն անկուսակցական համարող միակ պատգամավոր Արտաշես Մելքոնյանին, ապա նա սկզբում ցույց չէր տալիս իր ով լինելը, իսկ ավելի ուշ գործնականում դրսևորեց իրեն։ Նա խորհրդարանի աշխատանքների ընթացքում ավելի ու ավելի բացորոշ ձայնակցում էր էսեռների խմբակցությանը։

Բայց ինքնին հասկանալի է, որ ՀՅԴ 72 պատգամավորանոց խմբակցության դեմ ընդամենը ութ պատգամավորից բաղկացած ընդդիմությունը չէր կարող քիչ թե շատ լուրջ մրցակցություն առաջացնել։ Ահա սա նկատի ունեք ՀՅԴ հայտնի գործիչ, պատգամավոր Ռ. Տեր-Սինասյանը, երբ իր հուշերում գրում էր, որ Հայաստանի խորհրդարանում փաստորեն ընդդիմություն չկար¹⁰⁷։ Ինչ խոսք, այս խորհրդարանում, համեմատած նախորդի հետ, ընդդիմությունը շատ ավելի թույլ էր։ Բայց ասել, թե առհասարակ «Պառլամենտ չկար Հայաստանում»¹⁰⁸, արդեն բացահայտ ժխտողական գնահատական է, որի հետ նույնպես չի կարելի համամիտ լինել։

Այնուամենայնիվ, խորհրդարանում, թեև շատ թույլ, բայց կար ընդդիմություն, որը կառավարության դեմ պայքարում էր հիմնականում հարցապնդումների, հարցերի, հայտարարությունների և այլ ձևերով։ Անշուշտ, հարցապնդումը ևս պետք է համարել գործադիր մարմինների գործունեության նկատմամբ վերահսկողություն իրականացնելու ձև։ Մակայն առաջ անցնելով նշենք, որ գործադիր իշխանության այս կամ այն մարմնին կամ էլ պաշտոնատար անձանց ուղղված պատգամավորական հարցապնդումները շատ հաճախ մնում էին անպատասխան։

Այս խորհրդարանում նույնպես էսեռները շարունակում էին իրենց նախկին քաղաքական ուղեգիծը։ Որպես ինտերնացիոնալիստներ և ժողովուրդների բարեկամության ջատագովներ, նրանք հանդես էին գալիս հանրապետության ազգային փոքրամասնությունների, ազգային ու համայնքային իրավունքների պաշտպանության պահանջով։ Այսպես, օրինակ, խորհրդարանի առաջին նիստերից մեկում (օգոստոսի վերջերին) նրանք հարցապնդում ուղղեցին ներքին գործերի նախարարին, թե հայտնի է արդյոք իրեն, որ վերջին երեք շաբաթվա ընթացքում Երևանի, Էջմիածնի և Սուրմալուի գավառների մի շարք գյուղեր (Փաշաբենդ, Թաքեարլու, Աղվերան, Դալեյար, Նուրնուս, Ալիբեկ, Ջանֆիդա, Իգդալու, Կարխուն և այլն) «մաքրել» են թուրք ազգաբնակչությունից և թալանի ու կոտորածի ենթարկել¹⁰⁹։ Հարցապնդում մտցնող-

¹⁰⁶ ՀՀ ՊԿՊԱ, Ֆ. 199, ց. 1, գ. 25, ք. 37:

¹⁰⁷ Ռուբեն, Հայ հեղափոխականի մը հիշատակները, հ.է, Լոս Անճելոս, 1952, էջ 228:

¹⁰⁸ Հ. Քաջազունի, Հ. Յ. Դաշնակցությունը անելիք չունի այլևս, Երևան, 1994, էջ 30:

¹⁰⁹ «Սոցիալիստ հեղափոխական», 7 սեպտեմբերի 1919 թ.:

ները միաժամանակ ցանկանում էին իմանալ, որ եթե այս հայտնի է նախարարին, ապա ինչ միջոցներ են ձեռք առնվում վերջ տալու համար նման անօրինականություններին:

Ինքնին հասկանալի է, որ նման հարցապնդում կատարելիս՝ էւէռ-թուրքական խմբակցությունները հանդես էին գալիս միասնաբար: Փաստերը ցույց են տալիս, որ, իրոք, տեղ են գտել մի շարք ապօրինություններ ու բռնություններ թուրք ազգաբնակչության նկատմամբ¹¹⁰: Անշուշտ, պետք է դատապարտել ազգամիջյան թշնամանքի ու անհանդուրժողականության վրա հիմնված այդօրինակ գործողությունները: Բայց մյուս կողմից էլ հայ էւէռ ինտերնացիոնալիստները չպետք է նաև մոռանան, որ համանման չարագործություններ շատ ավելի դաժան դրսևորումներով ու ծանր հետևանքներով կատարվել ու կատարվում էին հայ ազգաբնակչության նկատմամբ թուրք-թաթարական վարչական ենթակայության շրջաններում՝ Բաքվում, Արեշում, Նուխիում, Շիրվանում, Գանձակում և այլուր, էլ չենք խոսում Արևմտյան Հայաստանի մասին:

Հայ էւէռների ինտերնացիոնալիզմը երևում է նաև Արցախյան խնդրում նրանց ցուցաբերած դիրքորոշումից: Այդ ինտերնացիոնալիզմը լավ հասկանալու համար բավական է բերել մի հատկանշական փաստ էւէռների կուսակցության Ղարաբաղի կազմակերպության օրգան «Աշխատանքից»․ «Ղարաբաղը կենսական կապերով է կապված Ադրբեջանի հետ և երբեք չի ոգևորվել Հայաստանին միանալու գաղափարով»¹¹¹: Կարծում ենք այստեղ մեկնաբանությունները ավելորդ են: Սա մի դիրքորոշում էր, որը պաշտպանում էին նաև շատ հայ բոլշևիկներ:

Կառավարող գլխավոր կուսակցության դեմ, քաղաքական դեպքերի ու իրադարձությունների նպաստավոր զարգացմանը զուգընթաց, էւէռների խմբակցությունը ակտիվացնում էր իր գործունեությունը: Սրանք, ունենալով ընդգծված ռուսական կողմնորոշում և արտահայտվելով ռուսական համապետականության օգտին, գտնում էին, որ Հայաստանը պետք է դաշնակցային (ֆեդերատիվ) կապերով միանա Ռուսաստանին: Իրենց նպատակին հասնելու համար հայ էւէռները գտնում էին, որ Հայաստանում պետք է հաստատվի խորհրդային իշխանություն¹¹²: Այս հիման վրա էլ հայ էւէռներն իրենց կողմնակցությունն ու համակրանքն էին արտահայտում բոլշևիկներին, խորհրդարանում հանդես էին գալիս նրանց պաշտպանությամբ, իրենց մամուլում տեղեր հատկացնում բոլշևիկներին և այլն:

Տեղեկացնենք, որ խորհրդարանի աշխատանքների սկսմանը գրեթե զուգահեռ՝ օգոստոսի երկրորդ տասնօրյակին հանրապետության երկրորդ քաղաք Ալեքսանդրապոլում տեղի ունեցավ էւէռների կուսակցության Հայաս-

¹¹⁰ ՀՀ ՊԿՊԱ, ֆ. 198, ց. 1, գ. 57, ք. 8:

¹¹¹ «Մոցիալիստ հեղափոխական», 12 հոկտեմբերի 1919 թ.:

¹¹² ՀՀ ՀԶԿՓ ՊԿԱ, ֆ. 4033, ց. 7, գ. 53, ք. 1:

տանի կազմակերպության առաջին խորհրդատուովը (կոնֆերանսը)¹¹³: Պատահական չպետք է համարել խորհրդատուովի Ալեքսանդրապոլում հրավիրելը: Բանն այն էր, որ այստեղ բավականին ուժեղ էին «ձախ» ուժերի՝ կուսակցությունների դիրքերը՝ սկսած մենչևիկ-անկախականներից ու էսէռներից վերջացրած բոլշևիկներով: Այս իմաստով էլ դարձյալ պատահական չէր, որ մի քանի ամիս անց հենց Ալեքսանդրապոլը դարձավ մայիսյան ապստամբության գլխավոր կենտրոնը (օջախը):

Կոնֆերանսում լավել ու քննարկվել են հետևյալ օրակարգային հարցերը՝ կուսակցության Հայաստանի կոմիտեի, Հայաստանի խորհրդի (հին խմբակցության) հաշվետվությունները, ընթացիկ մոմենտը և վերաբերմունքը դեպի Հայաստանի անկախության հարցը, էսէռների խորհրդարանական նոր խմբակցության մարտավարությունը, կազմակերպչական հարցեր, և այլն¹¹⁴: Կուսակցության Հայաստանի կոմիտեի գործունեության մասին զեկուցեց Լ. Թումանյանը: Հավանություն է տրվում և՛ կուսակցության Հայաստանի կոմիտեի, և՛ խորհրդարանական նախկին խմբակցության գործունեությանը¹¹⁵: Կոնֆերանսը բավարար է գնահատում մաս նոր խորհրդարանի ընտրությունների արդյունքները: Էսէռների կոնֆերանսը լսելով խորհրդարանական խմբակցության վարելիք մարտավարության մասին՝ հրահանգեց նրան վարել **«Հեղևողական օպոզիցիայի գործունեություն»**¹¹⁶: Հիշեցնենք մաս, որ կոնֆերանսի հրավիրումից մի տասը օր առաջ, նույն կուսակցության Երևանի կազմակերպության ընդհանուր ժողովում, Ա. Խոնդկարյանի զեկուցմամբ, նույն հարցի վերաբերյալ ընդունվել էր հետևյալ մարտավարությունը. խորհրդարանական նոր խմբակցությունը պետք է լիներ **«անպարտասխանապու օպոզիցիայի դերում»**¹¹⁷:

Հայաստանի ու հայ ժողովրդի քաղաքական կողմնորոշման հարցում կոնֆերանսում հետևողականորեն ընդգծվում էր կուսակցության միանշանակ ռուսական դիրքորոշումը: Էսէռները կտրականապես դեմ էին արտահայտվում Հայաստանի կառավարության վարած արևմտամետ քաղաքականությանը: Կոնֆերանսի մասնակիցները հանգում են այն հետևության, որ Փարիզի հայկական պատվիրակության ծրագիրը «հայ ժողովրդին տանում է դեպի վերջնական կործանում»¹¹⁸: Լսելով Ա. Խոնդկարյանի զեկուցումը Հայաստանի անկախության մասին՝ կուսակցությունը շարունակում էր պաշտպանել հակաանկախական տեսակետը:

Կոնֆերանսում Դավիթ Չուբյանը զեկուցեց Հայաստանում գործող կուսակցությունների նկատմամբ իրենց վերաբերմունքի մասին: Նրանք իրենց

¹¹³ «Սոցիալիստ հեղափոխական», 17 հուլիսի 1919 թ.:

¹¹⁴ Նույն տեղում:

¹¹⁵ Նույն տեղում, 4 սեպտեմբերի 1919 թ.:

¹¹⁶ Նույն տեղում:

¹¹⁷ Նույն տեղում, 10 օգոստոսի 1919 թ.:

¹¹⁸ «Սոցիալիստ հեղափոխական», 4 սեպտեմբերի 1919 թ.:

համակրական վերաբերմունքն ու գործակցությունը արտահայտեցին «ձախ» կուսակցություններին ու հոսանքներին, ի մասնավորի՝ բոլշևիկներին:

Էսեռների խմբակցության կողմից բոլշևիկներին պաշտպանելը բացորոշ դրսևորվեց 1920 թ. փետրվարի 20-ի խորհրդարանի թիվ 67 նիստում, երբ պատգամավոր Վ. Մինախորյանը հարցապնդումով հանդես եկավ՝ ն. գ. նախարարի հրահանգով հունվարի 31-ին Հայաստանում ձերբակալված մի քանի բոլշևիկների ազատ արձակման պահանջով¹¹⁹: Ի գիտություն հայտնենք, որ դեռ 1919 թ. դեկտեմբերի 31-ին ն. գ. նախարարը արել էր հետևյալ կարգադրությունը. «Ես՝ ն. գ. ն. Գյուլխանդանյանս, նկատելով Գ-անձակի բնակիչ Ասքանազ Մռավյանի և Վլադիկավկազի բնակիչ Նիկոլայ Պանֆիլովի հակապետական ազիտացիան ու պրոպագանդան, որոշեցի նրանց բանտարկել Երևանի կենտրոնական բանտում երեք ամսվա ժամկետով»¹²⁰: Այս հրամանի պատճենները հանձնվել են շրջանային դատարանի դատախազին առ ի գիտություն և Երևանի կենտրոնական բանտի պետին առ ի գործադրություն:

Գրանից հետո էլ կատարվեցին ուրիշ ձերբակալություններ: Օրինակ, փետրվար ամսին ձերբակալվել և քրեական գործ էր հարուցվել Գիլիջյանի գիմնագիայի մի քանի ակտիվիստ ուսուցիչների և աշակերտների նկատմամբ: Իսկ մի փոքր ուշ Երևանում ձերբակալվել էին Սահակյանը և Պողոսյանը, Ալեքսանդրապոլում՝ Ս. Խանոյանը և ուրիշներ¹²¹: Իհարկե, բանտարկությունների մասին տեղյակ էին պահել Երևանի շրջանային դատարանի դատախազին:

Ձերբակալված բոլշևիկները մեղադրվում էին արգելված գրականություն տարածելու, թուրք փաշաների հետ գործակցելու, գորքի ու բանվորության մեջ հակապետական պրոպագանդա անելու, թռուցիկներ տարածելու մեջ և այլն¹²²: Ն. գ. նախարարը խորհրդարանում հրապարակեց իր տրամադրության տակ եղած մի շարք փաստեր¹²³: Այդուհանդերձ՝ էսեռները պահանջեցին ձերբակալված բոլշևիկներին ազատ արձակել: Էսեռներին պաշտպանեց նաև «անկուսակցական» պատգամավոր Ա. Մելքոնյանը՝ անբավարար համարելով նախարարի տված բացատրությունները:

Երբ խնդրին մոտենում ենք առաջին հայացքից, ապա տեսնում ենք, որ, իրոք, ժողովրդավարական երկրին բնորոշ չէ, եթե չասենք հակաիրավական է ն.գ. նախարարի քայլը, երբ բանտարկություն է կատարվել առանց դատարանի վճռի: Այս պարագան հիմք ուներ պատգամավոր Ա. Խոնդկարյանը, որ նման ձերբակալությունը համարում էր անօրինական: Նա գտնում էր, որ եթե նրանք հանցավոր են, ապա պետք է գործը հանձնվեր դատաքննչական մար-

¹¹⁹ ՀՀ ՊԿՊԱ, ֆ. 198, գ. 1, գ. 64, թ. 1, ՀՀ ՀԶԿՓ ՊԿԱ, ֆ. 1022, գ. 3, գ. 258ա, թ. 2, «Հառնաջ», 24 փետրվարի 1920 թ.:

¹²⁰ ՀՀ ՊԿՊԱ, ֆ. 198, գ. 1, գ. 79, թ. 6:

¹²¹ ՀՀ ՊԿՊԱ, ֆ. 198, գ. 1, գ. 79, թ. 6, ՀՀ ՀԶԿՓ ՊԿԱ, ֆ. 1022, գ. 3, գ. 258ա, թ. 2:

¹²² ՀՀ ՊԿՊԱ, ֆ. 198, գ. 1, գ. 64, թ. 2, ՀՀ ՀԶԿՓ ՊԿԱ, ֆ. 1022, գ. 3, գ. 258ա, թ. 5:

¹²³ ՀՀ ՊԿՊԱ, ֆ. 198, գ. 1, գ. 64, թթ. 4-7:

միններին և պատիժն էլ կայացվեր դատարանով (օրենքով)¹²⁴: Բայց, երբ ծանոթանում ենք գործին ըստ էության, ապա տեսնում ենք, որ ն.գ. նախարարի նման քայլը ինքնագլուխ բռնարարք չէր: Նախարարը ձերբակալությունների ու բանտարկությունների նմանօրինակ վճիռներ կատարելիս՝ առաջնորդվել է Ռուսաստանի ժամանակավոր կառավարության 1917 թ. օգոստոսի 4-ի այն օրենքով, որ հեղափոխությանը սպառնացող վտանգների և այլնի դեպքում բացառիկ արտոնություններ պետք է տրվեն զինվորական և ներքին գործոց նախարարներին՝ առանձին անձանց ու խմբերի վնասակար գործունեության դեմն առնելու համար¹²⁵: Իսկ մենք արդեն գիտենք, որ Հայաստանի խորհրդի 1918 թ. դեկտեմբերի 6-ի հաստատած օրինագծով՝ ՀՀ տարածքում ժամանակավորապես ուժի մեջ էին մնում ցարիզմի և Ժամանակավոր կառավարության օրենքները: Եվ բացի այդ՝ Ա. Գյուլիսանդանյանը պարզաբանում է, որ մեծամասնականների ձերբակալման որոշումը կայացրել է Նախարարների խորհուրդը, իսկ ինքը պարզապես դա գործադրել է¹²⁶:

Չնայած էսեռների հարցապնդումը մի քանի ձերբակալված բոլշևիկների (Ա. Մռավյան, Ս. Կասյան, Ն. Պանֆիլով, Ե. Սևյան, Լ. Ուլիբեկյան) ազատ արձակման մասին մերժվում է (5 կողմ, 33 դեմ և 3 ձեռնպահ)¹²⁷, սակայն շուտով՝ դեռ երեք ամսվա ժամկետը չլրացած, կառավարության գիտությամբ սրանք բանտից ազատ են արձակվում՝ պայմանով, որ հեռանան Հայաստանի սահմաններից¹²⁸: Օգտվելով իշխանությունների ներողամտությունից՝ նրանք ավելի եռանդազին ծավալեցին իրենց գործունեությունը:

Ընդդիմությունը ավելի լայն շրջանակով էր հանդես գալիս խորհրդարանից դուրս: Եվ ինչպես ասվեց, դրանցից ամենամահաշուն ու ամենավտանգավորը բոլշևիկներն էին: Մինչև 1919 թ. կեսերը նրանք ՀՀ տարածքում շատ քիչ էին: Ս. Վրացյանը հայտնում է, որ նրանց մատների վրա կարելի էր հաշվել (Ա. Մելիքյան, Պ. Մակինյան, Ա. Հովհաննիսյան, Ս. Ալավերդյան, Բ. Ղարիբջանյան, Հ. Սարուխանյան, Բ. Բատիկյան և մի քանի աշակերտներ)¹²⁹:

1919 թ. գարնանից (ապրիլից) բոլշևիկների նախաձեռնությամբ Երևանում հիմնվել ու զաղտնի գործունեություն էր տանում կոմունիստական-երիտասարդական «Սպարտակ» միությունը՝ Ղ. Ղուկասյանի գլխավորությամբ¹³⁰: Միությունն իր մասնաճյուղերն ուներ գավառներում: «Սպարտակի» բյուրոն տեղավորված էր Աստաֆյան փողոցի վրա: 1919 թ. մայիսի 1-ին կազ-

¹²⁴ ՀՀ ՊԿՊԱ, ֆ. 198, ց. 1, գ. 78, ք. 1:

¹²⁵ ՀՀ ՊԿՊԱ, ֆ. 198, ց. 1, գ. 79, ք. 6, ՀՀ ՀԲԿՓ ՊԿԱ, ֆ. 1022, ց. 3, գ. 258^ա, ք. 3:

¹²⁶ ՀՀ ՀԲԿՓ ՊԿԱ, ֆ. 1022, ց. 3, գ. 258^ա, ք. 9:

¹²⁷ ՀՀ ՊԿՊԱ, ֆ. 198, ց. 1, գ. 64, ք. 41, գ. 52, քք. 18-19:

¹²⁸ ՀԲԿՓ ՊԿԱ, ֆ. 4010, ց. 1, գ. 15, քք. 1-2:

¹²⁹ Ս. Վրացյան, *Ինչո՞ւ և ինչպես խորհրդայնացավ Հայաստանը, Թեհրան, 1982, էջ 39:*

¹³⁰ Г. А. Аветисян, *Комсомол Закавказья в борьбе за победу и упрочение советской власти, Ер., 1964, с.160-161.*

մակերպությունը լույս տեսցրեց համանուն թերթը, սակայն ընդամենը մեկ համար¹³¹:

Պետք է ասել, որ «Սպարտակը» վարում էր թե՛ ընդհատակյա և թե՛ բացահայտ գործունեություն: Նրանք թռուցիկներ էին բազմացնում ու տարածում, գրականություն էին փոխադրում, ժողովներ հրավիրում, կապեր հաստատում ՌԿ(Բ)Կ Կովկասյան երկրային կոմիտեի հետ¹³²: Այսպես, 1919 թ. ամռանը Բեռլոյք Վեդիի հայտնի կոիվների ժամանակ երիտասարդ կոմունիստների այս կազմակերպությունը հրապարակեց ու տարածեց թռուցիկ, որում քննադատում էր կառավարությանը և կոչ անում գործին չկռվել ապստամբ թուրքերի դեմ: Նշենք նաև, որ այդ նույն դեպքերի կապակցությամբ ձախակողմյան թևի մեկ այլ կուսակցության՝ հայ էսեռների պաշտոնաթերթը Բեռլոյք Վեդիի դեպքերը որակում էր որպես Հայաստանի կառավարության կողմից ձեռնարկված «ավանտյուրա»¹³³: Հայտնի է, որ այդ աղետալի դեպքերի ժամանակ գոհվեց մոտ 200 հայ զինվոր¹³⁴: Հայաստանի պաշտոնական շրջանները այդ անհաջողությունը վերագրեցին «Սպարտակի» թռուցիկների պարտվողական քարոզչությանը: Ն. գ. նախարարությանը հաջողվեց ձերբակալել թռուցիկի հեղինակներին ու տարածողներին: Ժամանակավորապես բանտարկվեցին Ա. Խանջյանը, Գ. Գուկասյանը, Ա. Բուդաղյանը, Ե. Չուբարը և ուրիշներ¹³⁵:

Արդեն սկսած 1919 թ. երկրորդ կեսից՝ բոլշևիկների թիվը Հայաստանում սկսեց մեծանալ: 1919 թ. կեսերից հայ բոլշևիկները, հալածվելով վրացական և ադրբեջանական իշխանությունների կողմից, մի քանի հարյուրի չափ ապաստան են գտնում Հայաստանում և Չեզոք գոտում: 1919 թ. հուլիսին ՌԿ(Բ)Կ Կովկասյան երկրային կոմիտեն Հայաստան ուղարկեց իր ներկայացուցիչներ՝ Ս. Կասյանին և Ա. Մռավյանին¹³⁶: Գալով Հայաստան՝ բոլշևիկները խոստացան գրավել լոյալ դիրք և չժավալել հակապետական գործունեություն: Նրանցից շատերը նույնիսկ ստացան պաշտոններ:

Հարկ է նշել, որ բոլշևիկների Հայաստան ապաստանելու առաջին ամիսներին կառավարությունը ցուցաբերում էր ներողամտություն ու հանդուրժողականություն նրանց հանդեպ: Այս տեսակետից հատկանշական է հետևյալ փաստը. 1919 թ. կեսերից, երբ բոլշևիկները սկսել էին ակտիվանալ Հայաստանում և այդ հիման վրա ՀՅԴ ղեկավար մարմիններն ու խորհրդարանական խմբակցությունը բազմիցս գրավոր ու բանավոր զգուշացնում էին կառավարությանը նրանց հավանական վտանգի մասին ու առաջարկում էին լինել ավելի զգոն, անհաշտ ու վճռական, բայց ն.գ. նախարար Ա. Գյուլխան-

¹³¹ ՀՀ ՀԲԿՓ ՊԿՊԱ, Ֆ. 4012, ց. 1, գ. 32, թ. 1:

¹³² Ս. Վրացյան, Ինչո՞ւ և ինչպես խորհրդայնացավ Հայաստանը, Թեհրան, 1982, էջ 42:

¹³³ «Սոցիալիստ հեղափոխական», 12 հոկտեմբերի 1919 թ.:

¹³⁴ «Նոր աշխատավոր», Թիֆլիս, 22 հուլիսի 1919 թ.:

¹³⁵ ՀՀ ՊԿՊԱ, Ֆ. 198, ց. 1, գ. 64, թ. 4, նաև Դ. Ա. Աբեմուսյան, նշվ. աշխ., էջ 199:

¹³⁶ «Հայաստանի կոմկուսի պատմության ուրվագծեր», Երևան, 1967, էջ 283:

դանյանը, տալով պատասխան նման զգուշացումներին, ասում է, թե «Ինքը, հեղափոխական լինելով, չի կարող հեղափոխականներին հալածել»¹³⁷:

Հայաստան ապաստանած բոլշևիկները, Ռ-Կ(բ)Կ Կովկասյան երկրային կոմիտեի ներկայացուցիչների նախաձեռնությամբ, 1919 թ. սեպտեմբերին Երևանում գումարեցին Հայաստանի կոմունիստական կազմակերպությունների խորհրդակցություն: Նրա աշխատանքներին մասնակցում էին Արշ. Մելիքյանը, Ղ. Դուկասյանը, Ս. Կասյանը, Ա. Մռավյանը, Ս. Խանոյանը, Ս. Ալավերդյանը, Հ. Յաղոբյանը, Մ. Արոյանը, Գ. Շահվերդյանը և ուրիշներ¹³⁸: Խորհրդակցությունում մշակվում է Հայաստանում բոլշևիկյան կուսակցության հիմնական մարտավարությունը և ստեղծվում է կենտրոնական ղեկավար մարմին՝ **Հայաստանի կոմիտե (Արմենկոմ)**¹³⁹: «Սպարտակ» երիտասարդական կազմակերպությունը և սպետք է ղեկավարվեր Արմենկոմի կողմից¹⁴⁰:

Խորհրդակցության հանձնարարությամբ Ս. Կասյանը 1919 թ. դեկտեմբերին հրատարակեց «Ռ՞ր է ելքը» խորագրով գրքույկը¹⁴¹: Գրքույկում, անշուշտ, կան ճշմարիտ փաստեր և դատողություններ, բայց դժվար է համաձայնել հիմնական գնահատականների և շարադրանքի մարտնչող անհանդուրժողականության հետ:

1920 թ. սկզբներից Հայաստանի սահմաններից դուրս ծավալվող ռազմաքաղաքական փոփոխությունները նպաստավոր պայմաններ ստեղծեցին Հայաստանի բոլշևիկների ու նրա ղեկավար մարմնի՝ Արմենկոմի գործունեության ակտիվացման համար: Սա մի կողմից կապված էր Կարմիր բանակի հաղթանակների ու դեպի Կովկաս մուտք գործելու, ինչպես նաև այդ շրջանում Խորհրդային Ռուսաստանի և քեմալականների միջև նկատվող մերձեցման, իսկ մյուս կողմից Անտանտի երկրների կողմից Հայաստանի և Անդրկովկասյան մյուս հանրապետությունների դե-ֆակտո (փաստացի) ճանաչման հետ: Քաղաքական այս իրապայմաններում 1920 թ. հունվարին Երևանում հրավիրվեց Հայաստանի կոմունիստական կազմակերպությունների առաջին կոնֆերանսը, ուր որվեց քաղաքական խնդիր. «Պատրաստ լինել իշխանությունը գրավելու, երբ նեցուկ կունենանք մի հարևան երկիր, որով հնարավոր կլինի կապվել բանվորագյուղացիական Ռուսաստանի հետ»¹⁴²:

Հայաստանի կոմունիստական կազմակերպությունների հունվարյան անլեգալ կոնֆերանսում ընտրվեց Արմենկոմի նոր կազմ, որի մեջ մտան Ս. Կասյանը, Ս. Ալավերդյանը, Ղ. Դուկասյանը («Սպարտակից»), Ա. Մռավյանը, Ա. Նուրիջանյանը, Հ. Պողոսյանը, Գ. Շահվերդյանը, Ս. Մարտիկյանը

¹³⁷ Ռուբեն, նշվ. աշխ. էջ 344:

¹³⁸ ՀՀ ՀԲԿՓ ՊԿԱ, Ֆ. 4012, գ. 1, գ. 32, թ. 3, Ֆ. 4056, գ. 1, գ. 65, թ. 7:

¹³⁹ ՀՀ ՀԲԿՓ ՊԿԱ, Ֆ. 4056, գ. 1, գ. 65, թ. 8:

¹⁴⁰ Խ. Հ. Բարսեղյան, նշվ. աշխ., գիրք 2-րդ, Երևան, 1975, էջ 479:

¹⁴¹ «Հայաստանի կոմկուսի պատմության ուրվագծեր, Երևան, 1967, էջ 284:

¹⁴² Ս. Կասյան, Չախտության հիվանդությունը մեզանում, «Նոր աշխարհ», Թիֆլիս, 1920, թիվ 2, էջ 11:

(թեկնածու)¹⁴³: Արմենկոմի նախագահը Ս. Կասյանն էր: Բայց նրա ձերբակալվելուց և Հայաստանից արտաքսվելուց հետո (1920 թ. փետրվար) նախագահ ընտրվեց Ս. Ալավերդյանը¹⁴⁴:

1920 թ. փետրվար-ապրիլ ամիսներին Հայաստանի շատ շրջաններում տեղի ունեցած տեղական կազմակերպությունների կոնֆերանսները լիովին պաշտպանեցին Արմենկոմի քաղաքական գիծը ապստամբության նախապատրաստվելու հարցում¹⁴⁵: Մեր կարծիքով, սխալ է առանձին հեղինակների տարածած այն տեսակետը, թե մինչ մայիսյան ժամանակահատվածում Արմենկոմը մատնված էր անգործության: Արխիվային վավերագրերը ցույց են տալիս, որ նա տանում էր թե՛ գործնական-կազմակերպական (ընդլայնելով տեղական կազմակերպությունների շարքերը) և թե՛ գրավոր-քարոզչական աշխատանք՝ զորքի մեջ և բնակչության շրջանում: Մինչև մայիսյան ապստամբությունը Արմենկոմը հրատարակել էր բազմաթիվ թռուցիկներ, որոնք ունեին բացահայտ հակակառավարական, հակադաշնակցական ուղղվածություն¹⁴⁶:

Ըստ մարտավարության՝ Հայաստանում գործող բոլշևիկներին և նրանց կազմակերպությունները կարելի է բաժանել մի քանի թևերի: Ինչպես արդեն մեկ անգամ ասվել է՝ Հայաստանի բոլշևիկներից ամենաչափավոր թևին էր պատկանում Ա. Մելիքյանը: Վերջինս իր հայացքներով ու գործելակերպով չէր շտապում Հայաստանի խորհրդայնացման հարցում: Նա, օրինակ, գտնում էր, որ Հայաստանում չկան բավարար նախադրյալներ՝ կոմունիստական վարչաձևի հաստատման համար: Հարկ է նշել, որ Բ. Ղարիբջանյանը նույնպես վաղաժամ էր համարում «ընդհանուր ապստամբությունը դաշնակցական կառավարութեան դեմ»¹⁴⁷:

Ա. Մելիքյանի, Բ. Ղարիբջանյանի դրսևորած չափավոր թևին հակառակ՝ ձախ, ծայրահեղական գիծ էին պաշտպանում երիտասարդ կոմունիստների «Սպարտակ» միությունը (Գ. Ղուկասյան, Ա. Խանջյան, Ա. Բուդաղյան), ինչպես նաև Ալեքսանդրապոլի և Երևանի կազմակերպություններից շատերը, որոնք ձգտում էին բանվորասակավ Հայաստանում դրսի օգնությամբ հաստատել «պրոլետարիատի դիկտատուրա»: Հավանաբար տարածայնությունների այս հողի վրա էլ 1920 թ. փետրվարի 24-ին Ա. Մելիքյանի կարգացած հրապարակային մի դասախոսության կապակցությամբ, որը որակվել էր որպես հակակուսակցական, ՌԿ/ԲԿ Երևանի քաղաքային կոմիտեի որոշմամբ հեղինակը վտարվել է բոլշևիկների երևանյան կազմակերպությունից:

¹⁴³ ՀՀ ՀՔԿՓ ՊԿԱ, Ֆ. 1022, ց. 3, գ. 257, ք. 1:

¹⁴⁴ Խ. Հ. Բարսեղյան, *Հայաստանի Կոմունիստական կուսակցության կազմավորումը, Երևան, 1980, էջ 25:*

¹⁴⁵ Գ. Ա. Գալոյան, *Հերոսական մայիսից-հայրական նոյեմբեր, Երևան, 1980, էջ 61:*

¹⁴⁶ ՀՀ ՊԿՊԱ, Ֆ. 198, ց. 1, գ. 64, ք. 6:

¹⁴⁷ Ռ. Փիրումյան, *Հայաստանը Հ. Յ. Գ. Բոլշևիկ հարաբերությունների ոլորտում 1917-1921, Երևան, 1997, էջ 174:*

Միաժամանակ դիմում է հղվել Կովկասյան եկրային կոմիտեին՝ նրան կուսակցության շարքերից վերջնականապես հեռացնելու մասին¹⁴⁸:

Ա. Մելիքյանը այն եզակի կոմունիստներից էր, որ Հայաստանի համար շատ վտանգավոր էր համարում համաշխարհային հեղափոխությունը՝ պատճառաբանելով, որ նա շրջապատված է անբարեհույս դրացիներով, ուստի և պահանջում էր Հայաստանի կառավարությունից «չեզոք դիրք գրավել իմպերիալիզմի և սոցիալիզմի հակամարտ ուժերի հանդեպ»¹⁴⁹: Նա ոչ միայն բացասաբար արտահայտվեց, այլև դատապարտեց 1919թ. վերջերից և 1920 թ. սկզբներից ծայր առած թուրք-բոլշևիկյան համագործակցությունը:

Վերը նշված երկու՝ աջ Ա. Մելիքյանի և ձախ՝ «Սպարտակ» թևերի արանքում հիմնականում միջակա քաղաքական գիծ էր պաշտպանում Հայաստանի կոմիտեն (Արմենկոմը), թեև նրա մեջ կային առանձին ծայրահեղականներ (Ա. Նուրիջանյանը, Ղ. Ղուկասյանը): Ինչպես վկայում է Ս. Վրացյանը. «Հայաստանի կոմիտեն՝ Արմենկոմը, ընդհանուր առմամբ դեմ էր ծայրահեղ քայլերին և ուզում էր՝ մինչև ռուս բանակը չմտնեա Հայաստանի սահմաններին, չդիմել ծայրահեղ գործողությունների: Նա սահմանփակվում էր միայն կազմակերպական, նախապատրաստական աշխատանքներով և քարոզչությամբ¹⁵⁰: Ի տարբերություն երիտասարդ, տաքարյուն կոմունիստների՝ Արմենկոմի մարտավարությունը ընդհանուր առմամբ պետք է համարել տանելի:

Արտախորհրդարանական ձախակողմյան հոսանքների թվին պետք է դասել սոցիալ-դեմոկրատ մենշևիկներին, որոնք փոքրաքանակ ու թույլ կազմակերպություններ ունեին Հայաստանի առանձին շրջաններում: Եղածներից ամենուժեղը ՌՍԳԲԿ (մենշևիկների) Ալեքսանդրապոլի կազմակերպությունն էր: Հարկ է նշել, որ 1918թ. նոյեմբերին հայ մենշևիկների՝ վրաց մենշևիկներից անջատումից հետո առաջացավ այսպես կոչված «Անկախ սոցիալիստների կուսակցությունը», որը պաշտպանում էր ինտերնացիոնալիստական գիծ և նրա ղեկավար ու ոգեշնչող Ա. Չուրաբյանի անունով հաճախ այս կազմակերպության մեջ մտնող մենշևիկներին անվանել են նաև «զուրաբականներ»: Սրանք ևս իրենց գործունեությունը հիմնականում ծավալեցին Ալեքսանդրապոլում:

Հայ անկախ սոցիալիստները կազմեցին և Ալեքսանդրապոլում հրատարակեցին իրենց ծրագիրը, որի քննադատությամբ հանդես եկավ ճանաչված բոլշևիկ Բ. Ղարիբջանյանը: Նա այդ ծրագիրը որակում էր որպես բուրժուա-դեմոկրատական բովանդակության ծրագիր, իսկ Անկախ սոցիալիստ-

¹⁴⁸ ՀՀ ՀՔԿՓ ՊԿԱ, ֆ. 1022, 4, գ. 73, ք. 1, ֆ. 4056, գ. 1, գ. 3, ք. 1-2:

¹⁴⁹ «Ժողովուրդ», 29 փետրվարի 1920թ.:

¹⁵⁰ Ս. Վրացյան, Ինչո՞ւ և ինչպես խորհրդայնացավ Հայաստանը, Թեհրան, 1982, էջ 44:

ներին՝ «սոցիալ- կադետների կազմակերպություն»¹⁵¹: Անկախ սոցիալիստները իրավամբ դեմ էին պայքարի հեղափոխական մեթոդին և կողմնակից էին արևմուտքի սոցիալիստների մատնանշած հասարակական- քաղաքական ու տնտեսական էվոլյուցիոն (քնաշրջան) ուղուն: Անկախ սոցիալիստների ճանաչված ղեկավարներից էր Ալեքսանդրապոլի քաղաքագլուխ, երբեմնի դաշնակցական Լևոն Սարգսյանը: 1920 թ. սկզբներին Անկախ սոցիալիստները միավորվեցին «սպեցիֆիկները» հետ և հիմնեցին Հայաստանի սոցիալ- դեմոկրատական բանվորական կուսակցությունը (ՀՍԳԲԿ)¹⁵²:

Ինչպես հայտնի է, 1918 թ. Հայաստանի անկախութեան հռչակումից և Բաքվի սեպտեմբերյան ողբերգական դեպքերից հետո Սոցիալ- դեմոկրատական բանվորական հայ կազմակերպությունը (ՄԳԲՀԿ) կամ այսպես կոչված «սպեցիֆիկները», իր գործունեության ծանրության կենտրոնը փոխադրեց Հայաստանի նորանկախ հանրապետություն:

1920 թ. հունվարի 18-ին «սպեցիֆիկները» հանդես եկան մի կոչ- հայտարարությամբ, որով ազդարարեցին անկախ Հայաստանի հողի վրա նոր կուսակցության՝ Հայաստանի սոցիալ - դեմոկրատական բանվորական կուսակցության (ՀՄԳԲԿ) հիմնադրման մասին¹⁵³: Այդ նշանակում էր, որ «սպեցիֆիկները» վերածում են քաղաքական- կազմակերպական նոր որակի՝ կուսակցության: ՀՄԳԲԿ-ի հիմնադիր անդամներն էին՝ Դավիթ Անանունը, Պետրոս Չաքարյանը, Բախշի Իշխանյանը, Յուլյա Խանգադյանը, Գագիկ Պիճիկյանը, Խաչիկ Սամվելյանը, Տրդատ Տրդատյանը և ուրիշներ¹⁵⁴: Ինչպես ասվեց, նորահիմն կուսակցությանը միացան այսպես կոչված Անկախ սոցիալիստները՝ հայ մենշևիկների մի մասը:

Հունվարի 18-ի հայտարարությունը բովանդակային առումով փաստորեն ուներ ծրագրային նշանակություն: Հայտագրում կրկին ընդգծվում էր նորաստեղծ կուսակցության հավատարմությունը սոցիալիզմի ուսմունքին և սոցիալ- դեմոկրատական գործելակերպին: Բայց դրա հետ միաժամանակ վերագնահատման էին ենթարկվում նախկին կազմակերպության քաղաքական նվազագույն ծրագրի որոշ կետեր և առաջադրվում էր կուսակցության մոտակա քաղաքական գործունեության հետևյալ պլատֆորմը. «Ամուր ոտքերով կանգնել ազգային պետականության տեսակետի վրա, այսինքն՝ ընդունել հայ ժողովրդի ազգային ինքնորոշումը, որ է՝ միացյալ Հայաստանի որպես քաղաքական ուրույն միավորի, անկախությունը»¹⁵⁵: Այդ նշանակում է, որ ՀՄԳԲԿ-ը իր հիմնադրման պահից ընդունել է Միացյալ և Անկախ Հայաստանի գաղափարը:

¹⁵¹ ՀՀ ՀՔԿՓ ՊԿԱ, Ֆ 4009, ց. 1, գ. 55, թթ. 14-15, Բ. Ղարիբջանյան, Սովետական իշխանության համար մղված պայքարում, Երևան 1966, էջ 143:

¹⁵² Վ. Ա. Ավետիսյան, նշվ. աշխ. Ե., 1976, էջ 510:

¹⁵³ ՀՀ ՀՔԿՓ ՊԿԱ, Ֆ. 1022, ց. 7, գ. 68, թ. 1:

¹⁵⁴ Նույն տեղում:

¹⁵⁵ Նույն տեղում:

Միջկուսակցական և կառավարության հետ փոխհարաբերությունների խնդիրներում նրանք գտնում էին, որ բոլոր կուսակցությունները պետք է մոռանան խմբակային հաշիվները, հետաձգեն սկզբունքային տարաձայնությունները և մշակեն փոխզիջումային հաշտության և համագործակցության ուղեգիծ¹⁵⁶։ Հայ քաղաքական կուսակցությունների մերձեցման ու համագործակցության հիմքում պետք է դրվեր Հայոց անկախ պետականության կայացման գաղափարը։ Եվ այս դժվարին խնդրի իրականացման ճանապարհին ամենամեծ պարտականությունը և պատասխանատվությունը ընկնելու էր կառավարող ՀՅԳ կուսակցության վրա։ Հայաստանի սոցիալ-դեմոկրատները ամենևին էլ համակրանք չէին տաժում կառավարող Դաշնակցություն կուսակցության հանդեպ, տեղն եկած պահին ուժեղ քննադատության թիրախ էին դարձնում նրան։ «Դաշնակցության խնդրում,- կարդում ենք նրա որոշումներից մեկում,-որպես կառավարող կուսակցություն, մեր վերաբերմունքն այն է, որ նա կարող է արժանանալ մեր բարոյական աջակցությանը այն ժամանակ, եթե մեր ժողովրդին ու երկրին, մեր պետությանն ու անկախությանը կապառնա վտանգ՝ արտաքին թե ներքին ուժերի հարվածներից»¹⁵⁷։

ՀՄԴԲԿ-ը թեև քանակապես շատ փոքրաթիվ էր, սակայն նրանում ընդգրկված մարդիկ, ինչ խոսք, ՀՄԴԲԿ շարքերում ավելի քան մեկ և կես տասնամյակի ընթացքում անցել էին քաղաքական պայքարի դպրոց ու ձեռք էին բերել հարուստ փորձառություն։ Ինքնին հասկանալի է, որ իր սոցիալական կազմով զուտ բանվորական համարվող մեծամասնությամբ կուսակցությունը բուն Հայաստանում չուներ քիչ թե շատ ամուր սոցիալական հենարան, քանզի բանվոր դասակարգ, որպես այդպիսին, հանրապետության ներսում փաստորեն չկար, եթե, իհարկե, չհաշվենք այն մի քանի հազար երկաթուղային և առանձին գործատուների բանվորներին ու բաղնիքների քիսաչիներին՝ ընդամենը շուրջ 10 հազար¹⁵⁸։

Նկատի ունենալով, որ ներկա փոփոխված քաղաքական պայմաններում արդեն հնացել էին «սպեցիֆիկների» ծրագրի տեսա-գործնական շատ կետեր ու առաջադրություններ, ուստի՝ անհրաժեշտություն առաջացավ վերանայել ու մշակել նոր ծրագիր։ Այդ նպատակով 1920 թ. մայիսի 28-ին (Հայաստանի անկախության երկրորդ տարեդարձի օրը) Ալեքսանդրապոլում գումարվեց կուսակցության համագումար (կոնֆերանս)¹⁵⁹։

Օրակարգային հինգ հարցերից կենտրոնականը կուսակցության ծրագիրն էր, որը վերջնականապես մշակվեց և ընդունվեց համագումարում։ Նոր ծրագրում, ընդհանուր դրույթների ձևով, խոսվում էր բուրժուազիայի և պրոլետարիատի դասակարգային հակամարտության, վերջնիս կողմից սոցիալական հեղաշրջում կատարելու անխուսափելիության և սոցիալիստական հա-

¹⁵⁶ Նույն տեղում։

¹⁵⁷ ՀՀ ՀԲԿՓ ՊԿԱ, Ֆ.1022, ց.7,գ.72, էջ 8։

¹⁵⁸ «Հայաստանի աշխատավոր» 16 սեպտեմբերի 1919թ.։

¹⁵⁹ ՀԲԿՓ ՊԿԱ, Ֆ.1022, ց.7,գ.72, էջ 3, ՀՀ ՊԿՊԱ, Ֆ. 393, ց.1,գ. 303, ք.1։

սարակոթյան հաստատման անհրաժեշտության մասին, որով ըստ նրանց, ազատություն կստանար ոչ միայն պրոլետարիատը, այլև համայն մարդկությունը¹⁶⁰: Ծրագրում տեսական մի քանի դրույթներ էլ ընդօրինակված էր գերմանական սոց.-դեմոկրատների էրֆուրտի ծրագրից¹⁶¹:

Նոր ու ինքնուրույն էր ծրագրի գործնական մասը: Առանձնահատուկ տեղ էր տրվում հայ ժողովրդի պետական ինքնորոշման փաստին: Նրանում ընդգծվում էր, որ կուսակցությունը կանգնած է Միացյալ և Անկախ Հայաստանի պետականության տեսակետի վրա¹⁶²: «ՀՍԴԲԿ,- կարդում ենք ծրագրում,- նեցուկ է կանգնում Միացյալ Հայաստանի քաղաքական անկախությանը, պաշտպանում է նրա պետական ինքնուրույնությունը՝ իբրև ռամկավար հանրապետություն»¹⁶³:

Հայաստանի սոցիալ-դեմոկրատները, իրենց համարելով բանվորական կուսակցություն, գործնականում ոչ մի առավելություն կամ արտոնություն չէին նախատեսում այդ դասակարգին: Նրանք բանվորների համար պահանջում էին 8-ժամյա աշխատանքային օր, շաբաթական հանգիստ, կանանց ու երեխաների գիշերային աշխատանքի արգելում¹⁶⁴, մի խօսքով՝ այնպիսի պահանջներ, որոնց կարելի էր հանդիպել այդ ժամանակվա իրեն ժողովրդավարական համարող ցանկացած կուսակցության ծրագրում:

Կուսակցության մայիսյան համագումարը ընտրեց հինգ հոգուց բաղկացած Կենտրոնական կոմիտե, որի նախագահը հերթականությամբ փոփոխվելու էր¹⁶⁵: ՀՍԴԲԿ ԿԿ-ի նախագահ փոխնեփոխ ընտրվեցին ԿԿ-ի անդամներ Բ. Իշխանյանը, Տր. Տրդատյանը և ուրիշներ:

Արտախորհրդարանական ընդդիմադիր կուսակցություններից ամենաազդեցիկը շարունակում էր մնալ **Հայ Ժողովրդականը**: 1919թ. սեպտեմբերին Երևանում գումարվեց ՀԺԿ երկրորդ համագումարը: Չնայած ՀԺԿ-ն խորհրդարանում պատգամավորական ներկայացուցչություն չուներ, սակայն գոյության երկու- երեք տարվա ընթացքում բավականին ամրապնդվել էին կուսակցության դիրքերը՝ ռուսահայ իրականության մեջ: 71 պատգամավորների մասնակցությամբ տեղի ունեցած այս համագումարը նշանավորվեց նրանով, որ փոփոխություն կատարվեց երկու տարի առաջ՝ 1917թ. սեպտեմբերի առաջին համագումարում ընդունված ծրագրում:

Ամենից առաջ 2-րդ համագումարում ընդունված նոր ծրագրով խորհրդարանի կողքին ընդունվում էր նախագահական (պրեզիդենտական) ինստիտուտի անհրաժեշտությունը, բայց առաջնությունը տրվում էր ժողովրդական ներկայացուցչությանը՝ խորհրդարանին: Դա երևում է նոր ծրագրի հետևյալ

¹⁶⁰ ՀՀ ՊԿՊԱ, ֆ.404, ց. 1, գ. 12, քք.3-4:

¹⁶¹ ՀՀ ՀԶԿՓ ՊԿԱ, ֆ. 1022, ց. 7, գ. 72, էջ 4:

¹⁶² ՀՀ ՀԶԿՓ ՊԿԱ, ֆ. 1022, ց. 7, գ. 72, էջ 5:

¹⁶³ ՀՀ ՊԿՊԱ, ֆ. 404, ց. 1, գ. 12, ք. 5:

¹⁶⁴ ՀՀ ՊԿՊԱ, ֆ. 404, ց. 1, գ. 12, ք. 7:

¹⁶⁵ ՀՀ ՀԶԿՓ ՊԿԱ, ֆ. 1022, ց. 7, գ. 72, ք. 14:

կետից. «Ոչ մի որոշում, կարգադրություն, հրաման, ինչ անուն էլ որ կրի և ումից էլ որ բխի, չի կարող օրենքի ուժ ստանալ, եթե հիմնված չէ պառլամենտի որոշման վրա»¹⁶⁶:

Բացի այդ, կուսակցության գործող ծրագիրը համապատասխանեցվեց Հայաստանի քաղաքական նոր իրողություններին, այսինքն՝ անկախ Հայաստանի պայմաններին: Պաշտպանելով անկախ պետականության գաղափարը՝ կուսակցությունն իր առջև ծրագրային նպատակ էր դնում «Հայաստանի անջատված մասերից ստեղծել Սիացյալ և Անկախ Հայաստան» իր սեփական ծովային ելքով»¹⁶⁷: Ծրագրում շատ ուժեղ կերպով ամրագրված էին՝ Հայաստանը դեմոկրատական, պառլամենտական, իրավական հանրապետություն դարձնելու սկզբունքները: Ժողովրդականների համար անփոփոխելի սկզբունքներ էին մնում՝ հայ ազգի գոյության ու մշակույթի պաշտպանության, էվոլյուցիոն զարգացման, ազգային լինելու, իրավական- պառլամենտական պետություն հիմնելու գաղափարները:

Կուսակցության ծրագրի ընդունումից զատ՝ ժողովրդականների համաժողովը քննարկեց օրահերթ այլաբնույթ խնդիրներ, այդ թվում կուսակցության քաղաքական դիրքորոշման հարցը: Համագումարը ընդգծեց իր անվերապահ համակրանքը դեպի դաշնակիցները, այսինքն՝ ցուցաբերում էր արևմտյան կողմնորոշում¹⁶⁸:

ՀԺԿ համագումարը ներկա քաղաքական պահի (մոմենտի) վերաբերյալ ընդունեց մի ըմբոստ բանաձև՝ ուղղված Հայաստանի իշխանությունների դեմ: Համագումարը երկրի վիճակը բնութագրում էր «սոսկալի», իսկ կառավարող կուսակցությանը՝ «անճարակ»¹⁶⁹: Որոշվեց այդ բանաձևի պատճենները ուղարկել Հայաստանի կառավարությանը և խորհրդարանին՝ ի գիտություն:

Համագումարի այդ բանաձևը լուրջ անհանգստություն առաջացրեց իշխանությունների շրջանում: Բանն այն էր, որ քաղաքական մոմենտի մասին ընդունված բանաձևը, մի քանի օր անց, թռուցիկի ձևով բազմացվեց «Ժողովուրդ» թերթի տպարանում: Իշխանությունները հանդես բերելով զգոնություն՝ գտան, որ այդ բանաձև- թռուցիկը կարող է հասարակությանը մղել ըմբոստացման ու հեղաշրջման: Ուստի՝ սեպտեմբերի 19-ին ն. գ. նախարարի հրամանով խուզարկվում ու կնքվում են թերթի խմբագրատունը և «Լույս» տպարանը: Մի քանի օրով դադարում է «Ժողովուրդ» թերթի լույսընծայումը¹⁷⁰: Ի պատասխան դրա՝ հայ ժողովրդականները իշխանություններին մեղադրեցին «մամուլի ազատությունը» սահմանափակելու մեջ: Եվ այս ամենը տեղի էր ունենում այն դեպքում, երբ ՀՀ բացակայում էր մամուլի ու գրաքննության մասին օրենքը:

¹⁶⁶ «Ծրագիր Հայ ժողովրդական կուսակցության», *Երևան, 1919, էջ 5*:

¹⁶⁷ *Նույն տեղում, էջ 3*:

¹⁶⁸ «Ժողովուրդ», 24 սեպտեմբերի 1919թ.:

¹⁶⁹ ՀՀ ՊԿՊԱ, ֆ. 404, ց. 1, գ. 39, թ. 1, «Հայաստանի ծայն», 3 հոկտեմբերի 1919թ.:

¹⁷⁰ «Ժողովուրդ», 24 և 26 սեպտեմբերի 1919թ.:

Այս ամենով հանդերձ՝ ՀԺԿ և նրա պարբերականները երկրորդ խորհրդարանի գումարման առաջին մեկ- երկու ամիսներին ոչ մի կերպ չէին հաշտվում նրա գոյության փաստի հետ, այն համարում էին անօրինական ճանապարհով ընտրված: Սակայն մի փոքր ավելի ուշ մենք տեսնում ենք, որ «Ժողովուրդը» և «Ժողովրդի ձայնը» արդեն «փշերը թողած» տեղեկություններ էին տպագրում խորհրդարանի նիստերի և նրա ընդունած օրենքների ու որոշումների մասին: Իսկ 1920 թ. մայիսյան ճգնաժամի օրերին և հետագա ամիսներին լիովին կանգնում՝ հանրապետության ու նրա անվտանգության պաշտպանության դիրքերում:

ՀՀ Դաշնակցությունից ու Հայաստանի իշխանություններից իր գուսպ (խուլ) դժգոհությունն էր արտահայտում հայ ժողովրդականների դուստր կուսակցությունը՝ **Հայ ռամկավարները**:

1919թ. դեկտեմբերի վերջերին (21-ից 28-ը) Երևանում կայացավ Ռամկավար կուսակցության Հայաստանի շրջանային պատգամավորական ժողովը՝ համագումարը¹⁷¹: Սա Անդրկովկասի հայ ռամկավարների երկրորդ (Բ) համագումարն էր: Այս համագումարի ժամանակ կազմակերպությունը այլևս սահմանափակված չէր Վան- Վասպուրականի գաղթականության շրջանակով, այլ իր մեջ էր ներառել արևմտահայ մյուս ռամկավար՝ Խարբերդի, Տիգրանակերտի, Կարինի, Բաղեշի, Սվազի, Խնուսի, Ալաշկերտի, Մուշի, Տրապիզոնի գաղթական հատվածները¹⁷²:

Համագումարին մասնակցում էին 24 պատգամավոր վճռական ձայնի իրավունքով և 12 հոգի խորհրդակցական ձայնով՝ ընդամենը 36 պատգամավոր¹⁷³:

Օրակարգի հարցերից էին՝ կուսակցության Հայաստանի խորհրդի և տեղական ակումբների զեկուցումները, քաղաքական մոմենտը, ռամկավար կուսակցությունների ու հոսանքների միացման խնդիրը, գաղթականության հարցը և այլն¹⁷⁴: ՀՌԿ Հայաստանի կենտրոնական խորհրդի կողմից համա-ժողովը բացեց Արտակ Դարբինյանը: Չեկուցումներով հանդես եկան պատգամավորներ՝ Ն. Հակոբյանը, Մ. Մալոյանը և ուրիշներ:

Համագումարը արտահայտեց ընդգծված արևմտյան քաղաքական դիրքորոշում: Քաղաքական մոմենտի և Հայկական հարցի վերաբերյալ ընդունված բանաձևում ասվում էր. «Համագումարը, լսելով քաղաքական կացության մասին տրված զեկուցումը և անոր շուրջ արտահայտված մտքերը, որոշեց՝ վստահություն հայտնել դաշնակից պետություններուն և Փարիզի կոնֆերանսի վարած քաղաքականությանը Հայկական հարցի նկատմամբ»¹⁷⁵: Նույն հարցի վերաբերյալ ընդունված բանաձևի մեկ այլ կետում՝ (ը) հատուկ

¹⁷¹ Ա. Յափուճյան, նշվ. աշխ., էջ 45:

¹⁷² «Հայաստանի ձայն», 23 դեկտեմբերի 1919թ.:

¹⁷³ Նույնը, 4 հունվարի 1920թ.:

¹⁷⁴ Ա. Դարբինյան, նշվ. աշխ., էջ 392, «Հայաստանի ձայն», 7 նոյեմբերի 1919թ.:

¹⁷⁵ «Հայաստանի ձայն», 25 հունվարի 1920թ.:

ընդգծվում էր հետևյալը. «Իրական պայմանների թելադրանքով Հայաստանը պետք է կռթնի դաշնակից պետությունների աջակցության վրա»¹⁷⁶: Միաժամանակ, համագումարը մեծ կարևորություն էր տալիս նաև Ռուսաստանի դիրքին¹⁷⁷:

Ինչ վերաբերում էր 1919թ. մայիսի 28-ի «Միացյալ և Անկախ Հայաստանի մասին» կառավարության հայտնի ակտին տրված գնահատականին, ապա համագումարը, դրսաշխարհի ռամկավարներին և հայ ժողովրդականներին համախորհուրդ, քաղաքական սխալ ու անընդունելի էր համարում նրա այն մասը, որով Արարատյան (ՀՀ) կառավարությունը իրեն հայտարարում էր Միացյալ Հայաստանի կառավարություն: Դա որակվում էր որպես բռնաբարում թուրքահայության կամքի և իրավունքի¹⁷⁸: Հայ ռամկավարները բնականաբար վստահություն չէին տածում ինչպես ՀՀ կառավարության, այնպես էլ խորհրդարանի հանդեպ:

Խորհրդարանական և արտախորհրդարանական ընդդիմադիր կուսակցությունները տեսնելով, որ առանձին - առանձին չեն կարողանում ինչպես հարկն է հակազդել կառավարող կուսակցությանը, իշխանությունների դեմ արդյունավետ պայքարելու համար ժամանակ առ ժամանակ միավորվում էին, հանդես էին գալիս համատեղ հայտարարություններով, բողոքներով ու համախոսականներով: Օրինակ՝ համատեղ հայտարարություն է արձանագրվել ընդդիմադիր կուսակցությունների Ալեքսանդրապոլի կազմակերպություններում: Կառավարության սուր քննդատությամբ միասնաբար հանդես եկան ՀԺԿ Ալեքսանդրապոլի կոմիտեն, սոցիալ-դեմոկրատ մենչևիկների Ալեքսպոլի կազմակերպությունը, Հայ ռամկավարների կուսակցության Ալեքսանդրապոլի ակումբը՝ «D»-ն, Անկախ ընկերվար (սոցիալիստների) Ալեքսանդրապոլի կազմակերպությունը¹⁷⁹:

Ընդդիմությունը կառավարությանը, Դաշնակցությանը մեղադրում էր ամեն տեսակ մեղքերի մեջ: Հանրապետությունում ստեղծված սոցիալ-տնտեսական ծանր կացության պատճառը մերկապարանոց ձևով վերագրվում էր կառավարությանը: Ընդդիմադիր մամուլը՝ «Ժողովուրդ», «Ժողովրդի ձայն», «Սոցիալիստ հեղափոխական», «Աշխատանքի դրոշակ», «Հայաստանի ձայն», «Նոր կենք», «Կայծ» և այլն, ազատորեն ու անխնա քննադատում էին կառավարությանը՝ նրա վարած քաղաքականությունը, պաշտոնյաների թերացումները, անիրազեկությունը, շահատակությունները:

Բայց մյուս կողմից պետք է ասել, որ կառավարությանը, իշխանություններին ոչ պակաս սրությամբ քննադատում էր նաև դաշնակցական մամուլը: ՀՅԴ-Բիւրոյի օրգան «Հառաջի» էջերում, որի խմբագիրն էր Ս. Վրացյանը, խմբագրականներ ու բազմաթիվ հոդվածներ էին լույս տեսնում կառավարու-

¹⁷⁶ Նույն տեղում:

¹⁷⁷ Ա. Դարբինյան, նշվ. աշխ., էջ 398:

¹⁷⁸ «Հայաստանի ձայն», 25 հունվարի 1920թ.:

¹⁷⁹ ՀՀ ՊԿՊԱ, Ֆ.404, ց. 1, գ. 36, ք. 1.:

յան քննադատությամբ: Քննադատվում էին նաև Բյուրոն և խորհրդարանը: Վերջինս համարվում էր «խոսարան, իսկ կառավարությունը թույլ ու անկարող»¹⁸⁰: Այն ժամանակ բոլորն էլ միաբերան ընդունում էին, որ ՀՀ-ն դեռևս - հեռու էր իրավական պետություն ու քաղաքացիական հասարակություն լինելուց:

Եթե հանրապետության ներսում քաղաքական կուսակցությունների միջև կար ներքին դիմակայություն, ապա դրաաշխարհում նրանք ավելի հաճախ հանդուրժել են իրար և նույնիսկ գտել համագործակցության եզրեր: Նման գործակցության փորձեր են արվել, օրինակ ՍԳ- Հնչակ և ՀՅԳ- ամերիկյան կազմակերպությունների միջև: 1919 թ. դեկտեմբերին ՍԳ- Հնչակ կուսակցության ամերիկյան շրջանի Կենտրոնական վարիչ մարմնի և ՀՅԳ- Ամերիկայի ԿԿ-ի միջև բանակցություններ են ընթացել համագործակցելու նպատակով: Նրանք համագործակցել են՝ հիմք ընդունելով հետևյալ պայմանները. 1) նյութական օգնություն հասցնել Հայաստանի Հանրապետությանը, Կիլիկիայի և Հայաստանի այլ ազատագրված վայրերին, 2) օժանդակել կամ ուժ տալ կամավորական շարժումին ու ներգաղթին և 3) կուսակցական ոչ մի կաշկանդում¹⁸¹: Բայց արխիվային գործից պարզ չեն դառնում այդ համագործակցության արդյունքները: Ինչևէ, անկախ բանակցությունների արդյունքից, պետք է հավաստել, որ գաղթաշխարհի հայ քաղաքական կուսակցությունները հիմնականում սևեռում ուշադրություն ու շահագրգիռ հոգածություն են ցուցաբերել ՀՀ ճակատագրի հանդեպ, հնարավորության սահմաններում հանգամանակություններ կազմակերպել¹⁸²: Նրանք անհրաժեշտության դեպքում մի կողմ են դրել միջկուսակցական, քաղաքական-գաղափարական մանրախնդիր վեճերն ու տարածայնությունները և սատար կանգնել ՀՀ, Հայկական հարցի և այլ ազգաշահ խնդիրների լուծմանը:

4. ՀՅԳ 9-րդ Ընդհանուր ժողովը

Սույն ենթաբաժնում հարկ ենք համարում առանձնահատուկ և ավելի հանգամանորեն անդրադառնալ ՀՅԳ 9-րդ ընդհանուր ժողովին (համագումարին), քանզի Դաշնակցությունը հիմնական կառավարող կուսակցությունն էր, և նրա այս համաժողովի ընդունած կարևորագույն որոշումները ուղենշանային դեր են խաղացել թե՛ ՀՀ և թե՛ կուսակցության հետագա ողջ գործունեության համար:

ՀՅԳ պատմության մեջ բոլոր ընդհանուր ժողովները եղել են այն հանգրվանները, որոնցից հետո կուսակցության համար բացվել են տեսական

¹⁸⁰ Ռուբեն, Հայ յեղափոխականի մը հիշատակները, հ. է., Լոս Անճելես, 1952, էջ 227:

¹⁸¹ ՀՀ ՊԿՊԱ, Ֆ. 199, գ. 1, գ. 107, ք. 3:

¹⁸² Ա. Կիստր, նշվ. աշխ., հ. 2, էջ 149-154:

ու գործնական աշխատանքի նոր ու լայն հորիզոններ: Այդ տեսակետից հատկանշական էր նաև 9-րդ ընդհանուր ժողովը: Չնայած այստեղ կուսակցության նոր ծրագիր չի ընդունվել, բայց իր կայացրած որոշումներով և ծրագրամետ բանաձևումներով ժողովն ուղենշային է: Ավելին՝ մեր կարծիքով՝ սա ՀՅԳ դարձակետային համագումարներից մեկն է:

Այս ընդհանուր ժողովի որոշումներում ամենանշանակալին, թերևս, Միացյալ և Անկախ Հայաստանի գաղափարի պաշտպանումն ու վավերացումն էր: Ընդհանուր ժողովը հայոց անկախ պետականության պայմաններում հաստատակամորեն կանգնեց, Ն. Ադրալյանի պատկերավոր խոսքերով ասած, հայ ժողովրդի արյունով ոռոգված այդ նորածիլ հանրապետությունը խնամելու և հաստատուն ծառ դարձնելու աներկբա դիրքորոշման վրա¹⁸³:

Այս համագումարը շրջադարձային էր նաև այն իմաստով, որ հայոց նորածին անկախ պետականության իրողության պայմաններում ՀՅԳ պատրաստվում էր փակել քաղաքական պայքարի առաջին՝ գրեթե երեսնամյա շրջանը, և անցնել հաջորդին՝ պետականության կերտմանն ու տնտեսության վերաշինությանը: Բայց, ավաղ, արտաքին ու ներքին ոսոխների դավերի հետևանքով, այն շատ կարճ տևեց:

* * *

Ավելի քան հինգ տարի կուսակցության ընդհանուր ժողով չէր հրավիրվել. պատճառը սկսված աշխարհամարտն էր և դրա հետևանքով հայ ժողովրդի համար ստեղծված բացառիկ ծանր ռազմաքաղաքական իրավիճակը: Պատերազմի ավարտից հետո, քիչ թե շատ տանելի պայմաններում, հնարավորություն ստեղծվեց այն գումարել արդեն անկախացած հայրենիքի մայրաքաղաքում:

1919 թ. մարտի 1-ին ՀՅԳ Արևելյան և Հայաստանի բյուրոները հայտարարության ձևով հրապարակել էին 9-րդ ընդհանուր ժողովի օրակարգը՝ քաղկացած հինգ խումբ հարցերից: Լսվելու և քննարկվելու էին.

ա) Կուսակցության կենտրոնական մարմինների (երկու բյուրոների, Կ. կոմիտեների, խորհրդարանական խմբակցության և այլն) զեկուցումներ ու հաշվետվություններ՝ թվով 7 ենթահարց

բ) Սոցիալ-քաղաքական բնույթի (Մահմանադիր ժողովի, արտաքին ու ներքին քաղաքականության, գորքի, ներգաղթի, կրթության, վերաշինության, ֆինանսների, պարենավորման և այլն) թվով 12 ենթահարց

գ) Ծրագրային-կազմակերպական խնդիրներ (ծրագրի, կանոնադրության, կուսակցության ֆինանսների) 5 ենթահարց

դ) Կուսակցության ընթացիկ կյանքի (արխիվների, թանգարանի, հրատարակությունների և այլն) 8 ենթահարց

ե) Ընտրություններ¹⁸⁴:

¹⁸³ «Աշխատավոր», 5 հոկտեմբերի 1919 թ.:

¹⁸⁴ ՀՀ ՀԶԳՓ ՊԿԱ, ֆ. 4047, ց. 1, գ. 136, թ. 1, «Հառաջ», 6 մարտի 1919 թ.:

Մինչ Ընդհանուր ժողովի հրավիրումը կուսակցական կազմակերպությունների կենտրոնական ու տեղական ղեկավար մարմինները 1919 թ. գարնան և ամռան ամիսներին կատարել էին զգալի նախապատրաստական ու կազմակերպական աշխատանք, կայացել էին շրջանային ու ռայոնական ժողովներ, լայն հնարավորություններ էին ընձեռվել նախաձեռնությունների, առաջարկությունների ու դիտողությունների համար: Ընտրվել էին Ընդհանուր ժողովի պատգամավորներ՝ կուսակցության գրեթե բոլոր իրավասու մարմինների մասնակցությամբ: Համագումարին մասնակցում էին 61 պատգամավոր՝ վճռական ձայնով (աշխարհի տարբեր կողմերից) և 19-ը՝ խորհրդակցական (կառավարության ՀՅԳ անդամներ ու մի խումբ կուսկացական գործիչներ). ընդամենը 80 պատգամավոր¹⁸⁵:

ՀՅԳ Բյուրոների նախապես արված հայտարարության համաձայն՝ ժողովը բացվելու էր 1919 թ. օգոստոսի 15-ին, Երևանում¹⁸⁶: Սակայն, ինչպես հայտնի է, այդ օրերին տեղի ունեցող թուրք-թաթարական ապստամբական ելույթները (խռովությունները), մասնավորապես Բեռլոյկ Վեդիի արյունահեղ կռիվները, ինչպես նաև առանձին պատգամավորների ուշացումը պատճառ դարձան, որ համաժողովի հրավիրումը հետաձգվի: Արևելյան Բյուրոյի օգոստոսի 11-ի նիստում որոշվեց հետաձգել ժողովի հրավիրումը¹⁸⁷: Եվ այն վերջապես բացվեց 1919 թ. սեպտեմբերի 27-ին:

9-րդ Ընդհ. ժողովը գումարվում էր մի այնպիսի ժամանակաշրջանում, երբ հայ ժողովուրդը Փարիզի խաղաղարար համաժողովից անհամբեր սպասում էր Հայկական հարցի վերջնական լուծմանը: Տակավին մնում էին չլուծված հայ ժողովրդի ճակատագրի հետ կապված բազմաթիվ այլ հիմնահարցեր: Ահա թե ինչ էր գրում կուսակցության պաշտոնաթերթ «Հառաջը»՝ Ս. Վրացյանի խմբագրությամբ, Ընդհանուր ժողովի բացման օրը. «Երեսուն տարվա հեղափոխական անդուլ գործունեությունից հետո մեր կուսակցությունը կանգնած է իր ծրագրի ամենակարևոր կետի իրագործման նախօրյակին: Հայաստանի Հանրապետության գոյության փաստը առաջ է բերել մի շարք առաջնակարգ նշանակություն ունեցող խնդիրներ, որոնց լուծումը չի կարող հետաձգվել: Հայ աշխատավորության գաղափարական ղեկավար կուսակցությունը՝ ՀՅԳ, Ընդհ. ժողովի պատգամավոր ընկերները տոգորված են մի ձգումով՝ ամրացնել մեծ հեղափոխության¹⁸⁸ նվաճումները, կայուն դարձնել Միացյալ և Անկախ Հայաստանի Հանրապետությունը, ամրապնդել Հայաստանի դեմոկրատական իրավակարգը, ապահովել դեմոկրատիայի սոցիալական բարգավաճումը: Մենք համոզված ենք, որ ներկա Ընդհանուր ժողովի դե-

¹⁸⁵ «Զաղվածներ Հ.Յ.Գ. 9-րդ ընդհանուր ժողովի որոշումներից», Ե., 1920, էջ 3-4 (այսուհետև՝ «Զաղվածներ...»):

¹⁸⁶ ՀՀ ՀԲԿՓ ՊԿԱ, Ֆ. 4047, ց. 1, գ. 136, ք. 1:

¹⁸⁷ Նույն տեղում գ. 144, ք. 8:

¹⁸⁸ Նկատի ունի 1917 թ. Փետրվարյան հեղափոխությունը:

ըը Հայաստանի իրականության մեջ և մեր կուսակցության կյանքում շատ մեծ է լինելու¹⁸⁹:

1919 թ. սեպտեմբերի 27-ին, երեկոյան ժամը 8-ին, խորհրդարանի դահլիճում տեղի ունեցավ կուսակցության համագումարի հանդիսավոր բացումը:

Նիստը խոհուն ճառով բացեց Ն. Աղբալյանը: Նա հակիրճ կերպով բնութագրեց կուսակցության գործունեության վերջին հինգ տարիների արդյունքները՝ նվաճումները, հերոսությունները, հաջողությունները, բացթողումները, հիասթափությունները, ողբերգությունը:

Ն. Աղբալյանի բացման խոսքից հետո ՀՀ կառավարության կողմից Ընդհ. ժողովը ողջունեցին վարչապետ Ալ. Խատիսյանը, Երևանի քաղաքապետ Մ. Մուսինյանը և ուրիշներ:

Ընդհ. ժողովի նախագահներ ընտրվեցին՝ Հովսեփ Արղությանը, Վահան Խորենին և Մովսես Պետրոսյանը, որոնք հերթականությամբ վարում էին նիստերը:

Նախնական հարցերից հետո ժողովն անցավ բուն օրակարգին և լսեց Արևելյան (Ռուսաստան ու Իրան) և Հայաստանի (Արևմտյան Հայաստան, Թուրքիա, գաղթօջախներ) Բյուրոների մանրամասն զեկուցումները:

Արևելյան Բյուրոյի կողմից զեկուցեց Սիմոն Վրացյանը, իսկ Հայաստանի Բյուրոյի կողմից՝ Ռուբեն Տեր-Սիմասյանը: Հաշվետու ժամանակաշրջանում երկու Բյուրոներն էլ ունեցել էին մեծ կորուստներ: Հայաստանի Բյուրոյի 9 անդամներից մահացել կամ սպանվել էին 7-ը, իսկ Արևելյան Բյուրոյից՝ 2-ը: Այդ կորուստների թվում էին Ա. Վռամյանը, Է. Ակնունին, Հրաչը (Հայկ Թիրաքյան), Ս. Բարսեղյանը, Ռ. Չարդարյանը, Խ. Կարճիկյանը, Ա. Մանուկյանը, Ստ. Ջորյանը, Ա. Շահխաթունին, որոնք կամ սպանվել էին կամ մահացել բնական մահով¹⁹⁰:

Ժողովի ընթացքն ու արդյունքները ճիշտ հասկանալու և գնահատելու համար անհրաժեշտ է հպանցիկ անդրադառնալ կուսակցության ներքին կյանքին և կազմակերպական վիճակին նախահամագումարյան փուլում:

Հաշվետու հինգ տարիների ընթացքում հայ ժողովրդի հետ միասին մեծ չափով տուժել էր նաև ՀՅԴ: Կուսակցության բազմահազար ղեկավար ու շարքային անդամներ զոհվել էին կամավորական շարժման ժամանակ, Հայոց Մեծ եղեռնի, թուրք-թաթարական հետագա հարձակումների, 1918-1919 թթ. ձմռան սովի ու համաճարակի, վրաց ու բուլղարի բռնությունների և այլնի հետևանքով: Այս ամենը բացասաբար էր անդրադարձել կուսակցության կազմակերպությունների աշխատանքի ու մարտունակության վրա: Երկրի՝ թուրքերի կողմից գրավված ու օկուպացված շրջաններում խիստ թուլացել էին կուսակցական մարմինները, որոնք փաստորեն գտնվում էին կիսաքայքայված ու կազմալուծված վիճակում:

¹⁸⁹ «Հատաջ», 27 սեպտեմբերի 1919 թ.:

¹⁹⁰ ՀՀ ՊԿՊԱ, Ֆ. 199, ց. 1, գ. 54, բ. 31, «Հատաջ», 9 հոկտեմբերի 1919 թ.:

1918 թ. մայիսի վերջերին, երբ հռչակվեց Հայաստանի անկախությունը, ՀՅԴ-ն ստավոր ու կենսունակ ուժերի մեծագույն մասը գտնվում էր Հայաստանից դուրս: Նրանք կուսակցական ղեկավար մարմինների հրահանգով Թիֆլիսից, Բաքվից և մերձակա ու հեռավոր արտասահմանի այլ քաղաքներից ու վայրերից, չնայած շատ ծանր պայմաններին, վերադարձան Հայաստան՝ նորանկախ հանրապետության վերաշինության գործին լծվելու:

Նախահամագումարյան ժամանակաշրջանում կուսակցության կազմակերպական վիճակի մասին խոսելիս պետք է հաշվի առնել մի շատ կարևոր առանձնահատկություն: Ստեղծվել էր այնպիսի մի վիճակ, երբ ՀՀ-տարածքում կար 300 հազար արևմտահայ գաղթականություն, որի մեջ կուսակցական պատկանելությամբ ամենամեծ տեսակարար կշիռը կազմում էին ՀՅԴ-անդամները և համակրողները: Սրանք հայրենակցական հիմունքներով ստեղծել էին արտատարածքային կուսակցական կազմակերպություններ: Մինչև 9-րդ Ընդհ. ժողովը, ավելի ստույգ, մինչև 1919 թ. վերջերը, ՀՀ սահմաններում գործում էին հայրենակցական հիմունքներով ստեղծված կուսակցության հետևյալ արտատարածքային մարմինները՝ Վասպուրականի, Լեռնապարի, Բագրեվանդի, Հարք-Ապահունիքի, Դուրան-Բարձրավանդակի, Բարձր Հայքի, Փոքր Հայքի և այլ Կենտրոնական կոմիտեությունները և ենթակոմիտեները, որոնք ամենևին չէին ենթարկվում տեղական ԿԿ-ներին: Այսպես, օրինակ, Երևանում հաստատված արևմտահայերի Վասպուրականի և Լեռնապարի ՀՅԴ-ԿԿ-ը գործում էր նույն Երևանի տեղական Սրգաստանի ԿԿ-ից անկախ: Կամ Ալեքսանդրապոլի շրջանում գոյություն ունեցող Դուրան-Բարձրավանդակի ԿԿ-ը գործում էր տեղական Քարի և Ջրաբերդի ԿԿ-ներից ինքնուրույն¹⁹¹: Նույն կերպ, միևնույն տարածքում զուգահեռաբար գործող արևելահայ և արևմտահայ կուսակցական մարմիններ կային նաև հանրապետության սահմաններից դուրս՝ Թիֆլիսում և այլ վայրերում¹⁹²:

Չնայած միևնույն տարածքում զուգահեռ գործող արևելահայ և արևմտահայ կուսակցական կազմակերպությունների գլխին կար երկու բյուրո՝ համապատասխանաբար Արևելյան և Հայաստանի, կուսակցության ներսում ստեղծված նման կազմակերպական տարանջատված վիճակը սպառնում էր նրա միասնությանը, ջլատում պետական և հասարակական գործերը:

Արևմտահայ դաշնակցականների կազմակերպությունները սփռված էին ՀՀ գրեթե բոլոր գավառներում ու շրջաններում, այսինքն՝ այն վայրերում, որտեղ կար արևմտահայ հոծ գաղթականություն: Այդպիսիք էին՝ Երևանի, Թալինի, Աշտարակի, Էջմիածնի, Նոր Բայազետի, Կոտայքի (Կրբուլախ), Ղամարլուի, Ղարաքիլիսայի, Դիլիջան-Քարվանսարայի, Սուրմալուի, Ալեքսանդրապոլի, Ջանգեգուրի շրջանային կազմակերպությունները¹⁹³: Դրանցում ընդգրկված էին մեծ թվով արևմտահայ դաշնակցականներ: 1919 թ. սեպ-

¹⁹¹ Ռուբեն, նշվ. աշխ., էջ 155:

¹⁹² Նույն տեղում:

¹⁹³ «Հայաստանի աշխատավոր», 27 ապրիլի 1919 թ.:

տեսնելի նախահամագումարյան տվյալներով միայն չորս շրջանների՝ Երևանի, Թալինի, Ալեքսանդրապոլի և Կարսի արտատարածքային կազմակերպություններում հաշվվում էր մոտ 8000 արևմտահայ անդամ¹⁹⁴:

ՀՀ տարածքում գործող արևմտահայ դաշնակցական բոլոր կոմիտեների և ենթակոմիտեների աշխատանքների միավորման ու կազմակերպման գործերը վարում էր «Երկրի» ԿԿ-ն¹⁹⁵: Վերջինս հիմնվել էր հավանաբար 1917 թ. գարնանը՝ գաղթականության դեպի երկիր վերադարձի շրջանում¹⁹⁶: 1919 թ. ապրիլից «Երկրի» ԿԿ-ն հրատարակում էր իր օրգան «Աշխատանք» եռօրյա թերթը՝ Հ. Մանուկյանի (Խորոզյանի) խմբագրությամբ:

* * *

Կուսակցության գերագույն ժողովի կենտրոնական քաղաքական հիմնախնդիրը Հայկական հարցն էր, որի հիմքում ընկած էր Միացյալ և Անկախ Հայաստանի պահանջը: Հաշվի առնելով Առաջին աշխարհամարտի ավարտից հետո Հայկական հարցի համապարփակ լուծման համար ստեղծված նպաստավոր ռազմաքաղաքական և դիվանագիտական պայմանները՝ ՀՅԴ, իբրև ՀՀ հիմնական կառավարող կուսակցություն, Հայաստանի ամբողջությունը վերականգնելու նպատակով առաջ քաշեց և պաշտպանեց նրա երկու գլխավոր հատվածների (ռուսահայ և տաճկահայ նահանգների) միավորումից Միացյալ և Անկախ Հայաստան ստեղծելու մասին գաղափարը:

Միացյալ և Անկախ Հայաստանի տեսլականը կուսակցության գործնական քաղաքականության հիմնաքար դառնալու համար պետք է վավերացվեր ու նյութականացվեր կուսակցության համաժողովում: Մինչ համագումարի հրավիրումը՝ ՀՅԴ Բյուրոն մշակել էր Հայաստանի պահանջները, որում պաշտպանվում էր Միացյալ Հայաստանի գաղափարը առանց Կիլիկիայի և, նույնիսկ, առանց ելքի՝ դեպի ծով:

Այդ ուղղութեամբ հրահանգ էր տրված թե՛ կառավարությանը և թե՛ Փարիզ մեկնած ՀՀ պատվիրակությանը¹⁹⁷: Բայց հանգամանքների բերումով այդ քաղաքականությունը հետևողականորեն չանցկացվեց: Պողոս Նուբար փաշայի գլխավորած Ազգային պատվիրակությունը և գրեթե ողջ գաղութահայությունը, այդ թվում գրեթե բոլոր արևմտահայ դաշնակցականները, ձգտում էին նաև Կիլիկիայի անկախությանը՝ կամ առանձին, կամ Հայաստանի հետ միասին¹⁹⁸: Այս քաղաքական խնդիրը քննության առնվեց ժողովում, որտեղ ի հայտ եկան տարբեր տեսակետներ ու մոտեցումներ: Այդ կապակցությամբ Բյուրոյի անդամ Ռ. Տեր-Սիմասյանը իր հուշերում գրում էր. «Թեև նախորդ

¹⁹⁴ «Հասաջ», 2 հոկտեմբերի 1919 թ.:

¹⁹⁵ Հ. Տասնպետյան, Հ.Յ.Դ.-ն կազմակերպական կառույցի հոլովույթը, Պեյրուք, 1985, էջ 101:

¹⁹⁶ «Ազդակ» շաբաթօրյակ, 1973, թիվ 36, էջ 571:

¹⁹⁷ Ս. Վրացյան, Հայաստանի Հանրապետություն, Բեյրութ, 1958, էջ 200, Ռուբեն, նշվ. աշխ., էջ 170, «Ազդակ» շաբաթօրյակ, 1973, թիվ 38, էջ 607:

¹⁹⁸ Ռուբեն, նույն տեղում, «Ասպարեզ», 28/29 մայիսի 1992 թ.:

Բյուրոյի անդամները (այդ թվում և ինքը- Ա. Հ.) և շատ պատգամավորներ պնդեցին Հայաստանի սահմանների հարցում չափավոր քաղաքականության անհրաժեշտության մասին՝ մատնանշելով Կիլիկիան և ուրիշ հատվածներ Միացյալ Հայաստանի սահմաններից դուրս ձգելու մասին, սակայն Ընդհ. ժողովը, ձայների մեծամասնությամբ, բանաձևեց հետևյալը. «Հայաստանի սահմանները որոշելու խնդրում արտաքին քաղաքականությունը պիտի ղեկավարվի այն ծրագրով, որը 1919 թ. փետրվարի 12-ին ներկայացվել է Փարիզի հաշտության համաժողովին»¹⁹⁹: Այսպիսի որոշում կայացվեց Ընդհանուր ժողովում Հայկական հարցի վերաբերյալ առաջադրված ինը տարբեր բանաձևերի համադրման հիման վրա²⁰⁰:

Այսպիսով, կուսակցության 9-րդ Ընդհ. ժողովը հավանություն տվեց 1919 թ. փետրվարի 12-ին Փարիզի հաշտության համաժողովին Հայաստանի միացյալ պատվիրակության ներկայացրած Միացյալ և Անկախ Հայաստան ստեղծելու ծրագրին, մի ծրագիր, որով ենթադրվում էր ստեղծել Ռուսահայաստանից, Արևմտյան Հայաստանի վեց վիլայեթներից և Կիլիկիայից բաղկացած հայկական պետություն: Այդ նշանակում էր, որ նորընտիր Բյուրոն, ողջ կուսակցությունը պետք է առաջնորդվեին Միացյալ Հայաստանի ծավալուն (առավելագույն) սահմանների պահանջով: Սակայն պատմաքաղաքական հետագա անցքերը ցույց տվեցին, որ չափավոր պահանջներ ներկայացնող պատգամավորները՝ Ռուբենը, Վրացյանը, Բաբայանը և ուրիշներ, ավելի իրատես դուրս եկան, քան մեծամասնություն կազմող արմատականները: Բայց եթե Հայաստանի սահմանների, այդ թվում Կիլիկիայի խնդրում, ժողովականների կարծիքները բաժանվեցին, ապա Միացյալ, Անկախ և Ազատ Հայաստան ունենալու հարցում նրանք մնացին անասան:

Հիրավի, անհրաժեշտ էր կուսակցության, ամբողջ ժողովրդի ջանքերը նպատակամղել բուն Հայաստանի երկու հատվածների միասնացման գործին և ոչ թե ուժերի մի մասը ջլատել ու սպառել Կիլիկիայում, որը, ինչպես հետո պարզ դարձավ, մեծ տերությունների, մասնավորապես Ֆրանսիայի դիվանագիտական խարդավանքների հետևանքով ունեցավ ողբերգական ավարտ:

1920 թ. աշնանը քենալական Թուրքիայի և բոլշևիկյան Ռուսաստանի համատեղ ու կոպիտ ռազմաքաղաքական միջամտության և Արևմուտքի մեծ տերությունների դրսևորած անհետևողականության ու անտարբերության հետևանքով ոչ միայն չիրագործվեց Սևրի դաշնագրով նախատեսված Միացյալ, Անկախ և Ազատ Հայաստանի գաղափարը, այլև աշխարհի շատ պետությունների կողմից արդեն պաշտոնապես ճանաչված ՀՀ-ը կորցրեց իր անկախությունը և խորհրդայնացվեց:

¹⁹⁹ Ռուբեն, նշվ. աշխ., էջ 170, «Քաղվածներ...» էջ 5:

²⁰⁰ «Հայրենիք», 1929, թիվ 5, էջ 68:

Ընդի. ժողովի առջև ծառայած դժվարին ու առանցքային հարցերից մեկը կուսակցության ծրագրի վերաքննության խնդիրն էր: Կուսակցության 8-րդ համագումարից հետո, անցած հինգ տարիների ընթացքում, Հայաստանում և համաշխարհային մասշտաբով տեղի էին ունեցել վիթխարի փոփոխություններ. աշխարհամարտ, ռուսական և օսմանյան կայսրությունների փլուզում, Հայաստանի անկախության հռչակում և այլն:

Համաշխարհային պատերազմին հաջորդած քաղաքական արմատական տեղաշարժերը, բնականաբար, անխուսափելի անհրաժեշտություն դարձրին համապատասխան փոփոխություններ կատարել 1907 թ. Վիեննայի Ընդի. ժողովում հաստատված կուսակցության գործող ծրագրում: Այս կապակցությամբ կուսակցության հայտնի գործիչ Ա. Ջամայանը գրում է. «Ստեղծված նոր կացությունը անհրաժեշտ էր դարձնում Գ-աշնակցության ծրագրի վերաքննությունը, ոչ միայն այն պատճառով, որ նրա ազգային-քաղաքական պահանջը պետք է նոր ձևակերպություն ստանար, այլև այն պատճառով, որ անկախ պետականության սահմաններում գործելու կոչված կուսակցությունը պիտի դժվարանար տեղականապես գործել մի ծրագրով, որ բոլորովին այլ քաղաքական պայմանների հաշվառմամբ էր կազմված»²⁰¹:

Ակնհայտ էր դարձել, որ կուսակցության ծրագրի մի քանի կետեր (դրույթներ) հնացել էին: Հնացել էր ամենից առաջ նրա «Նվազագույն պահանջներ»-ի բաժինը: Այս բաժնում, ինչպես հայտնի է, նախատեսված էին երկու իրարից անջատ Հայաստաններ՝ Արևմտյան և Արևելյան, որոնցից մեկը տեղական լայն ինքնավարությամբ և դաշնակցային կապերով միացած պիտի մնար Թուրքիային, իսկ մյուսը՝ Ռուսաստանին²⁰²: Ծրագրային այս պահանջը տվյալ ժամանակաշրջանի ու պայմանների համար միակ տրամաբանական ու հնարավոր միջոցն էր: Այս քաղաքական դավանանքով էլ հայ ժողովուրդը մտավ համաշխարհային պատերազմի մեջ՝ անցնելով Ամտանտի (Համաձայնության) երկրների կողմը՝ որպես նրանց «փոքր դաշնակից»: Սակայն 1915 թ. Հայոց Մեծ Եղեռնը, 1917 թ. վերջերից ռուսական զորքերի հեռանալը Անդրկովկասից, Բրեստի կողոպտիչ հաշտության պայմանագիրը և այլ անբարենպաստ հանգամանքներ այլևս ավելորդ էին դարձնում խոսել երկու Հայաստանների ինքնավարության իրականացման մասին: Ստեղծված պայմաններում ՀՅԳ Բյուրոն, դուրս գալով կուսակցության ծրագրի շրջանակներից, նախ հրահանգ տվեց Արևելյան Հայաստանի անկախության առաջարկին, ապա և առաջադրեց Հայաստանի Արևելյան և Արևմտյան հատվածների միավորումով Միացյալ Հայաստանի անկախության պահանջը²⁰³: Որքան էլ դժոխային լինեին այս ակտերին ծնունդ տվող պատճառները, այնուամենայնիվ, այն աստիճանաբար հայ ժողովրդի համար դարձավ միս ու արյուն:

²⁰¹ «Հայրենիք», 1931, թիվ 8, էջ 110:

²⁰² «Հ.Յ. Գաշնակցության ծրագիր», Կ. Պոլիս, 1908, էջ 17-18:

²⁰³ «Հայրենիք», 1931, թիվ 8, էջ 106:

Հետևաբար անհրաժեշտ էր, որ հասունացած այս պահանջը նոր ձևակերպում ստանար նոր ծրագրի մեջ: Եվ այդ ձևակերպումը տրվեց Ընդհանուր ժողովում՝ հանձին «Միացյալ և Անկախ Հայաստանի» մասին բանաձևի:

Ժողովում ծրագրային նշանակության փոփոխությունը կայանում էր ընդամենը հետևյալ երեք առանցքային կետերում.

ա) Նվիրագործել Անկախ և Միացյալ Հայաստանի հայտարարությունը և նրա ամբողջացման ու զարգացման ձգտել բոլոր գործությամբ, ժողովրդավար (դեմոկրատիկ) հանրապետության հիման վրա:

բ) Չեղյալ համարել կուսակցության նվազագույն ծրագրի Ռուսահայաստանի և Տաճկահայաստանի վերաբերյալ քաղաքական պահանջները:

գ) Ամբողջական ծրագրի վերաքննությունը հետաձգվում է հաջորդ Ընդհանուր ժողովին²⁰⁴:

Այսպիսով, 9-րդ համագումարը հանգում է իր ծրագրային գերագույն նպատակին՝ Միացյալ և Անկախ Հայաստան կերտելու գաղափարին: Ժողովի գրեթե մյուս բոլոր որոշումները բխում էին Միացյալ և Անկախ Հայաստանի ծրագրային հիմնապահանջից: Պետության արտաքին ու ներքին քաղաքականությունը իրականացնելիս՝ դարձյալ որպես հիմք պետք է համարվեր Միացյալ և Անկախ Հայաստանի հիմնանպատակը: Պետք է ասել, որ այն ժամանակ Միացյալ և Անկախ Հայաստանի ստեղծումը միանգամայն իրականանալի գործընթաց էր:

Հիրավի, կուսակցության 9-րդ Ընդհ. ժողովը շրջադարձային, պատմական եղավ այն իմաստով, որ փաստորեն առանց կենսագործման չեղյալ համարվեց 1907-ի Վիեննայի 4-րդ Ընդհ. ժողովում ընդունված նվազագույն ծրագրի քաղաքական պահանջների բաժինը՝ Հայաստանի երկու հատվածների ինքնավարության մասին, և դրա փոխարեն որդեգրվեց Հայաստանի անկախության պահանջը:

Կուսակցության համաժողովը, բանաձևելով Անկախ և Միացյալ Հայաստանի ստեղծման մասին պահանջը, ելնում էր այն հաստատ համոզումից, որ «ստեղծված պայմաններում Հայաստանի անկախությունը հայ աշխատավորության ֆիզիկական ապահովության և քաղաքական ազատագրության միակ գրավականն է»²⁰⁵:

Նոր ձևակերպում պետք է ստանային նաև կուսակցության նվազագույն ծրագրի մեջ առաջադրված քաղաքացիական, տնտեսական և մշակութային պահանջները, որովհետև դրանք նախատեսված ու համապատասխանեցված էին Թուրքիայի և Ռուսաստանի իրականությանն ու պայմաններին: Օրինակ՝ 1907 թ. ծրագրում խոսվում էր արքունական տիպի հողերի, պաշտոնյաների պարտադիր երկու-երեք գլխավոր լեզու իմանալու, մշտական գորքի փոխարեն՝ ժողովրդական միլիցիայի մասին և այլն²⁰⁶: Մինչդեռ Հա-

²⁰⁴ «Զաղվածներ...», էջ 4-5, Ռուբեն, նշվ. աշխ., էջ 205:

²⁰⁵ «Զաղվածներ...», էջ 7:

²⁰⁶ «Հ.Յ. Դաշնակցության ծրագիր», Կ. Պոլիս, 1908, էջ 19-20:

յաստանի անկախության հռչակումից և ՀՅԴ հիմնական կառավարող կուսակցություն դառնալուց հետո նրա գործունեության գլխավոր դաշտն էր լինելու նորանկախ Հայաստանի Հանրապետությունը՝ նրա ազգային, քաղաքական, տնտեսական և մշակութային վերաշինությունը:

Կնշանակի 1907 թ. կուսակցության նվազագույն ծրագրի քաղաքական, տնտեսական և մշակութային բնույթի շատ պահանջներ ևս արդեն հնացել էին, ուստի՝ դրանք պետք է վերափոխվեին և համապատասխանացվեին ՀՀ կյանքի պայմաններին: Մասնավորապես խնդիր էր առաջադրվում. «Ռամկավարացնել պետության վարչական ամբողջ մեխանիզմը՝ վերացնելով միապետական կարգերի մնացորդները և կյանքի կոչելով ու գործունեության լայն ասպարեզ տալով տեղական ինքնավարություններին ու գյուղացիական կազմակերպություններին»²⁰⁷:

Սակայն Ընդհանուր ժողովը չէր կարող մի քանի շաբաթում ուսումնասիրել այն դժվարին խնդիրները, որոնք կապված էին կուսակցության ծրագրի քաղաքական վերաքննության հետ: Դրա համար էլ նա բավականացավ միայն մի քանի փոփոխություն կատարելով: Առաջինը, ինչպես արդեն ասվեց, ծրագրային ձևակերպում տրվեց Միացյալ և Անկախ Հայաստանի գաղափարին, և երկրորդ՝ նվազագույն ծրագրի մեջ կատարեց մի քանի սրբագրություններ, որպեսզի այն կարողանար հիմք դառնալ կուսակցության գործնական աշխատանքների համար՝ մեր ազգային պետության մեջ²⁰⁸: Ժողովը հրահանգ տվեց նորընտիր Բյուրոյին, կուսակցական մարմիններին առաջմ դեկավարվել նվազագույն ծրագրում արված մի քանի խմբագրական-սրբագրական բնույթի փոփոխություններով՝ մինչև հաջորդ տարի հրավիրվելիք հերթական Ընդհանուր ժողովը, որտեղ և նախատեսվում էր մեկամյա վերամշակումից, կյանքի փորձով հաշվառումից ու ստուգումից հետո միայն ընդունել կուսակցության փոփոխված և ամբողջական ծրագիրը: Ժողովը չուզեց դեպքերի տրամաբանությունից առաջ ընկնել, նախընտրեց ծրագրի վերաքննությունը հետաձգել առնվազն մեկ տարով՝ ամենից առաջ հետևելով ու սպասելով Փարիզի խաղաղության համաժողովում Հայկական հարցի լուծման արդյունքներին:

Պատմաքաղաքական հետազա աննպաստ հանգամանքների հետևանքով այլևս նպատակահարմար չգտնվեց կուսակցության վերամշակված և ամբողջացված ծրագրի ընդունումը:

* * *

Արտաքին քաղաքականություն. - Յուրաքանչյուր համաժողովի աշխատանքներում ամենագնահատելին և արժեքավորը, թերևս, նրա ընդունած որոշումներն են: Կուսակցության ղեկավար մարմինների ներկայացուցիչների տված զեկուցումների ու հաշվետվությունների, տեղի ունեցած ելույթների ու

²⁰⁷ «Զաղվածներ...», էջ 8:

²⁰⁸ «Հայրենիք», 1931, թիվ 8, էջ 110:

քննարկումների հիման վրա ժողովը արտաքին քաղաքականության վերաբերյալ կայացրեց հետևյալ կողմնորոշիչ որոշումը. «Հայաստանի արտաքին քաղաքականության առանցքը պիտի կազմել Միացյալ Հայաստանի անկախությունը օտար պետություններին ճանաչել տալու և ապահովելու մտահոգությունը»²⁰⁹:

Հաշվի առնելով, որ Հայաստանի Հանրապետության ապագան մեծ չափով կախված էր նաև հարևան երկրների հետ ունեցած փոխհարաբերություններից ու վարվող հստակ քաղաքականությունից՝ կայացվեցին առանձին որոշումներ՝ Հայաստանին դրկից բարեկամ և ոչ բարեկամ երկրների հետ ունենալիք արտաքին քաղաքականության և տնտեսական հարաբերությունների առնչությամբ: Օրինակ՝ Իրանի վերաբերյալ տրվեց հետևյալ ձևակերպումը. «Պարսկաստանի հետ պահպանել նույն սերտ հարաբերությունները, զոր ունեցել է Հայաստանի արտաքին քաղաքականությունը մինչև օրս, և որ մեծապես կհամապատասխանի հայ ժողովրդի շեշտված վերաբերմունքին դեպի պարսիկ ժողովուրդը»²¹⁰: Հարկ է նշել, որ ՀՀ գոյության ընթացքում Իրանը դրսևորեց բարյացակամ չեզոքություն:

Ընդամին, կարելի է ասել, որ ժողովը թշնամական վերաբերմունք չի արտահայտել անգամ Ադրբեջանի և Թուրքիայի նկատմամբ, որոնց հետ ուներ ազգային-տարածքային լուրջ վեճեր ու քաղաքական տարամերժ դիրքորոշումներ: Մասնավորապես, Ադրբեջանի հարցում կայացվեց հետևյալ բանաձևը. «Հրահանգել կառավարությանը, պահպանելով Հայաստանի և հայ աշխատավորության շահերը Ադրբեջանի սահմաններում, աշխատել բարի դրացիական հարաբերություն պահպանել նրա հետ»²¹¹: Սակայն հայ-ադրբեջանական հարաբերություններին վերաբերող այս առաձգական բանաձևից զատ՝ Ընդհանուր ժողովը հատուկ որոշում կայացրեց Ղարաբաղի և Չանգեզուրի վերաբերյալ. «Դրանք համարելով՝ անբաժանելի մասը Անկախ ու Միացյալ Հայաստանի Հանրապետության»²¹²: Այդ նշանակում էր, որ ՀՀԳ, ձգտելով հանդերձ Ադրբեջանի հետ բարիդրացիական հարաբերությունների հաստատման, ոչ մի գնով նրան չէր զիջելու Ղարաբաղն ու Չանգեզուրը: Ի կատարումն այս որոշման՝ հանձնարարվեց նորընտիր Բյուրոյին՝ «բոլոր քայլերը առնել Չանգեզուրն ու Ղարաբաղը միացնելու Հանրապետությանը»²¹³: Հայկական այդ հողերի միացումով ՀՀ իրական տարածքը կկազմեր 67 հազար քառ. կմ²¹⁴:

Գործնականում Ընդհանուր ժողովի որոշումները՝ Միացյալ և Անկախ Հայաստանի, ինչպես նաև Ղարաբաղի և Չանգեզուրի Հայաստանին կցման

²⁰⁹ «Զաղվածներ...», էջ 5:

²¹⁰ «Զաղվածներ...», էջ 6, Ռուբեն, նշվ. աշխ., էջ 173:

²¹¹ Նույն տեղում, Ռուբեն, նշվ. աշխ., էջ 184:

²¹² Ռուբեն, նշվ. աշխ. էջ 205:

²¹³ «Ասպարեզ», 28/29 մայիսի 1992 թ.:

²¹⁴ Ռուբեն, նշվ. աշխ., էջ 185:

մասին, հակոտնյա էին Ադրբեջանի և Թուրքիայի ձգտումներին: Հասկանալի է, որ պահանջների նման կտրվածքով Թուրքիայի հետ համաձայնության գալը դառնում էր անհնարին:

Ընդհանուր ժողովը վճիռ կայացրեց հայ ժողովրդի դահիճներին պատժելու վերաբերյալ, որը և հետագայում փայլուն կերպով իրագործեցին հայ վրիժառուները: Միայն Էնվերի ահաբեկմանը ՀՅԴ մասնակցություն չունեցավ²¹⁵:

Ինչ վերաբերում էր Ռուսաստանի հետ տարվող քաղաքականությանը, ապա հաշվի առնելով, որ գոյություն ունեին տարբեր Ռուսաստաններ՝ բոլշևիկյան, դեմիկիկյան, կոլչակյան և այլն, ցուցաբերվում էր տարբերակված (դիֆերենցված) մոտեցում: Եվ ռուսական այդ կառավարություններին Հայաստանը պետք է դիմադրեր այնքանով, որքանով, որ դրանք կփորձեին կրկին վերահաստատել իրենց գերիշխանությունը Ռուսաստանի վրա և դրանով խափանել Հայաստանի ամբողջացման գործը: Այդուհանդերձ՝ ժողովը շեշտում էր, որ պահպանվելու էր բարյացակամ, բարեկամական հարաբերությունները ռուս ժողովրդի ու Ռուսաստանի քաղաքական վերածնության հանդեպ²¹⁶: Պետք է տեսնել, որ ՀՅԴ-ն Խորհրդային Ռուսաստանին դիմակայել է գաղափարական հարցերում, իսկ Ռուսաստանի ու ռուս ժողովրդի նկատմամբ նա առանձնապես ոչ մի թշնամանք չի դրսևորել: Այս առնչությամբ գտնում ենք, որ ամիսին է տասնամյակներ շարունակ խորհրդահայ պատմագրության մեջ դեգերող այն դատողությունը, թե իբր Դաշնակցության անհաշտ, թշնամական վերաբերմունքի պատճառով Խորհրդային Ռուսաստանը երես դարձրեց Հայկական հարցի հայանպաստ լուծումից: Այնինչ, երբ 1918 թ. բոլշևիկները մերկացրին Կովկասյան ռազմաճակատը և Բրեստի պայմանագրով փաստորեն թաղեցին Հայ Դատը, ոչ Հայաստանի Հանրապետությունը կար, ո՛չ էլ Դաշնակցությունն էր կառավարող կուսակցություն: Իսկ այդ ժամանակ Անդրկովկասի երեք գլխավոր քաղաքական կուսակցություններից (վրաց մենշևիկներից, ազերի մուսավաթականներից և ՀՅԴ-ից), թերևս միայն Դաշնակցությունն էր, այսպես թե այնպես, կողմնորոշվում դեպի Հյուսիս: Ավելին՝ Դաշնակցությունը մինչև վերջին րոպեն դեմ է եղել Անդրկովկասը Ռուսաստանից անջատելուն²¹⁷: Իրականում հայ ժողովուրդն ու Հայաստանը, հանուն համաշխարհային հեղափոխության հաղթանակի, որպես քաղաքական մանրադամ զոհաբերվեց թուրք-բոլշևիկյան համընկնող շահերին ու գործակցությանը:

Տնտեսական քաղաքականություն. - Տնտեսական քաղաքականության հարցերում համաժողովի կայացրած որոշումներից առանձնապես սկզբուն-

²¹⁵ Հ. Տասնապետյան, Հ.Յ.Դ. իր կազմությունն են մինչև Ժ ընդհ. ժողով (1890-1924), Արենք, 1988, էջ 162:

²¹⁶ «Զաղվածներ...», էջ 6:

²¹⁷ «Հատուց», 2 հոկտեմբերի 1919 թ.:

քային և կողմնորոշիչ դեր խաղաց հետևյալ բանաձևը. «Երկրի մեջ տնտեսություն ստեղծելու տեսակետից, անհրաժեշտ նախապայման համարելով դրամագլխի ազատ մուտքը, դաշնակցական կառավարությունը պիտի քաջալերի թե՛ օտար և թե՛ մանավանդ, հայկական դրամագլխի մասնակցությունը երկրի վերաշինության, ճարտարարվեստի, հաղորդադակցության և առևտրի զարգացման համար»²¹⁸

Բանն այն էր, որ հասարակական-քաղաքական որոշ շրջանների կողմից հանրապետության ներսում և, հատկապես, դրսում այն թյուր միտքն էր տարածվում, թե Հայաստանի դաշնակցական կառավարությունը ոչ միայն չի քաջալերում մասնավոր տնտեսական (ձեռնարկչական) գործունեությունը, այլև ամեն կերպ արգելք է հանդիսանում ապրանքաշուկայական հարաբերություններին ընդհանրապես: Ցավոք՝ ՀՅԳ- հասցեին համանման մեղադրանքներ արվում են նաև մեր օրերում: Այս ամենը արվում է՝ ելնելով այն տրամաբանական դատողությունից, որ ՀՅԳ- իր բնույթով սոցիալիստական է, հետևաբար և դեմ կլինի մասնավոր սեփականությանը և շուկայական տնտեսությանը: Բայց իրականում այդպես չէր: ՀՅԳ- միշտ էլ թույլատրելի է համարել սեփականության ձևերի բազմազանությունը՝ սկսած արտադրական ձեռնարկությունների ու հողի մասնավոր սեփականությունից, վերջացրած պետական-համաժողովրդական անօտարելի սեփականության վրա հիմնված կոոպերատիվ ու համայնական տնտեսություններով:

Իրականում Հայաստանի կառավարությունը, ինչպես և յուրաքանչյուր կառավարություն, հավաքական նախաձեռնության կողքին ամեն կերպ ուժ էր տալիս ու խրախուսում մասնավոր ձեռներեցությունը և «նույնիսկ դրամական նպաստ էր բաց թողնում անհատ արդյունաբերողներին՝ այս կամ այն տնտեսական ձեռնարկն սկսելու համար»²¹⁹: Մույն որոշումը դարձավ ուղեցույց Հայաստանի կառավարության գործնական քաղաքականության համար: Այդ մասին ընդգծվեց նաև կառավարության հայտագրում: Եվ այս իմաստով այնքան էլ հիմնավոր չէ այն վարկածը, թե արտերկրի հայ դրամատերերը (առևտրաարդյունաբերական կապիտալը) իրենց կապիտալները չէին ներդնում Հայաստանի տնտեսության մեջ այն պատճառով, քանզի, իբր, վախենում ու խրտնում էին դաշնակցական կառավարության սոցիալիստամետ քաղաքականությունից: Թեև ՀՀ հռչակվել էր իբրև ռամկավարական հանրապետություն, բայց պետք է տեսնել, որ այդ ռամկավարության հիմնական կողմը՝ ժողովուրդը, տակավին ծանոթ չէր ժողովրդավարության շատ սկզբունքների: Ամբողջատիրական երկու դաժան (ցարական և սուլթանական) վարչակարգերին սովոր հայության երկու հատվածներում էլ հնարավոր չէր հանպատրաստի (միանգամից) ժողովրդավարություն արմատավորել: Դրա համար ժամանակ էր պահանջվում: Իսկ մինչ այդ, կյանքի բնականոն շփմը պահպանելու, անիշխանական երևույթների դեմ պայքարելու համար կարևորվում

²¹⁸ «Զաղվածներ...», էջ 13, «Հասուջ», 4 ապրիլի 1920 թ.:

²¹⁹ «Հասուջ», 4 ապրիլի 1920 թ.:

ու արդարացվում էին նաև հեղափոխական առանձին միջոցառումների դիմելու անհրաժեշտությունը²²⁰։

Չորք. - Դրոյի տված գեկուցման հիման վրա ընդունվեց համապատասխան որոշում՝ բոլոր քաղաքացիների պարտադիր երկամյա զինվորական ծառայության, բանակը բոլոր առումներով հայացնելու և այն հայոց պետության պաշտպանությանը ծառայեցնելու հրամայականի մասին²²¹։ Մարտունակ և որակյալ բանակ ունենալը կուսակցությունը տեսնում էր մի կողմից հզոր տնտեսության, իսկ մյուս կողմից ռազմիկների բարոյական կայունության ու հայրենիքին նվիրվածության մեջ։

Գաղթականություն. - Ընդհ. ժողովը զբաղվեց նաև գաղթականության ու ներգաղթի հարցերով։ Ներքին քաղաքականության վերաբերյալ ընդունված որոշումների 9-րդ (Թ) կետով նախատեսվում էր «աջակցել ու կազմակերպել դրսի հայության ներգաղթը Հայաստան»²²²։ Կազմակերպական տեսակետից ժողովը խնդիր դրեց ուժեղացնել կուսակցական մարմինների գործունեությունը Երկրում (Արևմտյան Հայաստանում)՝ իբրև ներգաղթի իրագործման անհրաժեշտ նախապայման²²³։

Ինչպես արևմտահայ 2-րդ համագումարում, այնպես էլ ՀՅԳ այս ընդհանուր ժողովում, որպես առաջնահերթ քաղաքական նշանակության խնդիր, որոշվեց «պայմաններ ստեղծել արևմտահայ փախստականները դեպի իրենց ծննդավայրը՝ Երկիր ներգաղթեցնելու համար»²²⁴։ Եվ պետք է ասել, որ Հայաստանի կառավարությունը բավականաչափ միջոցներ ու ջանքեր գործադրեց Հյուսիսային Կովկասում, Վրաստանում, Ադրբեջանում, Իրանում և Միջազգետքում գտնվող գաղթականներին հայրենիք վերադարձնելու ու վերաբնակեցնելու ուղղությամբ։ Բավական է ասել որ իրանահայ գաղթականության վերաբնակեցման, Միջազգետքի ու Բաքվի գաղթականությանն օգնելու համար նախարարների խորհուրդը հատկացրեց 10.5 մլն. ռուբլի²²⁵։

1919 թ. դեկտեմբերի 4-ի կառավարության մի գրությունից տեղեկանում ենք, որ առաջիկայում Բաքվից, Թիֆլիսից և Գանձակից սպասվում է մոտ 80 հազար գաղթականների հոսք դեպի Հայաստան, որոնց ընդունման ու տեղավորման համար ձեռնարկվել են միջոցառումներ²²⁶։ Սակայն Հայաստանի անկախության ու պետականության դեմ ուղղված կործանարար գործընթացները կասեցրին կուսակցության և կառավարության կանխագծումները ներգաղթի ասպարեզում։

Կամավորական շարժում. - Վերլուծելով Արևելյան և Հայաստանի Բյուրոների գործունեությունը՝ մասնավորապես հավանություն տրվեց կամա-

²²⁰ «Զաղվածներ...», էջ 8-9։

²²¹ Նույն տեղում, էջ 10-11։

²²² «Զաղվածներ...», էջ 9։

²²³ Նույն տեղում։

²²⁴ «Համառոտ տեղեկագիր Արևմտահայ երկրորդ համագումարի», Ե., 1919, էջ 12։

²²⁵ ՀՀ ՊԿ ՊԱ, Ֆ. 199, գ. 1, գ. 11, թ. 141, գ. 14, մաս 2, թ. 7։

²²⁶ Նույն տեղում, գ. 43, թ. 92։

վորական շարժման կազմակերպմանը՝ այդ շարժումը նկատելով որպես «հայ ժողովրդի ինքնապաշտպանական մեկ պատմական փաստ և մեր քաղաքական ազատագրության ազդակ»²²⁷:

Չկամենալով վիճարկել նման գնահատականի իրավացիությունը՝ մյուս կողմից, որպես պատմական փաստ, ուզում ենք արձանագրել, որ Հայկական հարցին նպաստավոր լուծում տալու խոստումով նիկոլայների և վորոնցովների կողմից բորբոքվող այդ շարժումը, այնուամենայնիվ, շեղում էր ՀՅԴ 8-րդ Ընդհ. ժողովի նախանշած չեզոքության (լոյալության) մասին ուղեգծից, մանավանդ որ Բյուրոյի անդամներ՝ Արամ Մանուկյանը, Արշակ Վռամյանը և էլի ուրիշներ դեմ են եղել դրան²²⁸: Ընդհանրապես, կամավորական շարժման ռազմաքաղաքական նշանակության մասին խոսելիս, գտնում ենք, որ նրա դերը չպետք է գերազնահատել: Հեղինակներ կան, որ այնպես ոգևորությամբ են գրում այդ մասին, որ, կարծես, եթե հայ կամավորական այդ փոքրաթիվ խմբերը չլինեին, ռուսները չէին կարողանա գրավել Արևմտյան Հայաստանը: Հիրավի, ինչ դեր ու տեսակարար կշիռ կարող էին խաղալ մի քանի հազարանոց հայ կամավորները Անդրկովկասում գտնվող կեսմիլիոնանոց ռուսական բանակում:

Մամուլ. - Ընդհանուր ժողովը առանձին որոշում կայացրեց կուսակցական մամուլի մասին: Ամեն մի կուսակցության ու կառավարության ժողովրդավարության ու բացախոսության աստիճանը կարելի է չափել նաև նրա մամուլով, նրանում թույլատրվող քննադատության ու ինքնաքննադատության ազատությամբ և կարծիքների բազմազանությամբ: Եվ պետք է ասել, որ թե՛ ամբողջ հանրապետությունում լույս տեսնող մի քանի տասնյակ անուն թերթերի ու ամսագրերի և թե՛ ՀՅԴ կուսակցական մամուլի համար հիմնականում ապահովված էր այդպիսի ազատության և բազմակարծության հնարավորություն:

Ժողովը հրահանգ տվեց նորընտիր Բյուրոյին ամեն կերպ նպաստելու կուսակցական մամուլի զարգացմանը: Պահանջվեց ունենալ մեկ կենտրոնական օրգան, որը պետք է լիներ կուսակցության գլխավոր ուղղության ու քաղաքականության արտահայտիչը: Այդ օրգանը դարձավ «Հառաջ»-ը: Կուսակցության գիտական օրգանն էր դառնալու «Դրոշակը», որի հրատարակությունը ընդհատվել էր Առաջին աշխարհամարտի տարիներից: Հետագա ամբարենպաստ հանգամանքները ևս հնարավորություն չտվեցին «Դրոշակի» լույսընծայմանը: Եվ այն սկսեց վերահրատարակվել միայն 1925 թվականից՝ ՀՅԴ 10-րդ (Ժ) Ընդհ. ժողովի որոշումով²²⁹:

ՀՅԴ պատմություն. - Ընդհ. ժողովը կազմեց հատուկ մարմին (Միքայել Վարանդյան, Ռուբեն Տեր-Մինասյան և Սիմոն Վրացյան)՝ կուսակցության արխիվները կարգի բերելու, պատմության վերաբերյալ նյութեր հավաքելու ու

²²⁷ «Զաղվածներ...», էջ 16:

²²⁸ Ա. Դարբինյան, Հայ ազատագրական շարժման օրերեն, Փարիզ, 1947, էջ 254, 338:

²²⁹ «Դրոշակ», 1925, թիվ 1, էջ 1:

«Գիվան ՀՅԳ» մատենաշարով հրատարակելու և կուսակցության պատմությունը գրելու համար²³⁰: Ավելի ուշ լույս տեսան «Գիվան»-ի երկու հատորները²³¹, իսկ Մ. Վարանդյանը գրեց ՀՅԳ պատմությունը երկու հատորով և այլն²³²:

ՀՅԳ երեսնամյակ. - ՀՅԳ հիմնադրման երեսնամյակի առթիվ ժողովը որոշեց 1920 թ. աշնանը հանդիսավոր կերպով տոնել ՀՅԳ երեսնամյակը: Նախատեսվում էր 1922-ին արձան կանգնեցնել Հայաստանի մայրաքաղաքում ազատության համար զոհված բոլոր ընկերների հիշատակին: Այդ նպատակով կազմակերպվելու էր հանգանակություն և հայտարարվելու էր մրցույթ: Բացի այդ, որոշում ընդունվեց՝ մինչև 1922 թ. Հայաստանի մայրաքաղաքում ստեղծել ՀՅԳ պանթեոն, և այնտեղ փոխադրել Հայաստանից դուրս թաղված կուսակցության ղեկավար ընկերների աճյունները²³³: Սակայն, ինչպես ասում են, շաբաթն ավելի շուտ եկավ, քան ուրբաթը, և համաժողովի շատ կանխագծումներ մնացին անկատար:

Գերագույն դատական ատյան. - Ընդի. ժողովը որպես նորույթ հիմնեց Գերագույն դատական ատյան, որը մնայուն բնույթ ուներ: Դատական ատյանի նախագահ ընտրվեց Իշխան Հովսեփ Արղությանը: Վերջինիս հետագայում (Իրանում Հայաստանի դեսպան նշանակվելուց հետո) փոխարինեց տեղակալը՝ Հովսեփ Տեր-Գավթյանը, իսկ անդամներն էին Լևոն Թադևոսյանը և Մերուժան Օզանյանը: Անաչառությունը ապահովելու նպատակով Դատական ատյանի անդամը կուսակցության որևէ կազմակերպական մարմնի անդամ չէր կարող լինել²³⁴:

Գերագույն դատական ատյանը իրավասու էր քննության առնելու անհատ դաշնակցականների, ԿԿ-ների, կառավարության դաշնակցական պաշտոնյաների, խորհրդարանի ՀՅԳ խմբակցության անդամների, Բյուրոյի դրամական, քրեական և հակակարգապահական գործերը և համապատասխան վճիռ կայացնել: Դատական ատյանը խախտումներ, հանցանքներ, անօրինականություններ հայտնաբերելու և արձանագրելու դեպքում այդպիսիների գործերը հանձնում էր պետական դատարան կամ էլ իր հայեցողությամբ վճիռ էր արձակում՝ մինչև կուսակցությունից վտարելը²³⁵:

Այս մարմինն ուներ կուսակցության մեջ մի տեսակ վերահսկիչ և վերստուգիչ բարձրադիր ֆունկցիա: Դատական ատյանի վճիռը գործնականում վերջնական էր: Այն վերաքննելու և բեկանելու իրավունք ուներ միայն Ընդհանուր ժողովը: Եվ պետք է ասել, որ դատական ատյանը եղել է շատ գործուն մարմին: Նրա կայացրած վճիռները անկասելի էին ու արդարացի, որոնք հե-

²³⁰ ՀՀ ԼԲԿՓ ՊԿԱ, Ֆ. 4047, ց. 1, գ. 157, ք. 3, «Հառաջ», 13 նոյեմբերի 1919 թ.:

²³¹ «Գիվան Հ.Յ.Գ.», հ. 1, Պոսթրն, 1934, հ. 2, Պոսթրն, 1934:

²³² Մ. Վարանդյան, ՀՅԳ պատմություն, հ. 1, Փարիզ, 1932, հ. 2, Գահիրե, 1950:

²³³ «Զաղվածներ...», էջ 20:

²³⁴ Հ. Տասնապետյան, ՀՅԳ կազմակերպական կառույցի հոլովույթը, Պեյրուք, 1985,

էջ 112:

²³⁵ «Հառաջ», 9 հունվարի 1920 թ.:

տամուտ էին նախ և առաջ ՀՅԳ-անդամի, անկախ զբաղեցրած պաշտոնից ու դիրքից, անձնական մաքրության ու գաղափարաբարոյական անաղարտության պահպանմանն ու ամրապնդմանը:

Ընտրություններ. - ՀՅԳ-Բյուրոների՝ Արևելյան և Հայաստանի հնգամյա գործունեությունը գնահատելիս՝ Ընդհանուր ժողովը խիստ քննադատության ենթարկեց երկուսին էլ: Չնայած երկու Բյուրոների ունեցած մարդկային կորուստներին, այնուամենայնիվ, փաստվեց, որ անցած հինգ տարիների վայրիվերումների ընթացքում նրանք չեն կարողացել մշակել մեկ ընդհանուր ուղեգիծ և ինչպես հարկն է դեկավարել կուսակցական կյանքը²³⁶: Դրա փոխարեն Բյուրոների անդամները, իրերի բերումով, ավելի հաճախ ստանձնել են գործադիր պաշտոններ՝ ընդգրկվելով Ազգային Բյուրոյում և Խորհրդում, Սեյմում, Անդրկովկասյան կառավարությունում և այլն²³⁷: Արդյունքում՝ կուսակցությունը չի ունեցել միասնական ուղեգիծ (տեսակետ), նրա մարմինները իրարից կտրված են եղել և գործել են տարբեր ուղղություններով: Կուսակցության նոր բարձրագույն գործադիր մարմին՝ Բյուրո ընտրելիս, ցանկություն հայտնվեց, որպեսզի նա, հավաքական վճիռներ կայացնելու հիման վրա, կարողանա կոորդինացնել կուսակցական մարմինների գործունեությունը:

Նախկին երկու Բյուրոների (Հայաստանի և Արևելյանի) փոխարեն ընտրվեց մեկ Բյուրո՝ բաղկացած յոթ անդամից և երեք փոխանդամից²³⁸: Այդ նշանակում էր, որ կուսակցությունը, ապակենտրոն երկու Բյուրոների փոխարեն այժմ պիտի ունենար ՀՅԳ մեկ Բյուրո՝ գործադիր մարմնի իրավունքներով: Սրան համապատասխան՝ պետք է փոփոխվեր նաև կուսակցության Կանոնադրությունը:

Նորընտիր Բյուրոյի կազմում էին անդամներ՝ Համազասպ Օհանջանյանը, Աբրահամ Գյուլխանդանյանը, Միմոն Վրացյանը, Արշակ Ջամալյանը, Մարգիս Արարատյանը, Ռուբեն Տեր-Մինասյանը, Արմեն Գարոն (Փաստրմաճյան), փոխանդամներ՝ Գևորգ Դազարյանը, Արսեն Շահմազյանը և Վահան Նավասարդյանը: Բյուրոյի նիստերին վճռական ձայնի իրավունքով մասնակցում էին միայն անդամները: Բյուրոյի նստավայրը Հայաստանի մայրաքաղաքն էր:

* * *

Ընդհանուր ժողովը անդրադարձավ կուսակցության կազմակերպական (չինարարության) խնդիրներին քանզի հատկապես ՀՀ առաջացումով նրա գործունեության համար հայրենիքում և դրսում ստեղծվել էին նոր պայմաններ: Ուստի անհրաժեշտ էր կուսակցության կազմակերպական աշխատանքները կատարելագործել՝ համապատասխանեցնելով նոր պայմաններին ու պահանջներին: Նախկին անլեզալ ու կիսալեզալ ՀՅԳ- դարձել էր միանգա-

²³⁶ Հ. Տասնապետյան, *նույն տեղում, էջ 99*:

²³⁷ «Ընդգրկվածներ...», էջ 14-15:

²³⁸ «ՀՅԳ կազմակերպական կանոններ», Ե., 1919, էջ 9:

մայն ազատ ու նույնիսկ կառավարող կուսակցություն իր անկախ հայրենիքում: Այստեղից էլ նյութական անհրաժեշտություն էր դարձել կուսակցության կազմակերպական կանոնների փոփոխությունը:

Ամենից առաջ կանոնադրական-կազմակերպական առումով պետք է լուծվեր երկու կարևոր խնդիր: Նախ, հաշվի առնելով, որ ՀՅԳ դարձել էր կառավարող կուսակցություն, անհրաժեշտություն էր առաջացել, թույլ չտալ մինևույն անձին համատեղելու կուսակցական և պետական ղեկավար պաշտոններ: Սա ընդունված կարգ էր և բնորոշ էր բոլոր քաղաքակիրթ ժողովրդավարական պետություններին: Համաձայն այս փոփոխության (հոդված 65)՝ «Կառավարության դաշնակցական անդամները միաժամանակ կուսակցական որևէ մարմնի անդամ չեն կարող լինել»²³⁹: Այդ նշանակում էր, որ միանգամից Բյուրոյի չորս անդամներ, որոնք կառավարության մեջ էին որպես նախարարներ (Ա. Գյուլխանդանյան և Ս. Արարատյան) կամ ունեին պետական պաշտոններ արտասահմանում (Հ. Օհանջանյան և Ա. Գարո), կամ պետք է թողնեին պետական պաշտոնները, կամ էլ գրկվեին Բյուրոյի անդամությունից: Արդյունքում կառավարության մեջ գտնվող ՀՅԳ բյուրոյի անդամները հարկադրված դադարեցին գործուն կերպով մասնակցել Բյուրոյի աշխատանքներին: Կուսակցության գերագույն գործադիր մարմնի բեռը ընկավ Ս. Վրացյանի, Ա. Ջամալյանի և Ռ. Տեր-Սիմասյանի ուսերին, որոնց օգնում էին երեք փոխանդամները՝ Գ. Ղազարյանը, Վ. Նավասարդյանը և Ա. Շահմազյանը: Ի դեպ՝ վերջինս պատասխանատու պաշտոն ուներ Ջանգեգուրում:

Այնուհետև, մյուս կանոնադրական փոփոխությունն այն էր, որ, նկատի ունենալով մինևույն տարածքում (շրջանում) իրարից անկախ և իրար զուգահեռ կուսակցական մարմինների (տեղական և գաղթական) գոյությունը չի համապատասխանում կուսակցության ծրագրային և կանոնադրական պահանջներին, ժողովը որոշեց.

«ա) Թույլ չտալ մի ԿԿ-ի սահմաններում մեկ այլ ԿԿ-ի գոյությունը և բ) տվյալ ԿԿ-ի սահմանների մեջ եղած բոլոր կոմիտեները պիտի ենթարկվեն այդ շրջանի ԿԿ-ին միայն»²⁴⁰: Պատգամավոր Ռ. Տեր-Սիմասյանը հավաստում էր, որ ժողովը նման որոշման հանգեց այն հիմնավորմամբ, կուսակցության մեջ նոր կուսակցություն ստեղծելու տրամադրություններ կային²⁴¹:

Համաձայն այս որոշման ու նոր մշակված կանոնադրության պահանջների՝ «Երկրի» ԿԿ-ը հրահանգ է ստանում Բյուրոյից՝ միանալ Երևանի ԿԿ-ին և արևմտահայ կոմիտեները միացնելու ու ձուլելու տեղական կազմակերպություններին: Ընդ որում՝ «Երկրի» ԿԿ-ի այն անդամները, որոնք գտնվում էին Երևանում, պետք է միանային Երևանի ԿԿ-ին, իսկ մյուս շրջաններում գտնվող անդամները՝ տեղի կոմիտեությանը²⁴²: Այսպիսի որոշում կայացնելիս՝

²³⁹ «ՀՅԳ կազմակերպական կանոններ», Ե. 1919, էջ 13:

²⁴⁰ «Զաղվածներ...», էջ 23, Ռուբեն, նշվ. աշխ., էջ 151:

²⁴¹ Ռուբեն, նշվ. աշխ., էջ 154:

²⁴² «Հատաջ», 15 նոյեմբերի 1919 թ.:

Ընդհանուր ժողովը ելնում էր այն միասնական համոզմունքից, որ Միացյալ Հայաստանի հռչակումով պետք է վերանան հատվածային խնդիրները կուսակցության ներսում, քանզի ամեն վայրի համար կուսակցության ծրագիրը մեկն է:

Ընդհանուր ժողովը նորընտիր Բյուրոյի վրա պարտականություն դրեց վերացնել երկու հատվածների միջև եղած տարակարծություններն ու անվստահությունը, ստեղծել միաձույլ կազմակերպություն և բոլոր տարրերին լծել կուսակցական և պետական շինարար աշխատանքի²⁴³: Բյուրոն պետք է քանդեր զուգահեռ կազմակերպությունները և դրանց փոխարեն ստեղծեր նորը՝ ձուլելով երկուսին իրար հետ: Ի դեպ՝ կանոնադրական այս սկզբունքը տարածվում էր հիմնականում ՀՀ կազմակերպությունների վրա և պարտադիր չէր գաղութներին (հայկական գաղթօջախներին)²⁴⁴:

Ի կատարումն ՀՅԳ-9-րդ Ընդհ. ժողովի որոշման և Բյուրոյի կարգադրության՝ Երևանի և «Երկրի» Կենտրոնական Կոմիտեները 1919 թ. նոյեմբերի 15-ի միացյալ նիստում որոշեցին՝ միանալով կազմել մեկ ԿԿ և այսուհետ գործել «Երևանի ԿԿ» անունով: Իսկ նոյեմբերի 24-ի Երևանի ԿԿ-ի և Երկրի ԿԿ-ի հրապարակած համատեղ շրջաբերականով հրահանգվում էր շրջանների արևմտահայ և տեղական բոլոր մարմիններին ու ընկերներին. «Անհապաղ միանալ՝ կազմելու համար մի մարմին և միասին վարելու տեղական կուսակցական գործերը»²⁴⁵:

Կուսակցության արևմտահայ արտատարածքային հատվածների ձուլման ու կենտրոնացման գործը հաջողությամբ իրականացվեց հատկապես Վ. Խորենու, Կորյունի, Մ. Օզանյանի, Հ. Դեմեճյանի, Վ. Քրմոյանի, Կ. Սասունու, Վ. Նավասարդյանի, Նորհատյանի և ուրիշների թափած եռանդուն ջանքերի շնորհիվ²⁴⁶: Արդեն 1919 թ. վերջերին միավորումը հիմնականում ավարտվել էր: Հաջողվեց առանց ներքին ցնցումի ստեղծել միաձույլ կազմակերպություն:

Կանոնադրական այս էական փոփոխությունը ամենևին էլ չէր հակասում կուսակցության ապակենտրոնացման ոգուն և, ինչ խոսք, նպաստեց նրա շարքերի միասնության ու համախմբվածության ամրապնդմանը:

Կուսակցության նոր հաստատված և շուտով լույս տեսած Կանոնագրով²⁴⁷ ՀՀ բաժանվեց կուսակցական երեք կազմակերպական շրջանների՝ Երևանի («Միգաստանի»), Ալեքսանդրապոլի («Շիրակի») և Կարսի («Ջրաբերդի») Կ. Կոմիտեությունների, ինչպես նաև երկու՝ Ջանգեզուրի ու Լեռնային Ղարաբաղի կոմիտեությունների: Վերջիններս ուղղակիորեն կապված էին

²⁴³ Ռուբեն, նշվ. աշխ., 156:

²⁴⁴ Նույն տեղում, էջ 159:

²⁴⁵ «Աշխատավոր», 10 դեկտեմբերի 1919 թ.:

²⁴⁶ Ռուբեն, նշվ. աշխ., էջ 158:

²⁴⁷ «ՀՅԳ կազմակերպական կանոններ», Երևան, 1919:

Բյուրոյի հետ՝ ընդօժեյու համար այդ շրջանների վրա Հայաստանի ունեցած անվիճելի իրավունքը²⁴⁸։

Կուսակցության կազմակերպական միասնության ամրապնդման շնորհիվ՝ կրճատվեց (պակասեց) կուսակցական մարմինների թիվը, ուժեղացվեց դրանց շարժունակությունը։ Այսպես, եթե նախքան Ընդհանուր ժողովը ՀՅԳ-ամփոփված էր կուսակցության 26 մարմիններում (Բյուրոներ, ԿԿ-ներ և կոմիտեություններ), ապա ժողովից հետո իրականացված կազմակերպական վերակառուցմամբ թողնվեց ընդամենը 16 մարմին, այսինքն կրճատվեց 10-ով²⁴⁹։

Որպես նորույթ, հաշվի առնելով երկաթուղու աշխատանքի կարևորությունը ՀՀ-ում, հիմնվեց ոչ-տարածքային «Երկաթուղիների Կ. Կոմիտեություն», և երկաթուղային աշխատողների (ուր հաշվում էր մոտ 6000 մարդ) կազմակերպման ու նրանց վրա հսկողության գործը հանձնարարվեց ՀՅԳ Բյուրոյի անդամ Ա. Ջամալյանին։ Երկաթուղային Կ. Կոմիտեի ծավալած արդյունավետ կազմակերպական, քաղաքական-դաստիարակչական գործունեության շնորհիվ՝ զգալիորեն բարելավվեց երկաթուղու աշխատանքը։ Այդ կոմիտեի ջանքերով կառավարությունը հիմնականում բավարարում տվեց այդ համակարգում աշխատող գործադուլավորների արդարացի պահանջներին²⁵⁰։

ՀՅԳ կուսակցության կազմակերպական օղակները ստորաբաժանվում էին հետևյալ կարգով՝ գյուղական, թաղային, գավառակային, գավառական, քաղաքային, Կենտրոնական կոմիտեների և Բյուրոյի²⁵¹։

Կուսակցությունը ճյուղավորված էր հանրապետության բոլոր անկյուններում։ Նրա շարքերում էին ընդգրկված սոցիալական գրեթե բոլոր խավերի ներկայացուցիչներ՝ առաջին հերթին աշխատավոր զանգվածներ՝ գյուղացիներ, բանվորներ, արհեստավորներ, ինչպես նաև մտավորականներ, ծառայողներ, ուսանողներ։ Նա իր կազմակերպական ցանցն ուներ նաև աշակերտության մեջ։ Ազգային կազմի տեսակետից ՀՅԳ կազմակերպություններ կային նաև ասորիների և եզդիների շրջանում։ Չնայած նոր Կանոնադրությամբ անդամակցության պայմանները դժվարացվեցին (պահանջվում էր 7 հոգու երաշխավորություն), այդուհանդերձ՝ գնալով կուսակցության շարքերն աճում էին։

Սակայն, ցավոք, անկախ պետականություն կերտող 9-րդ համաժողովի նախագծած որոշումները և կազմակերպական սկզբունքները, դեպքերի հետագա աննպաստ զարգացման հետևանքով հնարավոր չեղավ մինչև վերջ հետևողականորեն կենսագործել։

1919 թ. նոյեմբերի 2-ին Երևանում փակվեց ՀՅԳ 9-րդ Ընդհ. ժողովը, որի աշխատանքները տևեցին մեկ ամսից ավելի՝ ուղիղ հինգ շաբաթ։

²⁴⁸ Ռուբեն, նշվ. աշխ., էջ 157-159, «Ազրակ շաբաթոյակ», 1973, թիվ 37, էջ 586։

²⁴⁹ Ռուբեն, նշվ. աշխ., էջ 159։

²⁵⁰ Նույն տեղում, էջ 161։

²⁵¹ «ՀՅԳ կազմակերպական կանոններ», Ե., 1919, էջ 4։

Այս համագումարի արդյունքները ամփոփելիս և նրա նշանակությունը գնահատելիս՝ այն պետք է որակել որպես **հայկական պետականության գաղափարի կայացման ու ամրապնդման համագումար**: Այս համագումարով է, որ ՀՅԴ հրաժարվում է մինչ այդ որդեգրած ինքնավարության նպատակադրումից և հաստատակամորեն իր դրոշի վրա պարզում «Ազատ, Անկախ և Միացյալ Հայաստան» ստեղծելու նվիրական ձգտումը:

5. Խորհրդարանը և կառավարությունը

ՀՀ, որպես ռամկավար հանրապետություն, տակավին չունեի Սահմանադրություն: Այն պետք է ընդունվեր միացյալ հայկական պետության ստեղծումից հետո: Պետության գլուխ կանգնած էին խորհրդարանը և կառավարությունը: Հայաստանի խորհրդարանը մեկպալատանի էր: ՀՀ չունեի նախագահ (պրեզիդենտ): Նախագահական համակարգ մտցնելը նույնպես կապվում էր Հայկական հարցի լուծման և Սահմանադիր ժողովի հրավիրման հետ: Իսկ մինչ այդ նախագահի իշխանությունը տրոհված էր խորհրդարանի և կառավարության միջև:

Հանրապետության ամենաբարձր պաշտոնատար անձը համարվում էր վարչապետը: Չնայած սահմանադրության բացակայությանը՝ ակներև է այն փաստը, որ և՛ խորհրդարանը, և՛ կառավարությունը առաջնորդվում էին հանրապետական, ռամկավար կառավարման սկզբունքներով և միտում ունեին դառնալու այդպիսին:

Խորհրդարանի և կառավարության գործունեության ու փոխհարաբերությունների ողջ ընթացքում մենք հանդիպում ենք դեպքերի, երբ կառավարությունը երբեմն անտեսում էր խորհրդարանի գոյությունը, գերազանցելով իր իրավասության (լիազորությունների) սահմանները՝ շրջանցում նրան: Իսկ խորհրդարանն էլ, կամա թե ակամա, հաճախ հաշտվում էր ստեղծված կացության հետ:

Հանրապետության ռամկավար կառավարման համակարգի արմատավորման ուղղությամբ նշանակալի ձեռնարկ պետք է համարել այն, որ 1919 թ. մայիսի 23-ին նախարարների խորհրդի ընդունած օրենքով ՀՀ մտցվեցին զեմստվային ինքնավարություններ, որոնց ընտրակարգը չէր տարբերվում խորհրդարանի ընտրություններից²⁵²: Բացի այդ, Երևանում հիմնվեց դատական պալատ, օկրուգային դատարան և սենատ: Վերացվեցին նախկին դասային ու հաշտարար դատարանները²⁵³:

Խորհրդարանի իրավասության մեջ էր մտնում նախարարների խորհրդի առաջարկությամբ (ներկայացմամբ) դատական պալատի և Շրջանային

²⁵² ՀՀ ՊԿՊԱ, Ֆ. 200, գ. 1, գ. 422, ք. 21:

²⁵³ Նույն տեղում, ք. 21 և 23:

դատարանի անդամների հաստատումը²⁵⁴։ Խորհրդարանին էր վերապահվում դատական վճիռներով (կարգով) դատապարտյալներին ներում շնորհելը, նրանց գործը վերաքննության տալը և այլն։ Խորհրդարանին էր վերապահված նաև սենատին և դատական պալատին վերաբերող օրենքների, քրեադատավարության կանոնադրության մեջ փոփոխություններ ու լրացումներ կատարելու իրավունքը²⁵⁵։

Ղեռ 1919 թ. հունիսի 5-ից, երբ արձակվել էր Հայաստանի խորհուրդը և նրա օրենսդրական իրավասությունները անցել էին կառավարությանը, հաջորդ օրը՝ հունիսի 6-ին, նախարարների խորհրդի ընդունած օրենքի հիման վրա, նա իրեն իրավունք վերապահեց, արտակարգ հանգամանքների թելադրանքով, ամբողջ հանրապետությունում կամ նրա առանձին շրջաններում հայտարարել ռազմական դրություն ու հիմնել ռազմադաշտային դատարաններ։ Այսպես, օրինակ, երբ 1919 թ. հուլիս-օգոստոս ամիսներին Դիլիջան-Ղազախի գավառը ազգամիջյան բախումների հետևանքով հայտնվեց բացառիկ ծանր պայմաններում, նախարարների խորհրդի հունիսի 6-ի օրենքով գավառում մտցվեց ռազմական դրություն, իսկ Դիլիջանի ջոկատի պետին թույլատրվեց տեղում հիմնել ռազմադաշտային դատարաններ։ Եվ պետք է ասել, որ դեռ ցարիզմի և Ժամանակավոր կառավարության ժամանակներից նախկին օրենքներով պահպանվել ու գործում էին ռազմադաշտային դատարանները։ Այդպիսիք գործել էին Երևանում, Ալեքսանդրապոլում, Կարսում և այլն։

Արդեն 1919 թ. սեպտեմբերին Հայաստանի նորընտիր խորհրդարանում էսէռ պատգամավոր Լ. Թումանյանը հարցապնդում է անում հունիսի 6-ի այդ օրենքը վերանայելու մասին։ Հիշյալ պատգամավորը հարց է տալիս, թե մեծ օրենք ինչո՞ւ պետք է մտցնեք նախարարների խորհուրդը և ոչ թե խորհրդարանը²⁵⁶։ 1919 թ. սեպտեմբերի 24-ին ՀՀ ռազմական նախարար գեմ.-մայոր Արարատյանը հրաման է արձակում՝ կանգնեցնելու ռազմադաշտային դատարանների գործունեությունը մինչև որ խորհրդարանը համապատասխան ընթացք կտա նախարարների խորհրդի հիշյալ օրենքին²⁵⁷։

Հանրապետությունում ժողովրդավարական իրավակարգի հաստատման ճանապարհին էական քայլ պետք է համարել նաև այն, որ 1920 թ. հունվարի 2-ին խորհրդարանի հաստատած նոր օրենքով՝ իր ուժը կորցրած համարվեց 1919 թ. հուլիսի 7-ի կառավարության հրապարակած օրենքը «Արտակարգ քննիչ հանձնաժողովի և արտակարգ դատարանի մասին»։ Համաձայն այս նոր օրենքի՝ Արտակարգ քննիչ հանձնաժողովում եղած գործերը պետք է հանձնվեին ընդհանուր (քաղաքացիական) դատական քննիչներին, իսկ ար-

²⁵⁴ Նույն տեղում, Ֆ. 202, գ. 1, գ. 333, թթ. 4-5։

²⁵⁵ Նույն տեղում, գ. 303, թ. 11։

²⁵⁶ ՀՀ ՊԿՊԱ, Ֆ. 198, գ. 1, գ. 36, թ. 5։

²⁵⁷ Նույն տեղում, թ. 3։

տակարգ դատարանի գործերը՝ Շրջանային դատարանին²⁵⁸։ Սույն օրենքի գործադրման պատասխանատվությունը դրվում է արդարադատության նախարարության վրա։

Կառավարության և խորհրդարանի ընդունած օրենքների բնույթից ու բովանդակությունից դժվար չէ կռահել, որ կառավարությունը որպես կանոն հակված է եղել ընդունել այնպիսի օրենքներ ու օրենսդրական ակտեր, որպեսզի արտակարգ օրենքներ, հանձնաժողովներ ու դրություններ մտցնելով՝ ուժեղացնի կոշտ իշխանությունը, վերացնի (համահարթեցնի) օրենսդիր, գործադիր և դատական իշխանությունների տարանջատվածությունը, իսկ խորհրդարանն էլ իր բնույթին ու խաղաղասիրական էությանը համապատասխան՝ հակված էր երկիրն ու հասարակությունը ղեկավարել քաղաքացիական, ռամկավար բնույթի օրենքներով։ Բայց, ցավոք, դեպքերի ու իրադարձությունների աննպաստ թելադրանքով ժամանակ առ ժամանակ խորհրդարանը հարկադրված էր լինում կառավարության ճնշման տակ զիջումների գնալ։

Այն պահերին, երբ կառավարությունը ստանձնում էր օրենսդրական իրավասություններ, նա աշխատում էր գործող օրենսդրության մեջ կատարել այնպիսի փոփոխություններ, որպեսզի հնարավորին չափ սահմանափակվեր դատարանի լիակատար անկախությունը։ Այսպես՝ նախարարների խորհուրդը 1919 թ. հուլիսի 8-ի նիստում քաղաքացիական դատավարության օրենսգրքի երկու հոդվածներում կատարեց հետևյալ փոփոխությունը։

Հոդ. 945.- «Օրինական ուժ ստացած դատական վճիռները, նախքան նրանց ի կատար ածելը, արդարադատության նախարարի միջոցով ներկայացվում են ՀՀ նախարարների խորհրդին՝ ի հայեցողություն» և հոդ. 946.- «Հանրապետության նախարարների խորհրդի որոշումը դատարանի վճռի մասին արդարադատության նախարարը առաջարկում է անմիջապես այն դատարանին, որտեղ կայացել է վճիռը»²⁵⁹։

Վերոհիշյալ հոդվածներից ստացվում է, որ նախարարների խորհուրդը կարող էր անհարկի վիճարկել դատարանի վճիռը, հավանություն չտալ դրան և այլ որոշում կայացնել։ Այս ամենը նշանակում է, որ չէին ապահովվում դատարանի լիակատար անկախությունը և նրա վճիռների վերջնական ու անկասելի լինելու հանգամանքը։

Չնայած խորհրդարանը և կառավարությունը կուսակցական պատկանելության առումով գրեթե միատարր էին և տանում էին միևնույն կուսակցության քաղաքական ուղեգիծը, սակայն պետք է ասել, որ գործնական աշխատանքի ոլորտում միշտ չէ, որ նրանց միջև ամեն ինչ հարթ էր ընթանում։ Երբեմն իրար էին բախվում գործադիր և օրենսդիր իշխանությունների գերատեսչական շահերը։ Առանձին դեպքերում արձանագրվել են կոնֆլիկտային իրավիճակներ՝ խորհրդարանի ու կառավարության միջև։ Մրա տիպիկ ար-

²⁵⁸ Նույն տեղում, Ֆ. 202, ց. 1, գ. 333, թ. 70, «ՀՀ օրենքների հավաքածու 1920 թ.», էջ 1-2։

²⁵⁹ «Կառավարության լրաբեր», 2 հուլիսի 1919 թ.։

տահայտությունն էր 1920 թ. ապրիլի 7-ի (թիվ 80-րդ) նիստը, ուր քննվեց միլի-
ցիայի ենթակայության խնդիրը:

Բանն այն է, որ 1919 թ. մայիսի 23-ի զեմստվային ինքնավարություննե-
րի մասին ժամանակավոր օրենքի 2-րդ հոդվածում կառավարությունը մտցրել
էր մի ծանոթություն, համաձայն որի՝ ոստիկանությունը ենթարկվում էր իրեն՝
կառավարությանը: Արդ, երբ անցել էր շուրջ մեկ տարի, խորհրդարանը,
հարստացած նոր կենսափորձով, համապատասխան օրինագծով հարց է հա-
րուցում՝ տեղերում ոստիկանությանը դուրս բերել գավառային կոմիսարների
ենթակայությունից և հանձնել գավառական զեմստվային ինքնավարություն-
ներին: Ձեկուցող, պատգամավոր Ս. Թորոսյանը բացատրում էր՝ այդ նշանա-
կովի գավառական կոմիսարները գործում են ինքնագլուխ, բյուրոկրատիկ մե-
թոդներով և հաճախ թույլ են տալիս զեղծումներ ու շահատակություններ: Ի
դեպ՝ այդպիսիներից մեկն էր Էջմիածնի գավառական կոմիսար Գևորգ Ալ-
թունյանը, որը կաշառակերության համար ՀՅԳ-Գերագույն դատական առ-
յանի վճռով վտարվեց կուսակցությունից և նրա գործը հանձնվեց պետական
դատարան²⁶⁰:

Տեղական ոստիկանությունը գավառական կոմիսարների ենթակայու-
թյունից դուրս բերելու և նորահիմն զեմստվային ինքնավարություններին
հանձնելու մասին օրինագծին առարկում է ն.գ. նախարար Ա. Գյուլխանդան-
յանը՝ պատճառաբանելով, թե իբրև կառավարությունը ծանոթ չէ խնդրին և ա-
ռաջարկում է հետաձգել օրինագծի քննությունը: Օրենսդրական հանձնաժո-
ղովի անդամներ՝ Հ. Տերտերյանը և Գ. Վարչամյանը հավաստում են, որ դեռ
երեք շաբաթ առաջ այս խնդրի շուրջ բանակցել են ն. գ. նախարարության
պաշտոնյաների հետ, սակայն համաձայնության չեն հասել: Իսկ հարցի
քննարկումից չորս ամիս առաջ Դիլիջանի զեմստվային ինքնավարությունը
առաջարկել էր տեղի միլիցիան հանձնել իր ենթակայությանը, բայց դարձյալ
ն. գ. նախարարությունը մերժել էր²⁶¹:

Պատգամավորների հիմնավոր փաստարկներից հետո նախարար
Ա. Գյուլխանդանյանը վրդովված հեռանում է խորհրդարանի դահլիճից:
Վարչապետ Ալ. Խատիսյանը փորձում է պաշտպանության տակ առնել
նախարարին ու նախարարությանը՝ առաջարկելով հետաձգել հարցի
քննարկումը և օրինագիծը տալ կառավարության եզրակացության: Պատ-
գամավոր Ս. Թորոսյանը տեղեկացնում է, որ կառավարությունը ծանոթ է
օրինագծին:

Խորհրդարանի նախագահ Ավ. Մահակյանը նույնպես փորձում է հե-
տաձգել տալ հարցի քննարկումը և օրինագիծը ուղարկել կառավարության
կարծիքի, սակայն դահլիճում լսվում են ձայներ, աղմուկ: Մի խումբ պատգա-
մավորներ հայտարարում են. «Նախագահությունը կամայականություններ է
կատարում, մենք թույլ չենք տա շարունակելու նիստը, մինչև չքվեարկվի այս

²⁶⁰ «Հատաջ», 9 հունվարի 1920 թ.:

²⁶¹ ՀՀ ՊԿՊԱ, Ֆ. 198, ց. 1, գ. 52, ք. 43:

օրինագիծը»²⁶²: Նախագահ Ավ. Սահակյանը ստիպված ինքնավարությունների մասին ժամանակավոր օրինագիծը, արված համապատասխան փոփոխությամբ, դնում է քվեարկության, և որը ընդունվում է (26 կողմ, 1 դեմ և 4 ձեռնպահ): Միաժամանակ, սահմանվում է, որ միլիցիան ենթարկվելով ինքնավարություններին՝ նրա ծախսերը պետք է որ հոգան ինքնավարությունները²⁶³: Վերոհիշյալ փաստը ցոյց է տալիս, որ խորհրդարանը անդեմ ու անկերպարան մարմին չէր: Այնտեղ շատ հաճախ կառավարությանը քննադատողի, կառուցողական ընդդիմության ու հակակշռի դերում հանդես էր գալիս ամենից առաջ ՀՅԳ-ի խմբակցությունը, համենայն դեպս նրա անդամների մեծամասնությունը:

Խորհրդարանի և կառավարության միջև թերևս ամենատուր բախումը տեղի ունեցավ 1920 թ. հունվարի սկզբին, երբ ՀՅԳ-ի խորհրդարանական խմբակցության բանավեճերի (դեբատների) ընթացքում դրվեց վարչապետի ու կառավարության վստահության հարցը:

Պետք է ասել, որ մինչ կառավարության հունվարյան ճգնաժամը, դեռ 1919 թ. հոկտեմբերի սկզբներին հայացքների ու մտտեցումների որոշակի բևեռացում էր գոյացել խորհրդարանի և կառավարության միջև՝ ինժեներ Ս. Ջավախչիանի տնտեսական ծրագրի նախագծի ֆինանսավորման կապակցությամբ 4 մլն ռուբլի հատկացնելու օրինագծի շուրջը: Խորհրդարանում քննադատության ենթարկվեց ռուս ինժեներ Ս. Ջավախչիանի գլխավորած հիդրոտնտեսական ծրագրի (էլեկտրակայաններ ու ռոզգման համակարգեր կառուցելու, հողերի յուրացման, ճահիճների չորացման, հեղեղների դեմ պայքարելու) նախագծի մշակման կապակցությամբ միջոցների փոշիացումը: Մինչ օրինագծի քննարկումը Հայ ինժեներների միությունը բացասական կարծիք էր հայտնել ռուս ինժեների ծրագրի վերաբերյալ: Այս խնդրով հարցապնդում արվեց կառավարությանը: Կասկածելով այդ ծրագրի իրատեսության ու օգտավետության վրա՝ քննադատական ելույթներով հանդես եկան պատգամավորներ՝ Ա. Օհանջանյանը, Վ. Խորենին, Վ. Փափազյանը և ուրիշներ²⁶⁴: Այնուամենայնիվ, ձայների պարզ մեծամասնությամբ հավանություն է տրվում Ջավախչիանի խմբի կողմից հետազոտությունների համար 4 մլն ռուբլի հատկացնելու մասին օրինագծին²⁶⁵: Ծրագրվում էր 14 ինժեներներով և 200-ից ավելի բանվորներով ու տեխնիկներով 10 ամսվա ընթացքում մշակել նախագիծը, որի հետագա կենսագործմամբ հնարավոր կլիներ մասնավորապես ռոզգելի դարձնել 160 հազ. դես. հող և ստանալ 150 հազ. ձիաուժ էլեկտրաէներգիա²⁶⁶:

²⁶² ՀՀ ՊԿՊԱ, նույնը, թ. 44:

²⁶³ Նույն տեղում, թ. 45:

²⁶⁴ «Ժողովուրդ», 8 հոկտեմբերի 1919 թ.:

²⁶⁵ Նույն տեղում, 17 հոկտեմբերի 1919 թ.:

²⁶⁶ «Սոցիալիստ հեղափոխական», 19 հոկտեմբերի 1919 թ.:

Հարկ է նշել, որ ՀՀ կառավարությունը ազգային կապիտալի հանդեպ վարել է հովանավորչական քաղաքականություն: Հայաստանի ընդերքի և ջրային պաշարների հետազոտման ու շահագործման, ջրանցքների, հիդրոէլեկտրակայանների, երկաթուղիների, արդյունաբերական ձեռնարկությունների և այլնի կոնցեսիա տալու հավասար պայմանների դեպքում ՀՀ կառավարությունը նախապատվությունը տվել է հայկական ազգային կապիտալին²⁶⁷: Այսպես՝ 1920 թ. հունվարին ՀՀ նախարարների խորհուրդը հաստատում է Չանգու (Հրազդան) գետի ջուրը էներգետիկ նպատակներով շահագործելու Իլյա Մայիլյանի «Մայիլյան և որդիք» առևտրական տան (ընկերության) ներկայացրած կոնցեսիոն պայմանագրի նախագիծը²⁶⁸: Այդ հիման վրա մերժվում է օտարազգի դրամատերերի (անգլիացի կապիտալիստների) համանման առաջարկը²⁶⁹: Նման քաղաքականության իրականացման գործում բնականաբար խորհրդարանն ու կառավարությունը միասնական էին: Բայց կային առանձին հարցեր, որոնց լուծման շուրջ խորհրդարանի և կառավարության միջև ծագում էին տարակարծություններ ու ներքին դիմակայություն: Այդպիսի խնդիրներից էր, օրինակ, կադրային քաղաքականությունը, որի շուրջ խորհրդարանի և կառավարության միջև սուր տարաձայնություններ ծագեցին 1920 թ. սկզբներին:

Խորհրդարանի հունվարյան առաջին նիստերից մեկում վարչապետ Ալ. Խատիսյանը օրինագիծ է ներկայացնում խորհրդարան՝ արդարադատության առանձին նախարարություն հիմնելու, իսկ Ա. Չիլինգարյանին (Դարբինյանին) էլ որպես դրա նախարար առաջադրելու մասին: Մինչ այդ լուծարվել էր պարենավորման նախարարությունը: Վարչապետը գյուղատնտեսության և պետ. գույքերի նախարարի թեկնածու է առաջադրում Վ. Փափազյանին, իսկ հաղորդակցության նախարարի պաշտոնակատար՝ Հ. Տեր-Միքայելյանին և խնդրում է հաստատել այդ երեքի թեկնածությունները²⁷⁰: Այս հարցի կապակցությամբ առաջինը վարչապետի ու կառավարության սուր քննադատությամբ էլույթ է ունենում պատգամավոր Ավետիս Օհանջանյանը: Նա առաջարկություն է անում փոխել առհասարակ ամբողջ կաբինետը: Ա. Օհանջանյանի կարծիքով, օրինակ, մ.գ.նախարար Ա. Գյուլխանդանյանը գլուխ չի հանում իր ծանր պարտականությունից: Նա նույնպիսի գնահատական է տալիս ֆինանսների նախարար Ս. Արարատյանի գործունեությանը: Նախարարական նոր թեկնածուների վերաբերյալ հռետորը առարկում է Վ. Փափազյանի թեկնածությանը՝ գտնելով, որ նա բոլորովին անհամապատասխան է գյուղատնտեսության նախարարի պաշտոնին: Պատգամավոր Օհան-

²⁶⁷ ՀՀ ՊԿՊԱ, Ֆ. 203, ց. 1, գ. 497, քք. 10-44:

²⁶⁸ ՀՀ ՊԿՊԱ, Ֆ. 203, ց. 1, գ. 497, քք. 12 եւ 37:

²⁶⁹ Նույն տեղում, ք. 43:

²⁷⁰ ՀՀ ՊԿՊԱ, Ֆ. 198, ց. 1, գ. 57, ք. 6:

ջանյանը առաջարկում է կառավարության մեջ ընդգրկել կուսակցության ճանաչված գործիչներ՝ Ռ. Տեր-Սիմասյանին և Ս. Վրացյանին²⁷¹:

Այնուհետև կառավարության հասցեին քննադատության խոսք է ուղղում պատգամավոր Ս. Թորոսյանը: Նա վարչապետին մեղադրում է անվճռականության մեջ: «Ես գիտեմ,- հայտարարում է Ս. Թորոսյանը,- կան շատ սխալ գործեր, ես գիտեմ՝ եղել են անարդար գործողություններ այս կամ այն նախարարության կողմից, ինչպես օրինակ՝ Ջանֆիդայիի, Ագարակի և մյուս գյուղերի խաղաղ ազգաբնակչության վտարմանը դեմ է եղել նաև վարչապետը, բայց կատարվել է այդ ապօրինությունը»²⁷²:

Քննարկվող հարցի շուրջ նիստում հանդես եկան այլ պատգամավորներ՝ Կ. Սասունին, Հմ. Մանուկյանը, Մախասը, Ա. Մաքսապետյանը, որոնք քննադատեցին կառավարության քաղաքականությունը գաղթականության խնդրում: Օրինակ՝ Կ. Սասունին գտնում էր, որ կառավարությունը անտարբեր վերաբերմունք ունի դեպի արևմտահայությունը: Նա բերում էր հետևյալ փաստը, որ Հայաստանում հաշվվում է 16 հազար պետական պաշտոնյա, որոնց մեջ արևմտահայերի թիվը 100-ի չի հասնում²⁷³: Եվ սա այն դեպքում, երբ 1919 թ. մայիսի 28-ի «Սիացյալ և Անկախ Հայաստանի մասին» ակտով արևմտահայերը համարվում էին ՀՀ լիարժեք քաղաքացիներ:

Վարչապետը հանդես գալով նիստում՝ տալիս է որոշ բացատրություններ ու պարզաբանումներ և հայտնում, որ ինքը պատրաստ է ընդունել իրաժարականը: Պատգամավոր Հմ. Մանուկյանը առաջարկում է քվեարկության դնել կառավարության վստահության հարցը: Կատարվում է գաղտնի քվեարկություն: Սակայն ձայների մեծամասնությամբ խորհրդարանը վստահություն է հայտնում վարչապետին (կողմ՝ 25, դեմ՝ 3 և ձեռնպահ՝ 6)²⁷⁴:

Խորհրդարան - կառավարություն փոխհարաբերությունների պարզաբանման շատ էական կողմերից է պետական վերահսկողության իրականացման խնդիրը: Ինչպես արդեն ասվել է, պետական վերահսկողությունը իրականացվում էր Պետական վերահսկիչի միջոցով, որը միանգամայն անկախ էր գործադիր իշխանությունից՝ կառավարությունից, և պատասխանատու էր միայն խորհրդարանի առաջ: Տեղեկացնենք, որ խորհրդարանական այս կառույցը ընդօրինակվել էր Անդրկովկասյան սեյմից:

Սինչև 1919 թ. հունվարը պետական վերահսկիչի պաշտոնը, որ իր նշանակությամբ ու ռոճիկաչափով հավասարազոր էր նախարարի հաստիքին, վարում էր ՀԺԿ անդամ, հասարակական և պետական գործիչ, իրավաբան ու ֆինանսիստ Սիմաս Բերբերյանը: Սակայն, ցավոք, շատ հայ մեծամեծների պես, նա ևս վախճանվեց համաճարակից: Նրա փոխարեն ժամանակավորա-

²⁷¹ Նույն տեղում, թ. 7:

²⁷² ՀՀ ՊԿՊԱ, Ֆ. 198, ց. 1, գ. 57, թ. 8:

²⁷³ Նույն տեղում, թ. 9:

²⁷⁴ Նույն տեղում, թ. 17:

պես պաշտոնակատար նշանակվեց Ի. Ս. Պողոսյանին²⁷⁵, իսկ ավելի ուշ՝ 1919 թ. հոկտեմբերի 24-ին, խորհրդարանը պետական վերահսկիչ ընտրեց անկուսակցական Գրիգոր Ջաղեթյանին, որը մինչ այդ զբաղեցնում էր ֆինանսների նախարարի պորտֆելը²⁷⁶: Եվ նա մնաց այդ պաշտոնում մինչև հանրապետության անկումը:

Պետական վերահսկողության այս մարմինն առաջնորդվում էր խորհրդարանի կողմից հաստատված «Պետական վերահսկողության ընդհանուր կանոնների մասին» օրենքով: 1919 թ. դեկտեմբերի 30-ին հաստատված հաստիքացուցակով՝ նրանում ընդգրկված էին 95 աշխատող՝ ամսական նախահաշիվը 373100 ռուբլի աշխատավարձ²⁷⁷:

Պետական վերահսկողությունն այն գորավոր լծակներից էր, որով խորհրդարանը ներագրում էր կառավարության վրա: Եվ կարելի է ասել, որ ՀՀ գոյության ընթացքում պետական վերահսկողության այս մարմինը դարձավ խորհրդարանի աչքն ու ականջը, նրա վստահելի փորձաքննիչն ու հանձնակատարը: Այդպիսով, խորհրդարանի իրավասության մեջ էր մտնում ոչ միայն պետական բյուջեի հաստատումը, այլև նրա կատարման վերահսկողությունը: Այդքանով էլ խորհրդարանը վերադաս էր կառավարությունից:

6. Կուսակցություն-խմբակցություն-կառավարություն հարաբերությունները

ՀՀ կառավարության կուսակցական ձևը ինքնին բխում էր հանրապետության պետական կառուցվածքի խորհրդարանական բնույթից: Այսինքն՝ ամենուրեք ընդունված կարգ է, որ խորհրդարանական երկրներում կառավարությունները լինում են կուսակցական: Այդ կարգի համաձայն՝ վարչապետը ընտրվում էր խորհրդարանի կողմից, նախապես կուսակցությունների միջև համաձայնություն կայացնելու միջոցով, առանց ժամկետի որոշման: Վարչապետի հրամանով էին նշանակվում և ազատվում նախարարները: Իսկ նախարարի տեղակալները նշանակվում էին համապատասխան նախարարի ներկայացմամբ և վարչապետի հաստատմամբ²⁷⁸:

Խորհրդարանական խմբակցությունը այն հիմնական խողովակն է, որով կուսակցությունը անցկացնում է իր քաղաքականությունը:

Ինչպես տեսանք նախորդ ենթագլխում, ՀՅԳ 9-րդ ընդհ. ժողովը (համագումարը) ճշտեց ու կանոնակարգեց կուսակցություն- խմբակցություն և կառավարություն փոխհարաբերությունները: Ընդհանուր ժողովում ընդուն-

²⁷⁵ «Ջանգ», 17 հունվարի 1919 թ.:

²⁷⁶ «ՀՀ օրենքների հավաքածու 1919 թ.», էջ 29:

²⁷⁷ ՀՀ ՊԿՊԱ, Ֆ. 202, ց. 1, գ. 333, ք. 56:

²⁷⁸ ՀՀ ՊԿՊԱ, Ֆ. 200, ց. 1, գ. 282, ք. 3:

ված որոշումներում և նոր «Կազմակերպական կանոններում» սահմանվեցին այդ փոխհարաբերությունների և իրավասությունների բաշխման շրջանակներն ու սկզբունքները: Ընդհանուր ժողովի ընդունած սկզբունքով՝ կառավարությունը ենթակա ու պատասխանատու էր միայն խորհրդարանին: Իր հերթին՝ խորհրդարանն էլ պատասխանատու էր ժողովրդի առաջ: Հաստատված նոր կանոնադրությամբ՝ Բյուրոն վերահսկում էր միայն ՀՅԳ խորհրդարանական խմբակցության գործունեությունը և կառավարության վրա կարող էր ազդել միայն իր այդ խմբակցության միջոցով:

1920 թ. խորհրդարանի հունվարի 8-ի նիստում, երբ քննարկում էր կառավարության քաղաքականության կուսակցականացման մասին հարցը ՀՅԳ Բյուրոյի անդամ, պատգամավոր Ս. Վրացյանը ամենայն պատասխանատվությամբ հայտարարեց, որ կուսակցության 9-րդ «Ընդհ. ժողովից հետո Բյուրոն ոչ մի դեպքում դուրս չի եկել այն սահմանից, որ գծել է Ընդհանուր ժողովը»²⁷⁹: Իսկ այդ նույն նիստում վարչապետ Ալ. Խատիսյանը, հավաստիացնելով խորհրդարանին, ասաց. «Բյուրոն ոչ մի ազդեցություն չի գործել կառավարության վրա: Մենք մեր բոլոր դիրեկտիվները ստացել ենք ֆրակցիայից: Ես հրավիրել եմ նախարարության պաշտոնին Ռուբենին, Վրացյանին: Նրանք մերժել են՝ նկատի ունենալով կուսակցական պարտականությունները, Բյուրոյի աշխատանքները»²⁸⁰:

Խորհրդարանի ՀՅԳ սովոր խմբակցությունը հանդիսանում էր մի տեսակ կապող օղակ, շարժափոկ Բյուրոյի և կառավարության միջև: Իրավացի էր, օրինակ, Խատիսյանի կաբինետը, երբ իրեն պատասխանատու էր համարում միայն խմբակցության առջև²⁸¹: Կուսակցությունը, առաջնորդվելով պառլամենտարիզմի սկզբունքներով, աշխատում էր որպես կանոն իր քաղաքականությունն անցկացնել խորհրդարանական խմբակցության միջոցով: Իր հերթին կառավարությունն իրեն պատասխանատու էր համարում լայն առումով միայն խորհրդարանի, իսկ նեղ իմաստով՝ ՀՅԳ խմբակցության առաջ և նրա միջոցով միայն՝ Բյուրոյի:

Այնուամենայնիվ, ճշմարտությունը պահանջում է ասել, որ արձանագրվել են նաև դեպքեր, երբ ՀՅԳ Բյուրոն ուղղակի միջամտել է խորհրդարանի ներքին գործերին: Այսպես, օրինակ, դեռ Հայաստանի խորհրդի օրոք (1919 թ. հունիսին), երբ անկուսակցական պատգամավոր Ստ. Մամիկոնյանը Արցախում ծավալված իրադարձությունների կապակցությամբ դիմել էր խորհրդարանի նախագահ Ավ. Սահակյանին նիստ հրավիրելու հարցով, չզիտես ինչու խորհրդարանի նիստ վերագումարելու մասին հարցը լսվել է ՀՅԳ Բյուրոյում: Արևելյան Բյուրոյի հունիսի 16-ի նիստում մերժվել էր Մամիկոնյանի խնդրանքը՝ Ղարաբաղի դեպքերի առթիվ խորհրդարանի նիստ գումար

²⁷⁹ ՀՀ ՊԿՊԱ, ֆ. 198, ց. 1, գ. 57, ք. 7:

²⁸⁰ Նույն տեղում:

²⁸¹ Ռուբեն, Հայ յեղափոխականի մը հիշատակները, հ. է., Լոս Անճելոս, 1952, էջ 233:

րելու մասին. «Բյուրոն գտնում է, որ չի կարելի հարգել Մամիկոնյանի խնդրանքը»²⁸², - կարդում ենք նիստի արձանագրության մեջ:

Խորհրդարանական խմբակցությունը նոր ընտրվելիք վարչապետի (նախարարապետի) թեկնածությունն առաջադրելիս՝ նախապես պետք է ստանար մաս ՀՅԴ Բյուրոյի համաձայնությունը: Նախարարական թեկնածուների ցանկը խորհրդարան ներկայացնելուց առաջ նախարարապետը ստանում էր միայն խմբակցության համաձայնությունը, իսկ կառավարության դաշնակցական անդամները պատասխանատու էին խմբակցության առջև²⁸³: Բացի այդ՝ ՀՅԴ խմբակցությունն իր օրինատեղծ աշխատանքում միանգամայն ինքնուրույն էր: Ավելին՝ ըստ Վ. Նավասարդյանի՝ մինչև 1920 թ. բոլշևիկների մայիսյան ապստամբությունը, կուսակցության հսկողությունը և միջամտությունը խմբակցության և կառավարության գործունեության վրա արտահայտվել է շատ թույլ²⁸⁴:

Ահա, այսպիսի ճկուն, ժողովրդավարական մեխանիզմով էին հիմնականում զուգորդվում ու կարգավորվում կուսակցության, խորհրդարանական խմբակցության և կառավարության փոխհարաբերությունները 1919 թ. երկրորդ կեսին և 1920 թ. առաջին երեք-չորս ամիսներին, այսինքն՝ մինչև 1920 թ. բոլշևիկների մայիսյան հայտնի ապստամբությունը, երբ պատմաքաղաքական իրադարձությունների թելադրանքով ՀՅԴ Բյուրոն ամբողջ կազմով ստանձնեց կառավարությունը:

Այսպիսով, ինչպես տեսնում ենք, մինչև մայիսյան հայտնի դեպքերը ստեղծվել և գործում էր կուսակցություն-խորհրդարանական խմբակցություն-կառավարություն հարաբերությունների փոխգիշյունմային ճկուն (շարժուն) համակարգ, որի միջոցով ո՛չ կուսակցությունն էր անհարկի միջամտում պետական գործերին, և ո՛չ էլ կառավարությունն ու խորհրդարանական խմբակցությունն էին բոլորովին մեկուսացված կուսակցության ու նրա գերագույն գործադիր մարմնի՝ Բյուրոյի նախանշած քաղաքական ուղեգծից:

Բայց նման ժողովրդավարական մեխանիզմի գործադրումը հանդիպում էր դիմադրության ՀՅԴ կուսակցության և խմբակցության առանձին շրջանակներում: Այդ ընթացքում արձանագրվել են դեպքեր, երբ Բյուրոն միջամտել ու կաշկանդել է թե՛ խորհրդարանական խմբակցության և թե՛ կառավարության ինքնագործունեությունը: Օրինակ՝ Բյուրոյի ներկայացուցիչ Ռուբենը արգելել է խմբակցությունում առանձին քննարկման նյութ դարձնել 1920 թ. գարնանը Արցախում ձեռնարկված ապստամբության ձախողման հանգամանքները: Եվ նախապես պարզվել էր, որ այդ ձախողման գլխավոր պատասխանատուն եղել է ՀՅԴ Բյուրոյի կողմից Արցախ գործուղված Արսեն Միքայելյանը²⁸⁵:

²⁸² ՀՀ ԸԹԿՓ ՊԿԱ, Ֆ. 4047, ց. 1, գ. 144, ք. 1:

²⁸³ «ՀՅԴ կազմակերպական կանոններ», Երևան, 1919, էջ 12:

²⁸⁴ Վ. Նավասարդյան, Հ.Յ.Գաշնակցության անելիք, Գահիրե, 1924, էջ 189:

²⁸⁵ «Ազգակ շարաքոյակ», 23 սեպտեմբերի 1973 թ. (թիւ 41):

Եթե առանձին դեպքերում արձանագրվել է Բյուրոյի միջամտությունը խմբակցության աշխատանքներին, ապա դա հիմնականում դրսևորվել է ոչ թե օրենսդրական, այլ քաղաքական բնույթի խնդիրների ծագման ժամանակ, որպեսզի խմբակցությունը շեղում չկատարի կուսակցության մշակած ընդհանուր քաղաքական ուղեգծից: Կարծում ենք խորհրդարանական սկզբունքի բնորոշ դրսևորումներից է այն, որ խմբակցություն ունեցող ամեն մի կուսակցություն իրավունք ունի և պետք է իր քաղաքականությունը անցկացնել այդ խմբակցության միջոցով: Եվ այս առնչությամբ չի կարելի համամիտ լինել Հ. Քաջազունունու Ժխտողական այն գնահատականին, թե խորհրդարանում չկար նաև դաշնակցական խմբակցություն, «որովհետև սա դրված էր Գաշնակցության Բյուրոյի խիստ հսկողության տակ և պարտավոր էր կատարելու նրա հրամանները»²⁸⁶: Եվ սա ասում է մի գործիչ, որ այդ խորհրդարանի գործունեության գրեթե ամբողջ ժամանակամիջոցում գտնվել է արտասահմանում և բնականաբար այնքան էլ իրազեկ չէր շատ մանրամասներին:

Ընդհանուր առմամբ, եթե ՀՅԳ Բյուրոն ազդել է իր խմբակցության գործունեության վրա, ապա մինչև 1920 թ. մայիս ամիսը կուսակցության ու նրա Բյուրոյի ազդեցությունը խմբակցության աշխատանքների վրա արտահայտվել է թույլ կերպով: Այս կապակցությամբ Ռ. Տեր-Սիմասյանը վկայում էր, որ «Բյուրոյի գործունեությունը պետական, պառլամենտական ոլորտներում ավելի շատ երևութական էր, քան էական»²⁸⁷: Իսկ Ս. Վրացյանը հավաստում էր, որ Բյուրոն որևէ ազդեցություն չի ունեցել մեր ներքին քաղաքականության վրա: Նա ազդել է միայն բացառիկ պարագաներում²⁸⁸:

Սակայն դրությունը կտրուկ փոխվեց 1920 թ. գարնանը (ապրիլ-մայիսին), երբ քաղաքական հանգամանքների թելադրանքով ՀՅԳ Բյուրոն խմբակցության առջև պահանջ ներկայացրեց իշխանությունը հանձնել իրեն: Հիշեցնենք, որ դեռ ապրիլի սկզբից, խախտելով կուսակցության կազմակերպական կանոնների այն կետը, որ Բյուրոյի անդամը միաժամանակ չի կարող կառավարության անդամ լինել²⁸⁹, Բյուրոյի չորս անդամներ մտան կառավարության մեջ՝ ստանալով նախարարական պորտֆելներ²⁹⁰: 1920 թ. ապրիլի 3-ին խորհրդարանի թիվ 78 նիստում նախագահող Լ. Շանթը որպես ի գիտություն՝ խորհրդարանին տեղյակ պահեց նախարարական կազմի համալրման մասին: Նախարարական պոստեր ստանձնեցին ՀՅԳ Բյուրոյի անդամներ՝ Հ. Օհանջանյանը (արտ. գործ. նախ.), Ա. Ջամալյանը (հաղորդակցության), Ռ. Տեր-Սիմասյանը (գորական) և Ս. Վրացյանը (գյուղատնտ. և աշխատանքի)²⁹¹: Սա նախադուռ հանդիսացավ այն բանին, որ մեկ ամիս անց պահանջ-

²⁸⁶ Հ. Քաջազունուի, Հ. Յ. Գաշնակցությունը անելիք չունի այլևս, Երևան, 1994, էջ 30:

²⁸⁷ Ռուբեն, նշվ. աշխ., էջ 233:

²⁸⁸ ՀՀ ՊԿՊԱ, Ֆ. 198, ց. 1, գ. 57, ք. 7:

²⁸⁹ «Հ. Յ. Գ. կազմակերպական կանոններ», Երևան, 1919, էջ 13:

²⁹⁰ «Ազգակ շաբաթօրյակ», 9 սեպտեմբերի 1973 թ. (թիվ 39):

²⁹¹ ՀՀ ՊԿՊԱ, Ֆ. 198, ց. 1, գ. 52, ք. 29:

վի Ալ. Խատիսյանի կաբինետի հրաժարականը, և իշխանությունը անցնի Բյուրոյի՝ կուսակցության բարձրագույն գործադիր մարմնի ձեռքը: Գրանով իսկ հաղթանակ տարավ Բյուրոյի անդամ Ռուբենի և նրա կողմնակիցների տեսակետը՝ կառավարության կուսակցական ղեկավարման մասին: Հարկ է նշել, որ ՀՅԳ խմբակցության մի ստվար խումբ մինչև վերջ դեմ արտահայտվեց Բյուրոյի կառավարություն դառնալուն²⁹²:

Մյուս կողմից, ՀՅԳ խմբակցությունը խորհրդարանական քննարկումների ժամանակ միշտ չէ, որ եղել է միասնական: Արևմտահայ հասարակական-քաղաքական գործիչ, պատգամավոր Կ. Սասունին իր աշխատություններից մեկում նշում էր, որ խորհրդարանում դաշնակցական խմբակցությունը բաժանված էր մի քանի ոչ պաշտոնական խմբերի, որոնցից և ոչ մեկը չունեք հստակ ծրագիր²⁹³:

Ինչպես ՀՅԳ ներսում, այնպես էլ խորհրդարանական խմբակցությունում ակնհայտ դրսևորվում էին երկու թև. աջ՝ **ազգային** և ձախ՝ **ընկերվարական** հոսանքները: Որ ՀՅԳ ներսում և խորհրդարանական խմբակցության մեջ գոյություն ունեին «աջ» և «ձախ» թևեր՝ վկայում է ընդդիմադիր ՀԺԿ - պաշտոնաթերթ «Ժողովուրդը»: Նա իր առաջնորդողներից մեկում, վկայակոչելով խորհրդարանում ուժեղ ընդդիմության բացակայության փաստը, հանգում է այն հետևության, որ այդ պատճառով ՀՅԳ խմբակցությունը, ըստ էության, բաժանվել է երկու թևի. մեկը՝ «ձախ», դեպի ծայրահեղ սոցիալիզմը և դասակարգային անողորբ պայքարը, իսկ մյուսը՝ դեպի ազգայինը և հակասոցիալիստականը²⁹⁴:

ՀՅԳ հատվածային տեսակետից, եթե ազգային հոսանքը ներկայացնում էին հիմնականում կուսակցության արևմտահայ ներկայացուցիչները, ապա ընկերայինը՝ ռուսահայը: Խորհրդարանական խմբակցության արևմտահայ պատգամավորները (13-15 հոգի), ներկայացնելով գուտ ազգային հոսանքը, առհասարակ չէին ընկալում սոցիալիզմը ընդհանրապես և դասակարգային պայքարը մասնավորապես²⁹⁵: Արևմտահայ պատգամավորների (Ա. Մաքսապետյան, Մալխաս, Սեպուհ, Հ. Մանուկյան և այլք) մտահոգության առանցքը Հայաստանը միացյալ և անկախ դարձնելու հարցն էր, ինչպես նաև երկիրը հայացնելը, հայերենը պետական լեզու դարձնելը և այլն: Արևելահայ պատգամավորներ՝ Վ. Խորենին, Վ. Նավասարդյանը, Ա. Ջամալյանը, Ս. Թորոսյանը և ուրիշներ, ունեին ընդգծված ընկերվարական հակումներ:

ՀՀ քաղաքական կողմնորոշման հարցում ևս ՀՅԳ խորհրդարանական խմբակցության անդամները ունեին տարբեր դիրքորոշումներ: Քանի դեռ Հայկական հարցը լուծման ընթացքի մեջ էր, և մեծ ակնկալիք կար Փարիզի խա-

²⁹² «Ազդակ շաբաթօրյակ», 23 սեպտեմբերի 1973 թ. (թիվ 41):

²⁹³ Կ. Սասունի, Մայիսյան խռովությունները և թաթարական ապստամբ շրջանները, Պեյրուք, 1968, էջ 17:

²⁹⁴ «Ժողովուրդ», 13 հունվարի 1920 թ.:

²⁹⁵ Նույն տեղում:

դադրության համաժողովից, ինչպես կառավարությունը, այնպես էլ ՀՅԴ խմբակցությունը հիմնականում պաշտպանում էին արևմտյան քաղաքական դիրքորոշումը: Սակայն 1920 թ. քաղաքական հանգամանքների կտրուկ փոփոխման հետևանքով պատգամավորական խմբակցության զգալի մասը, քաղաքական կողմնորոշման առումով, ավելի ու ավելի հակվեց դեպի Ռուսաստանը: Պետք է ասել, որ ՀՅԴ խմբակցության մեջ կային պատգամավորներ, որոնք միշտ էլ ունեցել են անփոփոխ ռուսական կողմնորոշում (դրանք հիմնականում եղել են ռուսահայ և ավելի սոցիալամետ պատգամավորները) և կային պատգամավորներ (սրանք էլ գերազանցապես արևմտահայեր էին), որոնք այդպես էլ մնացին արևմտյան դիրքորոշման վրա:

Ինչպես ՀՅԴ շարքերում, այնպես էլ խորհրդարանի դաշնակցական խմբակցության ներսում բացորոշ կերպով դրսևորվում էին երկու մոտեցում. մեկը՝ «հեղափոխական գաղափարների ջատագով», իսկ մյուսը՝ «պետական», որոնք հաճախ անհաշտ բնույթ էին ստանում և տեղիք տալիս գաղափարաքաղաքական առճակատումների:

Խմբակցությունում կային գործիչներ, որոնք պահանջում էին կառավարությունից առաջնորդվել **հեղափոխական օրենքներով**: Ինչպես արդեն գիտենք, այս մտայնության գաղափարախոսներն էին՝ Ռ. Տեր-Սինապյանը, Ա. Ջամալյանը և ուրիշներ²⁹⁶: Սրանք գտնում էին, որ կառավարությունը չպետք է կաշկանդվի օրենքներով ու իրավական մոբմերով, այլ հարկ եղած դեպքում պետք է դիմի **բացահայտ հեղափոխական միջոցներ**²⁹⁷: Ռուբենը և իր փոքրաթիվ կողմնակիցները գտնում էին, որ ա) կառավարությունը պետք է կանգնի կուսակցական սկզբունքների վրա, բ) իրագործի ՀՅԴ ծրագիրը և գ) կուսակցությունը իր սիստեմով պետք է լինի կառավարություն: Ըստ Ռուբենի՝ «Հայ ժողովրդի և Դաշնակցության ուժը **կոմիքաջության** մեջ է»²⁹⁸: Ռ. Տեր-Սինապյանի այս մոտեցման նպատակն այն էր, որ կուսակցական կառույցների միջոցով ուժեղացվեր պետության հիմքը:

Կուսակցության և ՀՅԴ խորհրդարանական խմբակցության ներսում պետական և հեղափոխական հոսանքների մասին ավելի հստակ պատկերացում կազմելու համար տեղին է մեջ բերել այն դասախոսությունը, որ 1919 թ. դեկտեմբերի 25-ին Արշակ Ջամալյանը կարդացել է խորհրդարանի դահլիճում պատգամավորների և այլ ունկնդիրների առջև: Ինչպես վերևում ենք նշել, Ա. Ջամալյանը հարում էր Ռուբենի գլխավորած «հեղափոխական» հոսանքին: Նրա կարդացած «Իրավական թե հեղափոխական պետություն» թեմայով դասախոսության մեջ տուրք է տրվում ընկերվարական հեղափոխական գաղափարներին: Նա խիստ քննադատության էր ենթարկում Հայաստանի կառավարությանը և անգամ խորհրդարանին որպես հին օրենքներով

²⁹⁶ Ս. Վրացյան, *Կյանքի ուղիներով*, հ. Ե, Բեյրութ, 1966, էջ 113, Ռուբեն, նշվ. աշխ., էջ 342:

²⁹⁷ Ռուբեն, նշվ. աշխ., էջ 275:

²⁹⁸ ՀՀ ՊԿՊԱ, Ֆ. 198, ց. 1, գ. 57, ք. 12:

առաջնորդվող մարմիններ և դրանց փոխարեն առաջարկում էր ստեղծել նոր՝ հեղափոխական կառավարություն, որն իրեն չպետք է կաշկանդի օրենքներով²⁹⁹։ Ջամալյանի ելույթը դաշնակցական և ոչ դաշնակցական (էսէՆ, «սպեցիֆիկ», արևմտահայ) ունկնդիրների շրջանում այնպիսի տարակուսանք ու արձագանք է առաջացնում, որ հաջորդ օրը՝ դեկտեմբերի 26-ին, ՀՅԳ Բյուրոյի հերթապահ անդամ Ս. Վրացյանը, հաշվի առնելով կուսկազմակերպությունների և անհատ անդամների կողմից հայտնված բողոքները, Ա. Ջամալյանի դասախոսությունում պարունակած դրույթները և անձամբ նրա անձնական վարքագիծը, որպես Բյուրոյի անդամի, հանձնում է կուսակցության Դատական ատյանի շուտափույթ քննությանը³⁰⁰։ Հունվարի 3-4-ին ՀՅԳ դատական ատյանը, լսելով Բյուրոյի անդամ Ա. Ջամալյանի դեկտեմբերի 25-ին կարդացած դասախոսության մասին հարցը, նրան ենթարկում է «հանդիմանության» և պարտավորեցնում, որ նա մամուլի միջոցով լուսաբանի իր դասախոսության իսկական իմաստը³⁰¹։

Խորհրդարանական խմբակցության և կուսակցության ներսում առկա մյուս հոսանքը «պետականության» և «իրավական նորմերին» հավատարիմ ուղղությունն էր, որը Հ. Քաջազնունու բացակայության պայմաններում պաշտպանում էին Ս. Վրացյանը, Ալ. Խատիայանը, Գ. Ղազարյանը, Ա. Չիլինգարյանը և ուրիշներ։ Այս հոսանքի կողմնակիցները գտնում էին, որ Հայոց պետականության հաստատումից հետո Դաշնակցությունը պետք է աստիճանաբար, իբրև քաղաքական հեղափոխական կուսակցություն, իր դերը թուլացնի՝ տեղի տալով և ասպարեզը թողնելով միայն պառլամենտին և կառավարությանը³⁰²։ «Ես կարծում էի, գրում էր պետականության գաղափարի հաստատական պաշտպան Ս. Վրացյանը իր հուշերում,- որ իշխանությունը պետք է ղեկավարվի պետական օրենքներով և արտակառավարական անհատական կամ կոմիտեական արարքները պետական գործերը վարելու հարցում անթույլատրելի են, մանավանդ, եթե այդ արարքները չէին վայելելու ժողովրդականություն»³⁰³։

Ինչպես տեսնում ենք, թե՛ ՀՅԳ շարքերում և թե՛ նրա խորհրդարանական խմբակցության ներսում այս կամ այն առօրեական խնդիրների լուծման շուրջ ծագում էր տեսակետների ու մոտեցումների լայն սպեկտր, սակայն մի հիմնախնդրում՝ Հայ ազգային Դատի ու համազգային հիմնախնդիրների պաշտպանության գործում, նրանք միշտ էլ հանդես են եկել միասնաբար։ Հենց դրանում է կայանում քանակապես սովոր ու սոցիալապես բազմատարր սույն կուսակցության ուժն ու կենսունակությունը։ «Որքան էլ, գրում է բոլշևիկ Ա. Կարինյանը,- տարբեր են եղել դաշնակցական զանազան տեսա-

²⁹⁹ ՀՀ ՀՔԿՓ ՊԿԱ, ֆ. 4047, ց. 2, գ. 23, քք. 4-7:

³⁰⁰ ՀՀ ՀՔԿՓ ՊԿԱ, ֆ. 4047, ց. 2, գ. 23, ք. 1:

³⁰¹ Նույն տեղում, քք. 9-10:

³⁰² Ռուբեն, նշվ. աշխ., էջ 275:

³⁰³ Ս. Վրացյան, Կյանքի ուղիներով, հ. Ե., Բեյրութ, 1966, էջ 153:

բանների որոնումները և հայացքները այս կամ այն մոմենտին, այս կամ այն երկրորդական խնդրի նկատմամբ՝ բայց և այնպես՝ հիմնականում նրանք միշտ ունեցել են մի ընդհանուր ուղի, մի գիծ. միշտ գործել են միասնաբար և այդպես միացյալ շարքերով էլ հանդես են եկել»³⁰⁴:

Գժվար չէ նկատել, որ ժողովրդի, հանրապետության իրական կյանքում առկա դժվարությունները բնականաբար իրենց արտացոլումն էին ստանում նաև ՀՅԳ խմբակցության անդամների վարքագծի ու դիրքորոշումների վրա: Այնպես որ՝ խմբակցությունը միապաղաղ, անկերպարան ու ՀՅԳ Բյուրոյին հլու կամակատար մարմին չէր: Ռուբենը հիշում է, որ խորհրդարանում խորենիները և նավասարդյանները ըմբոստանում էին կառավարության դեմ գրեթե այնչափ, որչափ էսեսները»³⁰⁵:

Այսպիսով, ՀՅԳ խմբակցությունում ամենից ավելի բացորոշ պայքար էր գնում պետական իշխանության երկու ձևերի հաստատման միջև՝ **պատլամենդական-ժողովրդավարական և կուսակցական-ամբողջատիրական**: Չնայած ՀՅԳ խմբակցության մեծամասնությունը դեմ էր իշխանության կուսակցականացմանը (որն իր հետ ծնելու էր կուսակցական մենիշխանություն), 1920 թ. գարնանը դեպքերն ու իրադարձությունները Անդրկովկասում և Հայաստանում այնպես զարգացան, որ խորհրդարանը զիջեց, հեռացավ ակտիվ գործունեությունից և ասպարեզը թողեց ՀՅԳ Բյուրոյին:

³⁰⁴ Ա. Կարինյան, *Գաշնակցությունը և իր զինակիցները, Երևան, 1932, էջ 34*:

³⁰⁵ Ռուբեն, *Նշվ. աշխ. հ., Է, Լոս Անձեյլես, 1952, էջ 235-236*:

ԳԼՈՒԽ ՀԻՆԳԵՐՈՐԳ ԽՈՐՀՐԳԱՐԱՆԻ ԳՈՐԾՈՒՆԵՈՒԹՅՈՒՆԸ

1. Օրենսդրական աշխատանքը: Սոցիալ-տնտեսական և կրթամշակութային խնդիրներ

Երկրորդ գումարման խորհրդարանի օրենսդրական աշխատանքը համեմատական կարգով աչքի էր ընկնում ավելի մեծ հասունությամբ ու արհեստավարժությամբ, քան Հայաստանի խորհրդինը, որտեղ, ինչպես արդեն գիտենք, շատ օրենքներ ու օրինագծեր ունեին պարզապես կառավարչական հրահանգի ու որոշման տեսք: Այս խորհրդարանի կարևոր օրինագծերից կարելի է համարել այն, որ 1919 սեպտեմբերին ի քննության դրվեց «ՀՀ տարածքում երդվյալ ատենակալների դատարան մտցնելու մասին» օրինագիծը, որը հավանության էր արժանացել նախարարների խորհրդում¹: Սի փոքր ուշ այն հաստատվեց և դրվեց գործողության մեջ:

Իրոք որ, ամեն մի պետության ժողովրդավարության մակարդակի կարևոր չափանիշերից է երկրի դատական համակարգը ու առաջին հերթին երդվյալ ատենակալների ինստիտուտ ունենալը: Հիշեցնենք, որ դատական համակարգի ձևավորման հարցը քննվել էր դեռ Հայաստանի խորհրդում (1918 թ. նոյեմբեր-դեկտեմբեր ամիսներին), անգամ կազմվել էր «Դատաստանական հիմնարկությունների մասին» օրինագիծ և կատարվել դրա առաջին ընթերցումը: Ըստ օրինագծի՝ Հայաստանի դատական համակարգը ունենալու էր հետևյալ աստիճանակարգը (դատական ատյանները)¹՝ 1) հաշտարար դատավորներ, 2) ինստանցիոն (տարածքային) դատարան, 3) շրջանային դատարան և 4) դատական պալատ: Այդ ժամանակ էլ ՀԺԿ խմբակցությունը առաջարկ մտցրեց երդվյալ ատենակալների ինստիտուտ ունենալու մասին²:

1919 թ. հոկտեմբերի 10-ին օրենսդրական նախաձեռնությամբ հանդես եկավ խորհրդարանի նախագահությունը և առաջարկություն մտցրեց, ս. թ. հոկտեմբերի 19-ի օրենքի հիման վրա՝ «պետական կամ այլ հասարակական

¹ ՀՀ ՊԿՊԱ, Ֆ. 198, ց. 1, գ. 27, ք. 41:

² «Կայծ», 5 դեկտեմբերի 1918 թ.:

վճարովի պաշտոն վարող պատգամավորներին (բացի նախարարներից և նրանց օգնականներից) պատգամավորական կոչումից զրկելու մասին»³:

Հաշվի առնելով, որ 1920 թ. հունվարի 31-ին Հայաստանի համալսարանի բացումից հետո որոշ պատգամավորներ անցան դասախոսական աշխատանքի, իսկ մի քանիսն էլ գործուղվել էին դիվանագիտական աշխատանքի՝ նույն թվականի մարտի 1-ին ընդունվեց լրացուցիչ օրենք, որով բացառություն արվեցին համալսարանի դասախոս և դիվանագիտական ներկայացուցիչ նշանակված պատգամավորների համար⁴: Այս կատեգորիայի մարդկանց պատգամավորական կոչումը լիարժեքորեն պահպանվեց: Ինչ վերաբերում էր պատգամավոր նախարարներին և նրանց օգնականներին, ապա ինչպես ասվել է, 1919 թ. սեպտեմբերի 19-ի օրենքով սրանք թեև պահպանում էին իրենց պատգամավորական կոչումը, սակայն զրկվում էին խորհրդարանում քվեարկությանը մասնակցելու իրավունքից⁵: 1919 թ. հոկտեմբերի 23-ին պատգամավոր Վ. Խորենին օրինագիծ մտցրեց՝ «70 տարին լրացած պետական պաշտոնյաներին ծերության պատճառով պաշտոնաթող անելու և կենսաթոշակի ուղարկելու մասին»⁶: Խորհրդարանը քայլեր ձեռնարկեց ուռճացած պետական ապարատը կրճատելու ուղղությամբ: Ստեղծվեց ժամանակավոր հանձնաժողով, որի միջոցով սկսեց կրճատվել պետական ծառայողների թիվը: Ս. Վրացյանը վկայում է, որ 16 հազարանոց պետպաշտոնյաների թիվը (որի մեջ, ի դեպ, ներառված էին նաև ոստիկանությունը և երկաթուղային ծառայողները) կրճատվեց 4 հազարով: ՀՀ վերջին շրջանում մնացել էր ընդամենը 12 հազար պաշտոնյա⁷:

Խորհրդարանի գործունեության տեսադաշտում են եղել երկրի սոցիալ-տնտեսական և կրթամշակութային զարգացման հարցերը: Դա երևում է նրա ընդունած օրենքներից ու օրինագծերից: Հանրապետության սոցիալական և կրթամշակութային կյանքի զարգացումը, ինչ խոսք, մեծ չափով կապված էր նրա տնտեսական վիճակի հետ:

Հայաստանի տնտեսությունը թույլ էր զարգացած: Արդեն մեր կողմից քանիցս նշված հայտնի պատճառներով այն չէր կարող ուժեղ զարգացած լինել, որովհետև նախկինում Արևելյան Հայաստանը հանդիսանում էր ընդամենը ցարական Ռուսաստանի ագրարային կցորդը: Պետք է ասել, որ տնտեսական ծանր վիճակ էր տիրում հանրապետությունում: Հանրապետության տնտեսական ծանր դրությունը պետք է բացատրել ոչ միայն և ոչ այնքան կառավարության կամ խորհրդարանի անգործությամբ ու անկարողությամբ, որքան այն ծանր ժառանգությամբ, որ ստացել էր ցարիզմից և այն համընդ-

³ ՀՀ ՊԿՊԱ, ֆ. 198, ց. 1, գ. 27, թ. 87:

⁴ ՀՀ ՊԿՊԱ, ֆ. 202, ց. 1, գ. 333, թթ. 81-82:

⁵ ՀՀ ՊԿՊԱ, ֆ. 202, ց. 1, գ. 333, թ. 10, «ՀՀ օրենքների հավաքածու 1919 թ., էջ 15-16:

⁶ ՀՀ ՊԿՊԱ, ֆ. 198, ց. 1, գ. 27, թ. 103:

⁷ Ս. Վրացյան, *Էջեր մոտիկ անցյալից* («Հայրենիք», Բնստոն, 1924 թիվ 5 (մարտ), էջ 115):

հանուր իրավիճակից, որն այդ շրջանում այնքան բնորոշ էր պատերազմից նոր դուրս եկած մնացած բոլոր երկրներին:

Այդուհանդերձ՝ հանրապետության տնտեսական կյանքում կատարվեցին նկատելի տեղաշարժեր և դրական փոփոխություններ: Հայաստանն իր համեմատական կայունացմանը հասավ Խառնիսյանի վարչապետության շրջանում: Հանրապետության տնտեսական ծանր և քաղաքական անկայուն պայմաններով հանդերձ՝ կարճ ժամանակամիջոցում տեղի ունեցան տնտեսական և հասարակական-մշակութային դրական մի շարք փոփոխություններ: Եվ այդ իմաստով անհիմն են խորհրդահայ պատմագրության մեղադրանքները. սևացնելով հանրապետության պատմությունը՝ դրական ոչ մի բան չէին տեսնում: Նույն կերպ, այժմ էլ քննադատելով կոմունիստական ամբողջատիրական, հակադեմոկրատական ռեժիմը, չի կարելի ասել, թե դրանց օրոք տնտեսական, մշակութային ոչ մի լավ բան չի ստեղծվել: Գա կույր քննադատություն է և պետք է մերժվի:

Որոշ փոփոխություններ կատարվեցին գյուղատնտեսության, անասնապահության, հանքարդյունաբերության, ապրանքափոխանակության բնագավառներում և այլն:

Շրջանառության մեջ էր դրվել հայկական դրամանիշը, որը տպագրվում էր Լոնդոնում: Շրջանառության մեջ էին նաև ոսկե և արծաթե դրամները: Հիմնվեցին պետական բանկեր (գանձատներ): Բարձրացվեց ակցիզային (անուղղակի) հարկը, կազմակերպվեց մաքսային գործը: 1919 թ. երկրորդ կեսից սկսեց աշխուժանալ առևտուրը: Երկրից արտահանվում էին բամբակ, կոնյակ, այլ խմիչքներ, բուրդ, կաշի, մորթի, պղինձ, աղ, չոր խոտ և այլն⁸:

Գյուղատնտեսության և պետգույքերի նախարարությանը կից գործում էր պետական ընդհանուր վիճակագրության գլխավոր բաժանմունքը, որի կառավարիչն էր «սպեցիֆիկ» Բ. Բշխանյանը: Նրա բաժանմունքի հավաքած տվյալներով՝ մեկ տարվա ընթացքում (1919 թ. մարտից մինչև 1920 թ. մարտի 1-ը) պետության և մասնավոր մարդկանց կողմից արտահանվել է (չհաշված բամբակը) ընդամենը 170 հազ. փութ կամ 36032780 ռ. արժողությամբ ապրանք, որը հիմնականում խմիչք էր և կաշվեղեն⁹: Վիճակագրական բաժանմունքը միաժամանակ տվյալներ է հրապարակել, որ ընդամենը չորս ամսում (1919 թ. նոյեմբեր- 1920 թ. փետրվար) Հայաստանից արտահանվել է 49929 փութ բամբակ¹⁰: Այսպիսով, ոչ լրիվ տվյալներով՝ մեկ տարում Հայաստանից արտահանվել է շուրջ 220 հազար փութ համախառն ապրանք:

Ներմուծվում էին՝ նավթամթերք, հացահատիկ, ալյուր, բրինձ, շաքար, ձուկ, օճառ, թեյ, բուսական յուղ, կակաո, կտորեղեն, ապակի, դեղորայք և այլն: Ներմուծումը, համեմատած արտահանման հետ, ուներ շատ մեծ տեսակարար կշիռ: Այսպես՝ վերը նշված ժամանակաշրջանից ավելի պակաս

⁸ Ա. Մ. Հակոբյան, Հայաստանի Հանրապետություն, Ե., 1992, էջ 15:

⁹ ՀՀ ՊԿՊԱ, Ֆ. 200, ց. 1, գ. 427, թթ. 107-112:

¹⁰ Նույն տեղում, թ. 117:

Ժամկետում (9 ամսում) Հայաստան է ներմուծվել ավելի քան 5,5 մլն փուֆ համախառն ապրանք, որի արժեքը, չճշտված տվյալներով, կազմել է մոտ 443 մլն ռուբլի: Հատկանշական է, որ Հայաստան ներմուծվող այդ ապրանքների (5,5 մլն փուֆ) ընդհանուր ծավալում 77 տոկոսը (4,2 մլն փուֆ) կազմել են միայն ամերիկյան ապրանքներն ու մասնավորապես ամերիկյան օգնության հացամթերքը¹¹: Այդ ընթացքում բացվեցին մի շարք գործարաններ, ջուլիականցներ ու արհեստանոցներ՝ օճառի, կաշվի, կոնյակի, հախճապակու, ծխախոտի, մանածագործության և այլն: Վարչապետ Ալ. Խատիսյանի հայտնած տվյալներով՝ արդեն 1920 թ. կեսերին Հայաստանում աշխատում էր 67 գործարան¹²: Գյուղատնտեսության բնագավառում 1919 թ. ստացվել էր 1,7 մլն աստիճան խաղողի սպիրտ: Տեղաշարժեր նկատվեցին կրթության և առողջապահության գործում: 1919 թ. կեսերին հանրապետությունում կար 30 հիվանդանոց՝ 1600 մահճակալով: 1919-1920 ուստարում Հայաստանն ուներ շուրջ 500 տարբեր տիպի դպրոց, շուրջ 50 հազ. աշակերտներով: 1919 թ. մայիսից որոշվեց բացել համալսարան և այլն¹³:

Ահա համառոտ այսպիսին էր հանրապետության սոցիալ-տնտեսական իրավիճակը, որի համար իրավաօրենսդրական փոքրիշատե պայմաններ էին արդեն ստեղծվել նախընթաց փուլում և ավելի մեծ աշխատանք էր սպասվում այժմ՝ Երկրորդ խորհրդարանից:

Խորհրդարանը նկատելի ուշադրություն դարձրեց վերաշինության հարցերին: Մասնավորապես, 1920 թ. ապրիլին Երևանի հատակագծման և կառուցապատման նպատակով որոշվեց բացել 22904950 ռ. վարկ¹⁴: Դրա տնօրինումը հանձնվեց խնամատարության և վերաշինության նախարարության գլխավոր ճարտարապետի վարչությանը: Այդ վարչության գլխավոր ճարտարապետն էր ակադեմիկոս Ալ. Թամանյանը: Այս շրջանում էլ նա գծեց քաղաքամայր Երևանի զարգացման առաջին գլխավոր հատակագիծը: Խնդիր դրվեց պատշաճ ուշադրություն դարձնել հանրապետության տարածքում գտնվող պատմամշակութային նշանակություն ունեցող հուշարձանների վերականգնմանն ու պահպանությանը: Այդպիսի հուշարձանների թվին էին դասվում Սարդարի պալատը, Անիի հուշարձանները, հանրապետության տարածքում գտնվող տաճարները, եկեղեցիները, ամրոցները, մզկիթները և այլն¹⁵:

1919 թ. դեկտեմբերի 26-ին խորհրդարանի փոխնախագահ Լ. Շանթի վավերացմամբ հաստատվեց օրենք «Պետական լեզվի մասին»: Սա այն օրենքներից էր, որի նախագիծը կազմվել էր առաջին խորհրդարանի ժամանակ, բայց վերամշակման կարիք ունենալու պատճառով դրա ընդունումը

¹¹ Նույն տեղում, թ. 117:

¹² «Ճակատամարտ», Կ. Պոլիս, 3 հուլիսի 1920 թ.:

¹³ Ա. Մ. Հակոբյան, Հայաստանի Հանրապետություն, Ե., 1992, էջ 15-17:

¹⁴ ՀՀ ՊԿՊԱ, ֆ. 198, ց. 1, գ. 58, թ. 12:

¹⁵ ՀՀ ՊԿՊԱ, ֆ. 199, ց. 1, գ. 22, թ. 22:

ձգձգվել և փոխանցվել էր երկրորդ խորհրդարան: Այս օրենքով հայերենը որպես պետական լեզու դառնում էր պարտադիր բանակում, բոլոր պետական ու հասարակական հիմնարկություններում ու հաստատություններում: Պետական և հասարակական բոլոր հաստատությունները պարտավոր էին վեց ամսվա ընթացքում հայերենը դարձնել պետական գործավարության լեզու¹⁶:

Առաջնորդվելով լեզվի մասին օրենքով՝ հաղորդակցության, գյուղատնտեսության, խնամատարության և վերաշինության նախարարությունները 1920 թ. հունիսի 5-ին պաշտոնական հայտարարություն արեցին այն մասին, որ իրենց հասցեագրված ռուսաց լեզվով գրությունները այսուհետ ուշադրության չեն արժանանա և կմնան անպատասխան¹⁷: Այս կապակցությամբ առանձնապես շատ էին նեղվում զորական և ֆինանսների նախարարությունները, որոնց ուղարկած գրություն-շրջաբերականները որպես կանոն ռուսերեն լեզվով էին¹⁸:

Ի կատարումն «Պետական լեզվի մասին» օրենքի՝ բանակում հայերենը արմատավորելու և միակ պաշտոնական լեզու դարձնելու նպատակով նախարարների խորհրդի 1920 թ. մայիսի 30-ի հրահանգով ոչ ուշ քան մինչև նույն թվականի օգոստոսի մեկը զինվորական նախարարության համակարգում գրագրությունը և գործավարությունը պիտի տարվեին միայն հայերենով: Իսկ հայազգի այն սպաները, ովքեր չէին տիրապետում մայրենի լեզվին, սույն հրահանգով պարտավոր էին անմիջապես ձեռնամուխ լինել նրա տիրապետմանը: Այսուհետ արգելվում էր զինվորական նախարարության համակարգում ծառայության վերցնել հայոց լեզվին չտիրապետող անձանց¹⁹: Բացառություն էին կազմում միայն նրանք, ովքեր իրենց հատուկ մասնագիտական գիտելիքներով ու պատրաստվածությամբ տվյալ ժամանակամիջոցում անհրաժեշտ էին զորամասերին ու հիմնարկություններին: Այդուհանդերձ՝ մի քանի ամսվա ընթացքում զինվորական ծառայությունից ազատվեցին և բանակից զորացրվեցին 81 օտարազգի սպաներ ու աստիճանավորներ²⁰: Սակայն կարծում ենք, որ այդպիսի քայլը տվյալ ժամանակաշրջանում արդարացված չէր: Որպես հավելում լեզվի մասին օրենքի՝ 1920 թ. հունիսի 15-ին ընդունվեց օրենք չչ-ում պետական լեզվին՝ հայերենին չտիրապետող պետական ծառայողներին (պաշտոնյաներին) աշխատանքից ազատելու մասին: Ըստ այս օրենքի՝ այդպիսիներին տրվելու էր տարեկան դրույքի չափով միանվագ դրամական վարձատրություն և Հայաստանի սահմաններում երկաթուղով անվճար երթևեկման հնարավորություն:

¹⁶ ՀՀ ՊԿՊԱ, Ֆ. 202, ց. 1, գ. 333 թ. 30:

¹⁷ ՀՀ ՊԿՊԱ, Ֆ. 203, ց. 1, գ. 116, թ. 38

¹⁸ Նույն տեղում:

¹⁹ Մ. Լ. Կարապետյան, Հայաստանի Հանրապետության բանակը (1918-1920), Եր., 1996, էջ 76:

²⁰ ՀՀ ՊԿՊԱ, Ֆ. 199, ց. 1, գ. 142, թ. 189:

Հայոց լեզվին չտիրապետող բարձրորակ պաշտոնյաներին ու մասնագետներին չկորցնելու և այս օրենքի համաձայն իրենց պաշտոններից հախուռն չազատելու նպատակով մինչ այդ՝ 1919 թ. նոյեմբերի 28-ի մեկ այլ օրենքով հանձնարարվել էր հանրային կրթության և արվեստի նախարարությանը Երևանում և Ալեքսանդրապոլում բացել հայոց լեզվի դասընթացներ՝ պետական պաշտոնատար անձանց համար²¹: Այստեղ խնդիրն այն էր, որ հայերենին չէին տիրապետում ոչ միայն այլազգի, այլև, ցավոք, հայազգի պաշտոնյաներից շատերը: Պետական պաշտոնավարման համապատասխան մասնագիտական որակավորում ունեցող հայազգի կադրեր բուն Հայաստանում շատ քիչ էին: Այդպիսիք համեմատաբար ավելի ստվար թիվ էին կազմում հարևան հանրապետություններում՝ Վրաստանում և Ադրբեջանում: Ըստ կուսակցական պատկանելության՝ բարձր որակավորում ունեցող արհեստավարժ կադրեր ամենաշատ հաշվվում էին ՀԺԿ շարքերում: Քիչ թվով մասնագետ-կադրեր կային նաև սոց. դեմոկրատների, էսէռների և մյուս ընդդիմադիր կուսակցությունների շարքերում: Սակայն, իր հերթին, հիմնական կառավարող Դաշնակցություն կուսակցությունը այնքան էլ ոգեշունչ չէր պետապարատում, պետաիրավական հաստատություններում ներգրավել իրեն ախոյան կուսակցությունների ներկայացուցիչներին: Նման կադրային քաղաքականությունը, ինչ խոսք, բացասաբար պետք է անդրադառնար հանրապետության սոցիալ-տնտեսական և հասարակական-քաղաքական կյանքի վրա:

1919 թ. սեպտեմբեր-դեկտեմբերին ընդունվեցին օրինագծեր՝ Ազգագրական-մարդաբանական թանգարան, պետական հանրային գրադարան, թատերական վարժարան հիմնելու մասին, որոնք դրվեցին հանրային կրթության և արվեստի նախարարության իրավասության տակ²²: Ազգագրական թանգարանին էր հանձնվում «Հայոց ազգագրական ընկերության» շարժական և անշարժ ամբողջ գույքը: Թանգարանի պահպանության համար հատկացվեց 30 հազ. ռուբլի վարկ²³: 1920 թ. մարտի 24-ին խորհրդարանը հաստատեց Հայաստանի պետական հանրային գրադարանի կանոնադրությունը: Պետք է ասել, որ կուլտուր-գիտական և կրթական հիմնարկությունները պահպանվում ու ֆինանսավորվում էին պետության միջոցներով²⁴:

1920 թ. հունվարի 3-ին ընդունվեց օրենք՝ եկեղեցին պետությունից անջատելու մասին²⁵: Ապրիլի 3-ին հաստատվեց մեկ այլ օրինագիծ՝ հայոց հոգևոր ուսումնական հաստատությունների և ծխական-եկեղեցական դպրոցների աշխարհականացման ու պետականացման մասին²⁶: Ընդ որում կատարվելու էր մինչ այդ չբացված եկեղեցական դպրոցների գույքի մասնակի

²¹ ՀՀ ՊԿՊԱ, Ֆ. 202, ց. 1, գ. 333, թ. 30:

²² ՀՀ ՊԿՊԱ, Ֆ. 198, ց. 1, գ. 20, թթ. 57-59, 94, Ֆ. 203, ց. 1, գ. 57, թ. 47:

²³ ՀՀ ՊԿՊԱ, Ֆ. 202, ց. 1, գ. 333, թ. 7, «ՀՀ օրենքների հավաքածու 1919 թ.», էջ 10:

²⁴ «ՀՀ օրենքների հավաքածու 1920 թ.», էջ 41-42:

²⁵ ՀՀ ՊԿՊԱ, Ֆ. 198, ց. 1, գ. 20, թ. 1:

²⁶ Նույն տեղում, թ. 40:

բռնագրավում (սեկուլյարիզիցիա)²⁷: Միաժամանակ հայտարարվում էր խղճի ազատություն: Առարկաների դասավանդումը դպրոցներում պետք է տարվեր մայրենի լեզվով: Թուլյատրելի էին համարվում ինչպես պետական, նույնպես և ոչ պետական դպրոցները: Օրենքում պահանջ էր դրված դպրոցը հեռու պահել քաղաքականությունից և այլն²⁸:

Մշակվեցին դպրոցական ուսումնամեթոդական ծրագրեր: Ն. Ադրալյանի և Գ. Ղազարյանի նախարարության շրջանում քայլեր արվեցին արմատախիլ անել ուսման սխոլաստիկ բնույթը, կրթությանը կից կարևորություն տալով նաև աշակերտների մոտ աշխատանքային դաստիարակությանը, պրոֆեսիոնալ կողմնորոշմանը, արհեստների տիրապետմանը: 1920 թ. մայիսից հայերենին չտիրապետող ուսուցիչները ազատվեցին աշխատանքից²⁹: Գպրոցն ու կրթությունը ավելի ու ավելի դառնում էին ազգային ու հայեցի: Հայաստանի խորհրդարանի ընդունած վերոհիշյալ օրենքներում ընդհանրականն այն էր, որ գերազանցապես դաշնակցականներից բաղկացած խորհրդարանը ընդգծում էր իր ազգային բովանդակությունը:

ՀՀ խորհրդարանն ու կառավարությունը քայլեր ձեռնարկեցին նաև անգրագիտության վերացման (հաղթահարման) ուղղությամբ: 1920 թ. հունվարի 5-ին խորհրդարանի հաստատած օրենքով ժողովրդի կրթությանը նպաստելու համար հիմնվում են. ա) անգրագետ հասակավորների համար գրագիտական դասընթացներ. բ) թերվարժ (կիսագրագետ) հասակավորների համար՝ գրավարժական դասընթացներ և գ) գրագետ հասակավորների համար՝ ժողովրդական համալսարաններ³⁰: Այդ դասընթացները կազմակերպվելու էին վեց ամիս տևողությամբ, որոնցում դասավանդվելու էին հայոց լեզու, գրականություն, աշխարհագրություն, թվաբանություն, բնագիտություն, հասարակական գիտություններ և այլն: Գասընթացներ ու ժողովրդական համալսարաններ կարող էր հաճախել ամեն ոք՝ առանց կրոնի, ազգի և սեռի խտրության: Դրանցում կրթությունը անվճար էր: Ուշադրություն է դարձվել նաև նախադպրոցական հիմնարկների ստեղծմանը: 1920 թ. հունվարի 2-ին կառավարությունը օրինագիծ մտցրեց խորհրդարան՝ պահանջելով 222 հազ. ռուբլի վարկ՝ հանրապետության 15 վայրերում մանկապարտեզներ բացելու համար³¹:

Նկատի ունենալով մանկավարժական կադրերի պակասը՝ հանրային կրթության և արվեստի նախարարության առաջարկությամբ 1919 թ. հոկտեմբերի 2-ին խորհրդարանը օրենք հաստատեց զինապարտության տարիքի հաստիքավոր ուսուցիչներին և վերատեսուչներին զորակոչից (զինծառայությամբ):

²⁷ ՀՀ ՊԿՊԱ, Ֆ. 200, ց. 1, գ. 576, ք. 240:

²⁸ «Կառավարության լրաբեր», 10 սեպտեմբերի 1918 թ.:

²⁹ ՀՀ ՊԿՊԱ, Ֆ. 207, ց. 1, գ. 136, ք. 2:

³⁰ ՀՀ ՊԿՊԱ, Ֆ. 202, ց. 1, գ. 303, ք. 73:

³¹ ՀՀ ՊԿՊԱ, Ֆ. 105, ց. 1, գ. 2776, ք. 4:

յունից) ազատելու վերաբերյալ³²: Բացի այդ, հաշվի առնելով ազգաբնակչության ցածր կենսամակարդակն ու վճարունակությունը և նպատակ դնելով դպրոցահասակ երեխաներին ներգրավելու կրթության ոլորտում՝ 1919 թ. որոշում ընդունվեց երկրում մտցնել անվճար տարրական ուսուցում³³: Այնուհետև կառավարության հրահանգով սահմանվեց պարտադիր տարրական ուսուցում³⁴: Սակայն դպրոցներում համապատասխան դասագրքերի ու գրենական պիտույքների տրության պատճառով այդ ազգանպաստ որոշումները մնացին կիսակատար:

Առանձին քայլեր ձեռնարկվեցին կրթության ոլորտ չբավոր, գաղթական և որբ երեխաներ ընդգրկելու ուղղությամբ: Պետության հաշվին սրանց տրվում էր պատսպարան, անվճար սնունդ, գրենական պիտույքներ: Կրթության նախարարության ոչ լրիվ տվյալներով՝ օգնության կարիք ունեցող այդպիսի դպրոցահասակ երեխաների թիվը հասնում էր շուրջ 22 հազարի³⁵:

Չնայած հանրապետության ֆինանսատնտեսական սուղ հնարավորություններին՝ այնուամենայնիվ բավականաչափ ուշադրություն էր դարձվում բնակչության սոցիալական պաշտպանվածության խնդիրներին: Իր հայացքներով սոցիալիստ, դաշնակցական Վ. Խորենին 1920 թ. հունվարին խորհրդարան ներկայացրեց բանվորության նվազագույն աշխատավարձի մասին օրինագիծը, որով չափահասների համար ամսական սահմանվում էր 2000 ռուբլի աշխատավարձ, իսկ անչափահասների համար՝ 1300 ռուբլի³⁶: Սակայն հաշվի առնելով հանրապետության տնտեսական ծանր դրությունը՝ խորհրդարանը որոշեց ժամանակավորապես հետաձգել օրինագծի ընդունումը: Գրամի արժեզրկման պայմաններում կառավարության ներկայացմամբ խորհրդարանը համապատասխան օրենքով բարձրացնում է կենսաթոշակների և այլ նպաստների չափերը: Այսպես՝ 1920 թ. մարտի 24-ին հաստատված օրենքով կենսաթոշակների չափերը ավելացան մի քանի անգամ՝ 325-ից մինչև 500 տոկոսով³⁷:

Առանձնահատուկ ուշադրություն էր դարձվում պատերազմում զոհվածների ընտանիքների պաշտպանությանը: Այս կապակցությամբ ուշագրավ ենք համարում կրթության և արվեստի նախարար Ն. Աղբալյանի կազմած և 1919 թ. սեպտեմբերի 29-ի թիվ 2956 գրությամբ նախարարների խորհուրդ ու խորհրդարան ուղարկված օրինագիծը. «Հայաստանի ազատագրության կրվում զոհված զինվորների զավակներին ձրի դասական (դպրոցական - Ա. Հ.) պիտույքներ մատակարարելու մասին»: Երեք կետից բաղկացած այս նախագիծը բովանդակում էր հետևյալ կետերը.

³² ՀՀ ՊԿՊԱ, Ֆ. 207, ց. 1, գ. 49, մաս 2, ք. 56:

³³ Նույն տեղում, գ. 114, ք. 6:

³⁴ Նույն տեղում:

³⁵ Նույն տեղում, գ. 116, ք. 81, գ. 420, ք. 27:

³⁶ «Հասոջ», 1920, թիվ 6:

³⁷ «ՀՀ օրենքների հավաքածու 1920 թ.», էջ 43:

1) Սկսած 1919 թ. սեպտեմբերի 1-ից պետական գանձարանի հաշվին ձրի դասական պիտույքներ մատակարարել այն բոլոր դպրոցականներին, որոնց ծնողները զոհ են գնացել Հայաստանի ազատագրական պայքարին՝ սկսած 1914 թ. սեպտեմբերի 1-ից:

2) Հիշյալ պիտույքները մատակարարել կամավորների, զինվորների, սպանների, բժիշկների և գթության քույրերի գավակներին:

3) Հիշյալ նպաստի գործը հանձնարարել հանրային կրթության և արվեստի նախարարությանը՝ այդ նպատակի համար տրամադրելով նրան 200 հազար ռուբլի³⁸:

Խորհրդարանի դպրոցական-կրթական հանձնաժողովը վերաքննության է ենթարկում այդ նախագիծը և որոշ ձգձգումներից հետո 1920 թ. հունվարի 5-ին հաստատում հետևյալ բովանդակությամբ. «Պետության հաշվին անվճար դասական պիտույք մատակարարել ՀՀ դպրոցներում սովորող բոլոր այն չքավոր դպրոցականներին, որոնց ծնողները զոհվել են Հայաստանի ազատագրության ու պաշտպանության և հայ ժողովրդի ինքնապաշտպանության համար»³⁹: 5 հունվարի, 1920 թ., խորհրդարան, փոխնախագահ՝ Լ. Շանթ:

Ի կատարումն այս օրենքի՝ նույն օրվա նիստում խորհրդարանն ընդունում է մեկ այլ օրենք, որով 1919/1920 ուստարում վերոհիշյալ կարգախմբի դպրոցական երեխաների համար, պետության հաշվին անվճար դասական պիտույք մատակարարելու նպատակով, բացվում է 100 հազար ռուբլի վարկ⁴⁰:

Հայ գրողների, գիտնականների և հրապարակախոսների նյութական պայմանները քիչ թե շատ մեղմելու նպատակով՝ 1919 թ. հուլիսին նախարարների խորհուրդը հատկացնում է 100 հազ. ռուբլի⁴¹: Հեղինակների երկերի հրատարակության համար հատկացվեց 3,2 մլն ռուբլի, նույնքան գումար էլ՝ գիտական և գեղարվեստական գրականության թարգմանությունների համար⁴²:

1920 թ. ամանորյա առաջին նիստում (թիվ 57) խորհրդարանի դպրոցական-կրթական հանձնաժողովի նախագահ Ս. Թորոսյանը օրինագիծ ներկայացրեց «Հանրային կրթության պաշտոնյաների ռոճիկի հավելման մասին», որն հաստատվեց հաջորդ օրը 27 ձայնով⁴³:

1920 թ. հունվարի 8-ի նիստում նախարար Ն. Աղբալյանը դարձյալ հանդես է գալիս օրենսդրական նախաձեռնության իրավունքով և օրինագիծ է ներկայացնում՝ Հայաստանում և նրա սահմաններից դուրս գտնվող հայ

³⁸ ՀՀ ՊԿՊԱ, ֆ. 199, 1, գ. 98, ք. 44:

³⁹ ՀՀ ՊԿՊԱ, ֆ. 202, գ. 1, գ. 333, ք. 72:

⁴⁰ Նույն տեղում, ք. 73, «ՀՀ օրենքների հավաքածու 1920 թ.», էջ 7:

⁴¹ «Կառավարության լրաբեր», 24 հուլիսի 1919 թ.:

⁴² Ա. Մ. Հակոբյան, Հայաստանի Հանրապետություն, Երևան, 1992, էջ 17-18:

⁴³ ՀՀ ՊԿՊԱ, ֆ. 198, գ. 1, գ. 52, քք. 3-5:

կրթական գործին նպաստելու համար 1,5 մլն ռուբլի վարկ հատկացնելու մասին: Խորհրդարանը, լսելով թերևս և դեմ կարծիքները, 18 ձայնով որոշում է կառավարության 10 միլիոն ռուբլու պահուստային ֆոնդից 1.5 միլիոնը հատկացնել կրթության գործի համար⁴⁴: Բացի այդ, նախարար Ն. Ադրալյանի նախաձեռնությամբ նախահաշիվ կազմվեց՝ Չանգեգուրում բացել 45 տարրական դպրոց՝ 82 դասարաններով, և մեկ միջնակարգ դպրոց⁴⁵: Կրթության և արվեստի նախարարը, հանդես բերելով պահանջկոտություն ու հետևողականություն, 1920 թ. մարտի 13-ի թիվ 1186 գրությամբ ֆինանսների նախարարության բյուջե-գանձարանային բաժնից պահանջում էր, որ հաստատված ժամանակավոր նախահաշիվի իր ենթակայության տակ եղած վարկից, առանց իր կարգադրության, ոչ մի հիմնարկության վարկ չբացել⁴⁶: Այս ամենը ինքնին ցույց է տալիս, թե որքան զգալի են եղել Ն. Ադրալյանի ծառայությունները հայ մշակույթի ու լուսավորական-կրթական գործում:

1920 թ. մարտի 5-ին թիվ 71 նիստում Ավ. Սահակյանի նախագահությամբ ֆինանսբյուջետային հանձնաժողովի անդամ Հ. Սարգսյանը օրինագիծ է ներկայացնում «Վաստակավոր գրողներին օգնելու համար վարկ բանալու մասին»⁴⁷: Պատգամավոր Ս. Վրացյանը առաջարկում է նախատեսված վարկի չափը մեկից հասցնել 1,5 մլն ռուբլու, իսկ էսեռ Ա. Խոնդկարյանը առաջարկում է վարկը բաց թողնել գրողների ընկերությանը: Հանձնարարվում է ավելի ամբողջական օրինագիծ մտցնել խորհրդարան⁴⁸:

1920 թ. ամռանը, Հայաստանի ֆինանսա-տնտեսական ճգնաժամի հետագա խորացման պայմաններում, թանկացումների դեմն առնելու նպատակով ընդունվում է «Օրենք գների բարձրացման մասին»: Օրենքը նախատեսում էր մինչև երկու տարվա բանտարկություն կամ մեկ մլն ռուբլու տուգանք այն անձանց նկատմամբ, ովքեր շահադիտական նպատակով առաջնահերթ անհրաժեշտության ապրանքները (պարեն, վառելանյութ, դեղորայք և այլն) կվաճառեն տնտեսապես չհիմնավորված չափազանց բարձր գներով⁴⁹:

Այսպիսով, չնայած Հայաստանի նյութական սուղ հմարավորություններին ու քաղաքական ոչ այնքան կայուն վիճակին՝ հանրապետության խորհրդարանի ու կառավարության գործունեությունը ունեցել է ընդգծված սոցիալական ուղղվածություն, աշխատավորության շահերը պաշտպանելու միտում, որով էլ ընդգծվում էր երկրի հիմնական քաղաքական դեկավար ուժի՝ ՀՅԳ- սոցիալիստական բովանդակությունը:

⁴⁴ Նույն տեղում, գ. 57, թ. 3:

⁴⁵ ՀՀ ՊԿՊԱ, Ֆ. 202, գ. 1, գ. 339, թ. 6:

⁴⁶ Նույն տեղում, թ. 12:

⁴⁷ ՀՀ ՊԿՊԱ, Ֆ. 198, գ. 1, գ. 52, թ. 22:

⁴⁸ ՀՀ ՊԿՊԱ, Ֆ. 198, գ. 1, գ. 32, թ. 2:

⁴⁹ ՀՀ ՊԿՊԱ, Ֆ. 202, գ. 1, գ. 333, թ. 176:

2. Ֆինանսավարկային հարցերը խորհրդարանում

Հայաստանի խորհրդարանը իր երկամյա գործունեության ընթացքում համապատասխան օրենքներով ու հրահանգումներով կատարել է ֆինանսական հատկացումներ հանրապետության կենսագործունեության ամենատարբեր ոլորտների համար՝ տնտեսական, սոցիալական, կրթամշակութային, պաշտպանական, խնամատարական և այլն⁵⁰:

Հատկանշական է, որ խորհրդարանի կողմից կատարվող ֆինանսական հատկացումների հիմնական մասը գնում էր երկու կարևոր ոլորտների (հողվածների) բանակի ու պաշտպանության և գաղթականության ու որբերի խնամքի վրա: Խորհրդարանը միջոց ու ջանքեր չէր խնայում առաջին հերթին ամրապնդելու ու զորացնելու հայոց բանակը: Գա հատկապես երևում է ֆինանսական այն հատկացումներից, որ արվել են պաշտպանության ու բանակի կարիքների համար: Վարչապետ Ա. Խատիսյանի հաղորդած տվյալներով՝ 1919 թ. կեսերին բանակի վրա ամսական ծախսվում էր 500 մլն. ռուբլի: Ըստ նրա՝ պետբյուջեի ամբողջ ծավալի շուրջ 75 տոկոսը գնում էր բանակի և պաշտպանության նպատակների վրա⁵¹: ՀՀ փորձը ցույց տվեց, որ սեփական բանակ պահելը դժվարին խնդիր է և կապված է հսկայական ծախսերի հետ: Մարտունակ և որակյալ բանակ ունենալու առաջին նախապայմանը, անշուշտ, հզոր տնտեսություն ունենալու մեջ է:

Ֆինանսական հատկացումների մյուս խոշոր բնագավառը բնակչության խնամատարությունն էր ու հատկապես գաղթականների ու որբերի պահպանությունը: Սա դեռ բավական չէր, ՀՀ խորհրդարանն ու կառավարությունը իրենց սուղ հնարավորության պայմաններում հարկադրված էին լինում օգնության ձեռք մեկնել նաև հանրապետության սահմաններից դուրս իր արյունակից եղբայրներին: Այսպես, օրինակ, 1919 թ. դեկտեմբերին խորհրդարանի հաստատմամբ ՀՀ կառավարությունը Ախալքալաքի հայ ազգաբնակչության կարիքների համար հատկացրեց 10 մլն ռուբլի վարկ⁵²: Իսկ 1920 թ. փետրվարին հանրապետության օգնության ֆոնդից նույն գավառի հայ բնակչությանը բաց թողվեց 30 հազ. փութ հացահատիկի սերմացու⁵³:

Խոսելով խորհրդարանի ֆինանսավարկային գործունեության մասին, հարկ է ասել, որ մինչև 1920 թ. մայիսը, այնուամենայնիվ, նա ներագրում ու

⁵⁰ 1919 թ. երկրորդ կեսից ՀՀ ֆինանսական համակարգում արդեն գործածության մեջ էին հայկական չեկերը և այլ դրամանիշեր: Նոյեմբեր ամսին խորհրդարանը թույլատրեց կառավարությանը՝ ֆին. նախարարին, ըստ կարիքի բաց թողնել 400 մլն, իսկ 1920 թ. ապրիլին 500 մլն ռուբլու չեկեր ու այլ դրամանիշեր: (Տես՝ «ՀՀ օրենքների հավաքածու 1919 թ.», էջ 42-43 և «ՀՀ օրենքների հավաքածու 1920 թ.», էջ 62:

⁵¹ «Ճակատամարտ», 3 հուլիսի 1920 թ.:

⁵² ՀՀ ՊԿՊԱ, Ֆ. 199, ց. 1, գ. 14, ք. 123:

⁵³ Նույն տեղում, գ. 118, ք. 38:

չափավորում էր կառավարության տնտեսապես չհիմնավորված քայլերը: Բայց արդեն Բյուրո-կառավարության ժամանակաշրջանից՝ 1920 թ. մայիսից, երբ խորհրդարանը հարկադիր արձակուրդի ուղարկվեց, կառավարության կողմից բաց թողնվեցին տնտեսապես չհիմնավորված հսկայական ֆինանսավարկային միջոցներ, որոնք էլ շատ ավելի մեծ տեմպերով արժեզրկեցին թղթադրամը ու Հայաստանը հայտնվեց ֆինանսական ճգնաժամի մեջ:

Բյուրո-կառավարությունում ֆինանսների նախարարը Ա. Գյուլիսանդանյանն էր, որը մասնագիտորեն այնքան էլ չէր տիրապետում ֆինանսատնտեսական, վարկային ու հարկային քաղաքականության հարցերին: 1920 թ. հունվարին նա արդեն մեկ անգամ սուր քննադատության ենթարկվել էր խորհրդարանում ն. գ. նախարարի պաշտոնում եղած ժամանակ: 1920 թ. երկրորդ կիսամյակում հանրապետության ֆինանսական վիճակի կտրուկ վատթարացումը պետք է բացատրել նաև նրանով, որ խորհրդարանը չէր գործում, չկար օրենսդիր մարմնի վերահսկողությունը կառավարության ֆինանսական գործունեության վրա: Իսկ վերջինս էլ յուրացնելով խորհրդարանի լիազորությունները՝ ֆինանսավորում էր ինքն իրեն՝ ինչպես ուզեր և որքան ցանկանար:

Այդ շրջանում ամենաբուռն կերպով գործում էր միայն թղթադրամի տպագրության մեքենան: Հայկական դրամի արժեզրկման դինամիկան ցույց տալու համար բերենք հետևյալ աղյուսակը⁵⁴:

Օտար դրամների հարաբերակցությունը հայկական չեկերի նկատմամբ 1920 թ.			
1. ԱՄՆ-ի մեկ դոլարը	մարտ հայկ. ռուբլի	մայիս հայկ. ռուբլի	նոյեմբեր հայկ. ռուբլի
	560	1000	28000
2. Թուրքական մեկ լիրան	470	900	20000
3. Վրացական 1000 ռ. բոնեթր	2000	5000	10000

Այսինքն՝ 8 ամսվա ընթացքում հայկական դրամը արժեզրկվել էր ավելի քան 50 անգամ: 1920 թ. 11 ամիսների ընթացքում բաց էր թողնվել արդեն 11 մլրդի հայկական չեկ⁵⁵: Կարելի է վատահ ասել, որ Բյուրո-կառավարությունը ֆինանսատնտեսական առումով ավելի խորացրեց երկրի ֆինանսական ճգնաժամը՝ փաստորեն այն հասցնելով կրախի:

⁵⁴ Գ. Չալխուշյան, Ի՞նչ էր և ի՞նչ պիտի լիներ մեր ուղին, Վիեննա, 1923, էջ 12:

⁵⁵ Գ. Չալխուշյան, նշվ. աշխ. էջ 12:

Ֆինանսների կայունացման երաշխիքը կառավարությունը տեսնում էր Հայաստանի միջազգային ճանաչման մեջ, որը հնարավորություն կտար արտաքին փոխառություններ ու վարկեր վերցնել⁵⁶: Հայաստանի ֆինանսական վիճակի անընդհատ վատացման կապակցությամբ արտասահմանում փոխառություններ կնքելու համար, կառավարության որոշմամբ 1920 թ. հունիսի կեսերին նախկին վարչապետ Ալ. Խատիսյանը գործուղվեց արտասահման⁵⁷: Նախատեսվում էր կնքել 20 մլն դոլարի «Անկախության փոխառություն»⁵⁸:

Ի դեպ, «Անկախության փոխառության» կապակցությամբ ընդդիմադիր Ժողովրդական, Ռամկավար, ՀՄԴ կուսակցությունները, ինչպես նաև «Անկուսակցականների միությունը» հավանություն տվեցին և օժանդակեցին կառավարության այդ ձեռնարկին⁵⁹: Անգամ արտասահմանի հնչակյանները պատրաստակամություն հայտնեցին առանց որևէ նախապայմանի մասնակցել «Անկախության փախառությանը»՝ այն համարելով ազգային, պետական մեծ կարևորության գործ⁶⁰: Փոխառության մարումը պետք է սկսվեր 1925 թ. և ավարտվեր 1930 թ.⁶¹: Բայց դա ի վիճակի չէր փրկելու դրությունը:

Հայաստանի կառավարության ֆինանսատնտեսական քաղաքականության բացթողումներից պետք է համարել այն, որ ներքին ռեսուրսները և դրսից ստացվող վարկերն ու օգնությունը ներդրվում էին ոչ այնքան տնտեսությունը, արտադրողական ուժերը զարգացնելու, հիմնական ֆոնդերը նորացնելու, տեխնիկան ու սարքավորումները կատարելագործելու նպատակով, որքան կենսամթերքներ գնելու, մարդկանց նյութապես օգնելու համար: Միգուցե այդպես էլ պետք է լիներ, քանզի որբերով ու գաղթականներով լեցուն, պատերազմից քայքայված ու անորոշության մեջ գտնվող հանրապետության ազգաբնակչության համար առաջնալինը գոյապահպանության խնդիրն էր:

Ֆինանսավարկային գործունեության հետ է առնչվում նաև առևտրամաքսային քաղաքականությունը: Հայաստանի կառավարությունը իրականացնում էր առևտուրը խրախուսող մաքսային քաղաքականություն: Հանրապետությունում գործում էին առաջին և երկրորդ կարգի հետևյալ մաքսային կետերը՝ Ջուլֆայի, Սարիղամիշի, Կարաուրգանի, Քոլագերանի, Երևանի, Կաղզվանի, Ուզունբալայի, Շահթախթիի, Իգդիրի և այլն⁶²: Մաքսային կետերը առաջնորդվում էին Հայաստանի խորհրդարանի կողմից մշակված և ընդունված կանոնադրությամբ: Հանրապետության ներսում ամեն տեսակ ապրանքների ու կենսամթերքների տեղափոխությունն ազատ էր: Տակավի՛ն

⁵⁶ ՀՀ ՊԿՊԱ, Ֆ. 200, ց. 1, գ. 35, թ. 89:

⁵⁷ Նույն տեղում, գ. 576, թ. 157:

⁵⁸ Նույն տեղում, գ. 511, թ. 79, Ֆ. 199, ց. 1, գ. 176, թթ. 3-4:

⁵⁹ «Հայաստանի ծայն», 22 հունիսի 1920 թ., «Ժողովուրդ», 23 հունիս 1920 թ.:

⁶⁰ «Երիտասարդ Հայաստան», 15 սեպտեմբերի 1920 թ.:

⁶¹ «Հայաստանի կոոպերացիա», 31 հուլիսի 1920 թ. (թիվ 14), էջ 532:

⁶² ՀՀ ՊԿՊԱ, Ֆ. 202, ց. 1, գ. 52, թ. 17:

1918 թ. սեպտեմբերից սահմանվել էր, որ արտասահմանից բոլոր տեսակի ապրանքների մուտքը (ներմուծումը) հանրապետություն ազատ է և մաքսատուրքի (հարկման) ենթակա չէ: Ներմուծվող ապրանքները սահմանագլխին պարզապես պետք է ցուցակագրվեին⁶³:

1919 թ. հունիսի 17-ին ՀՀ դիվ. ներկայացուցիչ Տ. Բեկզադյանը Ադրբեջանի կառավարության հետ կնքեց միմյանց միջև տարանցիկ ազատ առևտրի պայմանագիր, մեկ տարի ժամկետով: Այդ պայմանագրով արտոնվեց Հայաստանին Ադրբեջանից գնելու մինչև 8 մլն. փոք նավթամթերք՝ միջազգային սահմանված գներով⁶⁴: Բայց հայ-ադրբեջանական աննպաստ քաղաքական հարաբերությունները թույլ չտվեցին այս պայմանագիրը հետևողականորեն իրագործել: Ի տարբերություն Ադրբեջանի՝ Հայաստանի հարաբերությունները համեմատաբար ավելի բարվոք էին Վրաստանի հետ: 1919 թ. նոյեմբերի 5-ին ազատ տրանզիտի մասին պայմանագիր է ստորագրվում Վրաստանի հետ, դարձյալ երկու կողմից առանց մաքսատուրքի: Պայմանագիրը կնքվել էր երեք տարի ժամկետով: Ընդ որում՝ կողմերին իրավունք էր տրվում ամեն տարի այն վերանայել ու կրկին վավերացնել: Իհարկե, միջպետական պայմանագրերը վավերացնում էին խորհրդարանները: Հիշյալ պայմանագիրը միաձայն հաստատվում է Հայաստանի խորհրդարանի 1919 թ. նոյեմբերի 11-ի նիստում⁶⁵: Պետք է ասել, որ Հայաստանի խորհրդարանը շատ քիչ առիթներ է ունեցել միջպետական այլաբնույթ պայմանագրեր վավերացնել: Ընդհանուր առմամբ կառավարության առևտրամաքսային քաղաքականությունը առանձնապես չէր նպաստում բյուջեի եկամուտների համալրմանը:

3. Ներգաղթի խնդիրը խորհրդարանում

Հայաստանի խորհրդարանն ու կառավարությունը արևմտահայության՝ դեպի Երկիր ներգաղթի խնդիրը բնականաբար կապում էին Հայկական հարցի բարեհաջող լուծման ընթացքի հետ: Հայկական պատվիրակությունները երբեմն իրենց հակասական գործողություններով տակավին շարունակում էին դիվանագիտական ջանք թափել Եվրոպայի ու Ամերիկայի քաղաքական շրջաններում:

Հայկական հարցի լուծումն արագացնելու և հայ ժողովրդի անվտանգությունը թուրքական հավանական սպառնալիքից պաշտպանելու մտահոգությամբ 1919 թ. օգոստոսին Հայաստանի խորհրդարանը հուշագիր ընդունեց ուղղված Ամերիկայի, Անգլիայի, Ֆրանսիայի, Իտալիայի, Ճապոնիայի,

⁶³ «Հորիզոն», 23 հոկտեմբերի 1918 թ.:

⁶⁴ ՀՀ ՊԿՊԱ, ֆ. 200, ց. 1, գ. 12, քք. 42-43:

⁶⁵ ՀՀ ՊԿՊԱ, ֆ. 202, ց. 1, գ. 333, քք. 52-53, ֆ. 200, ց. 1, գ. 86, քք. 80-81:

Բելգիայի, Սերբիայի, Հունաստանի, Ռումինիայի, Չինաստանի, Իսպանիայի, Նորվեգիայի, Շվեդիայի, Հոլանդիայի, Պորտուգալիայի և Իրանի խորհրդարաններին⁶⁶: Թվարկված երկրները Հայաստանը դիվանագիտորեն ճանաչած ոչ բոլոր պետությունների ցանկն էր: 1919 թ. հուլիսի 17-ին Փարիզի խաղաղության խորհրդաժողովը հրաման էր արձակել՝ հայ գաղթականներին հնարավորություն տալ վերաբնակվելու իրենց նախկին բնակության վայրերում⁶⁷:

1920 թ. գարնանը, երբ մեծ տերությունները փաստացի ճանաչել էին ՀՀ և արդեն մշակվում էր Թուրքիայի հետ ապագա հաշտության պայմանագրի նախագիծը, ավելի գործնական հողի վրա դրվեց աշխարհասփյուռ արևմտահայ գաղթականությանը՝ դեպի Երկիր ներգաղթեցնելու խնդիրը: «Միացյալ Հայաստանի անկախության հայտարարումից հետո,- գրում էր «Հայաստանի աշխատավորը», - ամենամեծ խնդիրը տնտեսության վերականգնման և արևմտահայության ներգաղթի կազմակերպումն էր իր բուն հայրենիք»⁶⁸: Հայաստանի քաղաքական ղեկավարությունը քաջ գիտակցում էր, որ առանց զանգվածային ներգաղթի Միացյալ Հայաստանի գաղափարը կարող էր վերածվել մեռած տառի:

Ներգաղթի խնդիրներով զբաղվող, արևմտահայ գործիչ, պատգամավոր Ա. Մաքսապետյանի ներկայացրած տվյալներով՝ 1919 թ. գարնանը Կովկասում կային 222 հազ. գաղթական, Բաղդադ-Բակուբերում՝ 15 հազ. , Հալեպում՝ 80 հազ., Եգիպտոսում՝ 10 հազ. և այլն⁶⁹: Դեռ 1918 թ. վերջերին, երբ Թուրքիան արդեն պարտվել էր, արևմտահայ հասարակական-քաղաքական գործիչ Ա. Կիտուրը հարց էր բարձրացնում, որ «Տաճկահայը պետք է վերադառնա Երկիր ու տեր դառնա իր երկրին և ունեցվածքին»⁷⁰: Տեղեկություններ կան, որ 1919 թ. ամռանը արևմտահայ գավառներում և Կիլիկիայում եղել է 360 հազար հայ⁷¹:

Հույս էր հայտնվում, որ արևմտահայերի ներգաղթը դեպի Երկիր կթեթևացներ կովկասահայ ժողովրդի վիճակը: Արևմտահայ մի ստվար հատված կար Հյուսիսային Կովկասում, ուր մինչև 1920 թ. գարունը տնօրինում էր Դեմիկիմը: ՀՀ կառավարության հարաբերությունները Դեմիկիմի իշխանության հետ բարեկամական էին (քացի ռազմաքաղաքական ու տնտեսական հանգամանքներից) մաս ալն ակնկալիքով, որ այնտեղ կար հարյուր հազարի չափ հայ գաղթականություն, որ գտնվում էր քիչ թե շատ տանելի պայմաններում⁷²: Ծրագրվում էր այստեղի գաղթական հայությանը կամ ծովով կամ էլ

⁶⁶ «Սոցիալիստ հեղափոխական», 26 օգոստոսի 1919 թ.:

⁶⁷ Ա. Ահարոնյան, Մարդարասպատից մինչև Սեյր և Լոզան (քաղաքական օրագիր), Պոսթըն, 1943, էջ 28:

⁶⁸ «Հայաստանի աշխատավոր», 20 հունիսի 1919 թ.:

⁶⁹ Նույն տեղում:

⁷⁰ «Կայծ», 29 դեկտեմբերի 1918 թ.:

⁷¹ «Կայծ», 27 հունիսի 1919 թ.:

⁷² Ռուբեն, նշվ. աշխ., հ. Է, Լոս Անջելոս, 1952, էջ 258:

Վրաստանի վրայով փոխադրել Երկիր: Կան բազմաթիվ փաստեր ու վկայություններ, որ նման ծրագրի իրագործման ճանապարհին զանազան խոչընդոտներ ու կամայականություններ է հարուցում Վրաստանը⁷³: Պետք էր ներգաղթեցնել ոչ միայն Կովկասում ապաստանած արևմտահայերին, այլև Սիջագետքի գաղթականությանը: 1920 թ. ապրիլի 3-ի նիստերից մեկում խորհրդարանը (40 կողմ և 5 ձեռնպահությամբ) ընդունում է որոշում խնամատարության նախարարության անունով բացել 5 մլն ռուբլի վարկ Բակուբեում (Սիջագետք) գտնվող 18 հազար եղեռն վերապրած գաղթականներին և մահմեդականների մոտ գտնվող հայ գերիներին ազատելու համար⁷⁴:

Օձև 1920 թ. մարտ ամսից ն. գ. նախարարությունում հիմնվել էր ներգաղթի հանձնաժողով, որը պետք է կազմակերպեր արևմտահայության ներգաղթը դեպի Երկիր, բայց այդ գործը կապված էր մշտական վտանգների ու մեծ ծախսերի հետ, ուստի և այն շատ դանդաղ էր ընթանում⁷⁵: Նախնական հաշվարկներ էին արված, որ Կովկասից դեպի Երկիր պետք է ներգաղթեցվեին 300 հազար մարդ: Այս ծրագրի իրագործման համար կպահանջվեր 3 մլրդ. ռուբլի:

Կառավարությունն ու խորհրդարանը գտնում էին, որ քանի դեռ արևմտահայերի ներգաղթի համար չեն ստեղծված բավականաչափ քաղաքական և տնտեսական պայմաններ, հնարավոր չէ նրանց ներգաղթեցման արագացումը: Իսկ մինչ այդ ՀՀ-ում աշխատում էին նրանց կյանքի, աշխատանքի ու կենցաղի համար ապահովել քիչ թե շատ բավարար իրավաբանական և տնտեսական պայմաններ: ՀՀ արևմտահայ գաղթականների համար՝ որպես Սիսիակյալ և Անկախ Հայաստանի քաղաքացիների, բնականաբար, ևս սահմանվեցին ոչ միայն իրավունքներ, այլև պարտականություններ: Օրինակ, արևմտահայ երիտասարդության համար ևս սահմանվեց գորկոչի պարտականություն:

1920 թ. մարտի 1-ի օրենքով՝ արդարադատության նախարարության դիվանին կից ստեղծվեց արևմտահայ իրավագիտական բաժին՝ երեք հոգուց բաղկացած⁷⁶: Այդ մարմինը մասնակցելու էր ՀՀ նոր մշակվող օրենսդրության (օրենսգրքերի) մեջ արևմտահայ հատվածի ընտանեկան, ժառանգական և առհասարակ կյանքի առանձնահատկությունների հաշվառման ու համապատասխան ոգով փոփոխություններ մտցնելու գործին:

Դեպի Երկիր արևմտահայության ներգաղթի խնդրով ջանադրորեն զբաղվում էին Հայաստանի կառավարությունը, Փարիզում գտնվող հայկական պատվիրակությունները: Փարիզի խաղաղության կոնֆերանսի բացումից ի վեր, անցած 14 ամիսների ընթացքում, Հայաստանի կառավարությունը և ՀՀ կառավարական պատվիրակությունը ընդհանուր թվով մինչև 36 դիմում

⁷³ Նույն տեղում, էջ 259:

⁷⁴ ՀՀ ՊԿՊԱ, Ֆ. 198, ց. 1, գ. 79, քք. 2-3:

⁷⁵ ՀՀ ՊԿՊԱ, Ֆ. 199, ց. 1, գ. 118, ք. 47:

⁷⁶ ՀՀ ՊԿՊԱ, Ֆ. 202, ց. 1, գ. 333, ք. 82:

են արել Դաշնակից տերություններին՝ տաճկահայերի ներգաղթի վերաբերյալ⁷⁷: Տարբեր երկրներում պետական և հասարակական մակարդակներով կազմակերպվում էին քարեգործական հանգանակություններ: ԱՄՆ-ում հանգանակվել էին 20 մլն դոլարի իրեր ու ապրանքներ, որոնք պետք է բաշխվեին Երկիր գնացող ժողովրդին: Իսկ Անգլիայում նվիրատվության ձևով հավաքել էր 40 հազ. ֆունտ ստեռլինգ, որը նույնպես ծախսվելու էր գաղթականների ներգաղթի ժամանակ իրականացվող վերաշինության համար⁷⁸: Պետք է ասել, որ նմանատիպ հանգանակությունների կազմակերպման խնդրում, հատկապես ԱՄՆ-ում կազմակերպչական ու քարոզչական զգալի աշխատանքներ տարան Հ. Քաջազունին, Անդրանիկը, Գ. Փաստրմաճյանը, Ա. Էնֆիաջյանը և ուրիշներ: Միայն Անդրանիկի ղեկավարությամբ կազմակերպված փրկության հանգանակության գումարը կազմեց 532 հազար դոլարից ավելի⁷⁹:

Խորհրդարանն իր վերաբերմունքը ցուցաբերեց Կիլիկիայում սրվող իրադարձություններին: Մարտ 15-ին մի շարք պատգամավորների հարցապնդումով քննվեց և գնահատական տրվեց Կիլիկիայում տեղի ունեցող հայկական ջարդերին: Խորհրդարանը եկավ այն ճշմարիտ հետևությանը, որ կիլիկիահայությունը ենթարկվել է սադրանքի, որի մեջ մեղսակցության ամենամեծ բաժինն ունի Ֆրանսիան⁸⁰: «Ժամանակակից պատմության մեջ,- գրում է հնչակյան պաշտոնաթերթերից մեկը,- գրեթե օրինակը չկա այն եղեռնագործության, որին ընդունակ եղավ հասնելու կապիտալիստ Ֆրանսիան»⁸¹:

Հիրավի, Ֆրանսիան, որ մինչ այդ ստանձնել էր Կիլիկիայի հովանավորությունը և այդ թվում՝ կիլիկիահայության ինքնավարության պաշտպանությունը, շուտով թուրք-ֆրանսիական համաձայնությամբ իր զինված ուժերը դուրս է բերում Կիլիկիայից և տեղի հարյուր հազարավոր հայությանը թողնում թուրքական բանդաների երախում: Այդ ընթացքում մի շարք քաղաքներում (Հաճն, Մարաշ, Ադանա և այլն) խոշոր ջարդեր եղան, և կենդանի մնացած հայության բեկորները հեռանում են Կիլիկիայից ու հարկադրված արտագաղթում դեպի հարևան արաբական երկրներ՝ Կիպրոս, Եվրոպա, Ամերիկա և այլուր:

1920 թ. կեսերից միջազգային-քաղաքական հարաբերությունները Հայաստանի համար այնպես անհաշող դասավորվեցին, որ ոչ միայն ներգաղթի խնդիրը փակվեց, այլև բուն արևմտահայ մահանգներում ապաստանած գաղթական խմբաքանակները հարկադրված էին մասամբ արտագաղթել իրենց հայրենիքից, մասամբ էլ ծալվելով՝ աստիճանաբար կրոնափոխվել և ուժացվել:

⁷⁷ ՀՀ ՊԿՊԱ, ֆ. 198, ց. 1, գ. 79, ք. 4:

⁷⁸ Նույն տեղում:

⁷⁹ Հ. Ռ. Միմոնյան, *Անդրանիկի ժամանակը*, գ. 2, Երևան, 1996, էջ 618:

⁸⁰ «Հասոջ», 17 մարտի 1920 թ.:

⁸¹ «Երիտասարդ Հայաստան», 22 հոկտեմբերի 1920 թ.:

4. Բանակի և Արցախի խնդիրները խորհրդարանում

Հայաստանի կառավարությունն ու խորհրդարանն առանձնահատուկ ուշադրություն էին դարձնում բանակի ամրապնդման հարցերին: Հանրապետության բյուջետային հատկացումների ամենամեծ հոդվածը, անտարակույս, ռազմական-պաշտպանական ծախսերն էին: Երբեմն զինվորական մախարարության անունով վարկեր էին բացվում՝ առանց նախահաշիվների: Այսպես, օրինակ, 1919 թ. սեպտեմբերի 6-ի օրենքով, զինվորական մախարարությանը նախահաշիվից դուրս բացվեց 11,7 մլն ռուբլի վարկ՝ ամերիկացիներից գորքի համար կոշիկներ գնելու նպատակով⁸²:

Անգլիացիներից 600 ջորի, 150 սայլ և զինվորական հանդերձանք գնելու համար խորհրդարանի 1919 թ. օգոստոսի 30-ի օրենքով՝ գորական մախարարությանը բաց թողնվեց 12 մլն ռուբլի⁸³: Փոքր ուշ, բանակի պարենավորման և բանող ուժի կերակրման համար, մախարարությանը հատկացվեց 9.3 մլն ռուբլի⁸⁴: Արդեն 1920 թ. գարնանը բանակի համբարակային կարիքների համար բացվեց 85,4 մլն ռուբլու վարկ⁸⁵: 1920 թ. ապրիլին գորական մախարարության հոդվածով (հաշվեհամարով) բաց թողնվեց 35,6 մլն ռուբլի վարկ⁸⁶: Նույն ամսին մախարարների խորհրդի արտակարգ քաղաքական ծախսերի համար (այսպես է հիմնավորված օրենքում) բացվում է շուրջ 40 մլն ռուբլի վարկ⁸⁷:

Ֆինանսական հատկացումներ էին կատարվում ոչ միայն բանակի կերակրման ու հանդերձավորման, այլև, դրսից կախում չունենալու նպատակով, սեփական ռազմամթերք արտադրելու ուղղությամբ: Այսպես, 1919 թ. սեպտեմբերի 16-ի օրենքով, մարտական գնդակներ պատրաստելու և փամփուշտներ լցնելու արհեստանոց հիմնելու համար, բացվեց 6 մլն ռուբլի վարկ⁸⁸: Իսկ մեկ այլ՝ հոկտեմբերի 3-ի օրենքով, Ալեքսանդրապոլի հրանոթային արհեստանոցների կազմակերպման ու կահավորման համար, կառավարության խնդրանքով խորհրդարանը որոշեց հատկացնել 2, 172 հազ. ռուբլի⁸⁹:

Բանակի զորացմանը ուղղված հատկացումներին բոլոր խմբակցությունները չէ, որ համաձայն էին: Այսպես, Էսեռական խմբակցությունը որպես կանոն ձեռնպահ է մնացել և չի մասնակցել քվեարկություններին⁹⁰: Եթե ասենք հայոց բանակին ռազմական վարկեր տրամադրելու հարցում թուրք խմբակցությունը չէր ներկայանում միստին կամ դեմ էր քվեարկում. դա ինք-

⁸² ՀՀ ՊԿՊԱ, Ֆ. 200, ց. 1, գ. 86, ք. 41:

⁸³ ՀՀ ՊԿՊԱ, Ֆ. 200, ց. 1, գ. 86, ք. 41:

⁸⁴ Նույն տեղում, ք. 72:

⁸⁵ «ՀՀ օրենքների հավաքածու 1920 թ.», էջ 52-53:

⁸⁶ ՀՀ ՊԿՊԱ, Ֆ. 202, ց. 1, գ. 333, ք. 159:

⁸⁷ Նույն տեղում, ք. 160:

⁸⁸ Նույն տեղում, ք. 9:

⁸⁹ «ՀՀ օրենքների հավաքածու 1919 թ.», էջ 22-23:

⁹⁰ «Սոցիալիստ հեղափոխական», 9 հոկտեմբերի 1919 թ.:

նին հասկանալի է, իսկ ի՞նչ անուն տալ հայ էսէնների խմբակցության նման վարքագծին:

Գրամի աղետալի տեմպերով արժեզրկման պայմաններում արդեն 1920 թ. երկրորդ կիսամյակում ռազմական նախարարության գլխավոր համբարակային վարչության համար հաստատված նախահաշիվը կազմել էր շուրջ 2,4 մլրդ ռուբլի վարկ⁹¹:

Հանրապետության զինված ուժերին, խորհրդարանական հատկացումներից զատ, օգնություն էին ցույց տալիս նաև առանձին կուսակցություններ ու անհատ բարերարներ: Կուսակցական խողովակներով կամ անհատական կարգով հանրապետության պաշտպանության նպատակներին ավելի հաճախ օգնություն էին ցուցաբերում Հայ սահմանադիր ռամկավարների արտասահմանյան կազմակերպությունները: Հարկ է նշել, որ ռամկավարների արտասահմանյան կազմակերպությունների և անհատ գործիչների վերաբերմունքը դեպի ՀՀ իշխանությունները եղել է ավելի լոյալ ու բարյացակամ, քան Հայ ժողովրդականներինը: 1919 թ. փետրվարին Պողոս Նուբար փաշայի կողմից հայկական զորքի կարիքները հոգալու նպատակով, ստացվել էր 502270 ֆրանկ⁹²: Միաժամանակ սեփական միջոցներով գնել էր մեկ ինքնաթիռ: 1920 թ. մայիսին Հայաստանի անկախության երկրորդ տարեդարձի առթիվ եզիպտահայ մեծահարուստ Ղարիբ Գառնուկը Հայաստանին էր նվիրել ինքնաթիռ⁹³: Չնայած Ս. ռամկավար կուսակցությունը քննադատում էր դաշնակցական կառավարությանը և շատ խնդիրներում համաձայն չէր նրա վարած քաղաքականությանը, սակայն դա ամենևին էլ չէր խանգարում, որ անհրաժեշտության դեպքում օգներ ու աջակցեր հայոց պետականության ամրակայմանը: Պետք է ասել, որ հիմնականում այդպես էին մտածում ու գործում հայ ազգային մյուս կուսակցությունները:

Հայ Ս. ռամկավար կուսակցության Եզիպտոսի շրջանային կենտրոնական խորհուրդը 1920 թ. ամռանը որոշեց 50 մարտական ինքնաթիռ նվիրաբերել Հայաստանին, որոնցից 10-ը պիտի հատկացվեին Կիլիկիայի ինքնապաշտպանությանը, իսկ 40-ը՝ Հայաստանի Հանրապետությանը⁹⁴: Եզիպտահայ ռամկավարները դեռ մեկ տարի առաջ՝ 1919 թ. կեսերին Պ. Նուբար փաշայի անձնական միջնորդությամբ նման հարցով դիմել էին Եզիպտոսի անգլիական զինվորական իշխանության ներկայացուցիչներին՝ իրենց սեփական միջոցներով նման խմբաքանակով ինքնաթիռներ գնելու⁹⁵: Ս. ռամկավար կուսակցության Եզիպտոսի շրջանային մարմինը 1920 թ. ապրիլ-օգոստոս ամիսների ընթացքում, բանակցելով անգլիական զինվորական իշխանությունների հետ և ստանալով անգլիական կառավարության արտոնագիրը,

⁹¹ ՀՀ ՊԿՊԱ, ֆ. 198, ց. 1, գ. 58, թ. 68:

⁹² ՀՀ ՊԿՊԱ, ֆ. 199, ց. 1, գ. 14, թ. 31:

⁹³ ՀՀ ՊԿՊԱ, ֆ. 200, ց. 1, գ. 576, թ. 154:

⁹⁴ «Ժողովրդի ծայն», Կ. Պոլիս, 15 օգոստոսի 1920 թ.:

⁹⁵ «Հայաստանի ծայն», 18 սեպտեմբերի 1920 թ.:

գեղջ գներով (մեկ ինքնաթիռը՝ 100 եգիպտական ոսկի) գնում են 20 ինքնաթիռ⁹⁶։ Միաժամանակ ծրագրվում է պատրաստել 50 արհեստավարժ օդաչուներ։ Այս խնդիրն էլ իրենց վրա են վերցնում Ս. ռամկավարների Ամերիկայի և Իզմիրի շրջանակները⁹⁷։ Արդեն 1920 թ. օգոստոսին այդ ինքնաթիռների գնումը ավարտվել էր և մնում էր դրանց փոխադրումը հայրենիք։ Հիշյալ ինքնաթիռները պիտի անվանվեին դրանց գնող-նվիրատուների անուններով, իսկ ամբողջ խմբաքանակը «Հայ ռամկավարների օդային տորմիլ»⁹⁸։ Բայց մինչ Հայ Ս. ռամկավարները այս հայրենանվեր խնդիրներով էին զբաղված, Հայաստանում իրադարձությունները այլ ընթացք ստացան։ Այն բանից հետո, երբ հայ-թուրքական պատերազմից հետո Հայաստանը խորհրդայնանում է, անգլիական իշխանությունները այլևս թույլ չեն տալիս, որ գնված ինքնաթիռները ուղարկվեն Հայաստան։

*

*

*

Մեզանում տարածված է այն տեսակետը, թե ՀՀ բարձրագույն իշխանությունները՝ խորհրդարանը և կառավարությունը, բավարար ուշադրություն ու հետևողականություն չեն ցուցաբերել Արցախի խնդրում, և որ իբր դրա համար էլ նա վերջին հաշվով հայտնվեց Ադրբեյջանի վարչատարածքային սահմաններում։ Սակայն որքան էլ ծանր էր Հայաստանի սոցիալ-տնտեսական ու քաղաքական վիճակը, հանրապետության կառավարությունը անում էր հնարավորին ամեն ինչ տեր ու պաշտպան կանգնելու արցախահայության արդար դատին՝ «Ղարաբաղը համարելով անբաժանելի մասը Միացյալ և Անկախ Հայաստանի հանրապետության»⁹⁹։ Նույն կերպ Արցախին իր համակողմանի աջակցությունն է ցույց տվել Հայաստանի խորհրդարանը։ Նրա նիստերում պարբերաբար քննարկումների նյութ է դարձել Արցախի խնդիրը։ Արցախին օգնելու նպատակով դեռ 1919 թ. կեսերին հիմնվել էր դրամական ֆոնդ՝ 8 մլն ռուբլու չափով։ Այդ գումարից 1.5 մլն-ը հատկացվում է «Ղարաբաղի գորամաս» կազմակերպելու համար։ Նորակազմ գորամասը բաղկացած էր մեկ հեռուստ կուսակցականից, 2 լեռնային հրանոթից և 54 հեծյալ հետախույզներից¹⁰⁰։ Համանման օգնություն և այլ ծախսեր կազմակերպելու միջոցով շուտով Արցախի կարիքների համար հատկացված 8 մլն ռուբլու ֆոնդը

⁹⁶ Մ. Գ. Ճիզմենյան, Պատմություն ամերիկահայ քաղաքական կուսակցությանը 1890-1925, Ֆրեզնո, 1930, էջ 412:

⁹⁷ Նույն տեղում:

⁹⁸ «Հայաստանի ծայն», 14 սեպտեմբերի 1920 թ.:

⁹⁹ Ռուբեն, նշվ. աշխ., հ. Է (7), Լոս Անջելես, 1952, էջ 205:

¹⁰⁰ ՀՀ ՊԿՊԱ, Ֆ. 199, ց. 1, գ. 14, մաս 1, ք. 132:

սպառվում է, և կառավարությունը հարց է բարձրացնում կրկին 8 մլն ռուբլու վարկ բացելու մասին¹⁰¹:

Արցախին օգնություն էր ցույց տրվում ոչ միայն պետական-կառավարական մակարդակով, այլ նաև ՀՅԴ կուսակցական խողովակներով: Այսպես, օրինակ, 1919 թ. ամռանը ՀՅԴ Բաքվի կենտրոնական կոմիտեն Ղարաբաղի Ազգային խորհրդին էր տրամադրել (փոխանցել) 1.06 մլն. ռուբլու օժանդակություն¹⁰²: Այնպես որ՝ Հայաստանի խորհրդարանը, կառավարությունը, ինչպես նաև ՀՅԴ-ն որպես կառավարող կուսակցություն, Արցախյան խնդրի պասիվ դիտողի դերում չեն գտնվել, այլ հնարավոր բոլոր միջոցներով աշխատել են այն միավորված տեսնել ՀՀ կազմում:

Դեռ 1919 թ. վերջերին Դրոն իր գորամասով ուղեվորվել էր Չանգեզուր: ՀՀ կառավարությունը Չանգեզուրի միջոցով օգնում էր Ղարաբաղին թե՛ դրամով և թե՛ դիվանագիտական լծակներով: ՀՅԴ Բյուրոյի կողմից «Արտակարգ գործերի» ղեկավար նշանակված Արսեն Միքայելյանը կապ էր հաստատել Դրոյի հետ¹⁰³:

Արցախ-Չանգեզուրում ծավալվող դեպքերի քննությանն էր ամբողջովին նվիրված խորհրդարանի 1920 թ. ապրիլի 3-ի թիվ 78-րդ նիստը: Նիստում ընդարձակ ու հանգամանալի զեկուցումով հանդես եկավ վարչապետ և արտ. գործ. նախարար Ալ. Խատիսյանը¹⁰⁴: Ինչպես հայտնի է, մարտի վերջերին տեղի էր ունեցել Շուշիի և այլ բնակավայրերի հայության կոտորածները: Վարչապետն իր զեկուցման մեջ բացահայտում է Ադրբեջանի կառավարության նեմզ դավերը և հայաջինջ ծրագրերը: Մարտիվերջյան դեպքերից հետո խորհրդարանի հավանությամբ և Հայաստանի կառավարության հանձնարարությամբ տարածաշրջանի հայությանը օգնության է հասնում հայկական գորամասը՝ Դրոյի հրամանատարությամբ: Տեղում հայ ժողովրդի պայքարը ազատության և անկախության համար ղեկավարում էր Ղարաբաղի հայ ազգային խորհուրդը, որն 1918 թ. մայիսից մինչև 1920 թ. մայիսը, իր հրավիրած տասը համագումարներում և դրանից հետո էլ չի ընդունել և չի ճանաչել Ադրբեջանի իշխանությունը¹⁰⁵: Համատեղ ջանքերի շնորհիվ Լեռնային Ղարաբաղը գործնականում միացվում է Հայաստանի Հանրապետությանը:

Մեկ ամիս անց՝ ապրիլի վերջերին, Ադրբեջանում և դրա հետ կապված՝ Արցախի ու Չանգեզուրի հիմնահարցի առընչությամբ ծավալվեցին շատ ավելի մեծ իրադարձություններ: Այս կապակցությամբ 1920 թ. մայիսի 3-ին հրավիրվեց խորհրդարանի արտահերթ նիստ: Նիստում լսվեց ու քննարկվեց արտ. գործ. նախարար Հ. Օհանջանյանի հաղորդումը վերջին շաբաթվա ըն-

¹⁰¹ ՀՀ ՊԿՊԱ, Ֆ. 199, ց. 1, գ. 14, մաս 1, թ. 15:

¹⁰² ՀՀ ՊԿՊԱ, Ֆ. 199, ց. 1, գ. 76, թ. 10:

¹⁰³ Դրո, Ե., 1991, էջ 271:

¹⁰⁴ Այդ մասին հանգամանալից տես՝ «Առերեսում», 1995, թիվ 14, էջ 4-5:

¹⁰⁵ Л. А. Хуршудян, Истина-единственный критерий исторической науки, Е., 1989, . 9-25.

քացքում Անդրկովկասում և հատկապես Ադրբեջանում կատարված քաղաքական դեպքերի մասին, դեպքեր, որոնք ուղղակիորեն առնչվում էին Հայաստանի հետագա ճակատագրին: Այն ժամանակ, երբ ադրբեջանական 10 հազարանոց կանոնավոր և նույնքան էլ կամավոր զորքեր ուղարկվել էին Ղարաբաղ, և որոնք զբաղված էին տեղի բնակչության կոտորածով, այդ նույն ժամանակ Ադրբեջանի հյուսիսային սահմանին հայտնված 11-րդ Կարմիր բանակը ապրիլի 28-ին մուտք գործեց Բաքու և Ադրբեջանը խաղաղ ճանապարհով հայտարարվեց խորհրդային: Այս թավշյա հեղաշրջման նպատակն էր Կարմիր բանակի ուժերի միջոցով լուծել մուսավաթականների ծրագիրը՝ գրավել և Ադրբեջանին միացնել հայկական տարածքները (Ղարաբաղը, Չանգեզուրը, Շարուր-Նախիջևանը), դրանով իսկ «լուծել իրենց ազգային խնդիրները»¹⁰⁶: Խորհրդային Ռուսաստանն էլ իր հերթին հույսեր էր փայփայում, համաշխարհային հեղափոխության կարգախոսով, ապահովել Հայաստանի վրայով Խ. Ռուսաստանի և «Կարմիր» Ադրբեջանի ցամաքային կապը իրեն «հեղափոխական հայտարարած քեմալական Թուրքիայի հետ՝ Անտանտի դեմ համատեղ պայքարելու և համաշխարհային հեղափոխության կրակը ամբողջ Արևելքի մուսուլմանական երկրները տարածելու համար»: Ի կատարումն այդ ծրագրի՝ Ադրբեջանի խորհրդայնացումից տառաջիորեն երկու օր անց՝ ապրիլի 30-ին, ստացվեց Ադրբեջանի խորհրդային հանրապետության արտ. գործ. կոմիսարի պաշտոնակատար Հուսեյնովի վերջնագիրը՝ ուղղված Հայաստանի կառավարությանը: Նրանում ասված էր. «Ադրբեջանի խորհրդային բանվորագյուղացիական կառավարությունը, հանձինս հեղափոխական կոմիտեի, պահանջում է նախ՝ մաքրել ձեր զորքերից Ղարաբաղի և Չանգեզուրի տարածքը, երկրորդ՝ քաշվել դեպի ձեր սահմանները, երրորդ՝ դադարեցնել ազգամիջյան կոտորածը: Հակառակ դեպքում, Ադրբեջանի Խորհրդային Սոցիալիստական Հանրապետության հեղափոխական կոմիտեն իրեն կհամարի պատերազմական դրության մեջ Հայաստանի Հանրապետության հետ: Վերջնագրի պատասխանի համար տրվում է երեք օր ժամանակ»¹⁰⁷: Վերջնագրում Նախիջևանի անունը չի հիշատակված այն պարզ պատճառաբանությամբ, որ սկսած 1919 թ. կեսերից Նախիջևանը չէր ենթարկվում ՀՀ-ին, ուստի և նրանք Նախիջևանի հարցը գործնականում համարում էին լուծված:

Հաջորդ օրը՝ մայիսի 1-ին, Հուսեյնովի վերջնագրից մի քանի ժամ հետո, ստացվեց նույնաբանությամբ մեկ այլ վերջնագիր Կովկասյան ռազմաճակատի ռազմահեղափոխական խորհրդի նախագահ Օրջոնիկիձեի և անդամներ՝ Կիրովի, Մեխանդչինի և Լևանդովսկու ստորագրությամբ: Ստորև դարձյալ բերում ենք վերջնագրի տեքստն ամբողջությամբ, որպեսզի ընթերցողը համոզվի, թե ինչ ընդհանուր կապ ու նմանություն կան այդ երկու վերջնագրերի միջև:

¹⁰⁶ Հ. Ռ. Միմոնյան, *Թուրք-հայկական հարաբերությունների պատմությունից, Երևան, 1991, էջ 400:*

¹⁰⁷ «Հայաստանի պառլամենտի 1920 թ. մայիսի 3-ի արտակարգ նիստը, Ե., 1920, էջ 6, ՀՀ ՊԿՊԱ, Ֆ. 200, ց. 1, գ. 271, ք. 206:

«Հայաստանի և մեր բարեկամ դաշնակից Խորհրդային Ադրբեջանի սահմաններում շարունակվում են պատերազմական գործողությունները Հայաստանի և Ադրբեջանի միջև: Ռուսաստանի բանվորագյուղացիական կառավարությունն իր սրբազան պարտքն է համարում ամբողջ ուժով օգնության հասնել Ադրբեջանի բոլոր աշխատավորների անունից իրեն դիմող Ադրբեջանի բանվորագյուղացիական կառավարությանը, հաստատելու այնտեղ բանվորագյուղացիական իշխանություն: ՌՍՖՍՀ հանրապետության անունից առաջարկում են Հայաստանի կառավարությանը անմիջապես դադարեցնել պատերազմական ամեն գործողությունները Խորհրդային Ադրբեջանում և դուրս բերել իր զորքերը նրա սահմաններից: Այդ պետք է կատարվի 24 ժամվա ընթացքում այս առաջարկությունն ընդունելուց հետո: Այս առաջարկության չիրականացումը կընդունվի ՌՍՖՍՀ հանրապետության կողմից իբրև պատճառ պատերազմական գործողությունների, իսկ ամբողջ պատասխանատվությունն այս բանում կընկնի Հայաստանի կառավարության վրա»¹⁰⁸: Ինչպես նկատում ենք, երկու դեպքում էլ ձեռագիրը գրեթե նույնն է: Ի դեպ, նշենք, որ ՀՀ ուղղված այս երկու վերջնագրերի ստույգությանը այդ օրերին չէին հավատում մայիսյան ապստամբությանը նախապատրաստվող հայ բոլշևիկները և դա համարում էին Դաշնակցության հնարած սադրանք¹⁰⁹:

Խորհրդարանի արտահերթ նիստում իր հաղորդման ընթացքում նախարար Հ. Օհանջանյանը պատգամավորներին տեղյակ պահեց այդ վերջնագրերի ու այլ փաստաթղթերի մասին: Այնուհետև, արտ. գործ. նախարարը տեղեկացնում է, որ Հայաստանի կառավարությունը, հերքելով վերջնագրերում պարունակված մեղադրանքները, զուսպ և փաստարկված կերպով պատասխանել է դրանց: Մասնավորապես նա իր պատասխանում պարզաբանեց, որ Ադրբեջանի տարածքի վրա հայկական զորքեր չեն եղել ու չկան և որ, ընդհակառակը, «Մուսավաթական կառավարության զորքերն ու կազմակերպած բանդաները մինչև այժմ շարունակում են մնալ Հայկական Դարաբադի շրջանում՝ կոտորելով հայ գյուղացիությանը և այրելով Շուշի քաղաքի հայկական մասն ու բազմաթիվ գյուղերը»¹¹⁰:

Միաժամանակ հեռագրեր են ուղարկվել Լենինին և Չիչերինին¹¹¹: Հ. Օհանջանյանը առաջարկում էր վերջնագիր ներկայացնող կողմին դադարեցնել բոլոր ռազմական գործողությունները և սահմանների վերջնական որոշման ու դրացի հանրապետությունների միջև նորմալ հարաբերություններ հաստատելու համար Հայաստանի կառավարության հետ բանակցություններ սկսել¹¹²: Այլ խօսքով, Հայաստանի կառավարությունը այդ վերջնագրերին

¹⁰⁸ «Հայաստանի պառլամենտի 1920 թ. մայիսի 3-ի արտակարգ նիստը», Ե., 1920, էջ 6-7, «Բանվորի ձայն», 9 մայիսի 1920 թ.:

¹⁰⁹ ՀՀ ՊԿՊԱ, Ֆ. 199, գ. 1, գ. 138, թ. 75:

¹¹⁰ «Հայաստանի պառլամենտի 1920 թ. մայիսի 3-ի արտակարգ նիստը», Երևան, 1920 թ. էջ 7:

¹¹¹ Նույն տեղում:

¹¹² Նույն տեղում, էջ 9:

պատասխանել է խաղաղասիրական առաջարկություններով՝ բոլոր վիճելի հարցերը լուծել փոխադարձ համաձայնութեամբ:

Օհանջանյանի զեկուցման կապակցությամբ ելույթներ ունեցան ՀՅԳ խմբակցության անդամներ՝ Ս. Թորոսյանը, Սեպուհը, Ա. Շիրինյանը, Գ. Բալասյանը, Ա. Հովհաննիսյանը: Պատգամավոր Ս. Թորոսյանը հայտարարեց, որ «Ադրբեջանի կոմունիստ դառնալը» կեղծիք է և նրա վերջնագրին մենք պետք է պատասխանենք Ղարաբաղն ու Ջանգեզուրը Հայաստանին միացնելով¹¹³: Իսկ Սեպուհն իր ելույթում զարգացնում էր այն միտքը, որ Ադրբեջանը խորհրդային է դարձել այն նպատակով, որ «իր գորքերը Հայաստանի վրայով միացնեն Տաճկաստանի «Կարմիր» գորքերին»¹¹⁴: ՀՅԳ խմբակցության անդամները հավանություն են տալիս կառավարության ձեռնարկած քայլերին ու վարած քաղաքականությանը:

Էսէռական խմբակցության կողմից հանդես եկան պատգամավորներ Լ. Թումանյանը և Ա. Խոնդկարյանը: Թումանյանը, պատասխանելով իր գաղափարաքաղաքական ընդդիմախոսներին, չհամաձայնվեց նրանց արտահայտած այն մտքին, թե Բաքվում կատարվածը կեղծիք է: Նա Բաքվի ապրիլի 28-ի դեպքերը որակեց որպես հեղաշրջում¹¹⁵: Այս խմբակցության անդամներ՝ Լ. Թումանյանը, Ա. Խոնդկարյանը, Վ. Սինախորյանը, գոտեպնդվելով Կարմիր բանակի մուտքով և Ադրբեջանի խորհրդայնացմամբ, գտնում էին, որ այժմ հերթը հասել է Հայաստանի «Մուսավաթին»՝ «Դաշնակցությանը», որպեսզի հեռանա ասպարեզից և Հայաստանը խորհրդայնանա¹¹⁶:

Խորհրդարանական քննարկումների արդյունքում ընդունվեց համապատասխան որոշում: Հովակիմ Բուդաղյանը ՀՅԳ խմբակցության կողմից առաջարկեց հետևյալ բանաձևը. «Լսելով արտ. գործ. նախարարին հայտնածը Ադրբեջանի կառավարության վերջնագրի և նախարարի պատասխանի մասին՝ խորհրդարանը հավանություն է տալիս տված պատասխանին և հրահանգում է կառավարությանը ինքնապաշտպանության բոլոր միջոցները ձեռք առնել ապահովելու հայ ժողովրդի ֆիզիկական գոյությունը և ազատ հայրենիքի անկախությունը»¹¹⁷: Խորհրդարանը 33 ձայնով ընդդեմ 4-ի ընդունեց ՀՅԳ խմբակցության կողմից առաջարկված բանաձևը: Նիստն ավարտվեց գիշերվա ժամը 12-ին: Խ. Ադրբեջանի և Կարմիր բանակի հրամանատարության վերջնագրերին շուտով հաջորդում են գործնական քայլերը: Ղարաբաղ են շարժվում մեծ քանակությամբ ադրբեջանական և ռուսական կարմիր զորքեր¹¹⁸: Ադրբեջանի խորհրդայնացումը փաստորեն կանխում է Ղարաբաղը

¹¹³ Նույն տեղում, էջ 10:

¹¹⁴ «Հայաստանի պառլամենտի 1920 թ. մայիսի 3-ի արտակարգ նիստը», Ե., 1920, էջ 11:

¹¹⁵ Նույն տեղում, էջ 12:

¹¹⁶ Նույն տեղում, էջ 12:

¹¹⁷ «Հայաստանի պառլամենտի 1920 թ. մայիսի 3-ի արտակարգ նիստը», Երևան, 1920, էջ 19, «Հատաջ», 8 մայիսի 1920 թ., ՀՀ ՊԿՊԱ, Ֆ. 198, գ. 1, գ. 52, ք. 35:

¹¹⁸ Ս. Վրացյան, Հայաստանի Հանրապետություն, Բեյրութ, 1958, էջ 446:

Հայաստանին միացնելու հետագա գործընթացը: Մայիս ամսին խորհրդայնանում է Արցախը: Մայիսի վերջերին (26-ին) Դրոն հարկադրված իր գործնասով Արցախից վերադառնում է Ջանգեզուր և ապա հետո՝ Դարալագյազ:

5. Արտախորհրդարանական գործունեություն

Պատգամավորների գործունեությունը չի սահմանափակվել միայն խորհրդարանի շրջանակներում: Խորհրդարանի հանձնարարությամբ հանրապետության տարբեր շրջաններ են գործուղվել առանձին պատգամավորական հանձնախմբեր, որոնք տեղերում կատարել են ուսումնասիրություններ ու համապատասխան առաջարկություններ ներկայացրել խորհրդարանին ու կառավարությանը: Նման հանձնաժողովներ են գործել Կարսում, Նոր-Բայազետում, Դիլիջանում, Դարալագյազում, Էջմիածնում, Սուրմալուում և այլն¹¹⁹:

Սրանց ուսումնասիրությունների տեսադաշտում էին գտնվում զորքի, տեղական իշխանությունների (ինքնավարությունների), միլիցիայի, պարենավորման, հողային, դատական, ֆինանսական, պետ. գույքերի, խնամատարության, կրթության, սոցիալական այլ խնդիրներ: Օրինակ, 1920 թ. հունվար-փետրվարին Կարսում գտնվող խորհրդարանական հանձնախումբը ներկայացրել էր հետևյալ գործնական առաջարկները.

ա) Չորքի մասին.- բարելավել զինվորների, պահեստայինների ու նրանց ընտանիքների նյութական պայմանները, վերջ տալ դասալքությանը և այլն:

բ) Վարչակարգի ու միլիցիայի վերաբերյալ.- բարձրացնել պաշտոնավորների մասնագիտական մակարդակը, ինչպես նաև պատժել զեղծարարներին:

գ) Ինքնավարությունների մասին.- ստեղծել քաղաքային ինքնավարություններ Կաղզվանում և Սարիղամիշում: Ինքնավարություններին հանձնել քաղաքային միլիցիան, տարրական դպրոցները, հիվանդանոցները և այլն¹²⁰:

Դիլիջան մեկնած խորհրդարանական հանձնաժողովը 1920 թ. հունվարի 25-ին առաջարկություն էր մտցրել գավառի կենտրոնը դարձնել Իջևանը: Ի կատարում այս առաջարկության՝ 1920 թ. մարտի 1-ի թիվ 69 նիստում խորհրդարանը (28 կողմ, 2 դեմ և 1 ձեռնպահ) ընդունում է օրինագիծ Իջևանը գավառային ինքնավարության կենտրոն դարձնելու մասին¹²¹: Միաժամանակ, հանձնաժողովը հարց է բարձրացնում՝ խստիվ կերպով արգելելու անասունների, փայտի և այլ մթերքների արտահանությունը դեպի Ադրբեջան, ինչպես

¹¹⁹ ՀՀ ՊԿՊԱ, Ֆ. 198, ց. 1, գ. 2, ք. 1:

¹²⁰ ՀՀ ՊԿՊԱ, Ֆ. 198, ց. 1, գ. 2, քք. 2-3:

¹²¹ Նույն տեղում, գ. 52, ք. 36:

նան արգելելու ադրբեջանցի անասնապահներին օգտվելու Հայաստանի արտավայրերից, գյուղացիությանն ապահովել սերմացուով և այլն¹²²: Իսկ Նոր Բայազետի գավառ մեկնած խորհրդարանական հանձնաժողովը, տեղում ուսումնասիրելով գործերի վիճակը, հանգում է այն եզրակացության, որ գավառը պետք է բաժանել երկու կամ երեք գավառամասերի և շուտափույթ կարգավորել հողային խնդիրը¹²³:

1920 թ. բոլշևիկների մայիսյան ապստամբության շրջանում Դիլիջան գործուղված պատգամավոր Արշակ Հովհաննիսյանի միջնորդությամբ Դիլիջանի գորամասի հրամանատար է նշանակվում տաղանդավոր գորավար Սեպուհը¹²⁴:

Փաստերը ցույց են տալիս, որ խորհրդարանական հանձնախմբերի ներկայացրած առաջարկությունների մի մասին ընթացք է տրվել, իսկ մյուսին՝ ոչ: Պետք է ասել, որ արտախորհրդարանական հանձնախմբերի ներկայացրած առաջարկություններն ու եզրակացություններն օբյեկտիվ և սուբյեկտիվ պատճառներով ավելի հաճախ հաշվի չէին առնվում: Կարելի է արձանագրել այնպիսի փաստեր, երբ ժամանակին հաշվի չեն առնվել հանձնախմբերի օգտակար առաջարկություններն ու դիտողությունները, որոնք հետագայում ունեցել են բացասական հետևանքներ: Բերենք մի օրինակ: Հայտնի է, որ ռազմավարական նշանակություն ունեցող Կարսի շրջանում ստեղծվել էր անառողջ մթնոլորտ տեղի զինվորական հրամանատարության և քաղաքացիական իշխանությունների միջև: Չմռան ամիսներին Կարսում գործած խորհրդարանական հանձնաժողովի ներկայացրած բարեփոխումների մասին առաջարկությունները հավանաբար, ինչպես հարկն է, չէին հաշվի առնվել ու գործադրվել: Եւ ահա մայիսյան դեպքերի (ապստամբության) շրջանում Կարս գործուղված խորհրդարանական նոր հանձնաժողովը, տեսնելով շրջանի զինվորական հրամանատարներ՝ գորավարներ Հովսեփյանի ու Փիրույանի և նահանգապետ Ստ. Դորդանյանի միջև ստեղծված լարված հարաբերությունները, պահանջել էր փոխել եղած կազմը¹²⁵: Բայց Մայիսյան ապստամբության ճնշումից հետո, ցավոք, Բյուրո-կառավարությունը փոփոխություն չկատարեց տեղի զինվորական ու քաղաքացիական իշխանությունների կազմում, որն էլ անկասկած իր բացասական դերը խաղաց թուրք-հայկական պատերազմի ընթացքում:

¹²² Նույն տեղում գ. 2 թթ. 4-5:

¹²³ Նույն տեղում, Գ. 2, թ. 8:

¹²⁴ «Ազատ, Անկախ և Միացյալ Հայաստանի վերջին օրերը», Երևան, 1993, էջ 23:

¹²⁵ ՀՀ ՀԶԿՓ ՊԿԱ, ֆ. 4047, գ. 1, գ. 197, թթ. 3-4:

ԳԼՈՒԽ ՎԵՑԵՐՈՐԳ ԿՈՒՍԱԿՅՈՒԹՅՈՒՆՆԵՐԸ ԵՎ ԽՈՐՀՐԳԱՐԱՆԸ ՄԱՅԻՍՅԱՆ ՃԳՆԱԺԱՄԻ ՇՐՋԱՆՈՒՄ

1. Մայիսյան ապստամբությունը

Խորհրդարանի և կուսակցությունների գործունեությունը լավ հասկանալու և ճիշտ գնահատելու համար հարկ կա առանձնահատուկ կերպով անդրադառնալ Մայիսյան ապստամբությանը: Խորհրդահայ պատմագրության մեջ այս հիմնախնդիրը բավականաչափ ուսումնասիրվել է: Մրա շուրջ լույս են տեսել տասնյակ մենագրություններ, փաստա-հուշագրային ժողովածուներ: Սակայն հասկանալի պատճառներով այս հիմնահարցը, ինչպես և Հայաստանի խորհրդայնացման ողջ պատմությունը, ներկայացված են միակողմանիորեն: Ուստի ստորև մենք փորձ ենք արել կրկին անդրադառնալ այս խնդրին և այն լուսաբանել հնարավորինս օբեկտիվ ու անկողմնակալ:

Կարմիր բանակի մուտքը Անդրկովկաս և Ադրբեյջանի խորհրդայնացումը ոգևորություն առաջ բերեց մաս Հայաստանի բոլշևիկների մեջ, որոնք էլ կազմակերպեցին Մայիսյան ապստամբությունը: Այս ամենը սկսվեց մայիս-մեկյան ցույցերով ու միտինգներով, որոնք ընթացան պրոբոլշևիկյան կարգախոսներով, «Կեցցե՛ Խորհրդային Հայաստանը», «Բաքուն ընկավ, հերթը Երևանինն է», «Կորչի՛ Դաշնակցությունը», «Կեցցե՛ Կոմունիստական կուսակցությունը» և այլն:

Հարկ է նշել, որ Մայիսի 1-ը՝ որպես աշխատավորների համերաշխության տոն, պաշտոնապես նշվել էր մաս նախորդ տարում: ՀՅԳ, իրեն համարելով սոցիալիստական կուսակցություն, այն ոչ միայն համարում էր թույլատրելի, այլև իր կառույցներով ինքն էլ էր մասնակցում: Սակայն այլ ընթացք ու բնույթ ստացավ 1920 թվականի մայիսը: Պետք է ասել, որ մայիս-մեկյան ցույցերին ու միտինգներին, որոնք ընթացան Երևանում և հանրապետության մյուս խոշոր քաղաքներում, մեծ չափով տոն տվեց Երևանի արհեստակցական միությունների կենտրոնական խորհուրդը ու մասնավորապես նրա նախագահ «ձախ» դաշնակցական Հայկ Ավալյանը¹:

¹ ՀՀ ՀԲԿՓ ՊԿԱ, ֆ. 4033, ց. 1, գ. 441, թթ. 1-2:

Խորհրդարանի շենքի առջև կայացած միտինգում բոլշևիկ բանախոսներից ճարտասանեց Ստ. Ալավերդյանը²: Նա կոչ արեց տապալել դաշնակցական կառավարությունը: Մայիսյան ցույցին հանդես եկան այլ կուսակցությունների ներկայացուցիչներ: Մայիսի 3-4-ը Երևանում սկսվեցին խուզարկություններն ու ձերբակալությունները³:

Հանրապետության քաղաքներից ու բնակավայրերից անհամեմատ հեղափոխականացած էր Ալեքսանդրապոլը: Այստեղ բոլշևիկների ազդեցությունը համեմատաբար ավելի ուժեղ էր: Քաղաքում անցկացված մայիսյան տոնի ժամանակ բոլշևիկները՝ Ավիա Նուրիջանյանի ստորագրությամբ, ողջույնի երկու հեռագիր են ուղարկում Ադրբեջանի հեղկոմին⁴: Ռ-Կ/բ/Կ Ալեքսանդրապոլի կոմիտեն իր մայիսյան կոչում հավաստիացնում էր Բաքվի դռները բախող հաղթական Կարմիր բանակին ու Բաքվի պրոլետարիատին, որ «այսօրվանից մեր կռիվը թուրք բանվորի ու գյուղացու դեմ չէ, այլ դաշնակցական կառավարության»:

Ալեքսանդրապոլն էլ դարձավ ապստամբության կենտրոնը: Ապստամբության օջախներ դարձան Կարսը, Սարիղամիշը, Գիլիջանը, Իջևանը, Նոր Բայազետը, Բասարգեչարը, Գորիսը: Զինվորականության մի մասը անցավ բոլշևիկների կողմը: Ալեքսանդրապոլում «Վարդան Ջորավար» զրահագնացքի հրամանատար, կապիտան Ս. Մուսայելյանը չկատարեց վերադասի զինվորական հրամանը:

Ապստամբության նախապատրաստական փուլում Արմենկոմի հանձնարարությամբ լայն լիազորություններով Ալեքսանդրապոլ են գործողվում նրա երկու ներկայացուցիչներ՝ Գ. Տեր-Սիմոնյանը և պատգամավոր Ա. Մելքոնյանը՝ զինված ապստամբության հարցը տեղում որոշելու համար⁵: Հաջորդ օրը՝ մայիսի 7-ին, զրահագնացքում կայանում է բոլշևիկյան գաղտնի խորհրդակցություն, որտեղ հավանություն է տրվում ապստամբության կուրսին և ստեղծվում է ղեկավար կենտրոն՝ Հայաստանի ռազմահեղափոխական կոմիտե (Հեղկոմ)⁶: Տեղեկություններ կան, որ Ալեքսանդրապոլի խորհրդակցությանը մասնակցել են նաև էսեռների ներկայացուցիչներ, որոնք, սակայն, ապստամբության համար պահը հարմար չգտնելով՝ առաջարկել են ձեռնպահ մնալ ելույթից⁷: Հայաստանի ռազմահեղափոխական կոմիտեի մեջ մտան Ս. Մուսայելյանը, Ա. Նուրիջանյանը, Ա. Մելքոնյանը, Ա. Գոգունցը, Ա. Տեր-Սա-

² Ա. Մուսվյան, *հողվածներ և ճառեր*, Ե., 1961, էջ 80:

³ ՀՀ ՀԲԿՓ ՊԿԱ, Ֆ. 4020, ց. 1, գ. 16, քք. 14-15:

⁴ «Մայիսյան ապստամբությունը Հայաստանում 1920-1930» (*Հիշողությունների և ղոկումենտների ժողովածու*), Ե., 1930, էջ 159-161:

⁵ «Ռևոլյուցիոն կոչեր և թռուցիկներ 1902-1921», Ե., 1960, էջ 544:

⁶ «Մայիսյան ապստամբությունը Հայաստանում», էջ 151:

⁷ Ա. Հ. Մելքոնյան, *Մայիսյան ապստամբության պատմության հարցի շուրջը*, Ե., 1965, էջ 121-122, «Հայաստանի Կոմկոսի պատմության ուրվածգեր», Ե., 1967, էջ 292-293:

⁸ ՀՀ ՀԲԿՓ ՊԿԱ, Ֆ. 1022, ց. 2, գ. 134, ք. 17:

հակյանը, Գ. Տեր-Սիմոնյանը, Լ. Ուլիբեկյանը, Պ. Պետրոսյանը և Գ. Սարգսյանը՝ ընդամենը 9 հոգի⁹:

Հետաքրքրական է, որ Հեղկոմի անդամների թվում էր նաև խորհրդարանի պատգամավոր, Արմենկոմի անդամ Արտաշես Մելքոնյանը, որը մինչ այդ իրեն անկուսակցական էր հայտարարում: Նա, մինչ մայիսյան դեպքերի սկսվելը, խորհրդարանից արձակուրդ էր վերցրել և այդ ընթացքում, որպես ՌԿ/բ/Կ Արմենկոմի անդամ, եղել էր Բաքվում¹⁰:

Խորհրդակցությունում որոշվել էր ապստամբությունը սկսել մայիսի 10-ին: Նախօրյակին՝ մայիսի 9-ին, զրահագնացքում մատած Հեղկոմը վերջնազիր է ուղարկում կայազորի պետին և քաղաքային վարչությանը՝ քաղաքը հանձնելու պահանջով¹¹: Մայիսի 10-ին փաստորեն առանց մի գնդակ արձակելու՝ քաղաքն անձնատուր եղավ: Ապստամբները Ալեքսանդրապոլը իրենց ձեռքը վերցնելուց երկու օր անց՝ մայիսի 12-ին ՌԿ/բ/Կ տեղի կոմիտեն կոչ հրապարակեց՝ ամբողջ Հայաստանում խորհրդային իշխանություն հաստատելու վերաբերյալ: Անգամ որոշվեց Ալեքսանդրապոլի գրավման օրը՝ մայիսի 10-ը, այսուհետև համարել Հայաստանի խորհրդայնացման պատմահիշարժան օր¹²:

Այդ նույն ժամանակ ՀՅԳ Ալեքսանդրապոլի կոմիտեն մի թռուցիկ տարածեց՝ պահանջելով չժառայել բոլշևիկներին¹³: Նոր իշխանությունը զրահագնացքից դուրս չէր գալիս և բոլոր կարգադրությունները արվում էին այնտեղից¹⁴: Քաղաքային իշխանությունների անգործությունը և պարենամթերքի բացակայությունը իրենց զգացնել սովեցին: Քաղաքը կանգնեց սովի և անիշխանության առաջ¹⁵: Մայիսի 12-ին դաշնակցականների կողմից ծանր վիրավորվեց և զինվորական հիվանդանոցում մահացավ կայազորի պետ գորավար Խաչատրյանը: Մայիսի 14-ին արևմտահայ աշխարհագրայիններից կազմված Մեպուհի գորախումբը (600-700 հոգի) առանց լուրջ միջադեպի գրավեց քաղաքը և դրանով հնազանդեցվեց ապստամբության գլխավոր օջախը: Բոլշևիկների խնդրանքով մայիսի 14-ին սպասվում էր 1500 թաթարների ժամանումը Ալեքսանդրապոլ՝ ապստամբներին օգնելու համար: Սակայն ճանապարհին Ամասիայի թաթարները, իմանալով բոլշևիկների պարտության մասին, ցրվում են: Ապստամբության ձախողումը Ալեքսանդրապոլում մեծապես կանխորոշեց դրանց անհաջողությունը հանրապետության մյուս քաղաքներում ու բնակավայրերում:

Ապստամբության փորձեր արվեցին Կարսում և Սարիղամիշում: Ապստամբները Սարիղամիշում կապերի մեջ մտան թուրքերի հետ, որպեսզի վեր-

⁹ Նույն տեղում, *ց. 3, գ. 257, բ. 2*:

¹⁰ «Հառաջ», 14 մայիսի 1920 թ.:

¹¹ ՀՀ ՀԶԿՓ ՊԿԱ, Ֆ. 1022, *ց. 2, գ. 134, բ. 17*:

¹² ՀՀ ՀԶԿՓ ՊԿԱ, Ֆ. 4033, *ց. 1, գ. 444, բ. 1*:

¹³ ՀՀ ՀԶԿՓ ՊԿԱ, Ֆ. 1022, *ց. 2, գ. 134, բ. 18*:

¹⁴ Նույն տեղում:

¹⁵ ՀՀ ՀԶԿՓ ՊԿԱ, Ֆ. 4015, *ց. 1, գ. 7, բ. 5*:

ջիններս իրենց տան հացամթերք՝ երկաթուղային շապլների դիմաց՝ Էրզրում-Ալաշկերտ ուղղությամբ երկաթուղի կառուցելու և Շարուր ու Զանգեզուր գորք փոխադրելու նպատակով¹⁶: Ընդամենը մեկ օր տևեց Կարսի ելույթը (մայիսի 12-ին), որի ղեկավարներից 14 հոգի բեռնատար մեքենայով փորձեցին անցնել Ալեքսանդրապոլ, սակայն ճանապարհին՝ Արզինա գյուղի մոտ (Բաշկադըլար), ընդհարվեցին միլիցիայի հետ: Ընդհարման հետևանքով ապստամբներից 9-ը սպանվում են, այդ թվում՝ ապստամբության ղեկավար Գ. Գուկասյանը, իսկ մնացած 5-ը՝ ձերբակալվում: Հայտնի է, որ Կարսի ապստամբներին օգնել են մոլդկանները և տեղացի թաթարները: Համանման վախճան ունեցան ապստամբ մյուս շրջանները:

Պետք է ասել, որ ապստամբությունը ի սկզբանե դատապարտված էր անհաջողության: Բանն այն է, որ Խորհրդային Ռուսաստանը և անձամբ Վ. Ի. Լենինը այս շրջանում դեռևս չէին ծրագրել Հայաստանի խորհրդայնացումը, ուստի և հրահանգ չկար Ադրբեյջանից՝ Բաքվից, Կարմիր բանակին Հայաստանի աշխատավորներին «օգնության» հասնելու մասին: Իսկ մյուս կողմից էլ բուն Հայաստանում ապստամբությունը լավ չէր նախապատրաստվել տեղի բոլշևիկների կողմից: «Բոլոր վավերագրերն ու փաստական տվյալները, - խոստովանում է Ա. Կարինյանը, - վճռական կերպով հաստատում են, որ ապստամբությունն իրականում անկազմակերպ հեղափոխական տարերքի բռնկում էր»¹⁷:

Հարկ է նշել, որ բոլշևիկները, ձեռնարկելով ապստամբություն, փորձ արեցին ոտքի հանել նաև գյուղացիությանը: Եվ այդ նպատակին հասնելու համար օգտագործում էին արևելահայերի և արևմտահայ գաղթականության մեջ առկա անքող սառնությունը: Այսպես, օրինակ, Շիրակի նահանգապետ Կ. Սասունին իր հուշերում վկայում է, որ 1920 թ. մայիսյան ապստամբության օրերին բոլշևիկները «դասակարգային» կռվի պիտակով հրահրում էին տեղացի գյուղացիներին կռվի դուրս գալ արևմտահայ գաղթականության դեմ¹⁸: Բանն այն էր, որ բոլշևիկները մեծ հակակրանք էին տաժում արևմտահայության նկատմամբ այն պատճառով, որ վերջիններս բոլորովին անհաղորդ էին սոցիալիստական գաղափարներին, ավելի համախումբ էին և չէին ենթարկվում նրանց սաղրանքներին: Եվ պատահական չէր, որ մի քանի օր անց հենց արևմտահայ զինյալ աշխարհագորայինները Սեպուհի հրամանատարությամբ դարձան այն միջուկը, որը ճնշեց բոլշևիկների մայիսյան ապստամբությունը:

¹⁶ ՀՀ ՊԿՊԱ, Ֆ. 200, ց. 1, գ. 576, թ. 94:

¹⁷ Ա. Բ. Կարինյան, Դաշնակցությունը և իր զինակիցները, Ե., 1932, էջ 82:

¹⁸ «Հայրենիք», 1925, թիվ 12, էջ 95, Կ. Սասունի, Սիսիսյան խոռվությունները...» էջ 160:

2. Խորհրդարանի միջոցառումները 1920 թ. Մայիսյան իրադարձությունների կապակցությամբ: Բյուրո-կառավարության ստեղծումը

Բոլշևիկների մայիսյան ելույթների պատճառով Խատիսյանի կաբինետը կանգնեց ճգնաժամի առաջ և երերաց: Կառավարությունն սկզբում շփոթության մեջ էր: Բոլշևիկների ըմբոստությունը հնազանդեցնելու համար անհրաժեշտ համարվեց ստեղծել ուժեղ ձեռք: Մայիսի 5-ին ցերեկվա ժամը 11.30-ին հրավիրվեց խորհրդարանի արտակարգ (88-րդ) նիստ: Այն վարում էր նախագահի պաշտոնակատար Ալ. Սահակյանը: Օրակարգ դրվեց իշխանության կենտրոնացման ու կուսակցականացման հարցը: Վարչապետը հայտարարություն արեց կառավարության հրաժարականի մասին: Ընդունվեց Խատիսյանի կաբինետի հրաժարականը: Տալով վարչապետ Ալ. Խատիսյանի գործունեության գնահատականը՝ ընդհանուր առմամբ այն պետք է բնութագրել որպես դրական ու արդյունավետ: ՀՀ գոյության ընթացքում, չորս վարչապետերի կառավարման ժամանակշրջաններից, հանրապետությունը քիչ թե շատ կայուն ու տանելի պայմաններ ունեցավ, թերևս, միայն նրա օրոք: Ահա թե ինչպես է բնութագրել Ալ. Խատիսյանին արևմտահայ գործիչ Կ. Սասունիին, որին կարծում ենք, չի կարելի մեղադրել կողմնակալության մեջ. «Երկու տարվան աշխատանքին ընթացքին Խատիսյան ի հայտ բերավ պետական մարդու մեծ հատկություններ, որոնք ընդհանուր առմամբ օգտակար եղան: Մեր հասարակական բոլոր խավերում ուշադրությունը կենտրոնացավ այդ մարդուն վրա, որ ուներ աշխատելու անսպառ եռանդ, ճկունություն, քաղաքական անցքերու ըմբռնողականություն և բավական հաջող վարվելակերպ»¹⁹:

Մինչ խորհրդարանի այդօրվա նիստի հրավիրումը նախորդ օրը՝ մայիսի 4-ին, ՀՅԴ Բյուրոն, ինչպես նաև ՀՅԴ խորհրդարանական խմբակցության ղեկավարները, արդեն ճշտել էին իրենց անելիքը²⁰: Ստեղծված արտակարգ ծանր պայմաններում երկրում պետք էր հաստատել կուսակցական դիկտատուրա: Այդպես էլ արվեց:

Ինչ վերաբերում է ընդդիմադիր կուսակցությունների վերաբերմունքին նոր կառավարության ձևավորման խնդրում, ապա մեզ հայտնի որոշ տվյալների համաձայն, հայ ժողովրդականները և սոցիալ-դեմոկրատները կողմնակից են եղել կոալիցիոն կառավարության ստեղծմանը, իսկ էսեռները, բոլշևիկներին գրեթե համահունչ, միակ էլքը տեսնում էին Հայաստանում խորհրդային իշխանության հաստատման մեջ²¹: Ստեղծված իրադրության մեջ, կար-

¹⁹ Կ. Սասունի, *Մայիսյան խռովությունները...*, էջ 10-11:

²⁰ Ալ. Խատիսյանն իր հուշերում հայտնում է, որ կառավարության հրաժարականի հարցը որոշվել էր առանց իր գիտության ու մասնակցության (Տես՝ Ալ. Խատիսյան, նշվ. աշխ., էջ 215-216:

²¹ ՀՀ ՀԶԿՓ ՊԿԱ, Ֆ. 1022, ց. 2, գ. 134, ք. 15:

ծում ենք, որ Դաշնակցությունը և նրա խմբակցությունը ամենևին էլ չէին մտորում կռաւիցիոն կառավարության մասին, ընդհակառակը, նրա արմատական հոսանքը՝ Ռուբենի գլխավորությամբ, ձգտում էր էլ ավելի ուժեղացնել կուսակցության մենիշխանությունը:

Չնայած խորհրդարանի ՀՅԴ խմբակցության մի որոշ մասը դիմադրեց, սակայն հաղթանակ տարավ Բյուրոյի անդամ Ռ. Տեր-Սիմաայանի տեսակետը՝ կուսակցական-հեղափոխական կառավարություն ստեղծելու վերաբերյալ: Ռուբենը և մյուս բյուրոյականները մման վճռական քայլի դիմեցին՝ հենվելով ՀՅԴ 9-րդ Ընդհանուր ժողովի որոշումներից մեկում արտահայտված այն մտքին, որ «ներկայումս Հայաստանը ապրում է գերազանցորեն հեղափոխական ժամանակաշրջան, և այդ պատճառով կառավարությունը չպետք է կաշկանդվի «օրինական» այն էլ ռուսական օրինագրքերով, առաջադրված ծրագիրը իրագործելու խնդրում, այլ հարկը պահանջած ժամանակ պետք է դիմի բացահայտ հեղափոխական միջոցների»²²: Եվ կուսակցությունը՝ Բյուրոն, մայիսյան այդ ճգնաժամային շրջանը որակեց որպես հեղափոխական ժամանակաշրջան:

Հիրավի, հանրապետությունում ստեղծված օրհասական կացությունը, Կարմիր բանակի մոտենալը Հայաստանի սահմաններին, բոլշևիկների և մահմեդականների ապստամբական ելույթները, Ադրբեջանի վերջնագիրը, Դրոյի գլխավորած հայկական զորախմբի նահանջը Արցախից ու Չանգեզուրից և այլն հարկադրեցին խորհրդարանին և նրա ՀՅԴ խմբակցության մեծամասնությանը համաձայնվելու այն բանին, որ ՀՅԴ Բյուրոն իր ամբողջ կազմով անցնի իշխանության գլուխ՝ ստանձնի կառավարությունը:

ՀՅԴ խմբակցության անունից պատգամավոր Լ. Թադևոսյանը վարչապետի թեկնածու է առաջադրում Բյուրոյի անդամ, պատգամավոր Համազասպ Օհանջանյանին: Նրա թեկնածությունը դրվում է քվեարկության և անցնում է (կողմ՝ 32, դեմ՝ 5 և ձեռնպահ՝ 1)²³: Այդպիսով, Հ. Օհանջանյանը ընտրվում է վարչապետ: Նա շնորհակալություն է հայտնում խորհրդարանին և խնդրում ժամանակ տալ իրեն կազմելու կաբինետը: Նիստը ընդմիջվում է 15 րոպեով: Այն վերսկսվում է ժամը 12:00-ին: Վարչապետ Հ. Օհանջանյանը հայտարարում է նոր կաբինետի կազմը, որի մեջ է ընդգրկվում ՀՅԴ Բյուրոն ամբողջությամբ:

Բյուրո-կառավարության կազմում էին՝ Հ. Օհանջանյան (վարչապետ և արտ. գործ. նախարար), Ռ. Տեր-Սիմաայան (ն.գ. և զինվորական), Ա. Գյուլխանդանյան (ֆինանս. և արդարադատ.), Ս. Վրացյան (գյուղատնտ. և աշխատանքի), Ս. Արարատյան (խնամատ. և վերաշինութ.), Ա. Ջամալյան (հաղորդակց.) և Գ. Ղազարյան (հանր. կրթութ. և մշակույթի): Նախարարի օգնականներ նշանակվեցին Ա. Չիլինգարյանը և Ա. Բաբայանը²⁴:

²² «Զաղվածներ չ.Հ.Դ. 9-րդ ընդհ. ժողովի որոշումներից», Երևան, 1920, էջ 9:

²³ ՀՀ ՊԿՊԱ, ֆ. 198, ց. 1, գ. 52, ք. 57:

²⁴ Նույն տեղում, գ. 52, ք. 57, գ. 57, ք. 22:

Այնուհետև պատգամավոր Լ. Թադևոսյանը զեկուցեց խորհրդարանին մեկ ամսով արձակուրդ տալու մասին: 27 կողմ, 5 դեմ և 1 ձեռնպահությամբ ընդունվում է համապատասխան օրենք՝ բաղկացած երեք հոդվածից. 1. խորհրդարանի աշխատանքները դադարեցնել մեկ ամսով. 2. դադարի ժամանակ խորհրդարանի բոլոր իրավունքները հանձնել կառավարությանը և 3. հանձնարարել խորհրդարանի նախագահությանը և կառավարությանը արտակարգ կարևորության դեպքում հրավիրել խորհրդարանի նիստ²⁵: Դրանից հետո՝ ժամը 12.10 բռպեին, ավարտվում է խորհրդարանի նիստը:

Խորհրդարանի արձակուրդի հայտարարումից հետո ՀՅԴ խմբակցության անդամների մեծամասնությունը արտակարգ լիազորություններով գործուղվեց գավառները՝ ժողովրդի և գործի շրջանում բացատրական, կազմակերպական աշխատանք տանելու համար: Այսպես՝ պատգամավոր Ն. Ադբալյանը գործուղվեց Կարս, Հ. Բուդաղյանը և Գ. Վարչամյանը՝ Ալեքսանդրապոլ, Ս. Վրացյանը՝ Էջմիածին, Ա. Հովհաննիսյանը՝ Գիլիջան, Ա. Աբեղյանը՝ Իգդիր, Ա. Ջամալյանը՝ Աշտարակ, Վ. Նավասարդյանը՝ Ղամաղույ (Արտաշատ) և այլն²⁶: Համապատասխան օրենքով բացվեց 3 մլն ռուբլի վարկ՝ գավառներում աշխատող պատգամավորների օրապահիկի ու ճանապարհաձախսի համար²⁷:

Այդպիսով, հիմնականում մայիսյան իրադրության շարժառիթով դադարեցվեցին խորհրդարանի աշխատանքները և ամբողջ իշխանությունը՝ գործադիր, օրենդիր ու նույնիսկ դատականը կենտրոնացվեց Հ. Օհանջանյանի գլխավորած ՀՅԴ Բյուրո-կառավարության ձեռքում: Որքան էլ այս վճիռը հակառակ էր ՀՅԴ 9-րդ Ընդհ. ժողովի որոշումներին, իշխանության բոլոր լծակների մման կենտրոնացումը և կուսակցականացումը, ինչպես արդեն ասվեց, ուներ իր պատճառաբանությունն ու հիմնավորումը:

Մայիսյան ճգնաժամի օրերին, երբ ՀՀ համար ստեղծվել էր քաղաքական չափազանց ծանր իրավիճակ (ներսից բուշևիկների ու մահմեդականների իրար գուգորդող ու լրացնող խռովությունները, իսկ դրսից Ադրբեջանի, Կարմիր բանակի և քեմալական թուրքերի հարձակման մահացու վտանգը), դեկավար կուսակցության մեծամասնությունը գտավ, որ խորհրդարանական աշխատանքները պետք է դադարեցվեն և պատգամավորները անմիջապես աշխատանքներ պետք է կատարեն շրջաններում: Այդ իսկ պատճառով էլ խորհրդարանը ուղարկվեց արձակուրդ: Հարկ է նշել, որ խորհրդարանն արձակուրդ ուղարկվելով հանդերձ, նրա նախագահությունը շարունակում էր գործել՝ աջակից լինելով կառավարությանը:

Հանրագումարի բերելով Հայաստանի երկրորդ խորհրդարանի օրենսդրական աշխատանքի արդյունքները՝ հայտնենք, որ 1919 թ. երկրորդ կեսին՝ օգոստոսի 1-ից մինչև դեկտեմբերի 31-ը, հրավիրվել է 56 նիստ և այդ ընթաց-

²⁵ ՀՀ ՊԿՊԱ, Ֆ. 198, ց. 1, գ. 52, ք. 57, գ. 58, ք. 18:

²⁶ «Հասար», 15 մայիսի 1920 թ., «Նորք», 1998, թիվ 2, էջ 97:

²⁷ ՀՀ ՊԿՊԱ, Ֆ. 202, ց. 1, գ. 580, ք. 25:

քում հաստատվել են ընդամենը 117 օրենք ու մի քանի որոշում, իսկ սկսած 1920 թ. հունվարի 2-ից մինչև մայիսի 5-ը՝ 32 նիստ և այդ ընթացքում ընդունվել 85 օրենք, երկու տարեշրջանները միասին՝ ավելի քան 200 օրենք²⁸:

Բյուրո-կառավարությունը, իր ձեռքում կենտրոնացնելով իշխանության բոլոր լծակները, անմիջապես անցավ վճռական գործողությունների: Նորակազմ կառավարության առաջին քայլը եղավ այն, որ նույն օրը՝ մայիսի 5-ին, որոշում կայացվեց անհապաղ աշխատանքից հեռացնել կապի համակարգում աշխատող բոլշևիկ պաշտոնատար անձանց, ինչպես նաև մեծացնել դաշնակցականների թիվը բանակում²⁹:

Խորհրդարանը արձակուրդ ուղարկելու հաջորդ օրը՝ մայիսի 6-ին, նախարարների խորհուրդը որոշեց. «Բոլշևիկների դեմ ձեռք առնել կտրուկ միջոցներ: Հանձնարարել Ն. Գ. նախարարությանը ձերբակալելու բոլշևիկներին Հայաստանի ամբողջ տարածքի վրա»³⁰: Նույն օրը կառավարությունը ընդունեց ժամանակավոր օրենք «Արտակարգ դատարանի մասին»³¹:

Այս ժամանակավոր օրենքը սահմանում էր.

ա) Հայաստանում հաստատել արտակարգ դատարաններ և հանձնարարել արդարադատության նախարարին 24 ժամվա ընթացքում ներկայացնել օրինագիծ:

բ) Մտցնել մահապատիժ. պետական դավաճանության և չարամիտ սպեկուլյացիայի համար՝ արտակարգ դատարանի միջոցով:

գ) Արտակարգ դատարանի վճիռները հաստատում է զինվորական նախարարը³²:

Արտակարգ դատարաններ հիմնվեցին՝ Երևանում, Ալեքսանդրապոլում, Կարսում, Նոր Բայազետում, Գիլիջանում³³: Սրանց հիմնումը, ինչպես արդեն ասվեց, կապված էր մայիսյան ապստամբությամբ առաջացած արտակարգ իրավիճակի հետ և նպատակ ուներ հնարավորին չափ արագ ու օպերատիվ կերպով կանխել հնարավոր ամեն մի հակակառավարական ու հակօրինական գործունեություն:

Մայիսի 8-ին նախարարների խորհուրդը, խորհրդարանի կողմից իրեն տված օրենսդրական լիազորությունների հիման վրա, հրապարակեց մեկ այլ օրենք «Պետական ծառայողների սաբոտաժի և բանվորների գործադուլի արգելման մասին»: Այս կապակցությամբ, անշուշտ, սխալվում է իրավաբան Ռ.

²⁸ ՀՀ ՊԿՊԱ, ֆ. 198, ց. 1, գ. 20, թթ. 1-22, գ. 52, ֆ. 202, ց. 1, գ. 333, թթ. 70-160, «ՀՀ օրենքների հավաքածու 1919 թ.», էջ 1-93 և «ՀՀ օրենքների հավաքածու 1920 թ.», էջ 1-72 (Հաշվումները կատարված են մեր կողմից):

²⁹ ՀՀ ՀՔԿՓ ՊԿԱ, ֆ. 1022, ց. 2, գ. 125 ա, թ. 1:

³⁰ Նույն տեղում, թ. 2:

³¹ ՀՀ ՀՔԿՓ ՊԿԱ, ֆ. 199, ց. 1, գ. 118, թ. 80, 92, «Հառաջ», 18 մայիսի 1920 թ.:

³² ՀՀ ՀՔԿՓ ՊԿԱ, ֆ. 199, ց. 1, գ. 118, թ. 80:

³³ Կ. Սասունի, Մայիսյան խռովությունները..., էջ 180:

Ավագյանը, երբ սույն օրենքի ընդունումը վերագրում է խորհրդարանին³⁴: Ապստամբության դեմն առնելու նպատակով կառավարությունը սահմանեց հետևյալ ծայրահեղ կարգը, որն հակոտնյա էր ընդհրապես աշխատանքային ու բանվորական օրենսդրության ոգուն: Ժամանակավոր այս օրենքը կազմված էր չորս հոդվածից.

1. Պետական հիմնարկությունների ծառայողների սաքոտածը և բանվորների գործադուրը համարվում են պետական հանցանք, և դրանց հեղինակները պատժվում են իբրև պետական հանցագործներ՝ համաձայն քրեական պատժագրի սահմանած օրենքների:

2. Պետական ծառայողների և բանվորների աշխատանքի ընդունումը և արձակումը մտնում է բացառապես համապատասխան նախարարության իրավասության մեջ:

3. Սույն օրենքը իր ուժը կորցնում է Հայաստանի խորհրդարանի աշխատանքների վերսկսման օրից:

4. Սույն օրենքը ուժի մեջ է մտնում հրապարակվելու օրից³⁵:

Իսկ նախարարների խորհրդի մայիսի 11-ին ընդունած որոշմամբ՝ օրենքը տարածվեց նաև «հասարակական և մասնավոր հիմնարկությունների և ձեռնարկությունների ծառայողների ու բանվորների վրա»³⁶:

Մայիսի 9-ին նախարարների խորհուրդը որոշեց. «Չեզոք գոտում նշանակել ոստիկանապետ՝ նախօրոք այդ մասին տեղեկացնելով վրաց կառավարությանը»³⁷: Ահա կառավարության միջոցառումների այն ոչ լրիվ ցանկը, որի գործադրմամբ պետք է հնազանդեցվեին բոլշևիկյան ելույթները և երկրում վերականգնվեին կարգը և հանգստությունը:

Անդրադառնալով այդ օրենքների պրակտիկ գործադրմանը՝ պետք է ասել, որ Բյուրո-կառավարությունը հանդես բերեց վճռականություն և ինչ-որ տեղ՝ նաև դաժանություն: Տեղեկացնենք, որ մայիսյան ապստամբության կապակցությամբ Արտակարգ դատարանները մահապատժի վճիռ են կայացրել ինը ակտիվ կազմակերպիչների նկատմամբ: Առանց դատի հաշվեհարդար է կատարվել միայն երկու հոգու՝ ուսուցիչ Հ. Մարտիսանյանի և պատգամավոր Ա. Մելքոնյանի հանդեպ³⁸: Վերջինիս մասին ասենք հետևյալը: Ռ-Կ/բ/Կ Հայաստանի կոմիտեի (Արմենկոմի) անդամ, պատգամավոր Ա. Մելքոնյանը ապստամբության ժամանակ գործում էր Ալեքսանդրապոլում և համարվում էր Հայաստանի ռազմահեղափոխական կոմիտեի անդամ: Բայց երբ նա տեսնում է, որ ելույթը պարտության եզրին է, մայիսի 13-ին բոլշևիկ ղեկավարների մի խմբի հետ, վերցնելով 18 մլն ռուբլի (որից 5 մլն-ը պատկանում էր քաղա-

³⁴ Ռ. Ավագյան, *Հանցավորությունը Հայաստանի առաջին Հանրապետությունում (1918-1920)*, Երևան, 1995, էջ 66:

³⁵ ՀՀ ՊԿՊԱ, Ֆ. 202, ց. 1, գ. 333, ք. 128:

³⁶ Ռ. Ավագյան, *նշվ. աշխ.*, էջ 66:

³⁷ ՀՀ ՀԶԿՓ ՊԿԱ, Ֆ. 1022, ց. 2, գ. 125 ա, ք. 4:

³⁸ ՀՀ ՊԿՊԱ, Ֆ. 200, ց. 1, գ. 581, քք. 72 և 79, Կ. Սասունի, *նշվ. աշխ.*, էջ 185-186:

քային բանկին), փախչում է³⁹: Սակայն ճանապարհին Ա. Մելքոնյանը ձերբակալվում է Սեպուհի զինվորների կողմից և Երևան փոխադրվելիս՝ մայիսի 20-ին փաստորեն առանց դատարանի վճռի գնդակահարվում⁴⁰: Մեկ այլ փաստաթղթից տեղեկանում ենք, որ նա, փախչելով Ալեքսանդրապոլից, թաքնվել է իր հայրենի Աշտարակի շրջանում, որտեղից բռնվել և ուղարկվել է Էջմիածնի բանտը, այնտեղից էլ Երևան հասցնելու ճանապարհին՝ գնդակահարվել է պահակախմբի կողմից⁴¹:

Կառավարությունը, մասնավորապես, անձեռնմխելի համարվող պատգամավորի ձերբակալման (և առանց դատարանի վճռի գնդակահարման) քայլը հիմնավորում էր նրանով, որ մայիսի 5-ի օրենքով նա իր վրա էր վերցրել խորհրդարանի բոլոր լիազորությունները: Այդ հիման վրա էլ կառավարությունը չեղյալ էր համարել պատգամավոր Ա. Մելքոնյանի անձեռնմխելիության իրավունքը ու միջոցներ ձեռք առել նրան ձերբակալելու համար:

Իհարկե, կարելի է վիճարկել նման փաստարկների ու հիմնավորումների շուրջ: Ինչ էլ որ լինի, իշխանությունների կատարած գործողություններում, անշուշտ, կան հակաիրավական պահեր, մասնավանդ որ, անկախ մեղադրյալի հանցավորության վտանգավորության աստիճանից, գործը փակվել (կարճվել) է պատգամավորի սպանությամբ՝ առանց դատարանի վճռի: Բայց պետք է ասել, որ հետագայում բոլշևիկները ևս «պարտքի տակ չմնացին»: Շատ չանցած՝ 1920 թ. օգոստոսի 2-ին, Չանգեզուրում («Չեկայի» հրամանով) նրանք ավելի դաժանորեն (ամմարդկային խոշտանգումներով) հաշվեհարդար տեսան խորհրդարանի անդամներ՝ Վահան Խորենու և Արշակ Շիրինյանի նկատմամբ⁴²:

Արտակարգ դատարանները պահպանվեցին մինչև 1920 թ. նոյեմբերի 27-ը և վերացվեցին Ա. Վրացյանի «ձախ» կռաիցիոն կառավարության որոշմամբ: Հարկ է նկատել, որ Արտակարգ դատարանները արտակարգ իրավիճակի թելադրանքով հիմնված մարմիններ էին, որոնք ենթարկվում էին կառավարությանը: Հասկանալի է, որ դրանք անկախ չէին: Դա երևում է նրանից, որ մահապատժի վերաբերյալ Արտակարգ դատարանի վճիռները հաստատում էր զինվորական նախարարը⁴³:

Մայիսյան ապստամբության պարտությունից հետո Հայաստանի բոլշևիկները անցան խոր ընդհատակ: Նրանց մի մասը փախավ Խ. Աղբբեջան: 1920 թ. հունիսին ՌԿ/բ/Կ Կենտկոմի Կովկասյան բյուրոյի որոշումով և նույն կուսակցության Կենտկոմի կազմբյուրոյի հաստատումով ստեղծվեց

³⁹ ՀՀ ՀԹԿՓ ՊԿԱ, Ֆ. 200, ց. 1, գ. 576, ք. 94:

⁴⁰ «Մայիսյան ապստամբությունը Հայաստանում», էջ 154 և 198, «Ժողովուրդ», 18 մայիսի 1920 թ.:

⁴¹ «Հոկտեմբերյան սոցիալիստական մեծ ռեյոյցիան ...», էջ 322-323:

⁴² Գ. Վարդանյան, Լեռնահայաստանի հերոսամարտը, Պուքրեշ, 1923, էջ 49-50:

⁴³ ՀՀ ՊԿՊԱ, Ֆ. 199, ց. 1, գ. 133, ք. 73:

Հայաստանի Կոմունիստական կուսակցություն՝ մարզային կազմակերպության իրավունքներով⁴⁴:

ՀՅԳ Բյուրոն իշխանությունը ստանձնել էր մեկ ամիս ժամանակով: Խորհրդարանի արձակուրդի ժամկետը լրանալու օրը՝ 1920 թ. հունիսի 5-ին, գումարվեց խորհրդարանի արտահերթ նիստ⁴⁵: Վարչապետ Հ. Օհանջանյանը հանգամանորեն զեկուցեց կառավարության նախորդ մեկամսյա գործունեության արդյունքների, ներքին կացության և արտաքին փոխհարաբերությունների մասին: Վարչապետը մասնավորապես զովեստով խոսեց շրջանները մեկնած պատգամավորների կատարած աշխատանքի մասին: Նա ասաց, որ մայիսյան խռովության հնազանդեցման գործում «Մենք շատ բանում պարտական ենք խորհրդարանի անդամների եռանդուն գործունեության»⁴⁶:

Այնուհետև վարչապետը հայտարարեց, որ կառավարությունը հաստատել է 1.4 մլրդ ռուբլու ելքի վարկ, որը ծածկելու համար որոշված է կնքել 20 մլն դոլարի «Հայաստանի անկախության փոխառություն»⁴⁷: Հենց այս փոխառության կնքման առաքելությամբ էլ արտասահման գործուղվեց նախկին վարչապետ Ալ. Խատիսյանը:

Վարչապետի ելույթից հետո ամբիոն բարձրացավ պատգամավոր Ն. Աղբալյանը, որն արտասանեց գեղեցիկ և հիմնավորված ճառ: Նա հայ բոլշևիկներին բնութագրեց որպես «մեր կրծքների վրա սնուցված օձեր»⁴⁸: Ապա խոսեց պատգամավոր Ա. Մաքսապետյանը, որը պահանջում էր անմիջապես իրագործել պետական հիմնարկությունների հայացումը և ազգայնացումը: Իսկ էսէռ պատգամավորները, լուռ նստած, լսում էին իրենց հասցեին արված բոլոր մեղադրանքները:

Չնայած մայիսի 5-ի նիստում, վարչապետ ընտրվելու ժամանակ, Հ. Օհանջանյանը խոստացել էր, որ երբ բոլշևիկյան խռովությունը հնազանդեցվի և Հայաստանի վիճակը քիչ թե շատ կայունանա, Բյուրոն կհեռանա կառավարությունից և կրկին կսահմանազատվեն Բյուրոյի և կառավարության իրավասության շրջանակները, բայց այդ բանը տեղի չունեցավ: Այստեղ Բյուրոկառավարությունը փաստարկեց, որ «դեռ անելիք կա ներքին ճակատի վրա»⁴⁹: Ներքին ճակատ ասելով՝ կառավարությունը նկատի ուներ մահմեդականների ապստամբական ելույթները Չանգիբասարում, Կողբում, Շարուրում և այլուր:

Օրակարգը սպառելուց հետո առաջարկվեց երկարաձգել խորհրդարանի արձակուրդը: Կառավարության անդամներից Մ. Վրացյանը, որը հանդիսանում էր պետական տեսակետի ակտիվ ջատագովներից մեկը, դեմ արտա-

⁴⁴ «Հայաստանի Կոմկուսի պատմության ուրվագծեր», էջ 298:

⁴⁵ ՀՀ ՊԿՊԱ, Ֆ. 200, ց. 1, գ. 576, ք. 142:

⁴⁶ «Ժողովուրդ», 10 հունիսի 1920 թ.:

⁴⁷ ՀՀ ՊԿՊԱ, Ֆ. 199, ց. 1, գ. 176, քք. 3-4, «Մշակ», 8 հունիսի 1920 թ.:

⁴⁸ Ռուբեն, նշվ. աշխ., էջ 396:

⁴⁹ «Ազգակ-Շարաթորյակ», 23 սեպտեմբերի 1973 թ. (թիվ 41):

հայտվեց Բյուրոյի մեկ ամսից ավել իշխանության գլուխ մնալուն ու նույնիսկ հրաժարականի փորձ արեց, բայց վերջը Ռ. Տեր-Սիմասյանի և Հ. Օհանջանյանի պնդմամբ ընկրկեց⁵⁰:

Արդյունքում՝ խորհրդարանը կրկին նոր օրենք ընդունեց իր աշխատանքները մինչև օգոստոսի մեկը (շուրջ երկու ամիս) դադարեցնելու մասին⁵¹: Օրենքով սահմանվեց, որ ա) դադարի միջոցին ընթացիկ օրինագծեր հաստատելու և մերժելու իրավունքը փոխանցվում է կառավարությանը բ) խորհրդարանի նախագահությանը իրավունք է տրվում արտակարգ կարևորության դեպքում և կամ կառավարության ցանկությամբ հրավիրել խորհրդարանի նիստ⁵²: Այդ նշանակում է, որ նշված ժամանակամիջոցում կառավարությունը դարձյալ օժտվում է խորհրդարանի օրենսդրական գործառնություններով (իրավասություններով): Գտնում ենք, որ խորհրդարանին պարտադրված այս երկրորդ հարկադիր արձակուրդը արդարացված (տեղին) չէր: Եթե խորհրդարանի առաջին՝ մայիսյան արձակուրդը պատճառաբանվում ու հիմնավորվում էր մայիսյան ապստամբության հետևանքով հանրապետությունում ստեղծված քաղաքական ճգնաժամային վիճակով, պետական կառավարման խիստ կենտրոնացման անհրաժեշտությամբ, ապա հունիսին ընդունված երկամսյա արձակուրդը (երբ ապստամբությունն արդեն ճնշվել էր) խիստ վիճարկելի էր, եթե չասենք սխալ ու նահանջ էր ժողովրդավարական սկզբունքներից: Ավելին, հետագայում՝ օգոստոսի 2-ին, խորհրդարանի փոխնախագահ Ավ. Սահակյանի ստորագրությամբ նոր օրենք է ընդունվում խորհրդարանի աշխատանքները շուրջ երեք ամսով՝ մինչև հոկտեմբերի 31-ը, դադարեցնելու մասին⁵³: Եվ ընթացիկ օրինագծերի հաստատման կամ մերժման իրավունքը կրկին փոխանցվում է կառավարությանը: Սա նշանակում է, որ 1920 թ. մայիսի 5-ից մինչև հոկտեմբերի 31-ը (շուրջ 6 ամիս), հարկադիր արձակուրդների պատճառով, խորհրդարան չի հրավիրվել: Իրավ է, որ այդ շուրջ 6 ամիսների ժամանակաշրջանում հաստատվել էր Բյուրո-կառավարության մենիշխանություն, ուր կուսակցությունն ու կառավարությունը նույնանում էին, իսկ խորհրդարանը գտնվում էր արձակված վիճակում: Ուսումնասիրությունը մեզ բերում է այն հետևության, որ Բյուրո-կառավարությունը փաստորեն իրենից ներկայացնում էր երկրի գերագույն իշխանությունը, ուստի և նա պատասխանատու ու հաշվետու չի եղել մեկ այլ մարմնի, այդ թվում նաև անգործության մատնված խորհրդարանի առաջ: Այստեղից էլ հնարավոր սխալներն ու բացթողումները: Ս. Վրացյանը վկայում էր, որ Օհանջանյանի կաբինետը «... ավելի շուտ հեղափոխական կոմիտե էր, քան սովորական կառավարություն»⁵⁴:

⁵⁰ Նույն տեղում:

⁵¹ ՀՀ ՊԿՊԱ, Ֆ. 198, ց. 1, գ. 58, ք. 21:

⁵² Նույն տեղում, գ. 20, ք. 56:

⁵³ ՀՀ ՊԿՊԱ, Ֆ. 198, ց. 1, գ. 58, ք. 52, ք. 202, ց. 1, գ. 106, ք. 13:

⁵⁴ Ս. Վրացյան, Հուշեր մոտիկ անցյալից («Հայրենիք», 1923, թիվ 1, նոյեմբեր, էջ 63):

Այս առնչությամբ, կարծում ենք, միանգամայն տեղին ու արդարացի էր 1921 թ. ապրիլին ՀՅԳ Բուրբեշի (Բուխարեստի) խորհրդաժողովում Բյուրոյի գործունեությանը տրված այն քննադատական գնահատականը, որ նա «1920 թ. ապրիլից ի վեր կանգնած չի եղել պատմական ծանր վայրկյանի բարձրության վրա», «չի աշխատել ստեղծել կուսակցական ուժեղ կազմակերպություն», այլ «մտած է եղել կառավարության մեջ, լքելով կազմակերպության շարքերը» ու մայիսյան դեպքերի կանխումից անմիջապես հետո «չի հրաժարվել իշխանությունից»⁵⁵: ՀՅԳ Բյուրոյի գործունեությանը գրեթե նույն քաղաքական գնահատականը տվեց նաև 11.1924-1.1925 թթ. Փարիզում գումարված կուսակցության 10-րդ (Ժ) Ընդհանուր ժողովում: Զննելով 9-րդ (Թ) Ընդհանուր ժողովից ի վեր ՀՅԳ Բյուրոյի հնգամյա գործունեությունը՝ որպես թերություն ընդգծվեց, որ ՀՅԳ Բյուրոն «Մայիսյան ապստամբության զսպումից հետո երկարաձգել է իր պետական իշխանության գլուխ մնալը»⁵⁶:

Հարկ է նշել, որ ՀՅԳ Բյուրոն իշխանությունը վարելու հակումներ էր դրսևորել նաև ՀՀ նախընթաց փուլում: Օրինակ, 9-րդ Ընդհ. ժողովում խիստ քննադատության ենթարկվեց ՀՅԳ երկու՝ Արևելյան և Հայաստանի Բյուրոների հնգամյա (1914-1919 թթ.) գործունեությունը: Վերջիններս փոխանակ մշակելու ընդհանուր ուղեգիծ և կոորդինացնելու ու ղեկավարելու կուսկացական կյանքը՝ իրերի բերումով, ավելի հաճախ ստանձնել էին գործադիր պաշտոններ՝ ընդդգվելով Հայ Ազգային բյուրոյում ու Հայոց Ազգային խորհրդում, Անդրկովկասյան կառավարությունում ու Սեյմում⁵⁷:

Արդ, բազում տասնամյակների հեռվից, բացահայտելով ու քննադատելով Բյուրո-կառավարության թույլ տված այս կամ այն վրիպումները, մյուս կողմից պետք է հաշվի առնել, որ նորանկախ պետության կառավարման տակավին բավարար փորձ չունեցող կուսակցությունը հայտնվել էր միջազգային (ռազմա-քաղաքական, դիվանագիտական) հարաբերությունների մի այնպիսի բարդ ժամանակաշրջանում, երբ շատ դժվար էր երկրի ու ժողովրդի ճակատագրին վերաբերող բոլոր հարցերում ճիշտ կողմնորոշվել և անթերի վճիռներ կայացնել:

3. Կուսակցությունների վերաբերմունքը մայիսյան ապստամբությանը

Մայիսյան դեպքերի կապակցությամբ կառավարող կուսակցության ՀՅԳ Բյուրոն ի նկատի ունենալով հայրենիքին ու անկախ պետականությանը

⁵⁵ Հ. Տասնապետյան, Հ. Յ. Դաշնակցությունը իր կազմությունն մինչև Ժ ընդհ. ժողով (1890-1924), Աթենք, 1988, էջ 159, «Ազդակ-Շաբաթօրյակ», 30 սեպտեմբերի 1973 թ. (թիվ 42):

⁵⁶ Հ. Տասնապետյան, նշվ. աշխ., էջ 173:

⁵⁷ «Քաղվածներ Հ.Յ.Դ. 9-րդ ընդհանուր ժողովի որոշումներից», Ե., 1920, էջ 14-15:

սպառնացող վտանգը, մայիսի 5-ին հրապարակեց ազդ-կոչ, որով հայտարարվում էր կուսակցության բոլոր ուժերի մոբիլիզացիա: «Այսօրվանից սկսած,- ասվում էր կոչում,- յուրաքանչյուր շրջանի բոլոր դաշնակցական ընկերները պարտավոր են ներկայանալ տեղական մարմին կամ Բյուրոյի լիագորին և նրանց տրամադրության տակ դնել իրենց բոլոր ուժերը⁵⁸:

ՀՅԳ Բյուրոյի հրահանգները գործողության մեջ դնելու նպատակով Երևանի Կենտրոնական կոմիտեն մշակեց և մայիսի 7-ին հրապարակեց կուսակցության բոլոր մարմիններին ու անդամներին ուղղված շրջաբերական հրահանգ: Դրանում ներկայացված էին շուրջ 10 կետերից բաղկացած հանձնարարություններ, որոնցով պարտադիր կարգով պետք է ղեկավարվեին կուսակցության բոլոր տեղական մարմիններն ու շարքային անդամները: Այսպես, օրինակ, պահանջվում էր կուսակցական կարգապահության խստացում, կուսակցական մարտական և զինական ուժերի կազմակերպում, հասարակական լայն զանգվածների շրջանում ուժեղ քարոզչություն և այլն⁵⁹: Նույն օրը ՀՅԳ Երևանի քաղաքային կոմիտեի նախաձեռնությամբ խորհրդարանի դահլիճում քաղաքական մոմենտի մասին զեկուցումով հանդես եկավ Վ. Նավասարդյանը⁶⁰:

Մայիսի 13 և 17-ին ՀՅԳ Բյուրոյի հերթապահ անդամ Ս. Վրացյանի և քարտուղար Հ. Տեեճյանի ստորագրությամբ հրապարակվեցին կուսակցության մարմիններին ուղղված նոր շրջաբերական հրահանգներ, որոնցում ավելի խստապահանջ ոճով ցույց էին տրվում խռովության առաջ բերած անիշխանության երևույթները և դրանք հաղթահարելու համար կուսակցական մարմինների կոնկրետ անելիքները⁶¹: Ասվածից դժվար չէ տեսնել, որ ՀՅԳ Բյուրոն, լինելով հանդերձ երկրի կառավարություն, միաժամանակ շարունակում էր կատարել կուսակցության բարձրագույն մարմնի իր պարտականությունները:

Ալեքսանդրապոլի ելույթը ճնշելուց հետո, Բյուրոյի մայիսի 17-ի շրջաբերականը ավելի շատ ուղղված էր կուսակցության արտասահմանյան մարմիններին: Հաշվի առնելով, որ ապստամբության գործին մեծ չափով նպաստել էր այն հանգամանքը, որ պետական հիմնարկություններում մինչ այդ տեղեր էին զբաղեցրել քաղաքականապես անվստահելի տարրեր, Բյուրոն հանձնարարում էր արտասահմանից Հայաստան աշխատելու գործուղել՝ սպաներ, երկաթուղու, ռադիո-հեռագրական, ավտո-հավաքակայանի աշխատողներ, գյուղատնտեսներ, երկրաչափներ, անասնաբույժներ և այլ մասնագետներ՝ ամենևին էլ պարտադիր չհամարելով, որ նրանք լինեն դաշնակցականներ⁶²: Բյուրոյի սույն շրջաբերականը ուղղված էր արտասահմանի հայա-

⁵⁸ ՀՀ ՊԿՊԱ, Ֆ. 4047, ց. 1, գ. 104, ք. 1:

⁵⁹ ՀՀ ՊԿՊԱ, Ֆ. 4047, ց. 1, գ. 165, ք. 1:

⁶⁰ Նույն տեղում, գ. 164, ք. 3:

⁶¹ Նույն տեղում, գ. 167, ք. 1:

⁶² Նույն տեղում, գ. 169, ք. 1:

շատ շրջաններին ու մասնավորապես Կ. Պոլսի հայ հատվածին: «Հառաջի» հայտնած տվյալներով՝ 1920 թ. սկզբին այնտեղ կար մոտ 250 հազ. հայ, և հույս էր հայտնվում, որ Հայկական հարցի բարեհաջող վճռի դեպքում նրանց մոտ 1/3-ը անպայման կվերադառնար հայրենիք⁶³:

Մայիսյան ապստամբության կապակցությամբ առաջացավ տարանջատում հայ քաղաքական կուսակցությունների միջև: Հայ էսեռները և Հայաստանի հնչակյանները ոչ միայն համակրեցին, այլև տեղ-տեղ գործնականում պաշտպանեցին ու աջակցեցին ապստամբ բոլշևիկներին:

Հայ էսեռների Կենտկոմը մայիսմեկյան տոնի կապակցությամբ հանդես էր եկել խորհրդամետ և հեղափոխական բովանդակությամբ կոչով⁶⁴: Այս կապակցությամբ Ա. Հովհաննիսյանը գրում էր, որ մայիսմեկյան ցույցը շարժում առաջացրեց անգամ էսեռների կազմակերպության մեջ: Նրանք ձեռնպահ մնալով զինված ապստամբությունից՝ արտահայտվում են Հայաստանի խորհրդայնացման օգտին⁶⁵: Այսինքն՝ էսեռները կողմնակից էին Հայաստանի «անարյուն խորհրդայնացմանը»: Այս նպատակին հասնելու ճանապարհին՝ անգամ Հայաստանի կոմունիստներին առաջարկ էին անում կազմել համատեղ խառը (կոալիցիոն) կառավարություն⁶⁶:

Ապստամբության ժամանակ շատ տեղերում էսեռները համագործակցել են բոլշևիկների հետ⁶⁷: Նրանք հատկապես ակտիվ գործունեություն ծավալեցին Դիլիջանի գավառում: Դիլիջան գործուղված խորհրդարանի պատգամավոր Խ. Պապայանը և այնտեղ տեղակայված գորամասի հրամանատար Սեպուհի համհարզ Մ. Թամրազյանը հուլիսի 6-ին մայրաքաղաք՝ խորհրդարանին ուղարկած իրենց համատեղ զեկուցագրում տեղի էսեռների գործունեության վերաբերյալ հայտնում էին հետևյալը. «Մայիսի 19-22-ի դեպքերից առաջ, - կարդում ենք զեկուցագրում, - էսեռները Դիլիջանում, 18 հոգու մասնակցությամբ ունեցել են ժողով, որի ընթացքում քննել են դեպի Հայաստանի ներկա կառավարությունը և բոլշևիկյան շարժումը իրենց վերաբերմունքի մասին հարցը: Այդ ժողովում 7-8 հոգի ուժեղ կերպով կողմնակցություն են արտահայտել բոլշևիկներին միանալու վերաբերյալ»⁶⁸: Այնուհետև զեկուցագրի հեղինակները շարունակում են «Մայիսի 19-22-ի Դիլիջանի հայտնի դեպքերի քննության ընթացքում պարզվել է, որ շատ տեղերում էսեռները համագործակցել են բոլշևիկների հետ: Մասնավորապես Չարխեշում էսեռները կողակերատիվի վարչության կազմով վարել են պրոբոլշևիկյան գործունեություն»⁶⁹: Այս հիման վրա առաջարկ էր մտցվում խորհրդարան՝ տեղի էսեռ դե-

⁶³ «Հառաջ», 25 հունվարի 1920 թ.:

⁶⁴ ՀՀ ՊԿՊԱ, Ֆ. 404, ց. 1, գ. 41, թ. 1:

⁶⁵ Ա. Գ. Հովհաննիսյան, Հայաստանի հեղափոխության հուլիսն ու հոկտեմբերը, Ե. 1923, էջ 15:

⁶⁶ Նույն տեղում:

⁶⁷ «Մշակ», 28 նոյեմբերի 1920 թ.:

⁶⁸ ՀՀ ՊԿՊԱ, Ֆ. 4033, ց. 7, գ. 53, թ. 1:

⁶⁹ Նույն տեղում:

կավարներին վարչական կարգով արտաքսել շրջանից⁷⁰: Հայ ժողովրդականների պաշտոնաթերթ, «Ժողովուրդ» հայտնում է, որ Գլխիջանում էսէռները զինված աջակցություն են ցույց տվել խռովարարներին⁷¹: Բացի այդ, պետք է նշել, որ մայիսյան դեպքերից առաջ և դրա ընթացքում էսէռական մամուլը առատ տեղ էր հատկացնում կոմունիստների գործունեության լուսաբանմանը, նյութեր ու հաղորդագրություններ էին տպագրում բոլշևիկների ձեռքակալությունների ու հետապնդումների, նրանց ընդհատակյա կազմակերպությունների գործունեության մասին և այլն: Այս կապակցությամբ գտնում ենք, որ իրավացի չեն «Հայաստանի Կոմկուսի պատմության ուրվագծերի» հեղինակները, երբ էսէռներին դասում են դաշնակցական կառավարության կողմնակիցների թվում⁷²:

Բացի էսէռներից, հայ քաղաքական կուսակցություններից մայիսյան ապստամբությանը համակրել, պաշտպանել ու նույնիսկ աջակցել են հնչակյանները: Ա. Հովհաննիսյանը տեղեկացնում է, որ մայիսիանեկյան շքերթի ժամանակ Հնչակյան կուսակցության խմբակը քեց սեփական դրոշը և միացավ կոմունիստներին⁷³: Ս. Գ. Հնչակյան կուսակցության պատմագիր Ա. Կիտուրը հավաստում է, որ ապստամբության ժամանակ հնչակյանները մասնակցել են ոչ միայն խմբակով, այլ զանգվածորեն, մասնավորապես նրա Երևանի մասնաճյուղը⁷⁴: Իսկ հնչակյանների թիֆլիսյան կենտրոնը որոշում է կայացնում տապալել դաշնակների կառավարությունը և հաստատել խորհրդային կարգեր⁷⁵:

Հայ քաղաքական կուսակցությունների մնացյալ մասը՝ Հայ ժողովրդականները, Հայ ռամկավարները, Հայաստանի սոց.-դեմոկրատները (նախկին «սպեցիֆիկները»), հայ մենշևիկները, ինչպես նաև անկուսակցական հասարակական խմբեր պաշտպանեցին կառավարությանը:

Այսպես, դեռ ապստամբությունը չէր սկսել՝ մայիսիանեկյան ցույցերից անմիջապես հետո՝ մայիսի 3-ին, հրավիրվեց Հայ ռամկավար կուսակցության Հայաստանի գործադիր մարմնի արտակարգ խորհրդակցական ժողով: Նրանում ընդունվեց հետևյալ բանաձևը. «Վստահություն հայտնել և աջակցել Հայկական Հանրապետության կառավարությանը ցորչափ մա կանգնած է հայ ժողովրդի ֆիզիկական գոյությունը և Միացյալ Հայաստանի անխակությունը պաշտպանելու տեսակետի վրա»⁷⁶:

Մայիսի 5-ին գումարվեց կառավարությանը աջակից քաղաքական ուժերի՝ Հայ ժողովրդական, Հայ ռամկավար, Հայաստանի սոց.-դեմ. կուսակ-

⁷⁰ Նույն տեղում, թ. 2:

⁷¹ «Ժողովուրդ», 12 հունիսի 1920 թ.:

⁷² «Հայաստանի Կոմունիստական կուսակցության պատմության ուրվագծեր», Երևան, 1967, էջ 292:

⁷³ Ս. Գ. Հովհաննիսյան, նշվ. աշխ., էջ 15:

⁷⁴ Ա. Կիտուր, Պատմություն Ս. Գ. Հնչակյան կուսակցության (1887-1962), հ. Ա, Բեյրութ, 1962, էջ 488:

⁷⁵ Ա. Կիտուր, նշվ. աշխ., էջ 486:

⁷⁶ «Հայաստանի ծայն», 16 մայիսի 1920 թ.:

ցությունների, ինչպես նաև անկուսակցականների ներկայացուցիչների խորհրդակցական ժողով: Այնտեղ քննության առնելով արտաքին ու ներքին ազդակների թելադրանքով Հայաստանում առաջացած քաղաքական ճգնաժամի հանգամանքները՝ ժողովը միաձայն որոշում կայացրեց. «Կանգնել պետական ինքնապաշտպանության և Միացյալ Հայաստանի անկախության տեսակետի վրա»⁷⁷: Միաժամանակ, խորհրդակցությունը անհրաժեշտ համարեց ծանոթանալ կառավարության տրամադրությանը և վերաբերմունքին: Հաջորդ օրը՝ մայիսի 6-ին, հատուկ պատվիրակության միջոցով նորակազմ Բյուրո-կառավարությանը իրագեկ պահվեց խորհրդատուական արդյունքների մասին:

Անշուշտ, սխալ կլինի կարծել, թե վերոհիշյալ կուսակցությունները ցանկանում էին պաշտպանել դաշնակցական կառավարությանը, բնավ՝ ոչ: Ինչպես արդեն գիտենք, այս կուսակցությունները ևս ոչ պակաս ընդդիմադիր էին ՀՅ Դաշնակցությանը և նրա կառավարությանը: Ավելին՝ սրանք էլ ժամանակ առ ժամանակ հարմար առիթը բաց չէին թողնում փորձելու տապալել դաշնակցական իշխանությունը:

Ստեղծված պայմաններում դաշնակցական կառավարությանն ու իշխանություններին պաշտպանելու անվան տակ նրանք հասկանում էին Հայաստանի անկախության և Միացյալ Հայաստանի գաղափարի պաշտպանությունը:

Մայիսի 13-ին խորհրդարանի նախագահության նախաձեռնությամբ, վարչապետ Հ. Օհանջանյանի կաբինետում, տեղի ունեցավ խորհրդակցություն՝ ՀԺԿ, Հայ ռամկավարների, ՀՍԴԲԿ ներկայացուցիչների և անկուսակցականների մասնակցությամբ: Ներկա էին Ա. Խատիսյանը, խորհրդարանի նախագահ Ավ. Սահակյանը, ՀԺԿ-ից՝ Գր. Տեր-Խաչատրյանը, Հ. Հովհաննիսյանը, Ս. Հարությունյանը, ռամկավարներից՝ Ա. Դարբինյանը, սոց.-դեմոկրատներից՝ Բ. Իշխանյանը, Գ. Անանունը, անկուսակցականներից Մ. Աբեղյանը, Գր. Չալխուշյանը և այլք: Նրանք միակամ պատրաստակամություն հայտնեցին աջակցել կառավարությանը՝ Միացյալ Հայաստանի անկախությունը պաշտպանելու գործում⁷⁸:

Վերոհիշյալ քաղաքական ուժերից ՀԺԿ ցույց է տվել նաև գործնական օգնություն⁷⁹: Պետք է ասել, որ հիշյալ կուսակցությունների բարոյական և գործնական աջակցությունը զգալի դեր խաղաց ապստամբության արագ ու ոչ ցավազին հնազանդեցման գործում:

* * *

1920 թ. մայիսյան ապստամբության հնազանդեցումից հետո՝ մայիսի 28-ին, պաշտոնապես նշվեց անկախության երկրորդ տարեդարձը: Այդ օրը Աստաֆյան (Աբովյան) փողոցի վրա կառուցված խորհրդարանի նոր շենքում

⁷⁷ Նույն տեղում, 15 մայիսի 1920 թ.:

⁷⁸ «Ժողովուրդ», 16 մայիսի 1920 թ.:

⁷⁹ «Ժողովուրդ», 11-12 հունիսի 1920 թ., «Մշակ», 4 հունիսի 1920 թ.:

կայացավ հանդիսավոր նիստը⁸⁰: Անկախության տոնին չմասնակցեցին Էսեռները, որոնք բացակայում էին նաև հանդիսավոր նիստից: Այն բացեց խորհրդարանի նախագահ Ավ. Սահակյանը: Ելույթներ ունեցան վարչապետ Հ. Օհանջանյանը: ՀՅԴ անունից հանդես եկավ պատգամավոր Վ. Նավասարդյանը: ՀԺԿ Հայաստանի կազմակերպության կողմից անկախության տարեդարձը շնորհավորեց Ս. Հարությունյանը: Նա հայտնեց, որ իր կուսակցությունը բոլոր ուժերը տրամադրել է կառավարությանը և այդպես կվարվի նաև հետագայում, եթե Հայաստանին վտանգ սպառնա: ՀԺԿ Վրաստանի ԿԿ-ի կողմից անկախությունը ողջունեց Լեոն (Առաքել Բաբախանյանը): Տարեդարձի առթիվ հայ ժողովրդին ուղղված առանձին կոչ հրապարակեց ՀԺԿ Հայաստանի ԿԿ-ը: Այդ կոչում բարձր գնահատական էր տրվում 1918 թ. մայիսի 28-ի իրադարձությանը: Հատկանշական է, որ այս կոչում ժողովրդականները հատուկ ընդգծում էին իրենց արևմտյան քաղաքական կողմնորոշումը, «Մեզ համար արևմուտքից է ծագում ազատության արշալույսը», - ընդգծվում էր կոչում⁸¹:

Հարկ է նշել, որ չնայած հանրապետության հասարակական-քաղաքական կյանքում Ժողովրդական կուսակցության կրած անհաջողությանը, այդուհանդերձ, հավատարիմ մնալով հայ ազգային իդեալներին՝ նա շարունակում էր սատար լինել հայոց անկախ պետականությանը և Միացյալ Հայաստանի կայացմանը: Համազգային տոնի առթիվ Հայաստանի կառավարությանը և խորհրդարանին ջերմագին շնորհավորեցին ՀԺԿ ԿԿ-ը, ՀԺԿ Հայաստանի ԿԿ-ը, ՀԺԿ Երևանի ուսանողական և աշակերտական խմբակցությունները, «Ժողովուրդ» թերթի խմբագրությունը⁸²:

Հայ ռամկավար կուսակցության Հայաստանի խորհրդի անունից ողջույնի խոսք ասաց Արտակ Դարբինյանը, իսկ ՀՄԳԲԿ («սպեցիֆիկներին») կողմից՝ Երվանդ Պալյանը: Ս. Գ. Հնչակյան կուսակցության Հայաստանի մասնաճյուղի կողմից անկախությունը շնորհավորեց բժ. Բենյամին Ադոյանը⁸³: Այդ նշանավոր տոնի առթիվ ՀՄԳԲԿ Երևանի կոմիտեն տպագրեց Հայաստանի քաղաքացիներին ուղղված կոչ, որում զգուշացվում էր, որ «գլխավորը ազատություն ձեռք բերելը չէ, այլ ձեռք բերած ազատությունը՝ պահպանելը»⁸⁴:

Հանրապետության երկրորդ տարեդարձը խանդավառությամբ դիմավորեց ժողովուրդը: Այն նշվեց տողանցքներով, հավաքներով, երգ-երաժշտությամբ ու հրավառությամբ:

Մայիսյան դեպքերը լուրջ դաս հանդիսացան հայ ազգային քաղաքական կուսակցությունների համար, որոնք անկախության տարեդարձի օրերին

⁸⁰ «Հառաջ», 2 հունիսի 1920 թ.:

⁸¹ «Մշակ», 4 հունիսի 1920 թ.:

⁸² ՀՀ ՊԿՊԱ, Ֆ. 198, ց. 1, գ. 71, քք. 78-79, 86, 105-106:

⁸³ «Հառաջ», 3 հունիսի 1920 թ.:

⁸⁴ ՀՀ ՊԿՊԱ, Ֆ. 1022, ց. 7, գ. 70, ք. 1:

հաստատակամություն արտահայտեցին պաշպանել հայրենիքն ու նրա անկախությունը դրսի ու ներսի ոտնձգություններից: Այս խնդրում ՀՅԳ-ի հետ համերաշխ էին ժողովրդականները, ռամկավարները, գաղութահայ հնչակյանները, «սպեցիֆիկները»:

ՀՀ երկրորդ տարեդարձը հանդիսավարությամբ նշվեց նաև գաղթաշխարհում՝ կուսակցությունների և ժողովրդի կողմից⁸⁵: Մասնավորապես այն համերաշխորեն տոնեցին ամերիկահայ չորս կուսակցությունները՝ ՀՅԳ, Վերակազմյալ Հնչակյան, Ս. Գ. Հնչակյան և Ս. Ռ-ամկավար⁸⁶:

Հայոց անկախ պետականության պաշտպանության գործում ընդդիմադիր կուսակցություններից առանձնապես մարտականորեն էին տրամադրված Հայ ժողովրդականները, որոնք մեկ անգամ ևս ընդգծում էին իրենց ազգային բովանդակությունը: Բոլշևիկների մայիսյան ապստամբությունից դասեր առած՝ նրանք «աջից» քննադատում էին Հայաստանի կառավարությանը՝ հակապետական ու հակաանկախական կուսակցությունների ու հոսանքների հանդեպ նախկինում ցուցաբերած չափից ավելի լոյալության ու հանդուրժողականության համար: «Երբեք և ոչ մի կուլտուրական երկրում,- գրում էր «Ժողովուրդը» իր առաջնորդողներից մեկում,- չի թույլատրվում գործունեությունը այնպիսի քաղաքական կամ այլ կազմակերպությունների, որոնք չեն ճանաչում այդ երկրի անկախությունը և պայքարում են նրա դեմ»⁸⁷: «Ժողովուրդը» անգամ հարց էր բարձրացնում փակել նաև ռուսական ազգային խորհուրդները, որոնք օգնել ու օժանդակել էին բոլշևիկ խռովարարներին:

«Չախ» կուսակցությունները, մնալով հակաանկախական դիրքերում, ոչ մի կերպ չարձագանքեցին մայիսի 28-ի նշանավոր տարելիցին: Ավելին՝ նորաստեղծ Հայաստանի կոմունիստական կուսակցությունը ավելի մեծ վճռականությամբ սկսեց բանվորներին ու գյուղացիներին պայքարի կոչել՝ դաշնակցական կառավարությունը տապալելու և խորհրդային իշխանություն հաստատելու համար: «Մենք դիմում ենք Հայաստանի բանվորա-գյուղացիական զանգվածներին,- կարդում ենք ՀԿԿ Կենտկոմի հետմայիսյան կոչերից մեկում,- նրա հեղափոխական կորուվին ու դասակարգային գիտակցությանը՝ կազմակերպվելու Կոմկոմի դրոշի շուրջը, հավաքելու ցրված հեղափոխական ուժերը, որպեսզի ձեռք ձեռքի տված Խ. Ռ-ուսաստանի պրոլետարիատի հետ միահամուռ ուժերով խորտակենք միջազգային իմպերիալիզմի հայկական դաշնակցական հատվածի լուծը, նորից բարձրացնենք Կոմունիզմի Դրոշակը Հայաստանում»⁸⁸:

⁸⁵ «Երիտասարդ Հայաստան», Չիկագո, 2 հունիսի 1920 թ.:

⁸⁶ Մ. Գ. Ճիզմենճյան, նշվ. աշխ., էջ 426:

⁸⁷ «Ժողովուրդը», 18 մայիսի 1920 թ.:

⁸⁸ ՀՀ ԷԶԿԳ ՊԿԱ, Ֆ. 4033, ց. 1, գ. 440, թ. 8, «Կարմիր աստղ», 1920, թիվ 19:

ԳԼՈՒԽ ՅՈՒԹԵՐՈՐԳ ԿՈՒՍԱԿՅՈՒԹՅՈՒՆՆԵՐԸ ԵՎ ԽՈՐՀՐԳԱՐԱՆԸ ՀՀ ՎԵՐՁԻՆ ՓՈՒԼՈՒՄ

1. Խորհրդա-թուրքական համագործակցությունը

Հայ քաղաքական կուսակցությունների գործունեությունն ու քաղաքական դիրքորոշումները լավ ըմբռնելու և ճիշտ գնահատելու համար հարկ կա հատուկ անդրադառնալ թուրք-բուլղարիկյան մերձեցման ու գործակցության խնդրին, որը տասնամյակներ շարունակ ժխտվել կամ առնվազն կասկածի տակ է առնվել խորհրդահայ պատմագրության մեջ:

Ինչպես հայտնի է, դեռ 1919 թ. վերջերից քաղաքացիական կռիվներում օրավուր գորացող բուլղարիկների հաջողությունները գտնայնդեցին ու ոգևորեցին նաև թուրք-ազգայնականներին (քեմալականներին), որոնք և շտապեցին դրանք օգտագործել իրենց նպատակների համար՝ ուժեղացնելով պանթուրքիզմը և պանիսլամիզմը: Մի գաղտնի վավերագրից տեղեկանում ենք, որ դեռ 1919 թ. դեկտեմբերին Հայաստանի ռազմական (գորական) նախարարության հետախուզական բաժանմունքի պետ կապիտան Մուրադյանը ահազանգում ու զգուշացնում էր հանրապետության ղեկավարությանը, որ բուլղար-թուրքական «**համապեղ գործողությունների ծրագիրը**» մեծ վտանգ է ներկայացնում Հայաստանի համար¹:

Այս փաստի կապակցությամբ Ռուբեն Տեր-Սիմասյանը իր հուշերում նշում էր, որ 1919 թ. վերջերից «հաստատ լուրեր սկսեցին պտտվել, թե կայացել է բուլղար-թուրքական համագործակցություն»²: Ավելի վաղ՝ 1918-1919 թթ., խորհրդային պետության ղեկավարները կապերի մեջ են եղել երիտթուրք պարագլուխների հետ³: Հատկանշական է, որ Մոսկվային սիրաշահում էին թե՛ իթթիհատականները և թե՛ քեմալականները, որոնք իրենց հետապնդած հակահայկական, շովինիստական նպատակներով էապես չէին տարբերվում իրարից:

¹ ՀՀ ՊԿՊԱ, ֆ. 200, ց. 1, գ. 271, քք. 85-86:

² Ռուբեն, նշվ. աշխ., հ. Է, էջ 321:

³ ՀՀ ՊԿՊԱ, ֆ. 200, ց. 1, գ. 548, ք. 28, ֆ. 201, ց. 1, գ. 43, ք. 68:

Իր հերթին, Խորհրդային Ռուսաստանը, Անդրկովկասը խորհրդայնացնելուց զատ, հեռագրա նպատակներ էր հետապնդում կոմունիստական շոշափուկները տարածել ամբողջ իսլամական երկրների վրա՝ մինչև Հնդկաստան, Եմեն ու Մարոկկո, մուսուլմանությանը սրբազան պատերազմի հանել ընդդեմ Ամտանտի, մասնավորապես՝ Անգլիայի: Ի դեպ, Ամտանտի երկրների թվին էր դասվում նաև Հայաստանը: Ալեհայտ փաստեր կան այն մասին, որ 1919 թ. բոլշևիկ Կառլ Ռադեկը, Բեռլինում բանակցելով երիտթուրք պարագլուխներ Թալեաթի, Էնվերի և մյուսների հետ, դրել էր խորհրդա-թուրքական համագործակցության հիմքը⁴: Այնուհետև Էնվեր փաշան օդանավով ժամանել է Մոսկվա և իր ու Մուստաֆա Քեմալի անունից բանակցել Վ. Ի. Լենինի հետ: 1919 թ. հունիսին Մոսկվայում կայացել է խորհրդաժողով՝ բոլշևիկների և մուսուլմանական ժողովուրդների տարբեր քաղաքական կազմակերպությունների միջև⁵: Սեպտեմբերին Սվազում գումարված քեմալականների կոնգրեսին ներկա են եղել Խ. Ռուսաստանի և Ադրբեջանի ներկայացուցիչները: Այնտեղ որոշվել է համատեղ գործողություններ սկսել Հայաստանի դեմ: 1919 թ. աշնանը Թուրքիայի Սամսուն քաղաքում կնքվել էր խորհրդա-թուրքական բարեկամական դաշնագիր⁶, որն ուղղված էր նաև խորհուրդների արևելյան քաղաքականության խոչընդոտ ՀՀ դեմ:

ՀՀ հեռագրական գործակալության 1919 թ. հունիսի 21-ի թիվ 99 հաղորդագրության մեջ կարդում ենք. «Երիտասարդ թուրքերը համաձայնության են եկել մեծամասնականների հետ՝ նրանցից ստանալով դրամական և զինական աջակցություն՝ նախկին Տաճկաստանում շարժումներ առաջ բերելու և իբր թե խորհրդային իշխանություն հիմնելու համար⁷»:

ՀՀ ռազմական նախարարության գլխավոր շտաբի հետախուզական բաժանմունքի պետ կապիտան Մուրադյանը մի գաղտնի ամփոփագրում հայտնում էր. «Ստացված լուրերի համաձայն՝ թուրքերի և բոլշևիկների միջև կայացել է նոր համաձայնություն, որի համաձայն մինչև Արփաչայը (Ախուրյան գետը - Ա. Հ.) տրվում թուրքերին⁸, իսկ վերջիններս դրա դիմաց պարտավորվում են Ադրբեջանի հետ միասին ուժեր հատկացնել՝ կամավորների (Դե-

⁴ Յ. Իրազեկ, *Մոտիկ անցյալից, Պեյրոթ, 1956, էջ 57, ՀՀ ՊԿՊԱ, Ֆ. 200, ց. 1, գ. 548, թ. 28, գ. 427, մաս 2, թ. 249:*

⁵ ՀՀ ՊԿՊԱ, Ֆ. 200, ց. 1, գ. 576, թ. 169:

⁶ Յ. Իրազեկ, *նշվ. աշխ., էջ 62, ՀՀ ՊԿՊԱ, Ֆ. 200, ց. 1, գ. 576, թ. 169:*

⁷ ՀՀ ՊԿՊԱ, Ֆ. 201, ց. 1, գ. 43, թ. 68:

⁸ *Այս առնչությամբ կեղծ ու անհիմն պետք է համարել խորհրդային պատմագրության մեջ տարածված և մինչև օրս էլ շարչոկվող «եթե»-ների ու ենթադրությունների հիման վրա կառուցված այն վարկածը, որ իբր, եթե 1920 թ. զարնանը (մայիսյան ապստամբության ժամանակ) դաշնակները իշխանությունը կամավոր հանձնեին բոլշևիկներին, ապա Հայաստանը տարածքային մեծ կորուստներ չէր ունենա, առնվազն Կարսը, Արդահանը և Մուրմալուն կարող էին փրվել: Իսկ ինչ վերաբերում է Չիչերինի առանձին հայանպաստ հայտարարություններին, ապա դրանք պարզապես պետք է որակել որպես դիվանագիտական քարոզչություն:*

նիկինի - Ա. Հ.) դեմ կռվելու համար: Բոլշևիկները զենք են մատակարարում ինչպես Թուրքիային, այնպես էլ Ադրբեջանին⁹: Որ 1919 թ. աշնանից ՌԿ/Բ/Կ սկսել էր մեծ ուշադրություն դարձնել մահմեդական Արևելքի վրա, այնտեղ համաշխարհային հեղափոխության «հրդեհը» տարածելու համար, երևում է հետևյալ վավերագրից: 1919 թ. կեսերին, երբ վրաց մեկնչևիկյան կառավարությունը, վճռական հարձակման անցնելով բոլշևիկների դեմ, սկսեց նրանց զանգվածային ձերբակալություններն ու արտաքսումները, Թիֆլիսում ձերբակալված բոլշևիկների մոտ հայտնաբերված փաստաթղթերից պարզվել էր հետևյալը.

1) Վերջին մի քանի ամսում Հայաստան ուղարկված փողի քանակը կազմել է մի քանի միլիոն ռուբլի¹⁰: 2) Մոսկվայից ուղարկված մի փաստաթղթում, որի տակ կային ժողկոմխորհի քարտուղար Ստասովայի ստորագրությունը և ՌԿ/Բ/Կ ԿԿ-ի կնիքը, կարդում ենք հետևյալը. «Հարգելի ընկերներ, ստացանք Ձեր գրությունը: Սրա հետ ուղարկվում է Ձեզ դրամ և տպագրված նյութեր: ԿԿ-ի վերջին նիստում որոշվեց հատուկ ուշադրություն դարձնել մահմեդական Արևելքի վրա: Այնտեղի երկրները այնպիսի դրության մեջ են գտնվում, որ դրանց համար Եվրոպական իմպերիալիզմի դեմ մղվելիք կռիվը կյանքի և մահվան հարց է: Ուստի՝ դրանց մեջ շարժում առաջացնելն ու դրանք օգտագործելը ճիշտ է: Այդ նպատակով հատուկ անձեր ենք ուղարկում Ձեր տրամադրության տակ գտնվելու համար: Որոշեցինք Բաքվի «Հումմեթ» կուսակցության կոմիտեն համարել մեր ներկայացուցիչը: ...Ադրբեջանը պետք է հայտարարվի խորհուրդների տեղական հանրապետություն: Հատուկ ուշադրություն պետք է դարձվի Հայաստանի վրա, որի միացումով կհեշտանա զծի ուղղելը դեպի Թուրքիա: Դաժան կռիվ պետք է մղել դաշնակցականների դեմ...»¹¹:

Տեղեկացնենք, որ դեռ 1920 թ. հունվարից ՀՅԳ Բյուրոն արդեն տեղյակ էր բոլշևիկ-քեմալականների գործակցությանը: Այս կապակցությամբ Ա. Ջամալյանը, Ռ. Տեր-Սիմայանը և Ս. Վրացյանը տեսակցել էին ՌԿ/Բ/Կ Կովկասյան բյուրոյի քարտուղար Հ. Նազարեթյանի հետ և հանգել այն համոզման, որ հանուն համաշխարհային հեղափոխության և թուրք-բոլշևիկյան գործակցության շահերին Հայաստանը և նրա անկախությունը կարող է զոհաբերվել¹²: Այդ նույն ժամանակներում ՀՅԳ Բյուրոն խորհրդա-քեմալական համագործակցության մասին տեղեկություն էր ստացել նաև Կ. Պոլսից¹³: Ս. Վրացյանը հայտնում էր, որ Մոսկվայում քաղաքական մթնոլորտը հայանպաստ չէր: Թուրք-ադրբեջանական պրոպագանդան ստեղծել էր հակահայ-

⁹ ՀՀ ՊԿՊԱ, ֆ. 200, ց. 1, գ. 486, թ. 18:

¹⁰ ՀՀ ՀՔԿՊ ՊԿԱ, ֆ. 1022, ց. 4, գ. 288, թ. 1:

¹¹ ՀՀ ՀՔԿՊ ՊԿԱ, ֆ. 1022, ց. 4, գ. 288, թ. 2, «Աշխատավոր», 1919, թիվ 262, էջ 4:

¹² Հ. Տասնապետյան, նշվ. աշխ., էջ 151:

¹³ «Ազդակ-Շարաբորյակ», 1973, թիվ 40, էջ 629:

կական հասարակական կարծիք¹⁴: ՀՅԴ Բյուրոն 1920 թ. մարտյան իր շրջա-
բերականներից մեկում փաստում էր, որ «այլևս ամեն կասկածից դուրս է
թուրքերի և բոլշևիկների միջև կնքված զինակցությունը»¹⁵:

Խորհրդա-թուրքական մերձեցումը և համագործակցության փաստը
հաստատում են այլ կուսակցություններ: Այսպես՝ Դաշնակցությանը և Հա-
յաստանի կառավարությանը առնվազն ոչ համակիր էսեռների կուսակցու-
թյան պաշտոնաթերթը 1919 նոյեմբերյան իր համարներից մեկում տպագրել է
հետևյալ տեղեկությունը. «Կոստանդնուպոլսից հաղորդում են, որ Սիրիայից
Մուստաֆա Քեմալը հեռագրով դիմել է Լենինին և առաջարկել դաշն կապել
թուրք ազգայնականների և խորհրդային կառավարության մեջ»¹⁶:

1920 թ. ամռանը, երբ արդեն ակնհայտ իրողություն էր խորհրդա-թուր-
քական գործակցությունը, ՀՄԴԿ («սպեցիֆիկների») ԿԿ-ը հուլիսին հա-
տուկ կոչ է հղում աշխարհի բոլոր սոցիալիստական կուսակցություններին,
Սոցիալիստական ինտերնացիոնալի Բյուրոյին՝ Խ. Ռուսաստանի, Թուրքիա-
յի և Ադրբեջանի գործակցության հետևանքով Հայաստանի անկախ պետա-
կանությանը սպառնացող մահացու վտանգի մասին: «Խորհրդային Ռուսաս-
տանը,- ասված է կոչում,- դաշնակցած Ադրբեջանի թաթարների և թուրքական
Անատոլիայում գործող ազգայնականների կամ Մուստաֆա Քեմալ փաշայի
հետ, բոլոր կողմերից շրջապատել են Հայաստանը թշնամական ուժերով և
սպառնում են ոչնչացնել հայ ժողովրդի այնքան թանկ գնով ձեռք բերված ա-
զատությունը և անկախությունը: Խորհրդային կառավարությունը սպառնում է
իր համար ճանապարհ հարթել դեպի Արևելք՝ հայ դեմոկրատիայի դիակների
վրայով»¹⁷: Այս փաստաթղթի կարևորությունը մեծանում է նրանով, որ թուրք-
բոլշևիկյան գործարքի փաստը ժխտող կամ առնվազն կասկածի տակ առնող
հեղինակները հայտարարում էին, թե իբր դա եղել է ընդամենը ՀՅԴ կուսակ-
ցության և Հայաստանի դաշնակցական կառավարության մտացածին հնար-
քը՝ իր տխրահռչակ տիրապետությունը երկարացնելու համար: Մինչդեռ, ինչ-
պես տեսնում ենք, թուրք-բոլշևիկյան համագործակցության մասին փաստում
է ՀՅԴ-ին և Հայաստանի կառավարությանը ամենևին էլ ոչ համակիր ՀՄԴԿ -
կուսակցությունը: Վերոգրյալը մեկ ավելորդ անգամ հաստատելու համար ա-
վելացնենք, որ խորհրդա-թուրքական համագործակցության մասին են վկա-
յում այլ ընդդիմադիր կուսակցություններ և այդ թվում՝ նաև Ս. Դ. հնչակյան-
ները¹⁸:

1919 թ. վերջերին և 1920 թ. սկզբներին, երբ արդեն որոշակի հավաստի
տեղեկատվական աղբյուրներից հայտնի դարձավ խորհրդային իշխանու-
թյան և քեմալականների միջև մերձեցման փաստը, ՌԿ/Բ/Կ Հայաստանի կո-

¹⁴ Ս. Վրացյան, *Հայաստանի Հանրապետություն, Բեյրութ, 1958, էջ 454*:

¹⁵ ՀՀ ՀԶԿՓ ՊԿԱ, Ֆ. 4047, ց. 1, գ. 159, թ. 1:

¹⁶ «Սոցիալիստ հեղափոխական», 23 նոյեմբերի 1919 թ.:

¹⁷ ՀՀ ՀԶԿՓ ՊԿԱ, Ֆ. 1022, ց. 7, գ. 73, թ. 1:

¹⁸ «Երիտասարդ Հայաստան», 22 հոկտեմբերի 1920 թ.:

միտեն (Արմենկոմը), կասկածի տակ առնելով այդ լուրը, այն համարեց «Դաշնակցության զգվելի սադրանք»¹⁹: Արմենկոմի անդամ Ստ. Ալավերդյանը թուրք-բուլղարիկյան մերձեցումը համարում էր «դաշնակցականների հնարած կեղծիք»²⁰: Մեկ այլ բուլղարիկ, հեղկոմի անդամ Ա. Տեր-Սահակյանը դա համարում էր դաշնակների տարածած պրովոկացիա²¹: Բայց ինչպես ցույց տվեցին հետագա պատմաքաղաքական դեպքերն ու իրադարձությունները, թուրք-բուլղարիկյան համագործակցության վերաբերյալ լուրերը անհիմն չէին, ինչպես որ պնդում էր Ռ-Կ/բ/Կ Հայաստանի կոմիտեն և բուլղարի մյուս երևելի ներկայացուցիչները: Այդ գործակցության իրողությունը արդեն հաստատվել է բազմաթիվ հիմնավոր փաստերով, այդ թվում նաև մեր կողմից հրատարակված խնդրին առնչվող փաստաթղթերի ժողովածուով²²:

Եթե 1920 թ. առաջին կեսին հայ բուլղարիկները չէին ընդունում և աշխատում էին հերքել այն փաստը, որ բուլղարիկները զինակցել ու դաշնակցել է թուրք-թաթարական պանիսլամիզմի հետ Արևելքում միասնաբար գործելու համար, ապա 1920 թ. երկրորդ կեսից արդեն նրանք ոչ միայն չէին հերքում կամ ուրանում այդ փաստը, այլև հրճվում և Բաքվի «Կոմունիստի» միջոցով օրնիբուն քարոզչություն էին անում ու ուժեր կազմակերպում Հայաստանի դեմ և «ջերմ փափագ հայտնում Հայաստանի վրայով ճանապարհի հարթել դեպի Անատոլիա և կամուրջ ձգել Ադրբեջանի և Տաճկաստանի միջև»²³: Իսկ Ադրբեջանի և Թուրքիայի միջև կապի գլխավոր խոչընդոտը համարվում էր Հայաստանը: Դեռ 1919 թ. նոյեմբերին Բաքվում մշակվել էր այն պլանը, որով թուրքական զորքը պիտի անցներ Հայաստանի վրայով՝ Դեմիկիմի կամավորական բանակի թիկունքին հարվածելու համար:

Խորհրդային կառավարությունը՝ Վ. Ի. Լենինի գլխավորությամբ, առաջինը ճանաչեց 1920 թ. ապրիլի վերջերին Անգորայում բացված Թուրքիայի Ազգային մեծ ժողովի (խորհրդարանի) կառավարությունը՝ Մ. Քեմալի գլխավորությամբ²⁴: Մոսկվայի և Անգորայի միջև տեղի ունեցան ողջույնի և դիվանագիտական ուղերձների փոխանակություններ: 1920 թ. ապրիլի 26-ին Վ. Ի. Լենինին հղած նամակում Մ. Քեմալը խնդրում էր երկու կառավարությունների միջև դիվանագիտական հարաբերություններ հաստատել և Թուրքիային օգնել նյութապես և ռազմամթերքով: Այնուհետև Մ. Քեմալի նամակում ասվում էր, որ Թուրքական կառավարությունը իր վրա է վերցնում **պատերազմական գործողությունները իմպերիալիստական Հայաստանի դեմ** և պարտավորվում է **սրիպել Ադրբեջանի Հանրապետությանը մղվելու խորհրդային պե-**

¹⁹ ՀՀ ՀՔԿՓ ՊԿՊԱ, Ֆ. 4033, ց. 1, գ. 440, թ. 4:

²⁰ Նույն տեղում, Ֆ. 4020, ց. 1, գ. 16, թ. 12:

²¹ «Մայիսյան ապստամբությունը Հայաստանում», էջ 31

²² «Հայություն», 1-10 հուլիսի 1993 թ. (թիվ 9):

²³ ՀՀ ՊԿՊԱ, Ֆ. 199, ց. 1, գ. 138, թ. 75:

²⁴ Հ. Գանգրունի, նշվ. աշխ., էջ 141:

պուրջան շրջանակի մեջ»²⁵: Հայտնի է, որ 1920 թ. գարնանը քեմալականները արդեն նախապատրաստվում էին հարձակվել Հայաստանի վրա, որը, սակայն, հետաձգվեց Ռուսաստանի արտ. գործ. նախարար Գ. Չիչերինի միջնորդությունից հետո²⁶: Իսկ ինչ վերաբերում է Մ. Քեմալի կողմից Ադրբեջանի խորհրդայնացման առաջարկությանը, ապա այն ընդունվեց մեծ գոհունակությամբ և չանցած երկու օր՝ առանց որևէ կրակոցի ու զոհի Ադրբեջանը խորհրդայնացվեց:

Նոր փոփոխված քաղաքական իրադրության պայմաններում Մոսկվա մեկնեց Լ. Շանթի գլխավորած ՀՀ պատվիրակությունը՝ Խ. Ռուսաստանի հետ քաղաքական հարաբերությունները կարգավորելու ու բարեկամության դաշնագիր կնքելու համար: Հայաստանի իշխանությունները հույս էին տածում, թե Խ. Ռուսաստանը կճանաչի Հայաստանի անկախությունը: 1920թ. գարնանից Ռուսաստանը, սկսելով հարաբերությունները Հայաստանի հետ՝ փորձում էր հանդես գալ միջնորդի դերում Հայաստանի և Թուրքիայի միջև:

Հայաստանի կողմից նման քայլը միայն կառավարության նախաձեռնությունը չէր, այլ հասարակայնության և օրվա հասունացած ներքին պահանջ: 1920 թ. գարնանը հայ հասարակական-քաղաքական գրեթե բոլոր ուժերը, անկախ Խ. Ռուսաստանի հասարակական-քաղաքական վարչակարգի նկատմամբ ունեցած վերաբերմունքից, մեծ շահագրգռություն հանդես բերեցին, քաղաքացիական պատերազմում հաղթանակով դուրս եկած խորհրդային կառավարության հետ շուտափույթ բարեկամական կապեր հաստատելու ուղղությամբ: Այս կապակցությամբ բերենք մի փաստաթուղթ: Հայաստանի հինգ քաղաքական կուսակցությունների ներկայացուցիչների՝ 1920 թ. ապրիլի 5-ի Ալեքսանդրապոլի խորհրդակցությունը դիմել է Հայաստանի խորհրդարանին ու կառավարությանը՝ հետևյալ խնդրանքով. «Նկատի ունենալով այն հանգամանքը, որ Խորհրդային Ռուսաստանը երկամյա քաղաքացիական պատերազմից հետո վերջնականապես հաղթեց ներքին հակահեղափոխությանը և այժմ կանգնած է Անդրկովկասի սահմանին, այդպիսի իրադարձությունը ուժեղ ազդեցություն է թողնում հանրապետության ներքին կյանքի վրա: Հայ աշխատավորությունը չի կարող անտարբեր մնալ ու պետք է հաշվի նստի դեպի հարավ արշավող հյուսիսի դեմոկրատիայի մեծ ուժի հետ: Քաղաքական կուսակցությունների ս. թ. ապրիլի 5-ի խորհրդակցությունը գտնում է, որ կառավարությունը, հենվելով հասարակական և քաղաքական կազմակերպությունների լայն աջակցության վրա, պետք է անհապաղ բարեկամական բանակցությունների մեջ մտնի խորհրդային կառավարության հետ՝ պայմա-

²⁵ Մ. Վ. Արզումանյան, *Արհավիրքից վերածնունդ*, Ե. 1973, էջ 299, Ե. Ղ. Սարգսյան, *Դավադիր գործարք*, Ե., 1995, էջ 138-139:

²⁶ «Документы внешней политики СССР», т. 2, с. 725 /приложения/, Է. Ա. Չոխրաբյան, *Մովետական Ռուսաստանը և հայ-թուրքական հարաբերությունները*, Ե., 1979, էջ 40-41, Կ. Խ. Սարդարյան, *Պատմություն և իրականություն*, Ե., 1991, էջ 55, Ե. Ղ. Սարգսյան, *Աշվ. աշխ.*, էջ 138-140:

նով, որ ապահովվի թե՛ Ռուսահայաստանի և թե՛ Թուրքահայաստանի քաղաքական և տնտեսական գոյությունը»²⁷: Սույն փաստաթղթի տակ ստորագրել էին ՀՄԳԲԿ («սպեցիֆիկների»), Էսեռների, ՀՅ Դաշնակցության, Հայ ռամկավարների և Հայ ժողովրդական կուսակցությունների Ալեքսանդրապոլի կազմակերպությունները: Ինքնին հասկանալի է, որ կառավարությունը չէր կարող անտես անել ընդհանուր մտայնություն դարձած հասարակական կարծիքի այդ պահանջը:

Պետք է ասել, որ մյուս կողմից հայ-ռուսական բանակցություններին բացասաբար վերաբերվեցին համաձայնության (Անտանտի) երկրներն ու առաջին հերթին Անգլիան: Այդ օրերին անգլիական թերթերը հայտնում էին, որ իբր «Հայաստանը լքում է Դաշնակիցներին»²⁸:

Հայ-ռուսական հարաբերությունների խնդրում գտնում ենք, որ անկախ այն բանից, թե Հայաստանը ուներ Արևմտյան կողմնորոշում թե ոչ, ճիշտ էր վարվում, երբ, բանակցելով Խ. Ռուսաստանի հետ, ջանում էր նորմալ, բարիդրացիական հարաբերություններ հաստատել վերջինիս հետ: Մենք այն կարծիքին չենք, թե Հայաստանի կառավարությունը մինչ այդ որևէ ձգտում ու ցանկություն չի ունեցել բարեկամական հարաբերություններ հաստատել նաև Խորհրդային Ռուսաստանի հետ: ՀՀ երևելի գործիչներից Ռուբենը խոստովանում է, որ մեր հարաբերությունները դեմիկիմյան Ռուսաստանի հետ ավելի սերտ էին այն հիմնական պատճառով, որ աշխարհագրական առումով վերջինս Հայաստանին ավելի մոտ էր, քան Խ. Ռուսաստանը²⁹: Մյուս կողմից՝ Հայաստանը անհաղորդ ու թշնամի էր Թուրքիայի հանդեպ: Այդ թշնամությունը նա կարող էր հակակշռել Ռուսաստանի հետ բարեկամությամբ: Բացի այդ՝ Հայաստանը մշտապես զգում էր Ռուսաստանի տնտեսական ու ռազմական օգնության կարիքը: Մակայն արտաքին քաղաքական այս մտահայեցողությունների կողքին մենք հակված չենք անտեսել կամ թերագնահատել այն պարագան, որ, այնուամենայնիվ, մինչև 1920 թ. կեսերը Հայաստանի քաղաքական ղեկավարության կողմնորոշումը հիմնականում դեպի Արևմուտքն էր, դեպի սպասելիքաշատ ու խոստումնառատ Սան-Ռեմոն ու Սևրը:

Այս իմաստով կարծում ենք այնքան էլ անկեղծ չէ Ռուբենը, երբ գրում է, թե «Հայաստանի քաղաքական գլխատր ուղղությունը 1919 թ. ձգտումն էր դեպի Ռուսաստանը»³⁰: Հայաստանի քաղաքական շրջաններում միանգամից բեկում դեպի Ռուսաստան չէր կարող լինել այն պարզ պատճառով, որովհետև Հայաստանի հետախուզությանը ուղղակի և անուղղակի աղբյուրներից արդեն հայտնի էր դարձել խորհրդա-թուրքական մերձեցման փաստը, որը ինքնին զգուշության և անվստահության մտավախություն էր առաջ բերում:

²⁷ ՀՀ ՊԿՊԱ, Ֆ. 200, ց. 1, գ. 576, ք. 246, «Բանվորի ձայն», Թիֆլիս, 25 ապրիլի 1920

²⁸ ՀՀ ՊԿՊԱ, Ֆ. 200, ց. 1, գ. 576, ք. 167:

²⁹ Ռուբեն, նշվ. աշխ., էջ 256:

³⁰ Ռուբեն, նշվ. աշխ., էջ 255:

Խորհրդա-թուրքական մերձեցման իրողության պայմաններում Հայաստանի իշխանությունների վերաբերմունքը բոլշևիկների հանդեպ չէր կարող բարյացակամ լինել: «Այն օրից,- հայտարարել է Ա. Ջամալյանը խորհրդարանի թիվ 67 նիստում,- երբ փաստ եղավ բոլշևիկների և միլիների (թուրք ազգայնականների-Ա. Հ.) դաշինքը այդ չալմայավոր սոցիալիստների հետ, այդ օրվանից ահա փոխվել է մեր վերաբերմունքը դեպի բոլշևիկները»³¹:

Խոսելով հայ-ռուսական հարաբերությունների մասին՝ պետք է զատորոշել այն հանգամանքը, որ մինչև 1920 թ. սկզբները Հայաստանի իշխանությունների վերաբերմունքը դեպի Խ. Ռուսաստանը եղել է բարյացակամ, համեմայն դեպս ոչ թշնամական: 1919 թ. աշնանը Երևանում գումարված ՀՅԳ 9-րդ Ընդհ. ժողովում հայ-ռուսական հարաբերությունների խնդրում ընդունված որոշումներում շեշտվում էր, որ պահպանվելու էին բարյացակամ, բարեկամական հարաբերությունները ռուս ժողովրդի ու Ռուսաստանի քաղաքական վերածնության հանդեպ³²: Պետք է նկատել, որ ՀՅԳ-ն որպես կառավարող կուսակցություն, Խորհրդային Ռուսաստանին դիմակայել է գերազանցապես զաղափարական հարցերում, իսկ Ռուսաստանի և ռուս ժողովրդի նկատմամբ նա ընդհանրապես ոչ մի թշնամանք չի դրսևորել: ՀՅԳ-ն Հայաստանի կառավարությունը եղել են հակաբոլշևիկ, հակախորհրդային, բայց ոչ երբեք հակառուս: Ավելին՝ շատ խնդիրներում նրանք չափից ավելի ռուսասեր էին, որի համար էլ Արևմուտքի դաշնակից տերությունները ու հատկապես Անգլիան այդ իմաստով Հայաստանին ու հայերին հաճախ չէին վստահում: Այստեղից հետևում է, որ հայ-ռուսական բազմաշերտ հարաբերությունների կնճիռը բացահայտելիս՝ չի կարելի բոլշևիզմը նույնացնել Ռուսաստանի և ռուս ժողովրդի հետ:

Հայ-ռուսական հարաբերությունների և Հայաստանի քաղաքական կողմնորոշման խնդիրը քննելիս՝ անհրաժեշտ է ցուցաբերել կոնկրետ պատմական մոտեցում: Պետք է հաշվի առնել, որ քաղաքացիական պատերազմի շրջանում Ռուսաստանում կային մի շարք իշխանություններ՝ բոլշևիկյան, դեմոկրատիկ, կոլչակյան, վրանգելյան և այլն: Համեմայն դեպս՝ մինչև 1920 թ. սկզբները պարզ չէր, թե դրանցից որ մեկը կհաղթանակի վերջնականորեն: Եղածներից Հայաստանը սերտ կապեր ուներ աշխարհագրորեն իրեն ավելի մոտ Դեմոկրատիկ կառավարության հետ: Հայաստանը Խ. Ռուսաստանի հետ բարեկամական կապեր հաստատելու հնարավորություն չուներ, քանզի մինչև 1920 թ. սկզբները առնված էր ինտերվենցիայի և քաղաքացիական պատերազմի կրակե օղակի մեջ: Ասենք, եթե Հայաստանը այդ ժամանակ խորհրդային ընդգծված կողմնորոշում ցուցաբերեր, տնտեսական և քաղաքական ինչ-որ շահ կորզելու նպատակով, միևնույն է, դրանից ոչ մի օգուտ չէր կարող ստանալ, որովհետև Խ. Ռուսաստանը ինքը կարիք ուներ օգնության ու ներքին հանգստության: Բայց, երբ 1920 թ. սկզբներից քաղաքացիական պատե-

³¹ ՀՀ ՊԿՊԱ, Ֆ. 198, ց. 1, գ. 78, ք. 1:

³² «Քաղվածներ Հ.Յ.Գ. 9-րդ ընդհանուր ժողովի որոշումներից», Ե., 1920 թ. էջ 6:

րազմում հաղթանակով դուրս եկող Խ. Ռուսաստանի հետ իրական կապեր ու հարաբերություններ հաստատելու հնարավորություններ ու նախադրյալներ ստեղծվեցին, այժմ էլ, համաշխարհային հեղափոխության կոմինտերնյան հեռագնա գաղափարներով տարված, նա մերձեցավ քեմալականներին: Այս առնչությամբ անհիմն ու մտացածին պետք է համարել խորհրդահայ պատմագրության մեջ դեգերող այն դատողությունը, թե իբր դաշնակցական կառավարության անհաշտ, թշնամական, հակառուսական վերաբերմունքի պատճառով Խ. Ռուսաստանը երես դարձրեց Հայկական հարցի հայանպաստ լուծումից:

Ինչևէ, քաղաքական այսպիսի իրադրության պայմաններում 1920 թ. մայիսի սկզբին Շանթի գլխավորած ՀՀ պաշտոնական պատվիրակությունը մեկնեց Հյուսիսային Կովկաս, իսկ նույն ամսվա վերջին հասավ Մոսկվա: Սկզբում հաջող սկսված բանակցությունները հետագայում գործնական ոչ մի դրական արդյունք չտվեցին: Բանն այն է, որ 1920 թ. մայիսին Անգորայից Բաքվի վրայով դեպի Մոսկվա գործուղվեց Թուրքիայի Ազգային մեծ ժողովի պատվիրակությունը՝ արտ. գործ. նախարար Բեքիր Սամի բեյի և ժող. տնտեսության նախարար Յուսուֆ Քեմալ բեյի գլխավորությամբ: Թուրքայի դիվանագիտական առաքելությունը նապատակ ուներ Խորհրդային Ռուսաստանի հետ պայմանագիր կնքելու և օգնություն ստանալու դրամով և ռազմասարքով: Հուլիս-օգոստոս ամիսներին տեղի ունեցած բանակցությունների արդյունքով՝ Թուրքիան ստացավ և՛ դրամ՝ ոսկու ձևով, և՛ ռազմական օգնություն՝ զենքով ու ռազմամթերքով: Բացի այդ, 1920 թ. օգոստոսի 24-ին կողմերի միջև կայացվեց բարեկամության մախնական պայմանագիր, որով Խ. Ռուսաստանը ճանաչում էր թուրքական Ազգային ուխտով գծված սահմանները: Միաժամանակ, կողմերը պարտավորվում էին չճանաչել Սևրի պայմանագիրը և պետք է համատեղ հակազդեին դրան, որը «ուժով պարտադրվել էր Թուրքիային»³³:

Այս համայնապատկերի վրա, հայ-ռուսական բանակցությունները դրական արդյունք չէին կարող տալ, քանզի խորհրդային կառավարությունը՝ Հայաստան կամ Թուրքիա ընտրության հարցում «հեղափոխական Թուրքիան» գերադասեց «միջազգային իմպերիալիզմի գործակալ Հայաստանից»: Հայ-ռուսական բանակցությունների անհաջողության գործում որոշ դեր խաղացին նաև մայիսյան ապստամբությունում պարտություն կրած հայ կոմունիստները, որոնք ամեն ջանք թափեցին, նույնիսկ պատվիրակություն ուղարկեցին Մոսկվա՝ խորհրդային կառավարության մոտ, որպեսզի Խ. Ռուսաստանի և Հայաստանի միջև համաձայնություն չկնքվի³⁴:

Հուլիսի 1-ին Լ. Շանթը Մոսկվայից հեռագրում էր. «Առաջին տեսակցությունից պարզվեց, որ միակ դժվարությունը Ադրբեջանի սահմանն է, որով-

³³ Գ. Լազյան, Հայաստան և Հայ Դատը, Ե. 1991, էջ 254-256, Գ. Գալոյան, Հայաստանը և մեծ տերությունները (1917-1923 թթ.), Ե., 1999, էջ 267:

³⁴ «Ժողովուրդ», 7 հուլիսի 1920 թ.:

հետև Բաքվից Ադրբեջանի վարիչները և հայ բոլշևիկները ամեն կերպ աշխատում են խանգարել պայմանագրի կնքումը»³⁵: «Ադրբեջանի կոմունիստներին,- գրում է Ս. Վրացյանը,- Բաքվում գտնվող հայ կոմունիստների (Միկոյան, Ավիս, Մռավյան և ուրիշներ) աջակցությամբ, հաջողվեց ազդել Մոսկվայի վրա, որ դաշնագրի ստորագրությունը Հայաստանի հետ չկայանա»³⁶: Գաշնակցություն կուսակցությանը ընդդիմադիր ՀԺԿ պաշտոնաթերթը «Ժողովուրդը» Լ. Շանթի խաղաղարար առաքելության անհաջողության համար մեղադրում էր ռուսական կողմին³⁷: Եվ այս ֆոնի վրա միանգամայն անհիմն են Շանթի պատվիրակության հասցեին արված մեղադրանքները՝ անգիջողակալության, ձգձգման, կառուցողական մոտեցում չդրսևորելու, բանակցությունները վիժեցնելու հարցում³⁸: Հայ-ռուսական բանակցությունները, Մոսկվայում մտնելով փակուղի, ընդհատվեցին՝ Երևանում շարունակելու նպատակով: Մյուս կողմից՝ Արևմուտքում գտնվող ՀՀ մյուս պատվիրակությունը ձգտում էր Արևմտյան տերությունների օգնությամբ լուծել իր ազգային-տարածքային հիմնախնդիրները, որի իրական հնարավորությունը գնալով օրավուր պակասում էր: Արդեն 1920 թ. կեսերից Հայկական հարցի լուծման հավանականությունը Արևմուտքի կողմից գնալով պակասում էր այն պատճառով, որ տարածաշրջանում հայտնվել էին երկու հզոր ռեալ ուժեր՝ Խ. Ռուսաստանը և քեմալական Թուրքիան, որոնց քաղաքական շահերը այդ ժամանակ համընկնում էին, իսկ թույլ ու անօգնական Հայաստանը հայտնվել էր դրանց արանքում:

Արդեն 1920 թ. ամռանը, Արցախը խորհրդայնացնելուց և Կարմիր բանակի՝ Չանգեզուր ու Նախիջևան մուտք գործելուց հետո, անմիջական ցամաքային կապ հաստատվեց Ադրբեջանի, ասել է թե՛ Ռուսաստանի և Թուրքիայի միջև: «Հայրենիք» թերթը տեղեկացնում է, որ 1920 թ. օգոստոսի 10-ի հայ-ռուսական ժամանակավոր անիրավահավասար համաձայնագրի ստորագրումից հետո «ավելի քան յոթ հազար բոլշևիկյան զինվորներ Գարաբաղ-Չանգեզուր-Նախիջևան գծով անցել են Թուրքիա և Պալազիտի մեջ միացել են Բյազին Գարապետի զորքերի հետ»³⁹: Այս կապակցությամբ թուրքական 15-րդ բանակի հրամանատար Բյազին Կարաբեքիրը օգոստոսի 16-ի պաշտոնական մի ամփոփագրում հայտնում էր. «11-րդ մուսուլմանական (բոլշևիկյան) բանակը (նկատի ունի 11-րդ Կարմիր բանակը- Ա. Հ.), անցնելով կովկասյան մեր սահմանը, եկավ մեզ օգնության: Մեր դաշնակիցները բոլշևիկները, մշտապես մեզ մատակարարում են զենք և զինամթերք: Մենք կարող ենք վստահ լինել, որ մեզ համար դժվար օրերը արդեն մնացել են հետևում»⁴⁰:

³⁵ «Ժողովուրդ», 13 հուլիսի 1920 թ.:

³⁶ Ս. Վրացյան, Հայաստանի Հանրապետություն, Բեյրութ, 1958, էջ 456:

³⁷ «Ժողովուրդ», 13 հոկտեմբերի 1920 թ.:

³⁸ Ա. Երզնկյան, Աշխատավորության դատարանին, Թիֆլիս, 1927, էջ 5-8, Մ. Վ. Արզումանյան, Արևալիքից վերածնունդ, Ե. 1973, էջ 316-317, Ա. Եսփուճյան, նշվ. աշխ., էջ 75 և այլն:

³⁹ «Հայրենիք», Բոստոն, 25 օգոստոսի 1920 թ.:

⁴⁰ ՀՀ ՊԿՊԱ, Ֆ. 200, ց. 1, գ. 427, մաս 2, ք. 351:

Աղբբեջանի խորհրդայնացումից հետո Կարմիր բանակի և «կարմիր» դարձած մուսավաթական ուժեր են կենտրոնանում Հայաստանի սահմանների ուղղությամբ: 1920 թ. հունիսին գեմ. մայր Քիշնիշևը Ադստաֆայից գաղտնի տեղեկացնում էր, որ Հայաստանի սահմաններին կուտավկում են խորհրդային զորքեր⁴¹: Այդ նույն բանը հաստատում էր վրացական գլխավոր շտաբը՝ հայտնելով, որ «խորհրդային զորքեր են կենտրոնանում Ադստաֆայում՝ Ղազախի վրա հարձակվելու նպատակով⁴²: Միաժամանակ, հայտնվում էր, որ «Բուլշևիկների կողմից քարոզչության համար Հայաստան է ուղարկվել 32 մլն նիկոլայան ռուբլի»⁴³:

Վրաստանում Հայաստանի դիվանագիտական ներկայացուցչությունից 1920 թ. հուլիսի 19-ի թիվ 325/с հաղորդագրությամբ Հայաստանի զորքերի հրամանատարության հետախուզական բաժանմունքի պետին հայտնվում էր, որ «գաղտնի հետախուզական ճանապարհով հայտնի է դարձել, որ հուլիս ամսվա կեսերին կարմիր աղբբեջանցիների և ռուսների զգալի ուժեր Եվլախ կայարանից տեղափոխվել են Արցախի խճուղին»⁴⁴: Միաժամանակ, վրացական զինվորական շտաբի տեղեկությունների համաձայն՝ կարմիր զորքերը 4000 սվին, երեք զրահագնացքի ուղեկցությամբ, կենտրոնանում են Թոուզ գյուղի շրջանում՝ Հայաստանի վրա հարձակվելու նպատակով⁴⁵: Դիլիջանից հայկական ջոկատների հրամանատար Սեպուհը բանակի հրամանատար գեմ. Սիլիկյանին հեռագրում էր, որ հուլիսին 22-ին թաթարները հարձակվել են Բյուլախի գյուղի բարձունքների վրա, սակայն մեր զորամասերից հակահարված ստանալով՝ հետ են շարժվել⁴⁶:

Հուլիսի վերջին Հայաստանի զորքերի հրամանատարության շտաբի հետախուզական բաժանմունքի պետին ուղղված մեկ այլ գաղտնի ամփոփագրից իմանում ենք, որ Ղազախում են գտնվում հեղափոխական շտաբի անդամներ՝ Ալիս Նուրիջանյանը, Աղասի Վարդանյանը և ուրիշներ, և որ Ղազախի, Ադստաֆայի և Բաքվի միջև տեղաշարժեր են անում երեք զրահապատ գնացքներ և որ Չանգեզուրի ուղղությամբ ուղարկվել է խորհրդային 28-րդ հետևակային դիվիզիան⁴⁷:

Հայաստանի հեռագրական գործակալությունը Վրաստանի նույնատիպ գործակալությանը իրագեկում էր, որ բռնվել է բուլշևիկյան մի գաղտնի գրություն: Այդ գրությունից պարզվում է, որ Աղբբեջանի բուլշևիկները 300 մլն - ռուբլի են խոստացել կաշառքի և ագիտացիայի համար, որպեսզի հայկական

⁴¹ ՀՀ ՊԿՊԱ, Ֆ. 276, ց. 1, գ. 184, թ. 73:

⁴² ՀՀ ՊԿՊԱ, Ֆ. 200, ց. 1, գ. 581, թ. 232:

⁴³ ՀՀ ՊԿՊԱ, Ֆ. 276, ց. 1, գ. 184, թ. 76:

⁴⁴ ՀՀ ՊԿՊԱ, Ֆ. 200, ց. 1, գ. 581, թ. 210:

⁴⁵ Նույն տեղում:

⁴⁶ Նույն տեղում, թ. 211:

⁴⁷ Նույն տեղում, Ֆ. 276, ց. 1, գ. 184, թ. 89:

տարածքները միացվեն Ադրբեջանին: Փաստաթղթում միաժամանակ ասվում էր, որ պետք է շտապել, որովհետև Անգլիան քնած չէ⁴⁸:

1920 թ. մայիսյան ապստամբության պարտությունից հետո հայ բոլշևիկների մի զգալի մասը, անցնելով ռուսական և թուրք-ադրբեջանական զինյալ ուժերի շարքերը, մարտնչում էին Արցախը և Ջանգեղուրը հայկական զինյալ ուժերից մաքրելու և «Կարմիր» Ռուսաստանը ու Ադրբեջանը Հայաստանի վրայով «Կարմիր» Թուրքիայի հետ կամրջելու համար:

Ադրբեջանի «կարմրացույց» հետո Խ. Ռուսաստանը, Հայաստանի վրայով իր դաշնակից Թուրքիայի հետ միանալուց բացի, որոշակի նկրտումներ ուներ նաև Իրանի հանդեպ⁴⁹: Կարմիր զորքերը մտել էին Իրան: Ռեշտում հիմնվել էր այսպես կոչված հեղափոխական կառավարություն Քուչուկ-Խանի գլխավորությամբ, որը պիտի շարժվեր դեպի Թեհրան: Իսկ բոլշևիկ Բ. Մդիվանին նշանակվել էր ՌԽՖՍՀ-ի ներկայացուցիչը Քուչուկ-Խանի մոտ: 1920 թ. ամռանը իրադրությունը Իրանում այնքան էր բարդացել, որ այն քննության առնվեց Ազգերի լիգայում:

Արխիվային վավերագրերը վկայում են, որ Խ. Ռուսաստանը Բաքու-Նախիջևան և Տուսպսե-Տրապիզոն, Նովոռոսիյսկ-Տրապիզոն, Օդեսա-Սամսուն և այլ ցամաքային ու ծովային գծերով Թուրքիային էր մատակարարում զենք, ռազմամթերք, դրամ, ցույց տալիս զինվորական խորհրդատվական և դիվանագիտական աջակցություն: Մասնավորապես դա երևում է Հայաստանի ռազմական նախարարության շտաբի հետախուզական բաժանմունքի գաղտնի ամփոփագրերից, արտ. գործ. նախարար Հ. Օհանջանյանի բողոք-նոտաներից և այլն⁵⁰: Այսպես՝ հայկական բանակի հրամանատարության շտաբի հետախուզական բաժնի 1920 թ. ապրիլի 23-ի թիվ 15 գաղտնի ամփոփագրից իմանում են, որ հավանաբար Օդեսայից երկկայմ առագաստանավերով Սամսուն է բերվել մեծ քանակությամբ զենք և զինամթերք, որոնք փոխադրվել են Սվազ ու Մալաթիա⁵¹: Ոչ լրիվ տվյալներով 1920 թ. ամռանը քենալականները օգնության կարգով Խ. Ռուսաստանից ստացան 6000 հրացան, ավելի քան 5 մլն փամփուշտ, 17600 արկ, իսկ սեպտեմբերի 200,6 կգ ձուլածո ոսկի⁵²: 1920 թ. հոկտեմբերի սկզբին Թուրքիան ՌԽՖՍՀ-ից ստացել էր 16 վագոն հրացան ու փամփուշտ, որը շոգեմակույկներով Տուսպսեից տեղափոխվել էր Տրապիզոն ու բաժանվել հայկական ռազմաճակատ մեկնող չեթեներին⁵³: Այդ օգնությունը ավելի մեծ չափեր ընդունեց 1921-1922 թվականներին: Միակողմանի շլինելու համար նշենք, որ

⁴⁸ «Հայաստանի ծայն», 7 հոկտեմբերի 1920 թ.:

⁴⁹ ՀՀ ՊԿՊԱ, Ֆ. 200, ց. 1, գ. 576, ք. 194:

⁵⁰ ՀՀ ՊԿՊԱ, Ֆ. 200, ց. 1, գ. 427, մաս 1, ք. 176, գ. 486, ք. 18, գ. 581, ք. 333, գ. 607, ք. 112 և այլն:

⁵¹ ՀՀ ՊԿՊԱ, Ֆ. 200, ց. 1, գ. 427, մաս 1, ք. 176:

⁵² Է. Ա. Չոհրաբյան, նշվ. աշխ., էջ 79:

⁵³ Ս. Վրացյան, Խարխափումներ, Պոսթրոն, 1924, էջ 86, ՀՀ ՊԿՊԱ, Ֆ. 200, ց. 1, գ. 581, ք. 333, գ. 602, ք. 31:

քեմալականներին օգնում էին ոչ միայն Խ. Ռուսաստանը, այլև՝ Ֆրանսիան և Իտալիան: 1920 թ. աշնանը իտալական և ֆրանսիական նավերը զենք ու զինամթերք էին հասցնում թուրքական ազգայնական բանակին⁵⁴: Քեմալականները, ստանալով համակողմանի օգնություն, հարվածի թիրախ դարձրին «խմպերիալիզմի գործակալ ու համաշխարհային հեղափոխության խոչընդոտ» Հայաստանը: Եվ այս տեսակետից պետք է մերժել տասնամյակներ շարունակ խորհրդային ու խորհրդահայ պատմագրության մեջ տեղ գտած այն կեղծ թեզը, թե քեմալական շարժումն ուներ հակախմպերիալիստական, ազգային-ազատագրական բնույթ:

Քեմալական շարժման ինչ ազատագրական բնույթի մասին կարող է խոսք լինել, երբ այդ շարժման 1919 թ. Էրզրումի և Սվազի համաժողովներում, ինչպես նաև 1920 թ. հունվարի 28-ին ընդունված «Ազգային ուխտ» ծրագրային փաստաթղթում նպատակ էր դրվում կրկին խեղդել Թուրքիայի ճնշված ժողովուրդներին՝ հայերի, հույների, քրդերի, ասորիների և այլոց ազատագրական ձգտումները և դարձյալ զանգվածային կոտորածներ կազմակերպելու միջոցով, վերանվաճել ու ստրկացնել նրանց: Ընդամիս միլիականները՝ քեմալականները, ուխտել էին Արևմտյան Հայաստանից ոչ մի թիզ հող չզիջել հայերին, իսկ եթե հնարավոր լիներ՝ նաև զավթել Արևելահայաստանն ու բնաջնջել հայությանը: Նրանք այդ բանը (հայերի ու հույների նկատմամբ) մասնակիորեն ապացուցեցին գործով՝ 1920-1922 թթ. ընթացքում: Հարկ է հստակ ըմբռնել պատմական փորձով բազմիցս հաստատված այն ճշմարտությունը, որ **Հայաստանի ու հայ ժողովրդի հանդեպ դրսևորած քաղաքականության խնդրում ոչ մի էական փարբերություն չի եղել սուլթան Աբդուլ Համիդ 2-րդի, երիտթուրքերի և քեմալականների միջև**: Պարզապես նրանք շարունակել և լրացրել են հայակործան քաղաքական կուրսը: Դիշտ է նկատել պատմաբան Ջ. Կիրակոսյանը՝ գրելով. «Ազգային հարցում ազգայնականները (քեմալականները-Ա. Հ.) երիտթուրքերի ուղղակի ժառանգորդներն էին»⁵⁵: Չարագանելով պատմաբանի միտքը, ավելացնենք, որ մյուս հարցերում նույնպես քեմալականները, ըստ էության, շարունակել են իրենց նախորդների՝ երիտթուրքերի և Աբդուլ Համիդ 2-րդի քաղաքական կուրսը: Որ քեմալականները ոչնչով չէին տարբերվում իրենց նախորդներից, երևաց քիչ անց՝ 1920 թ. աշնանը՝ թուրք-հայկական պատերազմի ժամանակ, երբ իրենց «կարմիր ու հեղափոխական» հորջորջած թուրք ասկյարները, գրավելով արևելահայ տարածքները, երիտթուրքերից ոչ պակաս հմտությամբ ամենուրեք սփռեցին մահ ու ավեր: Այդ կարճատև պատերազմի ժամանակ նրանք հասցրել էին կոտորել, ոչ լրիվ տվյալներով, 198 հազար մարդ⁵⁶:

⁵⁴ Ջ. Ս. Կիրակոսյան, Երիտթուրքերը պատմության դատարանի առջև, հ. 2, Ե., 1983, էջ 281:

⁵⁵ Ջ. Ս. Կիրակոսյան, նշվ. աշխ., էջ 250:

⁵⁶ Советская историческая энциклопедия, т. 1, М., 1961, с. 753.

Նույն կերպ տարբերություն չպետք է տեսնել նաև Անգորայի քենալական իշխանության և Կ. Պոլսի սուլթանական կառավարության միջև: Հավաստի տվյալներ կան (թուրք իսկ գործիչների վկայությամբ) այն մասին, որ քենալական ազգայնական շարժումը Անատոլիայում առաջ է բերվել սուլթանական կառավարության հրահանգով՝ հայերին որևէ տարածքային զիջում թույլ չտալու նպատակով⁵⁷: Մեկ այլ աղբյուրից հայտնվում է, որ գեներալ Մ. Քենալը, 1919 թ. կեսերին, Կ. Պոլսում նստած սուլթանի խորհրդով ու թելադրանքով է սկսել թուրք ազգայնականների շարժումը Անատոլիայում. «Խալիֆին Անտանտի երկրների գերությունից ազատելու և թուրք ազգն ու պետությունը վերահաս վտանգից՝ անդամահատությունից փրկելու»⁵⁸:

Այսպիսով, թուրքական այս բոլոր տիպի հոսանքների ու կառավարությունների համար ընդհանրական ու հոգեհարազատ է եղել համենայն դեպս մեկ բան՝ հակահայկական ուղղվածությունը և պանթուրքիզմը:

Բոլշևիկ-քենալական գործակցության ուժեղացման տեսակետից մեծ դեր խաղաց 3-րդ Կոմիստերնի կազմակերպած Արևելքի ժողովուրդների առաջին համագումարը Բաքվում (1-8 սեպտեմբերի 1920 թ.): Տարված լինելով համաշխարհային հեղափոխության հովերով՝ կոմունիստների առաջնորդներ՝ Վ. Լենինը, Լ. Տրոցկին, Գ. Չիևովը և մյուսները մեծ հույսեր էին կապում Արևելքի ժողովուրդներին համաշխարհային սին հեղափոխության մեջ ներքաշելու հետ: Նրանք հատկապես մեծ դեր ու նշանակություն էին տալիս քենալական Թուրքիային: Եվ պատահական չէր, որ այդ խառնածողովում ամենապատվավոր տեղերում էին նստած Հայոց Մեծ եղեռնի մի քանի կազմակերպիչները, այդ թվում՝ հայ ժողովրդի դահիճ Էմվեր փաշան:

Թուրքիան իրեն հայտարարել էր իմպերիալիզմի դեմ պայքարող ուժ և փաստորեն դարձել Խ. Ռուսաստանի «բնական» դաշնակիցը: Ահա թե խորհրդա-թուրքական գործակցության գաղափարը ինչպես է ձևակերպել Թուրքիայի արտ. գործ. նախարար Ահմեդ Մուխթարը Գ. Չիչերինին հղած գրություններից մեկում. «Թուրքիայի Ազգային մեծ ժողովի կառավարությունը իրեն համարում է խորհրդային Ռուսաստանի բնական դաշնակիցը այն չափով, որ չափով նրանք միասին պայքարում են ընդհանուր թշնամու՝ Արևմուտքի իմպերիալիստների դեմ»⁵⁹: Խորհրդային կառավարությունը Հայաստան-Թուրքիա ընտրության հարցում «հեղափոխական Թուրքիային» գերադասեց «միջազգային իմպերիալիզմի գործակալ Հայաստանից»: Բաքվի համագումարում քննվեց պատերազմի հարցը «համաշխարհային հեղափոխության խոչընդոտ դաշնակցական» Հայաստանի դեմ և ազդարարվեց «կանաչ լույս» թուրքական հարձակման համար: Արդեն սեպտեմբերի 17-ին նույն Բաքվում կազմվեց Հայաստանի վրա հարձակման ու խորհրդայնացման

⁵⁷ Մեվլան զադե Ռիֆաթ, Օսմանյան հեղափոխության մութ ժալբերը և իբթիհատի հայացիկն ծրագրերը, Պեյրուք, 1968, էջ 240:

⁵⁸ «Տրիտասարդ Հայաստան», Չիկագո, 26 մայիսի 1920 թ.:

⁵⁹ ՀՀ ՀԶԿՓ ՊԿԱ. Ֆ. 1022, g. 4, 72, p. 24:

ծրագիրը, որում հիմնական դերը խաղալու էր Թուրքիան⁶⁰: Այլ խոսքով, խնդիր դրվեց Հայաստանի խորհրդայնացումը կատարել թուրքական մահաբեր ներխուժման սպառնալիքի միջոցով: Ժամանակաշրջանի վավերագրերը աներկբա հավաստում են, որ «թուրքական ավանտյուրան կատարվել է բոլշևիկների գիտությամբ և աջակցությամբ»⁶¹: Իր հերթին Թուրքիան պատրաստ էր գենքի ուժով վերացնել «հայկական սեպը»: Այնպես որ Հայաստանի կառավարության և նրա բանակի ուժերից վեր էր դիմակայել թուրք-բոլշևիկյան գործակցության հետևանքով հյուսիսից և հարավից ահագնացող մահացու հարձակման վտանգը, որն էլ ի վերջո կործանարար եղավ Հայաստանի Հանրապետության համար: Ահա թե ինչու հայ քաղաքական գրեթե բոլոր կուսակցությունները (բացառությամբ բոլշևիկների) դատապարտեցին խորհրդաթուրքական հայադավ գործակցությունը:

Տալով խորհրդա-թուրքական համագործակցության բնութագիրը՝ միամտություն է կարծել, թե քեմալականները Ռուսաստանի անկեղծ բարեկամներն էին: Այդ բարեկամությունը ժամանակավոր էր, կեղծ էր ու չինձու, որը ասպարեզ էր նետվել որոշակի քաղաքական-դիվանագիտական հաշիվներով, որից էլ մեծապես տուժեց հայ ժողովուրդը:

2. Կուսակցությունները թուրք-հայկական պատերազմի շրջանում

1920 թ. օգոստոս-սպետեմբերին անխուսափելի դարձավ թուրք-հայկական զինաբախումը՝ պատերազմը: Ինչպես արդեն ասվեց, քեմալականները Հայաստանի դեմ պատերազմ սկսեցին՝ ստանալով Խ. Ռուսաստանի համաձայնությունը: Վերջինս նպատակ էր դրել թուրքական սպառնալիքով ընկճել Հայաստանի դիմադրական ոգին և հեշտությամբ խորհրդայնացնել այն: Տեսակետ կա, որ եթե բոլշևիկները չուզեին, Քեմալը չէր հարձակվի Հայաստանի վրա⁶²:

Ականավոր պատմաբան ու ռամկավար գործիչ Լեոյի խմբագրած «Մշակ» թերթում թարգմանաբար արտաստվել է արտասահմանցի մի թղթակցի նամակը Անկարայից՝ «Ինչպես քեմալիստները վճռեցին հարձակվել Հայաստանի վրա» վերտառությամբ: Այս վերնագրով նյութը առաջին անգամ տպագրվել էր 1920 թ. հոկտեմբերի 19-ին Ստամբուլում լույս տեսնող ֆրանսերեն «Journal d'Orient» թերթում: Դրանում մասնավորապես հայտնվում էր, որ սեպտեմբերի սկզբներին 3-րդ Կոմիստերնի նախաձեռնությամբ Բաքվում հրավիրված Արևելքի ժողովուրդների համագումարի 1891 պատգա-

⁶⁰ «Հայաստանի Հանրապետությունը 1918-1920թթ.», փաստաթղթերի և նյութերի ժողովածու, Ե., 2000, էջ 281-286:

⁶¹ ՀՀ ՊԿՊԱ, ֆ. 200, ց. 2, գ. 107, ք. 9:

⁶² Ս. Բարսեղյան, Ինչպես կը գրեն մեր նորագույն պատմությունը, Պ. Այրես, 1948, էջ 52:

մավորների թվում, (ի դեպ, 110-ը հայեր էին)⁶³, բացի երիտթուրք շատ պարագլուխներից, գտնվել էր նաև ոմն գեներալ Ռեմզին: Մրան հանձնարարված է եղել՝ Բաքվում հող նախապատրաստել Հայաստանի վրա Թուրքիայի հարձակման համար: Այնուհետև տեղեկացվում է, որ անհրաժեշտ պատրաստություններից հետո Անկարան Բաքվից ստացել է հետևյալ լակոնիկ հեռագիրը՝ «Ճանապարհը ազատ է»⁶⁴: Կրկին հիշեցնում ենք, որ օտար աղբյուրից բերված այս քաղվածքը արտատպել է Գաշնակցությանը և ՀՀ կառավարությանը խիստ ընդդիմադիր «Մշակը»: Այնպես որ՝ խոսք չի կարող լինել արձանագրված փաստի կողմնակալ ու մտացածին լինելու մասին: Բերենք մեկ ուրիշ փաստ. «Կարմիրները արևելքեն,- գրում էր Ք. Կարաբեքիրն իր հուշերում,- մենք ալ արևմուտքեն, բոլորս միասին դեպի Հայաստան արշավելով, մինչև Կարսի դռները պիտի երթայինք»⁶⁵: Վերոգրյալ փաստերը համոզում են, որ Խ. Ռուսաստանը համաձայն է եղել թուրքական հարձակմանը:

Հար ու նման ճանապարհով Հայաստանը հայտնվեց համաշխարհային հեղափոխության Արևելյան խաչմերուկում: Ամենևին էլ պատահական չպետք է համարել Վ. Ի. Լենինի՝ 1920 թ. վերջերին Հայկեղկոմի անդամներ Ա. Մռավյանին և Ս. Տեր-Գաբրիելյանին հայտնած այն միտքը, որ «Ձեր դժվարությունն այն է, որ համաշխարհային հեղափոխության ֆրոնտներից մեկը անցնում է Հայաստանի վրայով»⁶⁶: Այն, ինչ տասնամյակներ շարունակ փորձել են ժխտել ու չտեսնելու տալ խորհրդահայ պատմաբանները, դրան իր ժամանակին այդպես պարզ ու ամերկիմաստ պատասխանել է համաշխարհային պրոլետարիատի առաջնորդ Վ. Ի. Լենինը:

1920 թ. սեպտեմբերի 23-ին (այլ տվյալներով՝ 28-ին), առանց պատերազմ հայտարարելու, թուրքական բանակը դիմեց հարձակման⁶⁷: Պատերազմը սկսվելու կապակցությամբ ՀՅԳ Բյուրոն, որը նույն ինքը Հայաստանի կառավարությունն էր, սեպտեմբերի 28-ին հրապարակեց կոչ՝ ուղղված Հայաստանի քաղաքացիներին: Կոչի գլխավոր կարգախոսն էր. «Ամեն ինչ ֆրոնտի համար: Ամեն ճիգ հաղթելու համար»⁶⁸: Հաջորդ օրը ՀՅԳ Բյուրոն հայտարարեց կուսակցության շարքերի մոբիլիզացիա. «Ամեն ընկեր պարտական է իրեն դնել կուսակցության տրամադրության տակ և անմիջապես կատարել իրեն տրված հրահանգը»⁶⁹: Նույն օրը Բյուրոն կուսակցության մարմիններին և անդամներին իջեցրեց յոթ կետից բաղկացած պահանջների կատարման հրահանգ. այն է՝ համախմբել կուսակցության ողջ ուժերը և դնել

⁶³ ՀՀ ՀՔԿՓ ՊԿԱ, Ֆ. 1022, ց. 2, գ. 147, ք. 2:

⁶⁴ «Մշակ», 5 նոյեմբերի 1920 թ.:

⁶⁵ «Չարթունք», 6 օգոստոսի 1966 թ., «Ք. Կարաբեքիրի հուշերը»:

⁶⁶ Ա. Մռավյան, Հողվածներ և ճառեր, Երևան, 1961, էջ 222:

⁶⁷ Պատերազմը սկսվելու ստույգ օրը ճշտել ու հիմնավորել է պրոֆ. Էդ. Չոհրաբյանը. /տես՝ «Երեկոյան Երևան», 23 հոկտեմբերի 1990թ. նաև 1920 թ. թուրք-հայկական պատերազմը և տերությունները, Երևան, 1997, էջ 165-166:

⁶⁸ ՀՀ ՀՔԿՓ ՊԿԱ, Ֆ. 4047, ց. 1, գ. 180, ք. 1:

⁶⁹ Նույն տեղում, ք. 2:

նրա պատասխանատու մարմինների տրամադրության տակ, մտնել բանակի շարքերը, կազմակերպել թիկունքի պաշտպանությունը, տանել բացատրական աշխատանք և այլն⁷⁰:

Սկսված պատերազմը մի նոր, լրացուցիչ արդարացնող փաստարկ էր խորհրդարանի արձակուրդը շարունակելու համար: Իհարկե, խորհրդարանի նախագահությունը կամ կառավարությունը լիազորություն ունեին, արտակարգ հանգամանքների դեպքում, հրավիրել արտահերթ նիստ: Եվ այս պատերազմը իրոք որ համարվում էր արտակարգ կարևորության հանգամանք: Սակայն հաշվի առնելով, որ պատերազմը հայտարարել էր հակառակորդը, իսկ Հայաստանը ինքնըստինքյան պաշտպանվող կողմն էր, ուստի նպատակահարմար չգտնվեց հրավիրել խորհրդարանի արտահերթ նիստ: Ավելի կարևոր համարվեց պատգամավորներին, շատ նախարարների հետ միասին, գործուղել ճակատամերձ շրջանները, ինքնապաշտպանության թեժ կետեր՝ զինված ուժերը կազմակերպելու, ժողովրդին համախմբելու, նրա տրամադրությունը բարձրացնելու, ռազմական ու նյութատեխնիկական միջոցների հայթայթման, փոխադրման ու մատակարարման գործը ղեկավարելու⁷¹:

Հոկտեմբերի 30-ին Ալեքսանդրապոլ մեկնեցին պատգամավորներ՝ Հ. Քաջազունին, Լ. Շանթը, Ս. Տիգրանյանը, Հ. Բուդաղյանը, Վ. Նավասարդյանը, Ա. Հովհաննիսյանը Հ. Տեր-Հակոբյանը և ուրիշներ⁷²: Մեծ լիազորություններով Կարս էին մեկնել նախարարներ՝ Ս. Վրացյանը և Ա. Բաբայանը, Ալեքսանդրապոլ՝ Ա. Ջամալյանը և Գ. Ղազարյանը, Սուրմալու՝ Ս. Արարատյանը, Իջևան՝ Ա. Գյուլխանդանյանը, Նոր Բայազետ՝ Ս. Մելիք-Յուլյանը, Աշտարակ՝ Հ. Տերտեղյանը և ուրիշներ⁷³: Ուշագրավ է, որ ռազմաճակատ մեկնելու պատրաստակամություն հայտնեց Ամերիկայից նոր վերադարձած նախկին վարչապետ Հ. Քաջազունին, որի երկու որդիները՝ Աշոտը և Արամը, տարբեր ժամանակներում (1918 թ.՝ Ղարաբիլխայում և 1920 թ.՝ Ջանգիբասարում) արդեն զոհվել էին հանուն հայրենիքի: Նա հասավ ռազմաճակատի առաջին գիծ և ցանկություն հայտնեց կռվել որպես կամավոր զինվոր: Սակայն հրամանատարությունը այնտեղից նրան հետ ուղարկեց⁷⁴:

Պատերազմի սկսվելուն պես՝ հայ հասարակական-քաղաքական բոլոր ուժերը (բացառությամբ բոլշևիկների) մեկ մարդու պես հանդես եկան կոչերով՝ հայրենիքը, պետականությունն ու անկախությունը պաշտպանելու, անարգ թշնամուն հակահարված տալու և երկիրն ազատագրելու վճռականությամբ: Բոլոր կուսակցությունները համախմբվեցին կառավարության շուրջը: Հոկտեմբերի 1-ին Ն. Գ. նախարար Ս. Արարատյանի մոտ հրավիրվեց խորհր-

⁷⁰ Նույն տեղում, ք. 3:

⁷¹ «Դրոշակ», 1930, թիվ 10, էջ 238:

⁷² Գ.ԱԹ, Հ Քաջազունու ֆոնդ., գ. 150, ք. 1, գ. 164, ք. 2, 3. Իրազեկ, Մոտիկ անցյալից, Պեյրուք, 1956, էջ 71-72:

⁷³ Ս. Վրացյան, նշվ. աշխ., էջ 477 «Ազատ, Անկախ և Միացյալ Հայաստանի վերջին օրերը, Երևան, 1993, էջ 36:

⁷⁴ Հ. Տեր-Հակոբյան, Հայաստանի վերջին աղետը, Կ. Պոլիս, 1921, էջ 76:

դակցություն, որին մասնակցում էին հանրապետությունում արտոնված կուսակցությունների ղեկավարներ, ինչպես նաև լրատվական միջոցների ներկայացուցիչներ: Խորհրդակցության մասնակիցները միակամ պատրաստակամություն հայտնեցին վտանգի պահին սատար կանգնել հայրենիքին ու կառավարությանը⁷⁵: Այդ նպատակով էլ ստեղծվեց Միջկուսակցական խորհուրդ, որի նախագահ ընտրվեց պատգամավոր Արամ Մաֆրաստյանը: Հոկտեմբերի 5-ին Ն. Գ. նախարարի մոտ տեղի ունեցավ կուսակցությունների և մամուլի ներկայացուցիչների նոր խորհրդակցություն: Գավառներում նույնպես ստեղծվեցին միջկուսակցական տեղական խորհուրդներ՝ գավառային մասնաճյուղեր: Միջկուսակցական խորհրդում ընդգրկվել էին՝ ՀՅԳ, ՀԺԿ, Հայ ռամկավար, ՀՍԳԲԿ, Ս. Գ. Հնչակյան և Սոցիալիստ-հեղափոխականների (Էսեռների) կուսակցությունները: Խորհրդի ակտիվ անդամներից էին՝ Հ. Տեր-Հակոբյանը (ՀՅԳ), Կ. Գյուլմազարյանը (ՀԺԿ), Լազոն (Ս. Գ. հնչակ), Բժիշկ Գ. Տեր-Հակոբյանը (Գրո) (Էսեռ) և ուրիշներ⁷⁶:

Միջկուսակցական խորհրդի և նրա մասնաճյուղերի առջև դրված էին հետևյալ խնդիրները՝ քարոզչական և այլ միջոցներով բարձրացնել ժողովրդի բարոյական ոգին, քաջալերել կամավորական շարժումը, օգնություն ցույց տալ ռազմաճակատին ու բանակին, օժանդակել կառավարությանը և այլն⁷⁷: Խորհրդի նախաձեռնությամբ պարբերաբար գումարվում էին ժողովներ, միտինգներ, հանրահավաքներ, կայացվում բանաձևեր, պայքարի կոչում ժողովրդին:

Որ անարգ թշնամու դեմ պայքարի խնդրում հայ քաղաքական բոլոր կուսակցությունները միակամ էին, երևում է հոկտեմբերի 4-ին վեց կուսակցությունների ստորագրությամբ հայ ժողովրդին ուղղված հետևյալ կոչից. «Արտաքին թշնամին թող իմանա հայ՝ ժողովուրդ, որ անկախության և հայրենիքի պաշտպանության խնդրում տարածայնություն չկա հայ քաղաքական կուսակցությունների միջև: Մենք՝ հայ քաղաքական մտքի տարբեր հոսանքներս, այսօր վստահությամբ ենք վերաբերվում մեր կառավարության այն բոլոր ջանքերին, որոնք նպատակ ունեն հաղթել ու դուրս հանել թշնամուն մեր սահմաններից»⁷⁸:

Պատերազմի շրջանում գործուն քարոզչություն էին տանում «Հառաջ», «Ժողովուրդ», «Հայաստանի ձայն», «Բանվորի ձայն» և այլ կուսակցական թերթեր: Կուսակցական թերթերի ամենօրյա մեծագիր կարգախոսն էր «**Հայրենիքը վրանգի մեջ է**»: Թերթերի համարներում տպագրվում էին պաշտոնական հաղորդագրություններ, իրենց կուսակցական կենտրոնական մար-

⁷⁵ Հ. Տեր-Հակոբյան, Հայաստանի վերջին աղետը, Կ. Պոլիս, 1921, էջ 53:

⁷⁶ «Ժողովուրդ», 10 հոկտեմբերի 1920 թ.:

⁷⁷ Հ. Տեր-Հակոբյան, նշվ. աշխ., էջ 62:

⁷⁸ «Գիրքերում», 17 հոկտեմբերի 1920 թ. «Հայաստանի ձայն», 8 հոկտեմբերի 1920 թ., ՀՀ ՀԶԿՓ ՊԿԱ, ֆ. 4047, ց. 1, գ. 180, ք. 1:

մինների առանձին կոչերը՝ ուղղված հայ ժողովրդին՝ գորակցելու համար բանակին ու կառավարությանը անարգ թշնամուն հակահարված տալու գործում:

Գրեթե բոլոր քաղ. կուսակցությունները հանդես եկան հայրենիքի պաշտպանության հայրենասիրական կոչերով: Հոկտեմբերի 2-ին կոչով հանդես եկավ ՀԺԿ Հայաստանի ԿԿ-ը, որում մասնավորապես ընդգծվում էր. «Ամեն ինչ պետք է զոհաբերել հանուն հաղթանակի, հանուն մեր ժողովրդի փրկության և Միացյալ ու Անկախ Հայաստանի»⁷⁹:

Նույն օրը՝ հոկտեմբերի 2-ին, հրապարակված էսեյների կուսակցության Հայաստանի կոմիտեի կոչի գլխավոր իմաստն այն էր, որ չնայած Հայաստանի կառավարության հետ նախկինում ունեցած տարածայնություններին, այժմ երբ վտանգը սպառնում է հայ ժողովրդի ֆիզիկական գոյությանը, «մենք պետք է մռռանանք ամեն ինչ, պետք է բովանդագուրկ դարձնենք մեր միտքն ու հոգին և նվիրվենք միայն և միայն մի գործի՝ ճակատի պաշտպանությանը»⁸⁰: «Հայ ժողովուրդն այժմ,- գրում էր մեկ այլ ընդդիմադիր կուսակցության՝ հայ մենշևիկների պաշտոնաթերթն այդ օրերին,- միաբան կերպով պիտի լարե իր բոլոր ուժերը և պաշտպանե իր անկախությունը և ազատությունը»⁸¹: Առանձին կոչով հանդես եկավ ՀՍԳԿ ԿԿ-ը՝ ուղղված հայ ժողովրդին: Նրանում պատրաստակամություն էր արտահայտվում աջակցել կառավարությանը, ըստ կարելվոյն օգնել ռազմաճակատում մարտնչող մեր զորամասերին և արժանի հակահարված տալ անարգ ոսոխին⁸²:

Ս. Գ. Հնչակյան կուսակցության Վրաստանի կենտրոնական (շրջանային) մասնաճյուղի վարչությունը, իր գումարած հոկտեմբերի 17-ի և 20-ի նիստերում լսելով Հայաստանին սպառնացող վտանգի մասին, որոշեց՝ «Կոչ անելով հորդորել Վրաստանի Ս. Գ. Հնչակյան մարմիններին և բովանդակ Հայաստանի դեմոկրատիային՝ ռազմաճակատ խոյացնել բոլոր ռազմունակ ընկերներին»⁸³:

Հոկտեմբերի 26-ի երեկոյան խորհրդարանի դահլիճում Միջկուսակցական խորհրդի նախաձեռնությամբ տեղի ունեցավ միտինգ: Այդ նիստ-միտինգում կառավարության ներկայացուցիչ Ն. Գ. նախարարի օգնական Վ. Քրմոյանի՝ ռազմաճակատում տիրող կացության մասին զեկուցումից հետո հանդես եկան քաղաքական կուսակցությունների ներկայացուցիչները՝ ՀԺԿ անունից Կ. Գյուլնազարյանը, ՀՍԳԿ («սպեցիֆիկների») կողմից՝ Բ. Իշխանյանը, ինչպես նաև սոցիալիստ-հեղափոխականների, Ս. Գ. Հնչակյան և Հայ ռամկավարների ներկայացուցիչները: Միտինգում միաձայն ընդունվեց բանաձև՝ ամեն գնով զորավիգ լինել ռազմաճակատում մարտնչող մեր զորամա-

⁷⁹ ՀՀ ԷԶԿԳ ՊԿԱ, Ֆ. 4043, ց. 7, գ. 20, ք. 1, Հ. Տեր-Հակոբյան, նշվ. աշխ., էջ 55:

⁸⁰ ՀՀ նույն տեղում, գ. 56, ք. 1, Հ. Տեր-Հակոբյան, նշվ. աշխ., էջ 56:

⁸¹ «Բանվորի ձայն», 10 հոկտեմբերի 1920 թ.:

⁸² «Հառաջ», 3 հոկտեմբերի 1920 թ.:

⁸³ «Մշակ», 29 հոկտեմբերի 1920 թ.:

սերին⁸⁴: Երկու օր անց՝ հոկտեմբերի 28-ին, երբ անմիջական սպառնալիք է առաջացել Կարսի և ապա Ալեքսանդրապոլի գրավման համար, հայ քաղաքական կուսակցությունների Միջկուսակցական խորհուրդը համատեղ նոր կոչ հրապարակեց, որով հայտարարում էր «ընդհանուր գորահավաք՝ զենք կրելու ընդունակ բոլոր քաղաքացիներին»⁸⁵: Նյութական և բարոյաքաղաքական աջակցություն էին ստացվում նաև դրսաշխարհի հայ հասարակական-քաղաքական կազմակերպությունների կողմից:

Կ. Պոլսում «Վերջին լուր» և «Ճակատամարտ» թերթերի նախաձեռնությամբ հավաքվեց 20 հազ. ոսկի: Հանգանակություններ էին կատարվում Բուլղարիայի, Ռումինիայի, Եգիպտոսի, Իզմիրի, Ամերիկայի և մյուս հայկական գաղթօջախներում: Գաղթաշխարհից գալիս էին նաև մեծ թվով կամավորներ⁸⁶: Բայց այս ամենը, ցավոք, չփրկեց Հայաստանը վերահաս աղետից:

Այսպիսով, պատերազմի շրջանում կուսակցությունների, Միջկուսակցական խորհրդի և այլ հասարակական կազմակերպությունների գործունեությունից պարզ է դառնում, որ բացի բոլշևիկներից, հայ հասարակական-քաղաքական մյուս բոլոր ուժերը միակամ են եղել հայրենիքի անկախության ու անվտանգության պաշտպանության խնդրում:

* * *

Այժմ էլ մի քանի խոսք բոլշևիկների բռնած դիրքի ու ցուցաբերած քաղաքականության մասին՝ թուրք-հայկական պատերազմի ժամանակ:

Պետք է ասել, որ Հայաստանի կոմունիստները ոչ միայն չէին աջակցում Հայաստանի կառավարությանը, այլև առանձին դեպքերում իրենց քայքայիչ ու վնասակար գործողություններով փաստորեն նպաստում էին թուրքերի հաղթանակին, Հայաստանի պարտությանը և նրա շուտափույթ խորհրդայնացմանը:

1920 թ. հունիսին նոր ձևավորված Հայաստանի Կոմունիստական կուսակցության ղեկավար մարմինը՝ Արտասահմանյան Բյուրոն, իսկ ապա ԿԿ-ը գտնվում էին Հայաստանի սահմաններից դուրս՝ հիմնականում Բաքվում, և այստեղից էլ ղեկավար ցուցումներ էին տալիս ընդհատակում գործող կուսակցական կազմակերպություններին ու անհատ կոմունիստներին:

Թուրք-հայկական պատերազմը դեռ չէր սկսել: 1920 թ. սեպտեմբերի 20-ին, ՀԿԿ ԿԿ-ը Բաքվից «հույժ գաղտնի» մի հրահանգ է իջեցնում (թիվ 218) կուսակցության բոլոր կազմակերպություններին, թիկունքի և ռազմական գոտիների բոլշևիկներին. «Ծավալել լայն պրոպագանդա ընդդեմ պատերազմի, հիմնական խնդիր դարձնելով՝

1. Թուրքիան այլևս նախկին Թուրքիան չէ և Հայաստանի նկատմամբ ագրեսիվ նպատակներ չունի.

⁸⁴ ՀՀ ՊԿՊԱ, Ֆ. 198, ց. 1, գ. 74, քք. 1-3, նաև «Հասագ», 28 հոկտեմբերի 1920:

⁸⁵ ՀՀ ՀԲԿՓ ՊԿԱ, Ֆ. 4045, ց. 1, գ. 241, քք. 2:

⁸⁶ Հ. Տեր-Հակոբյան, նշվ. աշխ., էջ 71-76:

2. Քենալական Թուրքիան Խորհրդային Ռուսաստանի դաշնակիցն է և պայքարում է իր ազգային-ազատագրության համար՝ ընդդեմ իմպերիալիզմի (Անգլիայի, Ֆրանսիայի, Հունաստանի)։

3. Հանրապետական Հայաստանի հաղթանակը Թուրքիայի նկատմամբ կնշանակի իմպերիալիզմի ուժեղացումը Մերձավոր Արևելքում և դրանով իսկ կվտանգվի հեղափոխության հաղթանակը Անդրկովկասում, ապա նաև Արևելքի խորհրդայնացումը։

4. Հայ բոլշևիկ կոմունիստների խնդիրը պետք է լինի՝ արագացնել հանրապետական Հայաստանի պարտությունը, որով և կարագացվի Հայաստանի խորհրդայնացումը։ Այս նպատակի համար պետք է.

1. Կազմալուծել հայկական կոմպոլ բանակը բոլոր միջոցներով, այն է՝

ա) կազմակերպել դասալքություն և ամեն կերպ խանգարել զորահավաքին,

բ) ռազմաճակատներում հասկացնել զինվորներին, որ նրանք չկրակեն առաջացող թուրքական զինվորների վրա, այլ լքելով դիրքերը՝ վերադառնան թիկունք,

գ) չենթարկվել սպաների հրահանգներին և հարկ եղած դեպքում ոչնչացնել նրանց։

2. Այս ամենի հետ ամենաէականն է հասկացնել հանրապետական Հայաստանի զինվորներին, որ հաղթող թուրքական ասկյարը հեղափոխական ասկյար է...»⁸⁷։ Այս փաստաթղթի տակ նշված են ՀԿԿ ԿԿ-ի անդամներ՝ Ս. Կասյանի, Ա. Մռավյանի, Ա. Նուրիջանյանի, Շ. Ամիրխանյանի, Ի. Դովլաթյանի, Ա. Հովհաննիսյանի անունները, ինչպես նաև վերջում ծանոթագրություն այն մասին, որ «գրությունը կարդալ սահմանափակ ժողովներում և կարդալուց հետո անմիջապես այրել»⁸⁸։

Ահա սա ծրագրային այն ուղեցույցն էր, որով պետք է առաջնորդվեին Հայաստանի բոլշևիկները արդեն անխուսափելի համարվող թուրք-հայկական պատերազմի ժամանակ։ Հրահանգի բովանդակությանը ծանոթանալիս՝ գալիս ես այն հետևության, որ Հայաստանի Կոմկուսի ղեկավարությունը հավանաբար Մոսկվայի ու Բաքվի ղեկավարների ցանկությամբ ու ցուցումով գրավել էր բացահայտ հակապետական ու պարտավորական դիրքորոշում՝ հանուն քենալական թուրքերի հաղթանակի և Հայաստանի խորհրդայնացման։ Այստեղ հետաքրքրական է նաև այն, որ արդեն սեպտեմբերի 20-ին Հայկոմկուսի ղեկավարությունը գիտեր թուրքերի հարձակման մասին։

Հիշյալ փաստաթուղթը իր բովանդակությամբ այնքան արատավոր էր ու հակազգային, որ ԽՍՀՄ պատմության հարցերի որոշ մասնագետ հետազոտողներ կասկածանք են հայտնել դրա վավերականության մասին, որ դա կեղծ փաստաթուղթ է՝ կազմված հավանաբար դաշնակցականների կողմից՝

⁸⁷ ՀՀ ՀԹԿՓ ՊԿԱ, Ֆ, 1022, ց. 3, գ. 275, ք. 1։

⁸⁸ Նույն տեղում։

հայ բոլշևիկներին վարկաբեկելու համար⁸⁹: Նման առարկության համար հիմնական կռվան է բերվում այն թյուր փաստարկը, որ իբր սեպտեմբերի 20-ին ընդունված այդ «հրահանգը», չէր կարող Հայկոմկուսի Կենտկոմինը լինել, որովհետև ՀԿԿ ԿԿ-ը իբրև հաստատվել ու սկսել է գործել հոկտեմբերի 1-ից, իսկ մինչ այդ բոլոր հրահանգները տվել է ՀԿԿ Արտասահմանյան բյուրոն⁹⁰:

Վերոհիշյալ առարկության հիմնագուրկ լինելը ցույց տալու համար դիմենք փաստերի: 1920 թ. օգոստոսի վերջերին՝ 29-ից ոչ ուշ՝ Արևելքի ժողովուրդների առաջին համագումարի նախօրյակին, Գ. Զինովևի, Կ. Ռադեկի, Բ. Կունի, Ս. Կիրովի և մյուսների մասնակցությամբ Բաքվում գումարված ՌԿ/բ/Կ Կավբյուրոյի նիստում որպես օրակարգային առաջին հարց լավել ու հաստատվել են Հայաստանի Կոմկուսի ԿԿ-ի և Արտասահմանյան բյուրոյի կազմերը: ՀԿԿ ԿԿ-ի անդամներ են հաստատվել Դովլաթովը, Ավիսը, Կոստանյանը, Տեր-Գաբրիելյանը, Ադասին: ԿԿ-ի վեցերորդ անդամը լինելու էր Հայաստանում աշխատող ընկերներից մեկը: Իսկ անդամության թեկնածուներ՝ Ամիրխանովը և Շահգեղյանը: Կավբյուրոյի այդ նույն նիստում Արտասահմանյան բյուրոյի անդամներ են հաստատվել Դովլաթովը, Ավիսը և Կոստանյանը⁹¹: Սույն փաստաթուղթը հավաստում է, որ օգոստոս ամսի վերջերից հաստատվել, ուստի և հավասարապես գործել են թե՛ Հայկոմկուսի Կենտկոմը և թե՛ Արտասահմանյան բյուրոն: Ի դեպ, վերոհիշյալ փաստաթուղթը ձեռագիր բնօրինակ է և չի կարող որևէ կասկածի տեղիք տալ:

Որ առնվազն 1920թ. օգոստոսի վերջից գործել է Հայկոմկուսի կենտկոմ, վկայում է կոմունիստ Ա. Մռավյանը: Նա իր կենսագրականում նշում է, որ մինչև 1920թ. օգոստոսի վերջը աշխատել է Թիֆլիսում որպես Հայաստանի ԿԿ-ի քարտուղար, իսկ ամսի վերջին ինքը աքսորվել է մենշևիկյան կառավարության կողմից:⁹² Բացի այդ, «Հայաստանի կոմկուսի պատմության ուրվագծերում» նշված է, որ 1920թ. սեպտեմբերի 10-ին ՌԿ(բ)Կ Կենտկոմի Կովկասյան բյուրոն հաստատեց ՀԿ/բ/Կ Կենտկոմի կազմը, որի մեջ մտան Ի. Դովլաթյանը, Ա. Նուրիջանյանը, Հ.Կոստանյանը, Ա.Խանջյանը, Ս. Տեր-Գաբրիելյանը, թեկնածուներ հաստատվեցին Շ.Ամիրխանյանը և Վ.Շահգեղյանը⁹³: Ինչ վերաբերում է «հակտեմբերի 1-ի» ամսաթվին, ապա այդ օրը ՌԿ(բ)Կ Կենտկոմի կազմբյուրոն հաստատել է արդեն սեպտեմբերի 10-ին Կովկասյան բյուրոյի կողմից հաստատված ՀԿ(բ)Կ Կենտկոմի կազմը⁹⁴:

⁸⁹ Голос Армении, 9 февраля 1991г.

⁹⁰ Նույն տեղում:

⁹¹ ՄԼԻ ՊԿԱ, ֆ. 64, ց. 1, գ., 1, թ. 14, «Հայաստանի Հանրապետությունը 1918-1920թթ.», փաստաթղթերի և նյութերի ժողովածու, Ե., 2000 էջ 261:

⁹² ՀՀ ՀՔԿԹ ՊԿԱ, ֆ. 4010, ց.1,գ.19,թ.11:

⁹³ «Հայաստանի կոմունիստական կոսակցության պատմության ուրվագծեր», Ե., 1967, էջ 299:

⁹⁴ Նույն տեղում:

Դիմենք մեկ այլ աղբյուրի՝ ՀԿԿ ԿԿ-ի այն ժամանակ անդամության թեկնածու Շավարշ Ամիրխանյանի հուշերին: Նա ևս հաստատում է, որ 1920 թ. օգոստոս-սեպտեմբեր ամիսներին Բաքվում (Ադրբեջանում) գործել են և՛ Հայաստանի Կոմկուսի ԿԿ՝ ընդլայնված կազմով, և՛ Արտասահմանյան բյուրո՝ ավելի նեղ կազմով: Շ. Ամիրխանյանը պատմում է, որ 1920 թ. օգոստոսին ՌԿ/ք/Կ ԿԿ-ը հաստատեց Հայկոմկուսի ԿԿ-ի կազմը (Բ. Դովլաթյան, Ավիս, Ա. Կոստանյան, Ս. Տեր-Գաբրիելյան, Ա. Խանջյան և թեկնածուներ՝ Շ. Ամիրխանյան, Վ. Շահգեղյան): Այնուհետև ասվում է, որ ԿԿ-ի անդամների մի մասը (Դովլաթյան, Ավիս, Կոստանյան) կազմեցին ԿԿ-ի Արտասահմանյան բյուրո՝ Հայաստանում ամենօրյա ընդհատակյա աշխատանքներ տանելու և վերականգնելու ու հիմնելու նոր ընդհատակյա կազմակերպություններ: Ըստ Շ. Ամիրխանյանի հուշերի՝ դարձյալ օգոստոս ամսից զուգահեռաբար գործել են և՛ ԿԿ, և՛ Արտ. բյուրո⁹⁵: Այնպես որ՝ սեպտեմբերի 20-ի գաղտնի հրահանգի հեղինակ-հասցեատերը եղել է հենց ինքը՝ Հայկոմկուսի Կենտկոմը: Եվ վերջին հաշվով, իր կանոնադրության համաձայն, Կոմունիստական կուսակցության միայն ԿԿ-ը կարող էր ունենալ բյուրո, արտասահմանյան բյուրո կամ քաղբյուրո: Ինչ վերաբերում է այն պարագային, որ օգոստոսի վերջերին հաստատված Հայկոմկուսի ԿԿ-ի անդամների ցանկը նույնությամբ չի համընկնում սեպտեմբերի 20-ի գաղտնի հրահանգում նշված ԿԿ-ի անդամների կազմին, ապա հարկ է հիշեցնել, որ բոլշևիկյան կուսակցության համար ընդունված կարգ էր կոպտացիայի միջոցով ԿԿ-ի կազմի հաճախակի փոփոխությունները:

Այս ամենից գատ՝ հետագայում ևս ընթերցողը կծանոթանա համանման բովանդակությամբ բազում այլ վավերագրերի, որոնք ավելորդ անգամ կհամոզեն, որ «սեպտեմբերի 20-ի» գաղտնի հրահանգը հայ բոլշևիկների ձեռքի գործն է:

1920 թ. հայկական բանակում բոլշևիկների քայքայիչ գործունեության մասին վկայում են հենց իրենք՝ բանակում ծառայած բոլշևիկ զինվորները իրենց հուշերում: Այսպես, օրինակ, հայկական բանակի զինվոր, բոլշևիկ Հայկ Մխիթարյանը պատմում է. «Մենք (բոլշևիկներս-Ա.Հ.) զինվորների մեջ տանում էինք բացատրական-քաղաքական աշխատանքներ: Մենք հատկապես զինվորներին բացատրում էինք, որ *թուրք աշխատավորներն էլ մեզ նման աշխատավորներ են և դաշնակցականները ցանկանում են ոչնչացնել այդ աշխատավորներին*, մերկացնում էինք դաշնակցականների դեմքը»⁹⁶:

1920 թ. հոկտեմբերի 30-ին, առանց լուրջ մարտի, ընկավ Կարս քաղաքամրցքը, ուր և սրի քաշվեցին մոտ 6000 հայ և գերի ընկան մոտ 3000 զինվոր: Շուտով հանձնվեց նաև Ալեքսանդրապոլը: Թուրքական մահաբեր արշավանքի տագնապալի օրերին կոմունիստները պացիֆիստական, պարտվողա-

⁹⁵ Մ. М. Амирян, Из истории борьбы за советскую власть в Армении, Ереван, 1967, с. 41:

⁹⁶ ՀՀ ՊԿՊԱ, Ֆ. 403, ց. 1, գ. 20, ք. 1 (ընդգծումը մերն է):

կան բովանդակության թռուցիկներ էին տարածում զինվորների և խուճապահար ժողովրդի մեջ. «Չկրակե՛ս, հայ աշխատավոր զինվոր, եղբայրական թուրք բանակի վրա, նա քեզ բերում է ոչ թե ստրկություն, այլ ազատություն. նա գալիս է օգնելու քեզ քո սրբազան պայքարի մեջ»⁹⁷:

Հայտնի են սաբոտաժի շատ դեպքեր, մատնություններ, գնացքների խորտակում և այլ փաստեր: Առանձին գործասեր գրեթե առանց գնդակ իսկ արձակելու, չենթարկվելով հրամանատարներին, դասալքում էին: Դեպքերին ականատես ու մասնակից Ն. Օդաբաշյանը գրում էր. «Ձարմանալի բան. կարծես թե թուրքերը մեր մեջ լրտեսներ ունեին և մեր զորքերի բոլոր շարժումները գիտեին. միշտ աշխատում էին մեր թույլ կողմից օգտվել»⁹⁸: Նոյեմբերի 5-ին, Ալեքսանդրապոլի շտաբից գորավար Մ. Սիլիկյանը բանակի հրամանատարությանը և կառավարությանը հայտնում էր, որ ռազմաճակատում գործասերը ինքնագլուխ լքում են ճակատը և չեն կատարում իրենց պետերի հրամանները⁹⁹: Հատկապես Կարսի անկումից հետո զանգվածային բնույթ կրեց ռազմաճակատի կազմալուծումը, որը շուտով վերածվեց ընդհանուր խուճապի:

Հայաստանի կոմունիստական կազմակերպություններից հատկապես ծայրահեղական դիրք էր գրավել ռազմաճակատամերձ Ալեքսանդրապոլի բոլշևիկյան կոմիտեն: Այն բանից հետո, երբ նոյեմբերի 7-ին թուրքերը գրավեցին Ալեքսանդրապոլը, տեղում իշխանությունը գործնականում անցավ մենշևիկ-եսեռների խմբակցության ձեռքը: Քաղաքային ինքնավարությունը գլխավորում էր Անկախ սոցիալիստների (մենշևիկների) ղեկավար Լևոն Մարգարյանը¹⁰⁰: Թուրքական օկուպացիայի շրջանում քաղաքում և շրջակայքում մեծ չափով ակտիվացան բոլշևիկները, որոնք փորձեցին կապեր հաստատել թուրքերի հետ: Նոյեմբերի 13-ին Ռ-Կ/բ/Կ Ալեքսանդրապոլի կոմիտեի նախաձեռնությամբ քաղաքում անցկացվեց բազմամարդ միտինգ, որին մասնակցել են նաև թուրքական կոմկուսի ներկայացուցիչներ¹⁰¹: Միտինգում ընդունվեց բանաձև, որը մեջ ենք բերում ամբողջությամբ. «Ալեքսանդրապոլի պրոլետարիատը և չքավոր գյուղացիությունը, ազատագրվելով հայկական դարավոր լծից, հղում է իր եղբայրական սրտագին ողջույնը թուրքական Կոմունիստական կուսակցությանը՝ Թուրքիայի ճնշված մասսաների միակ պաշտպանին: Հայաստանի հարստահարված և բազմատանջ զանգվածները վատահ են, որ միայն Հայաստանի և Թուրքիայի, երկու հարևան ժողովուրդների պրոլետարիատի միավորումը և ձեռք ձեռքի տված համատեղ աշխատանքը կերաշխավորի մեծ հաղթանակի լիակատար հաջողությունը և ընչաքաղց համաշխարհային իմպերիալիզմի տապալումը:

⁹⁷ Վ. Նավասարդյան, Հ.Յ. Դաշնակցության անելիքը, Գահիրե, 1924, էջ 224:

⁹⁸ «Հայրենիք», Պոսթըն, 1943, թիվ 4, էջ 67:

⁹⁹ ՀՀ ՊԿՊԱ, Ֆ. 200, ց. 1, գ. 602, ք. 88:

¹⁰⁰ ՀՀ ՀԶԿՓ ՊԿԱ, Ֆ. 1022, ց. 2, գ. 189, քք. 3-4:

¹⁰¹ Նույն տեղում, ք. 4:

Կեցցե՛ Թուրքիայի Կոմկուսը, կեցցե՛ Արևելքի Կարմիր հեղափոխական բանակը, կեցցե՛ կոմունիզմը, կեցցե՛ Խորհրդային Հայաստանը»¹⁰²:

13 նոյեմբերի 1920 թ.

ք. Ալեք-պոլ

Միտինգի նախագահ՝

Ար. Տեր-Մարտիրոսյան

քարտուղար՝ Սկ. Խաչիյան:

Այնուհետև այդ նույն միտինգում ընդունվել է նաև կոչ՝ ուղղված հայ զինվորներին, գյուղացիներին և գաղթականներին: «Մենք կոչ ենք անում ձեզ,- սա՛ված է այնտեղ,- չհավատալ դաշնակներին, քանզի գալիս են ոչ թե կողոպտիչներ, այլ հայ գյուղացիների, զինվորների ու բանվորների ընկերները: Նրանք (թուրքերը-Ա.Հ.) գալիս են ոչ թե մորթելու ձեզ, այլ ազատելու դաշնակ թալանիչների ձեռքից»¹⁰³: Հաջորդ օրը՝ նոյեմբերի 14-ին, Ռ-Կ/ք/Կ Ալեք-պոլի կազմակերպությունը, կոմիտեի անդամներ՝ Ներսիկի, Արծվիկի և Նուշիկի ստորագրությամբ հրապարակեց նույնաբնույթ մեկ այլ կոչ, որում դարձնալ կարողում ենք. «Մենք (հայ բոլշևիկներս-Ա.Հ.) լիակատար լեզու ենք գտել մեր դաշնակից հեղափոխական թուրքական բանակի հետ և մեր գործողությունները համաձայնեցված են»¹⁰⁴: Այստեղից ինքնին պարզ է դառնում, թե մնան քարոզչության, ժողովրդի ու բանակի այդպիսի քաղաքական ու բարոյահոգեբանական մթնոլորտի պայմաններում, որքան ցածր պետք է լիներ նրանց դիմադրական, ինքնապաշտպանական ոգին:

Այս ամենով հանդերձ, մենք ամենևին էլ այն կարծիքին չենք, թե Հայաստանի պարտության գլխավոր պատճառը բոլշևիկների բայթայիչ ու կազմալուծիչ գործունեությունն էր: Թուրք-հայկական պատերազմում Հայաստանի պարտության պատճառները շատ են¹⁰⁵, որոնց ամբողջական քննությունը մեր խնդրից դուրս է:

3. Խորհրդարանը և կուսակցությունները ՀՀ անկման փուլում

Տևական ու պերմանենտ արձակուրդներից հետո, 1920 թ. նոյեմբերի 1-ից խորհրդարանը վերսկսեց իր աշխատանքները՝ հրավիրելով արտահերթ նիստ: Պատմաքաղաքական առումով սա ՀՀ այն ժամանակաշրջանն էր, երբ հոկտեմբերի 30-ին ընկել էր Կարսը և Հայաստանն արդեն կանգնած էր պարտության եզրին: Հանրապետությունը, հայտնվելով «ռուսական մուրճի և թուր-

¹⁰² Նույն տեղում, թ. 1:

¹⁰³ Նույն տեղում, թ. 2:

¹⁰⁴ Նույն տեղում թ. 3:

¹⁰⁵ Ա. Հակոբյան, 1920թ. թուրք-հայկական պատերազմի պատմության փորձն ու դասերը, Ե., 2004:

քական սալի միջև» սպրում էր ռազմաքաղաքական խոր ճգնաժամ և նրա գոյությանը մնում էին հաշված օրեր, ավելի ստույգ՝ ընդամենը մեկ ամիս: Իսկ մինչ այդ, ինչպես արդեն ասվեց, թուրք-հայկական պատերազմում բավարար զինված ու լավ հանդերձավորված հայոց բանակը տարբեր պատճառներով անպատրաստ գտնվեց դիմակայել ու հակահարված տալ նենգ ոտխին:

Նոյեմբերի 1-ի երեկոյան ժամը 8-ին բացվեց խորհրդարանի նիստը: Օրակարգի կենտրոնական հարցը վերաբերում էր Հայաստանի ներկա դրությանը: Ձեկուցեց վարչապետ Հ. Օհանջանյանը: Ելույթներ ունեցան պատգամավորներ՝ Ս. Թորոսյանը, Ա. Խոնդկարյանը, Հ. Տերտերյանը, Ա. Խատիսյանը: Չայների մեծամասնությամբ ընդունվեց ՀՅԳ խմբակցության բանաձևը, որով հավանություն էր տրվում կառավարության ձեռնարկած ինքնապաշտպանական միջոցներին¹⁰⁶:

Երեք օր անց՝ նոյեմբերի 4-ին, գումարվեց խորհրդարանի երկրորդ նիստը, որին ներկա էին 35 պատգամավոր և կառավարության գրեթե ամբողջ կազմը: Այս նիստում լավեցին երկու հարց: Նախ՝ առաջին հարցով փոխվեց խորհրդարանի նախագահության կազմը: Գաղտնի քվեարկությամբ՝ 34 կողմով խորհրդարանի նախագահ ընտրվեց արտասահմանյան երկարատև գործուղումից նոր վերադարձած Հ. Քաջազնունին, իսկ փոխնախագահներ՝ Ս. Տիգրանյանը և Լ. Շանթը¹⁰⁷:

Այնուհետև երկրորդ հարցով որոշվեց կրկին դադարեցնել խորհրդարանի աշխատանքները՝ պատճառաբանելով, որ երկրի դրությունը արտակարգ է, ուստի անհրաժեշտ համարվեց, որ պատգամավորները գործեն ժողովրդի մեջ, իսկ կառավարությունն էլ, յուրացնելով խորհրդարանի իրավունքները, այս ծանր ժամանակներում գործի ավելի ազատ ու անկաշկանդ: Սույն հարցի մասին պատգամավոր Գ. Քալաշյանի ներկայացրած օրինագծի դեմ առարկեցին միայն էսեռներ՝ Ա. Խոնդկարյանը և Վ. Մինախորյանը: Որոշվեց խորհրդարանի աշխատանքները դադարեցնել մինչև ս. թ. դեկտեմբերի 1-ը¹⁰⁸: Նիստը փակվեց և խորհրդարանն արդեն հինգերորդ անգամ ուղարկվեց արձակուրդ: Այս առնչությամբ, կարծում ենք, տեղին էր «Հայաստանի ձայնի» հանդիմանությունը, երբ նա գրում էր իր խմբագրականում: «Մեզ կը թվի, որ պառլամենտի հասկացողությունը, եթե չասենք ամբողջությամբ, գեթ բավական մեծ չափով կորսնցուցեր է յուր արժեքը ժողովրդի մոտ, այնքան երկար ժամանակով շարունակվող արձակուրդի շնորհիվ»¹⁰⁹:

Հայկական գործի նահանջի և ազգաբնակչության խուճապի պայմաններում թշնամին մոտենում էր Ալեքսանդրապոլին: Նոյեմբերի 7-ին քաղաքը անձնատուր եղավ: Թուրքական զորքերի հրամանատար Զ. Կարաբեքիր փաշայի առաջարկությամբ կողմերի միջև կայացվեց զինադադար՝ հետևյալ

¹⁰⁶ «Ժողովուրդը», 3 նոյեմբերի 1920 թ.:

¹⁰⁷ «Հատաջ», 6 նոյեմբերի 1920 թ.:

¹⁰⁸ «Ժողովուրդը», 7 նոյեմբերի 1920 թ.:

¹⁰⁹ «Հայաստանի ձայն», 6 նոյեմբերի 1920 թ.:

պայմաններով. հայկական գործը պետք է հետ քաշվեր Ախուրյան գետից 15 կմ դեպի արևելք, Ալեքսանդրապոլի կայարանը և բերդը դրվելու էին թուրքերի տրամադրության տակ և այլն: Այս պայմաններն իսկույն կատարվեցին և ակնկալվում էր քիչ թե շատ տանելի (պատվավոր) հաշտություն կնքելու հնարավորություն: Սակայն մեկ օր անց՝ նոյեմբերի 8-ին, Անկարայի կառավարությունը, չբավարարվելով Ք. Կարաբեքիրի ներկայացրած պայմաններով, պահանջեց նոր, ավելի մեծ զիջումներ, որով ՀՀ տարածքի կեսից ավելին անցնում էր թուրքերին: Բացի այդ, Հայաստանը պետք է թուրքերին հանձներ մեծ խմբաքանակներով զենք, զինամթերք, փոխադրամիջոց (2000 հրացան, 60 գնդացի, 12 թնդանոթ, 4000 արկղ հրացանի փամփուշտ, 6000 թնդանոթի ռումբ, 4000 ջորի, 2 շոգեմեքենա, 50 վագոն և այլն)¹¹⁰: Սա նշանակում էր ոչ միայն տարածքային նոր կորուստ, այլև, ըստ էության, Հայաստանի զինաթափում ու կապիտուլյացիա: Բացի այդ, չէր բացառվում, որ քեմալականները, ստանալով Հայաստանի հանձնած զենքը, կարող էին այն կրկին օգտագործել հայության դեմ՝ նրան իսպառ բնաջնջելու նպատակով: Հասկանալի է, որ նման մտավախության պայմաններում Հայաստանի կառավարությունը մերժեց այդ պայմանները, որից հետո՝ նոյեմբերի 10-ից, կրկին վերսկսվեցին ռազմական գործողությունները:

Այս իրավիճակում էր, որ նոյեմբերի 11-ին, խորհրդարանի նախագահության նախաձեռնությամբ, գումարվեց արտահերթ նիստ: Նիստում լսվեց ու քննարկվեց կառավարության զեկուցումը նախորդ մեկ շաբաթվա ընթացքում տեղի ունեցած ռազմաքաղաքական իրադարձությունների մասին: Չեկուցողը՝ վարչապետ Հ. Օհանջանյանը, ասաց, որ ռազմական գործողությունների անհաջողության հետևանքով կառավարությունը հարկադրված զինադադար սկսեց թուրքական հրամանատարության հետ: Միաժամանակ, վարչապետը հիմնավորեց, թե ինչու է կառավարությունը մերժել երկրորդ զինադադարի պահանջները:

Հ. Օհանջանյանի զեկուցումից հետո ելույթներ ունեցան ՀՅԴ խմբակցության անդամներ՝ Ա. Խատիսյանը, Հ. Տերտերյանը, Հ. Սարգսյանը, որոնք կոչ արեցին կռվել մինչև հաղթական ավարտը: Իսկ էսեռ Ա. Խոնդկարյանը առաջարկեց կազմել նոր համաժողովրդական կառավարություն, որը կվայելի հասարակական-քաղաքական բոլոր հոսանքների վստահությունը¹¹¹: Նիստի վերջում ՀՅԴ խմբակցության ներկայացմամբ ընդունվեց մի բանաձև, որով վստահություն էր հայտնվում կառավարության վարած քաղաքականությանը:

Թուրքերը, վերսկսելով հարձակումը, մի քանի օրում գրավեցին նոր բնակավայրեր ու տարածքներ ու սկսեցին խորանալ երկրի ներսը: Հայաստանը կանգնեց լիակատար կործանման եզրին, ուստի և կայացվեց հարկադիր զինադադար: Նոյեմբերի 18-ին Հայաստանի և Թուրքիայի միջև կրկին կնքվեց զինադադար, որով ռազմական գործողությունները դադարեցվեցին:

¹¹⁰ «Ժողովուրդ», 10 նոյեմբերի 1920 թ., 3. Իրազեկ, նշվ. աշխ. էջ 78:

¹¹¹ «Ժողովուրդ», 16 նոյեմբերի 1920 թ.:

Իսկ նոյեմբերի 24-ի երեկոյան Ալեքսանդրապոլում պիտի սկսվեին հաշտութեան բանակցութիւնները¹¹²:

Թուրքիայի հետ զինադադար կնքելով՝ Հայաստանի կառավարությունը չէր կարող հաշտութեան բանակցութիւն չվարել: Հայկական կողմը հույս ուներ, թէ Թուրքիան Հայաստանին տարածքային որոշ զիջումներ կանի և կկարողանան կնքել քիչ թե շատ պատվավոր հաշտութեան պայմանագիր: Այդ նկատառումով Բ. Լեգրանի հետ տարվող բանակցութիւնները ձգձգվում էին: Հայաստանի կառավարութեան քաղաքական դիրքորոշման վրա, ինչ խոսք, որոշ ազդեցություն էր գործում նաև Անգլիայի ներկայացուցիչ Ստոքսը: Հոկտեմբեր-նոյեմբեր ամիսներին ընթացող հայ-ռուսական բանակցութիւնների վրա, անշուշտ, վերջինս բացասական դեր խաղաց: Անգլիայի ու Անտանտի քաղաքական շահերի տեսակետից ավելի ցանկալի կլինէր, որ Հայաստանը համաձայնութեան գար ու պայմանագիր կնքէր քեմալական Թուրքիայի, քան Խ. Ռուսաստանի հետ:

Հայ քաղաքական շրջաններն ու ժողովուրդը, տեսնելով, որ չեն կարողանում պատշաճ դիմադրություն ցույց տալ, իրենց փրկութեան վերջին հույսը դրել էին Խ. Ռուսաստանի վրա, չնայած արդեն շատերին էր հայտնի ռուս-թուրքական գործակցութեան փաստը:

1920 թ. աշնան ճակատագրական փուլում ժողովուրդը կանգնած էր երկրնտրանքի առաջ. Ռուսաստան¹¹³, թե՞ Թուրքիա երկրնտրանքում նա իր ճնշող մեծամասնութեամբ աներկբա պատրաստ էր ընդունել Ռուսաստանի տիրապետությունը: Ստեղծված պայմաններում քաղաքական կուսակցութիւններն ու ժողովուրդը պատրաստ էին հրաժարվել այնքան թանկ գնով ձեռք բերած անկախութիւնից: «Հայ ժողովրդի գլխին կանգնած ֆիզիկական բնաջնջման վտանգն այնքան ահռելի էր, - գրում էր Կ. Սասունի, - որ Հայաստանի անկախութեան խնդիրը այդ ժամանակ ստացել էր երկրորդական նշանակություն»¹¹³:

Կուսակցութիւնների, ժողովրդի ու բանակի մեջ գնալով ավելի ու ավելի միանշանակ ու գերիշխող էր դառնում ռուսական քաղաքական արևելումը (կողմնորոշումը): Ստեղծված աղետալի իրավիճակի թելադրանքով՝ գնալով հայ քաղաքական շրջանակներում մինչ այդ տիրապետող արևմտյան (անգլիական) արևելումը ավելի ու ավելի իր տեղը զիջում էր ռուսականին (Խ. Ռուսաստանին): Պատերազմի հետևանքով որքան անհուսալի էր դառնում Հայաստանի վիճակը, այնքան ավելի էր ժողովուրդը հակվում և իր փրկութեան միակ խարիսխը դարձնում Ռուսաստանը: Այս գործում գորքի, ժողովրդի մեջ մեծ աշխատանք էին տանում բոլշևիկները:

Ստեղծված իրադրութեան մեջ որոշ կուսակցութիւններ էլ արդեն մտորում էին գոյություն ունեցող վարչակարգի տապալման ու Հայաստանի խորհրդայնացման մասին: Բացի բոլշևիկներից՝ նման առաքելութեամբ հան-

¹¹² ՀՀ ՊԿՊԱ, Ֆ. 199, գ. 1, գ. 247, թ. 1:

¹¹³ «Հայրենիք», 1925, թիվ 12, էջ 88:

դես եկավ նաև Ս.Գ.Հնչակ կուսակցության Կովկասյան հատվածը: Սրանք, կանխազգալով ՀՀ վախճանը, նոյեմբերի 11-ին իրենց խորհրդատուներով ընդունեցին բանաձև՝ «Հայաստանում գոյություն ունեցող վարչակարգի և նրա ղեկավարների տապալման և գյուղացու-բանվորական-խորհրդային իշխանության հաստատման մասին»¹¹⁴:

Այդ ժամանակ հայ քաղաքական շրջանակներում տիրապետող մտայնությունն այն էր, որ պետք է հրաժարական տա արդեն հեղինակազրկված Բյուրո-կառավարությունը և նրա փոխարեն կազմվի մի այնպիսի նոր կառավարություն, որը լիներ «ծախ» և խաղաղասեր: Կարսի և Ալեքսանդրապոլի անկումը արդեն կանխորոշել էին Բյուրո-կառավարության բախտը: Ըստ Ս. Վրացյանի անտիպ հուշերի՝ ստեղծված քաղաքական խոր ճգնաժամի պայմաններում Հ. Օհանջանյանը և Ռ. Տեր-Սիմոնյանը այժմ արդեն շտապում էին օր առաջ հեռանալ կառավարությունից¹¹⁵:

Կառավարության հրաժարականի կապակցությամբ նույն ինքը ՀՅԳ Բյուրոն ընդունեց առանձին որոշում, որում ասվում էր. «Հաշվի ունենալով միջազգային քաղաքականության մեջ առաջացած մի շարք կարևոր երևույթները, ուժերի և շահերի նոր դասավորությունը, ՀՅԳ Բյուրոն անհրաժեշտ նկատեց դուրս գալ կառավարությունից, որպեսզի նոր կառավարությունը, նոր հոգեբանական պայմաններով, սկսի հաշտության բանակցությունները՝ վերջ դնի պատերազմին»¹¹⁶:

Անտարակույս, դատապարտելի են այդ օրերին (նոյեմբերի 20-ին և 23-ին) ՀՅԳ կենտրոնական օրգան «Հառաջի» տպագրած առաջնորդող հոդվածաշարերը, որոնցում քաղաքական-դիվանագիտական նկատառումներով զարգացվում էր հայ ժողովրդի համար անհարագատ մի հայեցակետ (զաղափար), թե հայ ժողովուրդը պետք է ունենա թուրքական օրիննուացիա: Եվ սա ասում էր մի կուսակցություն, որը 30 տարի շարունակ մարդկային, նյութական ու հոգևոր հսկայական կորուստներ տալով՝ պայքարել է այդ օրիննուացիայի օրեկտի՝ Թուրքիայի դեմ: Մեր կարծիքով, թուրքական կողմնորոշում ընտրելու մասին հայտարարությունը օրհասական պահի թելադրանքով դիվանագիտական մանևր էր՝ պատերազմում հաղթած Թուրքիայի համակրանքը ինչ-որ կերպ շահելու ակնկալիքով: Կարծում ենք, իրավացի չեն այն հեղինակները, ովքեր հիմք համարելով «Հառաջի» հոդվածները և նպատակ ունենալով վարկաբեկել ՀՅԳ-ին, պնդում են, թե Դաշնակցություն կուսակցությունը ունեցել է թուրքական կողմնորոշում:

1920 թ. նոյեմբերի 18-ին հայտարարված հայ-թուրքական տասնօրյա զինադադարի շրջանում՝ նոյեմբերի 23-ին՝ երեկոյան ժամը 8-ին (նախազահությամբ Հ. Քաջազնունու) գումարվեց խորհրդարանի արտահերթ նիստը: Խորհրդարանի խոսնակ Հ. Քաջազնունին կարդաց կառավարությունից

¹¹⁴ ՀՀ ՀԲԿՓ ՊԿԱ, Ֆ. 4045, ց. 1, գ. 244, ք. 1:

¹¹⁵ «Ազգրակ շաբաթօրյակ», 23 սեպտեմբերի 1973 թ. (թիվ 41):

¹¹⁶ «Հառաջ», 30 նոյեմբերի 1920 թ.:

ստացված հրաժարականի մասին գրությունը: Այնուհետև կաբինետի հրաժարականի շարժառիթների մասին բացատրություններ տվեց Հ. Օհանջանյանը: Ելույթներ ունեցան պատգամավորներ՝ Ս. Թորոսյանը (ՀՅԳ) և Ա. Խոնդկարյանը (ԷսէՄ): Խորհրդարանի երկու կուսակցական խմբակցությունները ընդունեցին կառավարության հրաժարականը (43 կողմ և 1 ձեռնպահ)¹¹⁷: Մինչև նիստի հրավիրումը ՀՅԳ խմբակցությունում նախապատրաստվել էր հարցը: ՀՅԳ Բյուրոյի գիտությամբ վարչապետության թեկնածու էր առաջադրվել պատգամավոր Սիմոն Վրացյանը¹¹⁸: Խորհրդարանը նրան էլ հանձնարարեց կազմել նոր կառավարություն¹¹⁹:

Ակնկալվում էր, որ նոր կառավարությունը պետք է ընդհանուր լեզու գտներ բոլշևիկների և հաշտություն կնքեր թուրքերի հետ: Նոր վարչապետը հույս էր տաժում, թե Հայաստանի ընկերվարական, ռուսամետ կառավարություն կազմելով՝ Խ. Ռուսաստանը հաշվի կնստի Հայաստանի անկախության հետ, կպաշտպանի Հայաստանի մինչև 1914 թ. սահմանները: Բայց այդ հույսերը չարդարացան:

Հարկ է նշել, որ կառավարության ճգնաժամի շրջանում թուրքական կողմը ևս ցանկանում էր, որ Հայաստանում կազմվելիք նոր կառավարությունը լինի ոչ դաշնակցական: Թե՛ ռուսական և թե՛ թուրքական կողմերին ձեռնտու էին Հայաստանի իշխանության ղեկին տեսնել իրենց կամակատար մի մարմին: Բայց այդ ժամանակ էլ Հայաստանում քաղաքական ուժերի հարաբերակցությունն այնպիսին էր, որ հնարավոր չէր նոր կառավարություն կազմել առանց Դաշնակցության մասնակցության:

Նոյեմբերի 24-ի երեկոյան կայացավ խորհրդարանի նախորդ օրվա արտահերթ նիստի շարունակությունը: Ս. Վրացյանը ներկայացրեց նոր կաբինետի կազմը: ԷսէՄները համաձայնություն տվեցին և մտան Վրացյանի «ձախ» կոալիցիոն կառավարության մեջ, իսկ ՀՄԴԿ («սպեցիֆիկ») գործիչներ Դ. Անանունը և Բ. Իշխանության հրաժարվեցին մտնել նոր կաբինետ¹²⁰: Խորհրդարանի նիստում լավեց և 30 կողմ, երկու ձեռնպահությամբ հավանություն տրվեց վարչապետի հայտագրին (ղեկլարացիային)¹²¹: Արտաքին քաղաքականության խնդրում այնտեղ ընդգծվում էր այն միտքը, որ «Մեր գործունեության նշանաբանն է լինելու՝ անկեղծ հաշտություն Տաճկաստանի հետ և

¹¹⁷ «Հառաջ», 25 նոյեմբերի 1920 թ.:

¹¹⁸ Ս. Վրացյանը իր հուշերում պատմում է, որ սկզբում հանձնարարվեց Հ. Քաջազունուն կազմել նոր կառավարություն: Վերջինս փորձեց կազմել բոլոր կուսակցությունների ներկայացուցիչներից բաղկացած ազգային միասնության կառավարություն, որին, սակայն, հրաժարվեցին մասնակցել ընդդիմադիր կուսակցությունները՝ ՀԺԿ, ՀՄԴԿ, ԷսէՄ և այլն: Այդ իսկ պատճառով Քաջազունունին հրաժարվեց և իր կողմից վարչապետության թեկնածու առաջարկեց գյուղատնտեսության նախարար Ս. Վրացյանին (Տես՝ Ս. Վրացյան, Հայաստանի Հանրապետություն, Բեյրութ, 1958, էջ 488):

¹¹⁹ ՀՀ ՊԿՊԱ, Ֆ. 198, ց. 1, գ. 75, թ. 3, «Ժողովուրդ», 25 նոյեմբերի 1920 թ.:

¹²⁰ Ս. Վրացյան, նշվ. աշխ., էջ 491:

¹²¹ «Ժողովուրդ», 26 նոյեմբերի 1920 թ., «Հայրենիք», 1923, թիվ 1 (նոյեմբեր), էջ 65:

համերաշխություն ու խաղաղ համակեցություն բոլոր հարևան ժողովուրդների հետ»¹²²:

Ս. Վրացյանի խառը սոցիալիստական որակվող կաբինետի մեջ մտան՝ Դ. Կանայան (զինվորական նախ.), Հ. Տերտերյան (ֆինանսների), Հ. Տեր-Հակոբյան (խնամատարության)¹²³, Ա. Հովհաննիսյան (գյուղատնտեսության), Ա. Խոնդկարյան (արդարադատության), Վ. Մինախորյան (կրթության և արվեստի), Վ. Բաբայան (աշխատանքի) և Վ. Զրմոյան (ն. գ. նախ. պաշտոնակատար): Այս խաղաղասեր ու ռուսասեր խառն կառավարությունը, որտեղ մեղմ դաշնակցականներից զատ մտան երկու էսէռ (պատգամավորներ Ա. Խոնդկարյանը և Վ. Մինախորյանը), պետք է վարեր խաղաղասիրական գիծ՝ լեզու գտնելու ու հաշտվելու ինչպես Թուրքիայի, այնպես էլ Ռուսաստանի հետ¹²⁴:

Հավելենք, որ Սոցիալիստ-հեղափոխական կուսակցության Անդրկովկասյան շրջանային կոմիտեն նոյեմբերի 29-ի նիստում քննելով Վրացյանի կաբինետում սոց.-հեղ. կուսակցության երկու ներկայացուցիչների մտնելու մասին հարցը՝ հավանություն չի տվել էսէռների Հայաստանի կազմակերպության այդ քայլին: Դա պատճառաբանվել էր նրանով, որ նորակազմ կաբինետում ընդգրկված են այնպիսի անձինք, որոնք «ունեն ագրեսիվ ձգտումներ, խաղաղասեր չեն հարևանների հետ և որ ամբողջությամբ վերցված մոր կառավարությունը չի կարող համարվել աշխատավորական»¹²⁵:

ՀՀ համար ճգնաժամային այս փուլում հայ քաղաքական կուսակցությունների ներքին կյանքը ևս խռովահույզ էր ու անկայուն: Այս շրջանում մեծ չափով ակտիվացան ձախակողմյան քաղաքական ուժերը: Խորհրդարանական և արտախորհրդարանական ձախ ուժերը ձգտում հանդես բերեցին բոլշևիկների հետ սերտ կապեր հաստատել: Հ. Քաջազնունին հայտնում էր, որ էսէռները անձնական կապեր ունեին հայ բոլշևիկների հետ¹²⁶: Վիճակն այնքան բարդ էր ու ճգնաժամային, որ պառակտում առաջացավ ՀՀ Դաշնակցության շարքերում: Արխիվային մի վավերագրից տեղեկանում ենք, որ նոյեմբերի կեսին Ստալինը Բաբու եղած ժամանակ խորհուրդ է տվել Բ. Մդիվանուն պառակտել Դաշնակցության շարքերը և նրա ձախ թևը իրենց կողմը գրավել¹²⁷: Նոր փոփոխված իրադրության մեջ նոյեմբերի կեսերից ՀՀԳ ներսում առաջացավ մի 30 հոգուց բաղկացած այսպես կոչված «Հայաստանի ինտերնացիոնալ ձախ դաշնակցականների» խումբը: Խմբի ղեկավարներ դար-

¹²² ՀՀ ՊԿՊԱ, Ֆ. 200, ց. 1, գ. 427, մաս 2, ք. 431:

¹²³ Նոյեմբերի 30-ից նրան փոխարինեց Ռուբեն Յուզբաշյանը (Տես՝ ՀՀ ՊԿՊԱ, Ֆ. 198, ց. 1, գ. 58, ք. 201

¹²⁴ «Հայրենիք», 1925, թիվ 12, էջ 89:

¹²⁵ «Մշակ», 3 դեկտեմբերի 1920 թ.:

¹²⁶ Հ. Քաջազնունի, Դաշնակցությունը անելիք չունի այլևս, Պուքրեշ, 1923, էջ 52:

¹²⁷ ՀՀ ՀԶԿՓ ՊԿԱ, Սիկրոժապավենների հավաքածու, թիվ 2, գ. 5, ք. 1:

ձան Հայկ Ավայանը, Արտաշես Վանցյանը, Արշակ Գրիգորյանը և ուրիշներ¹²⁸։

Այն բանից հետո, երբ պարզ դարձավ, որ թուրք-հայկական պատերազմում Հայաստանի պարտությունն ու կապիտուլյացիան արդեն օրերի հարց է, «Չախ դաշնակցականները»՝ Հայկ Ավայանի գլխավորությամբ, սերտ կապեր հաստատեցին՝ քարոզչական մեծ շքախմբով հոկտեմբերի 11-ին հատուկ գնացքով Երևան ժամանած Ռ.ՖԽՍՀ դիվանագիտական ներկայացուցիչ Բորիս Լեգրանի հետ։ Այդ օրերին Բ. Լեգրանը Երևանից Գ. Չիչերինին գրում էր, որ Հայաստանի ռազմաքաղաքական խոր ճգնաժամը առաջ է բերել պառակտում Դաշնակցության շարքերում¹²⁹։ «Չախ դաշնակցականները», Հայաստանի իշխանություններից գաղտնի, բանակցություններ սկսեցին Բ. Լեգրանի հետ՝ Հայաստանը դեպի Ռուսաստան կողմնորոշելու, դաշնակցական կառավարությունը տապալելու և Հայաստանը օր առաջ խորհրդայնացնելու նպատակով։ Պետք է ասել, որ «Չախ դաշնակցականները» համակիրներ ունեին և՛ խորհրդարանում, և՛ ժողովրդի մեջ¹³⁰։ Այսպես՝ «Չախ դաշնակցականների» խմբին էին միացել խորհրդարանի ՀՅԴ խմբակցության ուրոշ անդամներ՝ Ավետիս Օհանջանյանը, Ռուբեն Քաջբերունին և ուրիշներ¹³¹։ Սրանք հիմնեցին իրենց խորհուրդը և մի քանի անգամ հանդես եկան ժողովրդին ուղղված կոչերով, որոնցում հորդորում էին ժողովրդին կապերը խզել «Աջ դաշնակցականներից», նրանց կառավարությունից և ամբողջովին փարվել հեղափոխական բանվոր-գյուղացիական Ռուսաստանին, կողմնորոշվել դեպի միջազգային սոցիալիզմն ու համաշխարհային հեղափոխությունը։ Հայաստանի ինտերնացիոնալ «Չախ դաշնակցականների» առաջադրած կարգախոսները, ըստ էության, ոչնչով չէին տարբերվում կոմունիստականներից¹³²։

Բ. Լեգրանը, բանակցելով Ավայանի և Վանցյանի հետ, ջանում էր ներսից պայթեցնել ՀՅԴ-ն և խաղաղ ճանապարհով խորհրդայնացնել երկիրը։ Եվ պետք է ասել, որ նա փայլուն կատարեց իր առջև դրված դիվանագիտական առաքելությունը։ Չխորանալով քաղաքական-դիվանագիտական մանրամասների մեջ՝ ասենք, որ նոյեմբերի 30-ին Բ. Լեգրանը Ս. Վրացյանին ներկայացրեց վերջնագիր՝ Հայաստանի խորհրդայնացման մասին։ Նույն օ-

¹²⁸ Հիշեցնենք, որ ՀՅԴ Գերագույն դատական ատյանի 1920թ. հունիսի 12-ի որոշմամբ Հ. Ավայանը վտարված էր կուսակցության շարքերից, որը վերջնականորեն պետք է հաստատվեր սեպտեմբերին գումարվելիք կուսակցության առաջիկա 10-րդ Ընդհ. ժողովում։ Մակայն քանի որ ռազմաքաղաքական հանգամանքների պատճառով այն չէր գումարվել, նրա հեռացման հարցը մնացել էր առկախ), (տես՝ «Գրոշակ» 1930, թիվ 10, էջ 240)։

¹²⁹ Գ. А. Галоян, Рабочее движение и национальный вопрос, Ер., 1969, с. 370-371.

¹³⁰ «Հայրենիք», 1925, թիվ 12, էջ 88։

¹³¹ «Ազգայն շարաքորյակ», 23 սեպտեմբերի 1973 թ. (թիվ 41)։

¹³² ՀՀ ՀԶԿՓ ՊԿԱ, ֆ. 4047, ց. 1, գ. 185, քք. 1-2։

րը երեկոյան Հայաստանի կառավարությանը վերջնագիր տվեց նաև Թուրքիան:

Մինչ Հայաստանում կատարվում էին օրհասական այդ իրադարձությունները, դեռևս նոյեմբերի 4-ին «կարմիր» Բաքվում, Ի. Ստալինի գլխավորությամբ, վճռվում էր Հայաստանի ճակատագիրը¹³³: Նոյեմբերի 4-ին ՌԿ/ԲԿ Կենտկոմի Կովկասյան բյուրոյի և Ադրբեջանի Կոմկուսի Կենտկոմի քաղբյուրոյի միացյալ նիստում, որին մասնակցում էին նաև ՀԿԿ Կենտկոմի անդամները, «քննության է առնվում Հայաստանում տիրող դրությունը»¹³⁴: Քննելով Հայաստանում ստեղծված կացությունը՝ որոշվում է խորհրդայնացնել Հայաստանը¹³⁵: Խորհրդային կառավարությունը, խնդիր դնելով խորհրդայնացնել Հայաստանը և ապա նաև Վրաստանը, այնուամենայնիվ, առաջնային նշանակություն էր տալիս Ադրբեջանի անվտանգության ապահովմանը: 1920 թ. նոյեմբերի 27-ին ՌԿ/ԲԿ Կենտկոմի Քաղբյուրոն, Ի. Ստալինի տված զեկուցման հիման վրա, որոշում է. «Գլխավոր խնդիրը համարել Ադրբեջանի պաշտպանությունը... դրա համար արագացնել 7 դիվիզիաների փոխադրումը Ադրբեջան»¹³⁶: Այս ամենը նշանակում էր, որ Հայաստանը կանգնած էր խորհրդայնացման անխուսափելի փաստի առաջ:

ՀՀ մայրամուտին խորհրդարանի և կառավարող կուսկացության առջև ծառայած էր երկու շատ կարևոր խնդիր. 1. Թուրքիայի հետ հաշտության պայմանագրի ստորագրումը և 2. իշխանության հանձնումը բոլշևիկներին ու Հայաստանի խորհրդայնացումը: Առաջին խնդրի իրականացումը լիազորվեց Ալ. Խատիսյանի գլխավորած Հայաստանի պատվիրակությանը, որը նոյեմբերի 24-ին Ալեքսանդրապոլում սկսեց բանակցությունները թուրքական գործերի հրամանատար Ք. Կարաբեքիրի հետ:

ՀՀ հետագա ճակատագրի հարցը վերջնականորեն վճռելու համար նոյեմբերի 30-ի լույս դեկտեմբերի 1-ի գիշերը տեղի ունեցավ խորհրդակցություն՝ ՀՅԳ Բյուրոյի, ՀՅԳ Հայաստանի ԿԿ-ի, խորհրդարանի ՀՅԳ խմբակցության, կառավարության անդամների և մի քանի ճանաչված գործիչների մասնակցությամբ¹³⁷: Խորհրդակցությունում պետք է Բ. Լեգրանի ներկայացրած վերջնագրին պատասխան տրվեր: Կառավարության և Գրոյի զեկուցումներից պարզ դարձան, որ դրությունը անհույս է: Գրոն հայտարարեց, որ ինքը գորք չունի բոլշևիկների դեմ կռվելու համար, այսինքն՝ հայ զինվորը չի կրակի ռուս-բոլշևիկների վրա: Խորհրդակցության առջև դրված էր մի հարց. ինչպե՞ս -

¹³³ Ավելի վաղ՝ 1920 թ. հոկտեմբերի 14-ին ՌԿ/ԲԿ Կենտկոմի Քաղբյուրոն, Վ. Ի. Լենինի մասնակցությամբ, որոշում էր ընդունել Հայաստանում խորհրդային իշխանություն հաստատելու մասին (Տես՝ Գ. Ա. Галоян, նշվ. աշխ., էջ 366):

¹³⁴ Խ. Հ. Բարսեղյան, նշվ. աշխ., գիրք 2-րդ, Ե., 1975, էջ 523:

¹³⁵ Գ. Բ. Ղարիբջանյան, նշվ. աշխ., էջ 424-425:

¹³⁶ ՀՀ ՀԶԿՓ ՊԿԱ, Ֆ. 4050, ց. 1, գ. 6, ք. 1:

¹³⁷ Ս. Վրացյան, Հուշեր մոտիկ անցեալից («Հայրենիք», 1923, թիվ 1 (նոյեմբեր), էջ 70, Հ. Տերտերյան, Շանթի պատվիրակության գործունեությունը («Հայրենիք», 1954, թիվ 5, էջ 10-11):

դուրս գալ ստեղծված ծանր կացությունից¹³⁸: Վրացյանի, Դրոյի և Քաջագնու-
նու ելույթներից հետո տեղի է ունենում մտքերի փոխանակություն: Խոսում են
շատերը: Բանախոսների մեծամասնությունը հանգում է այն հետևության, որ
առանց դիմադրության պետք է ընդունել բոլշևիկների մուտքը Հայաստան և
իշխանությունը հանձնելով նրանց՝ երկիրը խորհրդայնացնել: Նիստի մաս-
նակիցների փոքրամասնությունը միայն գտնում էր, որ պետք է դիմադրել¹³⁹:
Ականատես հուշագիրները պատմում են, որ փոքրամասնության ակտիվիստ-
ներից էր գյուղնախարար Արշակ Հովհաննիսյանը: Նա առաջարկում էր հայ-
տարարել նոր զորահավաք, ձերբակալել Լեգրանին և դիմադրել բոլշևիկնե-
րին¹⁴⁰: Հայաստանի խորհրդայնացման Լեգրանի առաջադրած պահանջին
դեմ են արտահայտվել մաս չ. Օհանջանյանը, Ս. Արարատյանը, Ա. Չիլին-
գարյանը, Վ. Նավասարդյանը և այլք, որոնք առաջարկում էին զենքի դի-
մել¹⁴¹:

Նույն օրը՝ նոյեմբերի 30-ի երեկոյան, խորհրդակցության ժամանակ,
Ալեքսանդրապոլից հեռագիր ստացվեց, որ Թուրքիան, հանձին Ք. Կարաբե-
քիրի, վերջնագիր էր տվել Հայաստանի պատվիրակությանը՝ 48 ժամվա ըն-
թացքում հաշտության պայմանները ընդունելու կամ մերժելու վերաբերյալ¹⁴²:
Պետք է ասել, որ թուրքական վերջնագիրը մեծապես կանխորոշեց ու հստա-
կեցրեց խորհրդակցության մասնակիցների դիրքորոշումը՝ Հայաստանի
խորհրդայնացման մասին Լեգրանի վերջնագիրը ընդունելու օգտին:

ՀՅԴ Բյուրոն մույնպես հանգեց մույն եզրակացության՝ կայացնելով
հետևյալ որոշումը. «Հարկադրված երկու հսկառակորդ կողմերի ճնշումից՝
Բյուրոն հեռանում է Հայաստանից, թողնելով իր ներկայացուցիչը, և հրահան-
գում է ընկերներին իրենց տեղական պայմանների համաձայն գործել և
զաղտնի պահել կուսակցության գոյությունը, իսկ ընկերներին չի արգելվում
մտնել նոր իշխանության մեջ և աշխատել երկրի տնտեսական ու կուլտուրա-
կան զարգացման համար¹⁴³: ՀՅԴ, նրա խորհրդարանական խմբակցությունը,
կառավարությունը, առանց կռիվի ու դիմադրության, գնացին նման խոշոր գո-
հողության՝ հանուն հայ ժողովրդի ֆիզիկական գոյության փրկության:

Հանձնարարվեց Դրոյին և չ. Տերտերյանին, որոնք արդեն կապի մեջ
էին Բ. Լեգրանի հետ, տեղի տալու բոլշևիկներին և ընդունելու խորհրդայնաց-
ման վերջնագրի պայմանները: Նրանք լիազորվեցին Լեգրանի հետ համա-
ձայնագիր ստորագրել և իշխանությունը հանձնել Հայեղեկումին: 1920 թ. դեկ-
տեմբերի 1-ին ժամը 2-ին վարչապետ Ս. Վրացյանը հայտնում է Ալեքսանդ-
րապոլում գտնվող ՀՀ պատվիրակության ղեկավար Ալ. Խատիսյանին, որ

¹³⁸ «Դրոշակ», 1930, թիվ 10, էջ 240:

¹³⁹ «Դրոշակ», 1930, թիվ 10, էջ 241:

¹⁴⁰ «Հայրենիք», 1952, թիվ 7, էջ 7:

¹⁴¹ «Հայրենիք», 1923, թիվ 1 (նոյեմբեր), էջ 70:

¹⁴² Նույն տեղում:

¹⁴³ «Հայրենիք», 1925, թիվ 12, էջ 92:

Բյուրոն, խմբակցությունը և կառավարությունը որոշել են ընդունել կարմիրների առաջարկը Հայաստանի խորհրդայնացման մասին, պայմանով, որ ճանաչվի Հայաստանի անկախությունը և թույլ չտրվեն քաղաքացիական կռիվները¹⁴⁴։

Միաժամանակ, քննության առնելով Թուրքիայի հետ պատերազմի և խաղաղության հարցը, ցուցում էր տրվել Ալ. Խատիսյանին՝ ընդունել թուրքերի ներկայացրած պայմանները և ստորագրել հաշտության պայմանագիրը¹⁴⁵։

Գեկտեմբերի 1-ի երեկոյան խորհրդարանի շենքում մոմերի լույսի տակ տեղի ունեցավ ՀՅԳ խորհրդարանական խմբակցության վերջին նիստը։ Նիստին մասնակցում էին նաև ՀՅԳ Բյուրոյի և կառավարության ներկայացուցիչներ։ «Չափազանց ծանր էր և ճնշող ժողովի պատկերը,- հիշում էր նիստին մասնակից Հ. Տեր-Հակոբյանը (Իրազեկը),- մեր բախտից՝ այդ երեկո էլեկտաբականություն էլ չէր գործում, և նստել էինք մոմերի աղոտ լույսի տակ»¹⁴⁶։ Սա ՀՅԳ խորհրդարանական խմբակցության վերջին պատմական նիստն էր։ Այն դռնբաց էր։ Իրազեկը վկայում է, որ նիստին ներկա էին բազմաթիվ կողմնակի անձինք, գուցե և մեծամասնականներ¹⁴⁷։ Թեև ՀՅԳ Բյուրոն և կառավարությունն արդեն վճռել էին իրենց անելիքը, բայց և այնպես՝ որոշվեց խնդիրը վերջին անգամ քննարկել ՀՅԳ խորհրդարանական խմբակցության համատեղ նիստում՝ դրանով իսկ ընդգծելով օրենսդիր մարմնի նշանակությունը։ Իրավական առումով, անշուշտ, ավելի ճիշտ կլիներ, եթե նման կարևորության խնդիրը քննվեր ոչ թե խմբակցության, այլ խորհրդարանի նիստում՝ այնտեղ հրավիրելով նաև էսէն մի քանի պատգամավորների, մանավանդ որ այս կուսակցությունը ՀՅԳ հետ կազմել էր խառը կառավարություն։

Ս. Վրացյանը վկայում է, որ այստեղ դարձյալ կրկնվեց նախորդ օրվա վիճաբանությունը¹⁴⁸։ Պատգամավոր Ս. Թորոսյանն իր հետագա հուշերից մեկում հայտնում է, որ այդ նիստում երկար ճառով հանդես եկավ խորհրդարանի նախագահ Հ. Քաչազունունին։ Նա ևս հանգում է այն եզրակացության, որ Հայաստանին մնում է մի ելք՝ ընդունել Լեզրանի վերջնագիրը և խաղաղ կերպով կատարել իշխանության փոխանցում։ Քաչազունունին էլ Վրացյանի նման հավատացած էր, որ «հայ բոլշևիկները, հեմված ռուսական ուժի վրա, պիտի վարեն փաստորեն ազգային քաղաքականություն»¹⁴⁹։ Բայց, ցավոք, այդպես չեղավ։ Թեև այստեղ էլ մի քանիսը կոչ արեցին դիմադրել բոլշևիկներին, սակայն քվեարկության արդյունքով խմբակցության ձայների ճնշող մեծամասնությամբ՝ 21 կողմ, 7 դեմ (որոշ տվյալներով՝ 4 դեմ)¹⁵⁰ և 2 ձեռնպահ

¹⁴⁴ ՀՀ ՊԿՊԱ, Ֆ. 200, ց. 1, գ. 529, ք. 156։

¹⁴⁵ Է. Ա. Չոհրաբյան, *Սովետական Ռուսաստանը և...*, էջ 156 և 160։

¹⁴⁶ «Դրոշակ», 1930, թիվ 10, էջ 240։

¹⁴⁷ Յ. Իրազեկ, *Մոտիկ անցյալից*, Պեյրուք, 1956, էջ 87։

¹⁴⁸ «Հայրենիք», 1923, թիվ 1 (նոյեմբեր), էջ 72։

¹⁴⁹ Ս. Թորոսյան, *Հանդիպումներ Քաչազունունի հետ*, («Հայրենիք», 1952, թիվ 7, էջ 7)։

¹⁵⁰ «Հայրենիք», 1925, թիվ 12, էջ 92։

դարձյալ որոշվում է առանց դիմադրության, խաղաղ ճանապարհով իշխանությունը հանձնել բոլշևիկներին և երկիրը խորհրդայնացնել¹⁵¹: Հիրավի, քաղաքական տվյալ կացության մեջ սա միակ հնարավոր ելքն էր: Ստեղծված իրադրության մեջ հայ ժողովուրդն իր մեծամասնությամբ ընկալեց ու լուռ համաձայնությամբ, առանց որևէ կրակոցի, ընդունեց ռուս-բոլշևիկներին: Ժողովրդի ֆիզիկական գոյությունը փրկելու միակ ելքը բոլշևիկներին անձնատուր լինելն էր և երկրի իշխանությունը կանովին նրանց հանձնելը: Հայության համակրանքը ռուս բոլշևիկների կողմն էր: «Հայության մեծ մասը,- գրում է Ս. Վրացյանը,- աչքերը հառած էր դեպի հյուսիս՝ փրկությունը Ռուսաստանից էր սպասում»¹⁵²: Այդ գիտակցությունը արմատացել էր նրա մեջ դարերի փորձով: Ավելին՝ հայ ժողովուրդը հավատացած էր, որ «Սեժ Ռուսաստանը կքշի տաճիկներին մեր երկրից, կվերականգնի առնվազն 1914 թ. սահմանները և տաճկական յաթաղանը կհեռանա հայ ժողովրդի գլխից»¹⁵³:

ՀՅԳ- ներսում և ս կար մի այնպիսի մտայնության հոսանք, որի ներկայացուցիչները ներքուստ չէին համակրում բոլշևիկներին, բայց և առանձնապես մեծ հակակրանք էլ չէին տաժում նրանց հանդեպ: Դա միգուցե գալիս էր նրանից, որ այդ երկու կուսակցություններն էլ անուճով համարվում էին սոցիալիստական, հեղափոխական և բացի այդ՝ ՀՅԳ- շատ անդամներ ունեին ընդգծված ռուսամետ քաղաքական դիրքորոշում:

Պետք էր հասկանալ հայության հոգեկան վիճակը: Եթե հայ ժողովրդի մի զգալի մասը ըմբռնեց ու ընդունեց բոլշևիզմը՝ առանց ծանոթ լինելու նրա բուն էությանը, ապա լոկ այն բանի համար, որ այն ծագել էր Ռուսաստանում և Հայաստան էր մուտք գործում հյուսիսից: Այդ ժամանակներում արևելահայությունն իր մեծամասնությամբ ունենալով ռուսական կողմնորոշում՝ ռուս-բոլշևիկ անունը լսելով՝ հասկանում էր ընդամենը Ռուսաստան և ռուս ժողովուրդ: Դրա համար էլ 1920 թ. բոլշևիզմի թափանցումը Հայաստան ժողովրդի կողմից գործնականում դիմադրության չհանդիպեց: Այս անգամ էլ (ինչպես 1918 թ. մայիսին) ստեղծվեց մի այնպիսի կացություն, երբ այլընտրանք չկար: Այժմ արդեն միակ ելքն այն էր, որ հարկավոր էր փաստորեն հրաժարվել անկախությունից և ընդունել խորհրդային կարգեր:

Հայաստանի խաղաղ խորհրդայնացման գործում հարկ է առանձնահատուկ ընդգծել Դ. Կանայանի խաղացած դերը: Ժողովրդի ու հատկապես զինվորների վրա շատ մեծ էր բանակի հրամանատար Դրոյի ազդեցությունը: Նա գտնում էր, որ իրենց փրկությունը միայն Ռուսաստանի մեջ է, և որ հայկական զորքը չի կռվի ռուսների դեմ: Միաժամանակ, Դրոն հավատացած էր,

¹⁵¹ Մատենաշար «Արարատի» (հավելվածներ), Բեյրութ, 1957, էջ 83, «Գրոշակ», 1930, թիվ 10, էջ 240-241, «Հայրենիք», 1923, թիվ 1 (նոյեմբեր), էջ 72, «Ասպարեզ», 28/29 մայիսի 1992 թ.:

¹⁵² Ս. Վրացյան, նշվ. աշխ., Բեյրութ, 1958, էջ 490:

¹⁵³ «Գրոշակ», 1930, թիվ 10, էջ 239:

որ ինքը, ռուսական զորքերի գլուխ անցած, թուրքերին պիտի քշի մինչև 1914 թ. սահմանը¹⁵⁴։

1920 թ. դեկտեմբերի 2-ին, հինգշաբթի օրը, ժամը 12-ին մոտ ստորագրվեց Երևանի համաձայնագիրը, որի հիման վրա բովանդակ իշխանությունը հանձնվում էր Հայիեղկոմին։ Այս ակտի ստորագրումով իրավապես իրենց ուժը կորցնում էին ՀՀ ինչպես բարձրագույն գործադիր իշխանությունը՝ կառավարությունը, այնպես էլ բարձրագույն օրենսդիր մարմինը՝ **Հայաստանի խորհրդարանը**։ Այլ խոսքով՝ ՀՀ դադարում էր գոյություն ունենալուց։ Բովանդակ իշխանությունը ժամանակավորապես, մինչև Հայիեղկոմի մայրաքաղաք հասնելը, անցնելու էր զինվորական հրամանատարության ձեռքը, որի գլուխ կանգնելու էր Գրոն։

Ըստ Երևանի համաձայնագրի՝ Հայաստանը հռչակվում էր իբրև անկախ խորհրդային հանրապետություն։ Ռուսաստանը պարտավորվում էր պաշտպանել Հայաստանի սահմանները, այդ թվում նաև Նախիջևանը և Ջանգեզուրը։ Նոր իշխանությունը՝ Հեղկոմը, կազմված էր լինելու 5 կոմունիստներից (Ս. Կասյան, Ա. Մռավյան, Ս. Տեր-Գաբրիելյան, Ա. Բեկկաղյան և Ա. Նուրիջանյան) և 2 «ձախ» դաշնակցականներից՝ Գրո և Հ. Տերտերյան և այլն¹⁵⁵։ Առաջ գնալով՝ ասենք, որ այս համաձայնագրով խոստացված պայմաններից և ոչ մեկը չկատարվեց։ Կատարվեց միայն այն, որ Հայաստանը խորհրդայնացվեց։

Իշխանության փոխանցումը կատարվեց խաղաղ ճանապարհով, որտեղ «ձախ դաշնակցական» Գրոն հանդիսացավ կապող օղակ հին և նոր իշխանությունների միջև։ Նույն օրը՝ դեկտեմբերի 2-ի կեսերին, Ս. Վրացյանը իշխանությունը հանձնելով Գրոյին՝ ժամը 17.50 րոպեին հեռագրում է Թիֆլիս՝ Վրաստանում Հայաստանի դիվանագիտական լիազոր ներկայացուցիչ Տ. Բեկկաղյանին հետևյալ բովանդակությամբ «Հաշվի առնելով երկրում ստեղծված իրավիճակը՝ կառավարությունը որոշեց հրաժարվել իշխանությունից և քաղաքացիական ու ռազմական իշխանությունը հանձնել հրամանատար Գրոյին»¹⁵⁶։

Այսպիսով, իշխանության հանձնումը կատարվել է խաղաղ և կամավոր, քաղաքական երկու կողմերի միջև կայացրած համաձայնության հիման վրա։ Ուստի՝ խոսք չէր կարող լինել դիմադրության և անիմաստ արյուն թափելու մասին։

Այդ նույն օրը, դեկտեմբերի 2-ին, գիշերը ստորագրվեց Ալեքսանդրապոլի հաշտության պայմանագիրը։ Դեպքերի և իրադարձությունների ժամանակագրական հաջորդականությունը, արխիվային վավերագրերը, ականատես մասնակիցների հուշերը հավաստում են, որ Ալեքսանդրապոլի հաշտության պայմանագրի ստորագրման վերջնական հրահանգը փաստորեն տվել է

¹⁵⁴ «Գրոշակ», 1930, թիվ 10, էջ 239։

¹⁵⁵ ՀՀ ՊԿՊԱ, Ֆ. 200, ց. 1, գ. 560, թ. 476։

¹⁵⁶ Նույն տեղում։

Գրոն (համենայնդեպս չի արգելել, որ այն ստորագրվի), որը, ինչպես տեսանք, նույն օրը՝ դեկտեմբերի 2-ին, կեսօրվա ժամերին կնքված Երևանի համաձայնագրով ժամանակավորապես, մինչև Հայիեկղկոմի ժամանումը Երևան, որպես դիկտատոր իր վրա էր վերցրել գերագույն իշխանությունը, իսկ Վրացյանի կառավարությունը, մինչ Ալեքսանդրապոլի հաշտության պայմանագիրը կստորագրվեր, արդեն հրաժարական էր տվել¹⁵⁷: Ըստ վարչապետ Ս. Վրացյանի հուշերի՝ Թուրքիայի հետ Ալեքսանդրապոլի հաշտության պայմանագրի ստորագրման լիազորությունը Ա. Խատիսյանին էր տրվել դեկտեմբերի 1-ին, իսկ պայմանագրի ստորագրման նախօրյակին նախկին կառավարությանը ժամանակավորապես փոխարինած Գրոն և Միլինը տեղյակ են եղել, որ պայմանագիր պիտի ստորագրվի և չեն արգելել այն¹⁵⁸: Պետք է ասել, որ Ալեքսանդրապոլի կողմատիժ հաշտության պայմանագիրը չուներ իրավական ուժ՝ երկու հիմնական պատճառով. մեկ, որ պայմանագիրը ստորագրող Ալ. Խատիսյանին լիազորություն տվող կառավարությունը մինչ այդ արդեն հրաժարական էր տվել և երկրորդ, ինչպես նշված էր պայմանագրում, այն իրավական ուժ էր ստանում մեկ ամսվա ընթացքում խորհրդարանում վավերացնելուց հետո, իսկ ինչպես արդեն տեսանք, Հայաստանի խորհրդայնացումով՝ խորհրդարան նույնպես այլևս չկար: Կնշանակի՝ այդ պայմանագիրը մեռելածին էր, այսինքն՝ իր ստորագրման պահից իսկ որևէ իրավական ուժ չուներ: Ի դեպ, Ալեքսանդրապոլի պայմանագիրը չի վավերացրել նաև Թուրքիան:

Պատմաբանները վիճաբանում են այն հարցի շուրջ, թե Խատիսյանը պետք է ստորագրե՞ր պայմանագիրը, թե՞ ստորագրման հարցը պետք է թողներ բոլշևիկներին¹⁵⁹, գտնում ենք, որ պայմանագրի ստորագրումը բոլշևիկներին թողնելով, նրա բովանդակությունը էապես չէր փոխվի, քանզի խորհրդաթուրքական նախնական համաձայնությամբ արդեն գծված էր հայ-թուրքական սահմանը, իսկ դա այն էր, որ Ք. Կարաբեքիրը թելադրել էր Ա. Խատիսյանին Ալեքսանդրապոլում: Ամենայն հավանականությամբ այդ էր պատճառը, որ խորհրդային կողմից Բ. Լեգրանը, Գրոն կամ որևէ մեկ ուրիշը արգելք չհարուցեցին, որ պայմանագիրը ստորագրվի: Ալեքսանդրապոլի խայտառակությունը թույլատրվեց հավանաբար նաև նրա համար, որ խորհրդային կառավարությունը անգամ վերջին պահին ամբողջ պատասխանատվությունը, տարածքային կորուստները գցի կործանվող իշխանության վրա և դրանով էլ ավելի վարկաբեկի ժողովրդի աչքում: Որ խորհրդային կողմը Հայաստանի օգտին տարածքային փոփոխություն չէր մտցնի, նա դա ասպացուցեց մի քանի ամիս անց՝ 1921 թ. մարտի 16-ի Մոսկվայի և ապա հոկտեմբերի 13-ի Կարսի պայմանագրերով: Ի դեպ, Մոսկվայի և Կարսի պայմանագրերի Հայաստանին վերաբերող մասերը Ալեքսանդրապոլի պայմանագրից էապես չէին տարբերվում: Իսկ ինչ վերաբերում է այն փաստարկին, թե Ալեքսանդրապոլի պայ-

¹⁵⁷ «Հայրենիք», 1925, թիվ 12, էջ 91:

¹⁵⁸ Ս. Վրացյան, նշվ. աշխ., էջ 506:

¹⁵⁹ Է. Ա. Ջոհրաբյան, նշվ. աշխ., էջ 151:

մանագիրը պատճառ դարձավ, որ հնարավոր չեղավ Մոսկվայում արդյունքի հասնել, ընդամենը մտամարզանք է և նույնպես քննադատության չի դիմանում: Ինչպես կարող էր հրաժարական տված և իշխանությունից արդեն հեռացած կառավարության ներկայացուցչի ուժի սպառնալիքի գործադրմամբ ստորագրած և ոչնչով չվավերացված, ուստի և իրավական ուժ չունեցող պայմանագիրը դառնալ պատճառ ու խանգարիչ հանգամանք իրավագոր կողմերի միջև նոր, օրինական պայմանագիր կնքելու համար: Տակավին Բրեստ-Լիտովսկի հաշտության բանակցությունների ժամանակ էր ռուս-թուրքական կողմերի միջև սկզբունքային տեսակետ ձևավորվել այն մասին, որ երկու պետությունների միջև վերականգնվելու էր 1877 թ. պետական սահմանը, այսինքն՝ Կարսի մարզը վերադարձվելու էր Թուրքիային: Իսկ այն բանից հետո, երբ քեմալական Թուրքիան կեղծավորաբար իրեն «կոմունիստական ու հեղափոխական» էր հայտարարել, այժմ առավել ևս հնարավոր էր ավելի մեծ տարածքներ կորզել: Պատահական չպետք է համարել Ալեքսանդրապոլի բանակցությունների ժամանակ Ք. Կարաբեքիրի կողմից Ալ. Խատիսյանին մատուցած այն անակնկալը, որ «մենք նախապես համաձայնած ենք Մոսկվայի հետ՝ ստանալու Կարսի նահանգը, ավելին մեզ չեն տար»¹⁶⁰: Քաղաքական հոգևարքում գտնվող կառավարության ներկայացուցիչը իր վրա վերցրեց պատասխանատվությունը ու ստորագրեց այդ պայմանագիրը միմիայն այն մտահոգությամբ, որ հակառակ դեպքում Հայաստանը կարող էր մնալ առանց հայերի: Իսկ այդ ժամանակ, իրոք, գոյություն ունեւ այդպիսի վտանգ:

Այս ամենից հետո մնում էր Հայաստանի հեղկոմի և Կարմիր բանակի մուտքը Հայաստան: Դիլիջանում գտնվող Սեպուհի գլխավորած ուժերը մտադիր չէին դիմադրել Կարմիրներին:

Զինվորական նախարար Դրոն դիմադրությունը ավելորդ համարելով՝ համապատասխան հրահանգ էր տվել Սեպուհին: Վերջինս էլ թողնելով ռազմաճակատը՝ Ապարան-Լոռիով անցավ Վրաստան¹⁶¹: Իսկ մինչ այդ՝ նոյեմբերի վերջերին, Բաքվից ժամանած հայ բոլշևիկների մի խումբ (Հայհեղկոմը)՝ Մարգիս Կասյանի գլխավորությամբ, և շուրջ 50 կարմիր բանակայինների ուղեկցությամբ, խախտելով օգոստոսի 10-ի հայ-ռուսական ժամանակավոր համաձայնագիրը, նոյեմբերի 29-ին Ղազախով մուտք է գործում Իջևան և հայտարարություն անում Հայաստանի խորհրդայնացման վերաբերյալ¹⁶²: Հաջորդ օրը՝ նոյեմբերի 30-ին, նրանք մուտք են գործում Դիլիջան և հեռագրով կոմունիստական ողջույն հղում համաշխարհային պրոլետարիատի առաջնորդ Վ. Ի. Լենինին: Դեկտեմբերի 4-ին Դիլիջան-Սևան-Ախտա խճուղով Երևան հասան կարմիր բանակային զինյալ ուժերը, իսկ դեկտեմբերի 6-ին՝ նաև Հայաստանի Հեղկոմը:

¹⁶⁰ «Ժողովրդի ձայն», Կ. Պոլիս, 24 փետրվարի 1921 թ.:

¹⁶¹ «Հայրենիք», 1925, թիվ 12, էջ 92:

¹⁶² ՀՀ ՊԿՊԱ, Ֆ 200, ց. 1, գ. 529, թթ. 145-147:

Անհետաքրքրական չէ նաև իմանալ, որ Հայաստանի խորհրդայնացումը առաջինը ողջունեցին, նույնքերի 30-ին Ադրբեջանի հեղկոմ Ն. Նարինանովը, իսկ դեկտեմբերի 1-ին՝ Բաքվի խորհուրդը: Հանրահայտ է նաև, որ վերջինիս հանդիսավոր նիստում ընդունվել էր կեղծ հռչակագիր՝ Չանգեզուրը, Նախիջևանը և Լեռնային Գարաբաղը Հայաստանի սոցիալիստական հանրապետության անբաժանելի մասը ճանաչելու վերաբերյալ¹⁶³:

Դեկտեմբերի 2-ին պատասխան հեռագրով Հայաստանի խորհրդայնացումը շնորհավորեց Վ. Ի. Լենինը¹⁶⁴, իսկ դեկտեմբերի 4-ին՝ Ի. Վ. Ստալինը՝ «Պրավդայում» տպագրված իր հայտնի հոդվածով: Շուտով Հայաստանի խորհրդայնացումը ողջունեց նաև Թուրքիան: 1920 թ. դեկտեմբերի 19-ին Թուրքիայի Ազգային մեծ ժողովի կառավարության արտ. գործ. կոմիսար Ահմեդ Մուխթարից և Արևելյան ռազմաճակատի հրամանատար Քյազիմ Կարաբեքիրից Հայաստանի արտ. գործ. նախարար Ալ. Բեկզադյանը ստացավ հետևյալ հայտագիրը. «Թուրքիայի Ազգային մեծ ժողովի կառավարությունը մեծ ուրախությամբ դիմավորեց Հայաստանում դաշնակների իշխանության անկումը և նրանց փոխարեն կոմունիստների գործի գլուխ անցնելը, որոնք կոչված են ստանձնելու Ռուսաստանի և Թուրքիայի ժողովուրդների մեջ անկեղծ կապ մը հաստատելու պարտականությունը»¹⁶⁵:

Ահա այսպես Հայաստանի խորհրդարանական-ռամկավարական Հանրապետությանը փոխարինելու եկավ **Խորհրդային Հայաստանը**: Այդուհանդերձ, Հայաստանի Հանրապետության իրավահաջորդ Խորհրդային Հայաստանը, իր թերություններով ու բացերով հանդերձ, դարձավ հետագա հայ պետականության միակ կրողը, համայն հայության հայրենիքը, նրա ֆիզիկական, հոգևոր ու մշակութային վերընձյուղման միակ հուսալի երաշխավորը:

¹⁶³ ՀՀ ՀՔԿՓ ՊԿԱ, Ֆ. 1022, ց. 4, գ. 69, թ. 8, գ. 72, թ. 2:

¹⁶⁴ Վ. Ի. Լենին, ԵԼԺ, հ. 42, էջ 65:

¹⁶⁵ ՀՀ ՀՔԿՓ ՊԿԱ, Ֆ.1022, ց. 3, գ. 288, թթ. 1-3:

ԳԼՈՒԽ ՈՒԹԵՐՈՐԳ ԿՈՒՍԱԿՅՈՒԹՅՈՒՆՆԵՐԻ ԼՈՒՃԱՐՈՒՄԸ

1. ՀՅ Գաշնակցություն

Եվ վերջապես մեր առջև ծառայած վերջին հարցը. ի՞նչ ճակատագրի արժանացան հայ քաղաքական կուսակցությունները Հայաստանի խորհրդայնացումից հետո:

Ինչպես հայտնի է, 1920 թ. դեկտեմբերի 2-ի Երևանի համաձայնագրի 5-րդ կետով խորհրդային կողմը պարտավորվում էր, որ Հայաստանի խորհրդայնացումից հետո ՀՅԴ և մյուս ընդդիմադիր կուսակցությունների անդամները չպետք է ենթարկվեն հալածանքների՝ իրենց կուսակցական պատկանելության համար¹: Սակայն հայտնի է, որ խորհրդային-կոմունիստական քաղաքական համակարգը չի ընդունում այլ կուսակցությունների անհրաժեշտությունը, ուստի և չի հանդուրժում դրանց գոյությունը: Նա առաջնորդվում է «ով մեզ հետ չէ, մեր դեմ է» կարգախոսով: Այդ իսկ պատճառով էլ խորհրդային իշխանության հաստատումից հետո սկսվեց այլախոհ կուսակցությունների հալածումը, հետապնդումը և ըստ էության արտամղումը Հայաստանից: Այլ խոսքով՝ սկսվեց հայ քաղաքական բոլոր կուսակցությունների՝ ազգային և ոչ ազգային (անշուշտ, բացի կոմունիստականի) վախճանը՝ ոմանց արագ, մյուսներինը՝ համեմատաբար դանդաղ: Իրազեկենք, որ այդ նույն բանը ավելի մեծ մասշտաբներով կատարվում էր Խ. Ռուսաստանում: Հայաստանի կոմկուսը օրինակ էր վերցնում ու պարզապես առաջնորդվում էր Ռ-Կ/բ/Կ ԿԿ-ի դեկավար ցուցումներով:

Հայաստանի խորհրդայնացումից անմիջապես հետո վերաբերմունքը հայ քաղաքական կուսակցությունների հանդեպ կտրուկ փոխվեց: Նման պայմաններում ոչ պրոլետարական որակվող բոլոր կուսակցությունները անցան ընդհատակ: Փակվեցին նրանց պարբերականները: Ինքնին հասկանալի

¹ Գ. Լազյան, *Հայաստան և Հայ Դատը*, Ե., 1991, էջ 264, Ս. Վրացյան, *Հայաստանի Հանրապետություն, Բեյրութ, 1958, էջ 502*:

է, որ Հայաստանի իրականության պայմաններում առաջին ու գլխավոր հարվածը պետք է ուղղվեր ՀՅԳ դեմ: Բոլշևիկները, Հայաստան մտնելով, անմիջապես հայտարարեցին, թե այլ և «ձախ» Դաշնակցություն իրենք չեն ճանաչում և որ իրենք ճանաչում են մի Դաշնակցություն, որ «թշնամի է իրենց և որի դեմ պիտի պայքարեն իրենք»²: Դրանից հետո «ձախ ինտերնացիոնալիստ դաշնակցականներին» խմբի անդամներից ոմանք (Ա. Վանցյան, Հ. Ավայան, Ա. Գրիգորյան և այլք) աճապարեցին մտնել Կոմունիստական կուսակցության շարքերը, իսկ մյուսները նորից վերադարձան Դաշնակցություն, մանավանդ որ նրանցից շատերին բոլշևիկները մերժել էին իրենց շարքերն ընդունել³:

1921 թ. հունվարի վերջերին Հայկոմկուսի ԿԿ-ի պլենումը որոշում է ձեռքակալել և մեկուսացնել ՀՅԳ բոլոր կոմիտեների ղեկավարներին և նախկին կառավարության անդամներին: Նպատակալաց պայքար էր մղվում Դաշնակցություն կուսակցության լիակատար վերացման համար: Այս պայքարը մեծ չափով հրահանգվում ու հրահրվում էր դրսից՝ Բաքվից, Մոսկվայից և Անգորայից: Այսպես, օրինակ, հիմք ընդունելով 1921 թ. հունվարի վերջին ՌԿԲ/Կ Կենտկոմի կովկասյան բյուրոյի կայացրած որոշումը, կովբյուրոյի անդամներ Գ. Օրջոնիկիձե՛ն և Մ. Օրախելաշվիլին Բաքվից հեռագրով հրահանգում էին Հայիեղկոմի նախագահ Ս. Կասյանին. «Գտնում ենք, որ քաղաքական իրադրությունը հրամայաբար պահանջում է անողորմ պայքար մղել Դաշնակցություն կուսակցության լիակատար վերացման համար»⁴:

1920 թ. դեկտեմբերի 2-ի Երևանի համաձայնագրից հետո ՀՅԳ գերագույն գործադիր մարմինը՝ Բյուրոն, դադարեցրեց իր գործունեությունը Հայաստանի սահմաններում: Սակայն Դաշնակցության առանձին կազմակերպություններ և կուսակցական այլ կառույցներ, անցնելով ընդհատակ, շարունակեցին իրենց գործունեությունը: Դեկտեմբերի կեսերից գործում էր ՀՅԳ - Հայաստանի գաղտնի կոմիտեն, որի լիազորն էր Ս. Վրացյանը: Թուրքական օկուպացիայի պայմաններում գործում էր Շիրակի Կենտրոնական կոմիտեն: Գաղտնի կազմակերպություններ ու խմբեր կային Նոր Բայազետի և Լոռու գավառներում, Ապարանի, Ախտալի, Բաշգյառնիի, Կրբուլաղի, Չառի, Եղվարդի, Ծաղկաձորի և այլ շրջաններում⁵:

Բոլշևիկյան Արտակարգ հանձնաժողովի (Չեկա) կողմից ձեռքակալվեցին ու բանտարկվեցին ՀՅԳ նախկին ղեկավար շատ գործիչներ՝ Հ. Օհանջանյանը, Հ. Քաջազնունին, Ավ. Սահակյանը, Ա. Դարբինյանը, Վ. Նավասարդյանը, Հ. Տեր-Դավթյանը, Լ. Շանթը, Ն. Աղբալյանը, Մ. Մուսինյանը, Հա-

² «Դրոշակ», 1930, թիվ 10, էջ 240:

³ «Դրոշակ», 1930, թիվ 10, էջ 240, «Աերջին լուր», Կ. Պոլիս, 1 ապրիլի 1921:

⁴ ՀՅԳ և խորհրդային իշխանությունը (փաստաթղթերի և նյութերի ժողովածու, կազմ. պրոֆ. Վ. Ղազարյան), Ե., 1999, էջ 17:

⁵ Հայաստանում Սովետական իշխանության ամրապնդման պատմության մի քանի հարցեր (1920-1922 թթ.), Ե., 1987, էջ 196-197, Արշ. Մ. Հակոբյան, Քաղաքացիական կռիվները Հայաստանում 1921 թ., Ե., 1948, էջ 56-57:

մագասպը և շատ ուրիշներ: Միայն Երևանում ձերբակալվեցին 200-ից ավելի դաշնակցականներ⁶: 1921 թ. հունվարին թուրքերի պահանջով Հայաստանից հեռացվեց կարմիր բանակի հրամանատար Դրոն, իսկ շուրջ 1500-հոգիանոց նախկին սպայակազմը (անբարեհույսի, դաշնակցականի պիտակով) նույնպես արտաքսվեց:

Հայաստանի խորհրդայնացումից ու հատկապես 1921 թ. փետրվարյան ապստամբությունից հետո ՀՅԳ-ն ժողովրդի աչքում վարկաբեկելու նպատակով նրա դեմ հրապարակային դատ կազմակերպվեց: Դատավարությունը տեղի ունեցավ 1921 թ. դեկտեմբերի սկզբներին (2-ից - 13-ը) Երևանի «Բանվորական ակումբում»⁷ Գ. Տեր-Սիմոնյանի նախագահությամբ: Մեղադրյալի աթոռին, հանձնի Հ. Յաղուբյանի, նստած էր Դաշնակցություն կուսակցությունը:

Կեղծելով պատմությունը և խեղաթյուրելով իրականությունը՝ ցարական սատրապների մման Հայաստանի բոլշևիկները ևս դատական գործ սարքեցին ՀՅԳ դեմ՝ տալով մի իսկական թամաշա-ներկայացում: Դատարանի նախագահ Գ. Տեր-Սիմոնյանը ՀՅԳ դեմ ներկայացրեց 15 կետից բաղկացած մեղադրական և վճռվեց նրան դատապարտել մահվան այսինքն՝ լիկվիդացնել (վերացնել)⁷: Ի թիվս այլ, հիմնականում անհիմն, մեղադրանքների՝ ՀՅԳ մեղադրվեց ցարական կառավարության գործակալ լինելու մեջ: Հիրավի, ավելի անհեթեթ մեղադրանք դժվար է պատկերացնել: Այնինչ, իրականում, սկսած Հայ եկեղեցու գույքի բռնագրավման մասին օրենքի ընդունումից ի վեր ՀՅԳ-ն ինքնակալության դեմ ամենից ավելի անհաշտ ու հետևողական պայքարող ազդեցիկ քաղաքական ուժերից էր, գուցե և բոլշևիկներից ավելի ազդեցիկ ու առարկայական:

ՀՅԳ ազատամարտիկները, բացի սուլթանական բռնավարչակարգից, մարտնչում էին նաև ցարական ինքնակալության դեմ, ռուս-թուրքական սահմաններին և այլուր զոհվում տասնյակներով ու հարյուրներով: Իսկ 1905-1907 թթ. համառուսաստանյան առաջին հեղափոխության պարտությունից հետո ցարական իշխանությունները նշանառության տակ էին վերցրել ՀՅԳ՝ նպատակ դնելով վերջնականապես լիկվիդացիայի (կազմաքայման) ենթարկել նրան: Հենց նման հանձնարարականներ ստանալով էր, որ աշխատում էր ՀՅԳ գործի պատասխանատու քննիչ Ն. Լժինը: Պատմությունը որքան անգիտակ պետք է լինել չըմբռնելու, չհասկանալու այն փաստը, որ այդ նույն ցարական կառավարությունը 1908-1912 թթ. ընթացքում, բոլշևիկներից շատ ավելի շուտ և բոլշևիկների մման, կեղծ մեղադրանքներով 40 հազար էջանոց դատական գործ կազմեց և մի քանի ամիս շարունակ՝ 1912 թ. հունվարի 17-ից մինչև մարտի 22-ը, Պետերբուրգում դատավարություն անցկացրեց, որը պատմության մեջ հայտնի է որպես «ՀՀ Դաշնակցության գործ» անունով: Հիրավի, այս դատը դասվում է Ռուսաստանում տեղի ունեցած քաղաքական

⁶ ՀՀ ՆՊ ՊԿԱ, Ծ. 114, ց. 2, գ. 79, ք. 1:

⁷ ՀՀ ՀԶԿՓ ՊԿԱ, Ծ. 4047, ց. 1, գ. 199, քք. 1-31:

մեծ դատերի թվին⁸: Չորս տարում 2000-ից ավելի տարբեր զբաղմունքի ու խավի (գրականագետ, ուսուցիչ, առևտրական, հոգևորական, երկրագործ, արհեստավոր, քանվոր և այլն) մարդ քանտարկվեց⁹:

Արդ, ցարիզմի նման Դաշնակցությանը դատում էր նաև Հայկոմկուսը: Համանման եղանակով, ՀՅ Դաշնակցության դեմ մեկ տասնյակից ավելի մեղադրանքներ ներկայացնելով, դատարանի նախագահը առաջարկում էր պատժի առավելագույն աստիճանը՝ մահապատիժ. այն է՝ «Դաշնակցությունը իբրև կուսակցություն Հայաստանի արևի տակ տեղ չունի և մահվան պիտի դատապարտվի»¹⁰: Նշենք նաև, որ հրապարակային դատավճիռը ներկայացնելու ժամանակ դատարանի անդամ, հասարակական մեղադրող ու դատապաշտպան ընդհանուր թվով մեկ տասնյակից ավելի պաշտոնական անձանցից միակ մարդը, որ, գիտականորեն ապացուցելով ու իրավաբանորեն հիմնավորելով, դեմ է արտահայտվել դատարանի վճռին, դա դատապաշտպանի պարտավորություն ստանձնած, հետագա մեծանուն պատմաբան և կուսակցական-պետական գործիչ Աշոտ Հովհաննիսյանն էր: Ի պատիվ իրեն՝ տեղեկացնենք, որ նա այդ դատավարությունը որակել է որպես «թյուրիմացություն», ավելացնելով՝ «Դաշնակցության գործունեությունը այսօր հայոց պատմության սեփականությունն է, և այդ գործունեությունը պետք է ենթակա լինի մի ուրիշ դատի, ավելի ասեղ, քան ներկա դատը, դա պատմության դատն է»¹¹:

ՀՅԴ դեմ հրապարակային դատ կազմակերպելուց հետո նախապարտաատվեց նրա դարձյալ հրապարակային լուծարման գործը: Այդ գործի նախապարտատույնը և անցկացույնը հանձնարարվել էր երիտասարդ կոմունիստ, գրող Ա. Բակունցին, նախկին «ձախ դաշնակցական» Հ. Ավալյանին և ուրիշների¹²: Ստեղծվեց Դաշնակցության լուծարման բյուրո (նախ՝ Ա. Բակունց), որի վրա դրվեց Հայաստանի նախկին դաշնակցականների համագումարի նախապարտատույնն ու հրավիրման գործը, և այդ ընթացքում էլ պետք է ընդունվեին Դաշնակցության լուծարման ակտը:

Համագումարը գումարվեց 1923 թ. նոյեմբերի 20-24-ին: Այն արտահայտում էր Հայաստանի 4000-ից ավելի շարքային դաշնակցականների կամքը: ՀՅԴ լուծարման համագումարի նիստերը նախագահում էր Ակսել Բակունցը: Համաժողովի շատ մասնակիցների կեղծ և անկեղծ ելույթներից ու բանավեճերից հետո համագումարը վճիռ կայացրեց՝ լուծարման ենթարկել Հայաստանի Դաշնակցական կազմակերպությունները¹³: Նախատեսվում էր այս համագումարից հետո հրավիրել նաև Դաշնակցության լուծարման համակովկասյան համագումար: Բոլշևիկները ձգտում էին նման համագումարի հասնել

⁸ ՀՀ ՀԲԿՓ ՊԿԱ, Ֆ. 4047, ց. 2, գ. 10, թ. 1:

⁹ Նույն տեղում, թ. 3:

¹⁰ Նույն տեղում, ց. 1, գ. 199, թ. 10:

¹¹ ՀՀ ՀԲԿՓ ՊԿԱ, Ֆ. 4047, ց.1, գ. 199, թթ. 30-31:

¹² Նույն տեղում, գ. 213, թթ. 1, 4:

¹³ Նույն տեղում, գ. 222, թ. 1:

նան արտասահմանում, սակայն դա չհաջողվեց: Ինչպես արդեն ասվեց, հիշյալ համագումարի կապակցությամբ, Խ. Հայաստանի տարածքում խաբվելով, ինքնաբացահայտվել և ցուցակագրվել էին ավելի քան 4000 դաշնակցական: Հասկանալի է, հենց այս ցուցակների հիման վրա հետագայում բռնաճնշումների ենթարկվեցին գրեթե բոլոր նախկին դաշնակցականները¹⁴:

1924 թ. փետրվարի սկզբին՝ 1-3-ը, մույն ձևով կազմակերպվեց նաև Հայաստանի երիտասարդ դաշնակցականների (Դաշերիտմիության) ինքնալուծարման համահայաստանյան համագումարը¹⁵: Այս ամենից բավարարում ու հանգստություն չգտնելով, երկու տարի անց, Հայկոմկուսը ՀՅԴ դեմ կազմակերպեց ևս մեկ այլ հրապարակային դատավարություն: Այդ դատավարությունը անցկացվեց 1926 թ. հոկտեմբերին՝ ՀՍԽՀ Գերագույն դատարանի դատական կոլեգիայի նիստում: Դրա առիթը ունի Մ. Խուշոյանի ահաբեկչական սպանությունն էր:

ՀՅԴ պաշտոնական լուծարումից հետո էլ խորհրդային իշխանության անվտանգության ու հետախուզական մարմինները գտան, որ 1923 թ. Հայաստանում հիմնվել է «խորհուրդներից դուրս օպոզիցիա»՝ ՀՅԴ գաղտնի Կենտրոնական կոմիտե՝ խորհրդային իշխանության դեմ պայքարելու համար¹⁶: Խորհրդային քարոզչությունը լուրեր էր տարածում, թե դաշնակցական-կուլակային, հակահեղափոխական-թշնամական ուժերը բանդիտական ելույթներ են կազմակերպում, վնասարարություններ անում՝ խորհրդային կարգերը տապալելու նպատակով: Եվ ահա նման դասակարգային, քաղաքական պայքարի օրինակի թվին դասվեց 1925 թ. հուլիսի 26-ին Թալինի շրջանի Ն. Աղջաղալա (այժմ Ն. Բազմաբերդ) գյուղի գյուղխորհրդի քարտուղար Մանուկ Խուշոյանի սպանությունը նախկին մի դաշնակցականի կողմից: Այդ ակտը վերագրվեց ՀՅԴ կուսակցությանը, որպես նրա ձեռքի գործ և հրապարակային դատավճռով Դաշնակցությունը որակվեց որպես տեռորիստական կուսակցություն: Ակներև է, որ իր ժամանակին անուն հսկանա՞ծ հրապարակային այդ հերթական ներկայացման նպատակն էր ժողովրդի աչքում մեկ անգամ ևս վարկաբեկել այդ կուսակցությանը:

ՀՅԴ լուծարումից և Հայաստանից վտարումից հետո նրա կառույցները շարունակեցին գործել արտասահմանում՝ Սփյուռքում: Որպես իր գոյության հիմնական ձև՝ Դաշնակցությունը դարձյալ շարունակեց հետամուտ լինել Հայ Դատին՝ դրա տակ տեսնելով Թուրքահայաստանի և Ռուսահայաստանի միավորումը մեկ անկախ պետական մարմնի մեջ¹⁷: Եվ հետագա 70 տարիներին այս կուսակցության պայքարի կարգախոսն է եղել «Միացյալ և Անկախ Հայաստանը»: Միաժամանակ ՀՅԴ է եղել Հայոց ցեղասպանության միջազ-

¹⁴ «Հայոց պատմություն» (պրոֆ. Վ. Բ. Բարխուդարյանի խմբ.), Ե., 1994, էջ 308:

¹⁵ ՀՀ ՀԶԿՓ ՊԿԱ, ֆ. 4047, ց. 1, գ. 229, քք. 1-76:

¹⁶ «Դաշնակցության տեռորիստական գործը» (նյութեր Մ. Խուշոյանի տեռորիստական սպանության դատավարությունից), Ե., 1927, էջ 336-340:

¹⁷ «Դրոշակ», Ժնն, 1925, թիվ 1 (հուլիս), էջ 1-4:

գային ճանաչման համար պայքարող ամենագորեղ և հետևողական ուժը: Հայ Դատից ու պահանջատիրությունից հետո ՀՅԴ առջև կանգնած երկրորդ ռազմավարական խնդիրը համարվում էր հայապահպանությունը, թե՛ Հայաստանում և թե՛ ի սփյուռս աշխարհի՝ պայքար ազգային ձուլման և ուժացման ամեն մի վտանգի դեմ: Այս երկու կարևորագույն գերխնդիրներից հետո միայն ՀՅԴ երրորդում է ընկերվարության (սոցիալիզմի) գաղափարը:

Խորհրդային ժամանակաշրջանում թեև ՀՅԴ ֆիզիկապես հեռացված էր իշխանությունից ու վտարված հայրենիքից, սակայն նա հոգեպես շարունակում էր մնալ հայ ժողովրդի ամենաազդեցիկ քաղաքական ուժը: Չնայած խորհրդային ժամանակաշրջանում նա խոշոր հարվածներ ստացավ դրսից ու ներսից, աջից ու ձախից, բայց, իր հիմքում ամբարած ունենալով ազգային վեհ գաղափարներ ու նվիրական ձգտումներ, պահպանեց իր կենսունակությունը: Դաշնակցությունը մինչև վերջ մնաց ընդդիմադիր բուլշևիկյան ամբողջատիրությանը և նրա մեթոդներին:

Արդեն մեր ժամանակներում՝ կոմունիստական ամբողջատիրության փլուզման, Արցախյան շարժման և Հայաստանի անկախացման ժամանակաշրջանում ՀՅԴ կրկին բացահայտեց իր գոյությունը Հայաստանում և ամենայն պատասխանատվությամբ ու նվիրումով ներգրավվեց ժողովրդին հուզող համազգային-քաղաքական և սոցիալ-տնտեսական հիմնախնդիրների լուծման դժվարին գործում:

2. Էսեռներ

Հայաստանի խորհրդայնացումից հետո Ռուսաստանի սոցիալիստ-հեղափոխականների կուսակցության Հայաստանի կազմակերպությունը իր «կաշին» փրկելու և բուլշևիկյան կուսակցության ողորմածությանը արժանալու համար՝ գաղափարապես ու կազմակերպչորեն «վերակառուցվեց»: Կազմակերպության շարքերում տեղի ունեցան խմորումներ ու ներքին պայքար, որն իր վախճանական հանգրվանին հասավ 1921 թ. փետրվարին՝ Հայաստանում հակախորհրդային ապստամբության փուլում: Փետրվարի 18-ի ապստամբության հաղթանակից հետո Հայաստանի էսեռական կազմակերպությունը պառակտվեց երկու մասի: Սրանց աջ թևը ապստամբության ժամանակ համագործակցեց ՀՅԴ-ի ապստամբ ժողովրդի հետ և նրա ներկայացուցիչներից երկուսը (Վ. Մինախորյանը և Ա. Խոնդկարյանը) նույնիսկ մտան Ս. Վրացյանի գլխավորած կառավարության՝ «Հայրենիքի փրկության կոմիտեի» մեջ: Էսեռների մյուս՝ փոքրաթիվ մասը՝ «ձախերը» (Լ. Թումանյան, Տ. Մուշեղյան, Գ. Չուբարյան, Ռ. Ենգիբարյան), իրենց կապերը խզելով կուսակցության պաշտոնական կենտրոնի հետ և հենց «Հայրենիքի փրկության կոմիտեի» հաղթանակի օրերին հիմք դրեցին հեղափոխական, սոցիալիստական մի նոր՝ «Հայաստանի սոցիալիստ-հեղափոխական ինտերնացիոնա-

լիստների կուսակցությանը»¹⁸: Վերջիններս լիովին կանգնեցին Խորհրդային Հայաստանի պաշտպանության դիրքերում:

1921 թ. ապրիլի սկզբներին՝ Փետրվարյան ապստամբության ճնշումից հետո, Դաշնակցությանը համագործակցած ակտիվիստ էսեռները, մյուս այլախոհների հետ միասին, հեռացան արտասահման, իսկ շարքայիններից շատերը մնացին տեղում՝ պարտավորվելով օրինապահ դիրք գրավել Խորհրդային կարգերի նկատմամբ:

Վտարանդի հայ էսեռները, ինչպես նաև սոցյալ-դեմոկրատները, զգալի չափով մերձեցան Դաշնակցությանը: Եվ պատահական չէ, որ 1920-ական թվականներից Դաշնակցության մամուլում («Հայրենիք», «Վեմ» և այլն) մենք հաճախ տեսնում ենք նրանց առանձին գործիչների աշխատությունների և հուշերի տպագրությունը:

Ինչ վերաբերում է Սոցիալիստ-հեղափոխական ինտերնացիոնալիստների կուսակցությանը, ապա պետք է ասել, որ սրանք աշխատեցին ամեն կերպ սիրաշահել Կոմունիստական կուսակցությանը և Խորհրդային իշխանությանը՝ հուսալով պահպանել իրենց կազմակերպության ինքնուրույն գոյությունը:

1921 թ. ապրիլի 29-ին Հայաստանի սոցիալիստ-հեղափոխական ինտերնացիոնալիստների կուսակցության ժամանակավոր Կենտրոնական կոմիտեն հրապարակեց հռչակագիր իր քաղաքական դավանանքի, դիրքորոշման, նպատակի ու ձգտումների մասին¹⁹: Նրանք իրենց լիակատար համերաշխությունն էին արտահայտում «Սեմ հոկտեմբերի» և «3-րդ կոմիտերնի» գաղափարներին: Հայաստանի ձախ ինտերնացիոնալիստ էսեռները վերահարմարվելով, որդեգրեցին բոլշևիկյան և կիսաբոլշևիկյան մարտավարություն և կարգախոսներ: Օրինակ, 1921 թ. մայիսի մեկյան տոնակատարության կապակցությամբ նրանք հանդես եկան հետևյալ լոզունգներով. «Կեցցե՛ 3-րդ ինտերնացիոնալը», «Կեցցե՛ Խորհրդային Ռուսաստանը», «Կեցցե՛ միջազգային սոցիալիստական հեղափոխությունը», «Կեցցե՛ Խորհրդային սոցիալիստական հանրապետությունների եղբայրական դաշինքը» և այլն²⁰: Հայաստանի էսեռ ինտերնացիոնալիստները ևս ողջունում էին բուրժուազիայի տիրապետության տապալումը և բանվորագյուղացիական դիկտատուրայի հաստատումը:

Սակայն մյուս կուսակցությունների պես Հայ էսեռ ինտերնացիոնալիստների կուսակցությունը ևս ենթարկվեց լուծարման, քանզի, սոցիալիզմի հիմքերի կառուցմանը զուգընթաց, պետք է վերացվեին բոլոր այլախոհ համարվող կուսակցությունները՝ ապահովելու համար Կոմունիստական կուսակցության անբաժան մենիշխանությունը:

¹⁸ ՀՀ ՀԲԿՓ ՊԿԱ, Ֆ. 4033, ց. 7, գ. 59, թ. 4, «Կոմունիստ», Երևան, 16 ապրիլ 1921 թ.:

¹⁹ ՀՀ ՀԲԿՓ ՊԿԱ, Ֆ. 4033, ց. 7, գ. 59, թթ. 1-4:

²⁰ ՀՀ ՊԿՊԱ, Ֆ. 404, ց. 1, գ. 41, թ. 1:

1922 թ. Մոսկվայում անցկացվեց հրապարակային դատավարություն Համառուսական էստեռական կուսակցության Կենտկոմի և մյուս ղեկավար 34 անդամների նկատմամբ²¹: Մենք տվյալներ չունենք համանման դատավարության մասին Հայաստանում: 1923 մարտին համառուսաստանյան մասշտաբով լուծարքի ենթարկվեց էստեռների կուսակցությունը²²: Էստե ինտերնացիոնալիստների կուսակցության լուծարումից հետո, նրա անդամներից շատերը անհատական կարգով մտան Կոմունիստական կուսակցության շարքերը: Սակայն դա չազատեց նրանց հետագա բռնադատություններից: 1930-ական թվականներին, այլ կուսակցությունների նման, նախկին էստեռները ևս որակվեցին այլախոհ ու թշնամական տարր, և նրանցից շատերը բանտարկվեցին ու տանջամահ եղան խորհրդային գուլագներում ու սիբիրյան աքսորավայրերում:

3. ՄԳ-Հնչակ

Հայ քաղաքական կուսակցություններից Մ Գ-Հնչակյանները նույնպես մեծ բավականությամբ ընդունեցին խորհրդային իշխանության հաստատումը Հայաստանում: Ա. Կիտուրը վկայում է, որ խորհրդայնացման փուլում հնչակյանները ոչ թե դեպքերի պատիվ դիտողի դերում էին, այլ իրենց ուժերի ներածին չափ նպաստում էին խորհրդային կարգերի հաստատմանը²³:

Հետաքրքրական է այն փաստը, որ Հայաստանի խորհրդայնացումից մի քանի օր անց՝ դեկտեմբերի 9-ին, Հայիեդկոմը հարցապնդման ձևով դիմել էր Հնչակյան կուսակցության Երևանի մասնաճյուղին (հատվածին), պարզելու համար, թե ինչպիսին է նրանց վերաբերմունքը խորհրդային իշխանության նկատմամբ: Եվ ահա երկու օր անց՝ դեկտեմբերի 11-ին Հնչակյանների Երևանի մասնաճյուղի վարչությունը՝ նախագահ Գեդոնու ստորագրությամբ, տալով առաջադրված հարցերի պատասխանները, լիովին հավանություն է տվել և՛ Հայաստանի խորհրդայնացմանը, և՛ ցանկություն է հայտնել, որ Հայաստանում էլ հաստատվի պրոլետարիատի դիկտատուրա Ռուսաստանի օրինակով, ինչպես նաև, որ Խ. Ռուսաստանի աջակցությամբ ամբողջ Կովկասը խորհրդայնացվի²⁴: Այդ փաստաթղթում մասնավորապես կուզենայինք ընդգծել հետևյալը. «Մեր կուսակցությունը ջերմագին ողջունում է կատարված հեղաշրջումը և ստեղծված խորհրդային իշխանությունը Հայաստանում»²⁵: Հնչակի կարգախոսն է դառնում «Պրոլետարներ, բոլոր երկրների, միացե՛ք»:

²¹ С. Г. Меликян, Борьба большевистских организаций закавказья..., Е., 1983, с. 5 /автореперат/.

²² Մ. Հ. Մելիքյան, *Սոցիալիստ-հեղափոխականները Հայաստանում և Անդրկովկասի հայաշատ քաղաքներում 1900-1920 թթ.*, Ե., 1997, էջ 128 և 131:

²³ Ա. Կիտուր, *նշվ. աշխ.*, էջ 493:

²⁴ ՀՀ ՀՔԿՓ ՊԿԱ, Ֆ. 4045, ց. 1, գ. 245, թթ. 1-2:

²⁵ Նույն տեղում, թ. 1:

Հայաստանի խորհրդայնացումից հետո Հնչակյան կուսակցությունը անվերապահորեն կանգնեց խորհրդային-համայնավարական կարգերի պաշտպանության դիրքերում: «Մարքսիստ Ս. Գ. Հնչակյան կուսակցություն,- կարդում ենք հնչակյան մամուլում,- խորհրդային Հայաստանի վարչակազմը կը նկատե իր կուսակցության հետապնդած վարչակազմը, սկսյալ այն պատմական օրեն, երբ Հայաստանի մեջ հաստատվեցավ խորհրդային դրությունը»²⁶: Ա. Կիտուրի վկայությամբ՝ Հայաստանի խորհրդայնացումից հետո շատ հնչակյաններ կարծեցին, որ կուսակցության մոտակա և հեռավոր նպատակները արդեն իրականացված են, ուստի և այլևս կարիք չկա Ս Գ. Հնչակյան կուսակցության: Դրա հետևանքով էլ շատ տեղերում սկսվեցի, առանց այն էլ թույլ, այս կուսակցության կազմալուծումը և քայքայումը²⁷:

Հայաստանի խորհրդայնացումից հետո նոր փոփոխված քաղաքական իրադրության պայմաններում անհրաժեշտություն զգացվեց հրավիրել կուսակցության ընդհանուր պատգամավորական ժողով (համագումար)՝ վերանայելու համար կուսակցության ծրագիրն և տակտիկական մի շարք դրույթներ ու մոտեցումներ: Այդ նպատակով Ս. Գ. Հնչակյան կուսակցության կենտրոնական վարչությունը 1921 թ. հունվարի 10-ին Թիֆլիսում հրապարակեց մի շրջաբերական հայտարարություն՝ կուսակցության հերթական ընդհ. պատգամավորական ժողով հրավիրելու մասին²⁸:

Նախատեսվում էր այն հրավիրել 1921 թ. հունիսի 15-ին²⁹, Երևանում, եթե անակնկալ հանգամանքների պատճառով հնարավոր չլինի, ապա այն պիտի գումարվեր Սոֆիայում: Շրջաբերականում ներկայացված էր նաև հնարավոր օրակարգը՝ բաղկացած հինգ խումբ հարցերից՝ ա) գեկուցումներ և հաշվետվություններ, բ) վերաբերմունքը դեպի Խ. Հայաստանը, գ) 3-րդ ինտերնացիոնալին միանալու հարցը, դ) ծրագրային և տակտիկական հարցեր և ե) ընտրություններ³⁰: Սակայն արտասահմանի հնչակյան մասնաճյուղերը չարձագանքեցին կուսակցության կենտրոնական վարչության շրջաբերականին և պատգամավորական ժողովը չկայացավ: Հարկ է նշել, որ հնչակյանների արտասահմանյան կազմակերպությունները, համեմատած Անդրկովկասի ու Ռուսաստանի կազմակերպությունների հետ, խորհրդային իշխանության նկատմամբ վերաբերմունքի և Կոմունիստական կուսակցության մեջ ձուլվելու խնդիրներում եղել են ավելի գուսպ, գգուշավոր ու վերապահ:

Այս և այլ հանգամանքների պատճառով հնչակյանների համագումարը չկայացավ: Աստիճանական խորթացում և սահմանազատում տեղի ունեցավ արտասահմանի և խորհրդային երկրի հնչակյանների միջև: Հնչակյանների

²⁶ «Երիտասարդ Հայաստան», 2 նոյեմբերի 1945 թ.:

²⁷ Ա. Կիտուր, *նշվ. աշխ.*, էջ 500:

²⁸ ՀՀ ՀՔԿԳ ՊԿԱ, ֆ. 4045, ց. 1, գ. 248, թ. 1:

²⁹ Հունիսի 15-ը Հնչակյանների համար նվիրական օր է, քանզի այդ օրն են տեղի ունեցել 20 հնչակյանների կախադանները:

³⁰ ՀՀ ՀՔԿԳ ՊԿԱ, ֆ. 4045, ց. 1, գ. 248, թ. 1:

Թիֆլիսում նստած կենտրոնական վարչության կապերը աստիճանաբար կտրվում են արտասահմանյան մասնաճյուղերի հետ: Խորհրդային հատվածի հնչակյանները թե՛ իրենց թյուր համոզմունքով և թե՛ արտաքին ու ներքին հարկադրանքով քիչ-քիչ գնացին դեպի ինքնալուծարման և Կոմունիստական կուսակցության մեջ ձուլվելուն:

1923 թ. փետրվարի 5-ին Հնչակյան կուսակցության կենտրոնական վարչությունը դիմեց Կոմիտերնի 4-րդ կոնգրեսին՝ խնդրելով ընդունվել նրա շարքերը «իբրև կոմունիստական աշխարհայացք և հիմնական դավանանք ունեցող կազմակերպություն»³¹: Ընդ որում՝ կենտրոնական վարչությունը հայտարարություն էր արել, որ ընդունում է Կոմիտերնի հավատո հանգանակը հանդիսացող 21 հայտնի սկզբունքները և հրաժարվում է «նացիոնալիզմի ճղճիմ հաշիվներից»³²:

Այդ նպատակով Մոսկվա է գործուղվում կուսակցության կենտրոնական վարչության ատենապետ Երկաթը: Սակայն Մոսկվայում հնչակյաններին հասկացնում են, որ իրենք պետք է լուծարվեն որպես ինքնուրույն կուսակցություն, անհատապես մտնեն Կոմունիստական կուսակցության շարքերը և այդ ճանապարհով, ինքնըստիներյան, կանդամագրվեն Կոմիտերնին:

Այլ ելք չունենալով, կենտրոնական վարչությունը շրջաբերականով դիմեց թե՛ կովկասյան և թե՛ արտասահմանյան մասնաճյուղերին, որպեսզի շտապ կերպով հայտնեն իրենց դիրքորոշումները Կոմունիստական կուսակցության մեջ ձուլվելու խնդրում³³: Կովկասյան մասնաճյուղերը հավանություն են տալիս և համապատասխան վճիռներ են կայացնում՝ լուծարելու իրենց կազմակերպությունները և անհատապես մտնելու ՌԿ(բ)Կ շարքերը³⁴:

Իսկ հնչակյանների արտասահմանյան մասնաճյուղերը հիմնականում ձեռնպահ են մնացել այդ հարցում: Ասում ենք հիմնականում, որովհետև մի փաստաթղթում հայտնվում է, որ «Եգիպտոսի, Պարսկաստանի և մասամբ Ամերիկայի մասնաճյուղերը պաշտոնապես հավանություն են տվել կենտրոնական վարչության բռնած դիրքին»³⁵:

1924 թ. հունիսի 2-ի կենտրոնական վարչության կովկասյան մասնաճյուղերին ուղղված շրջաբերականից հետո սկսվեց հնչակյան կազմակերպությունների ինքնալուծարման և ձուլման գործընթացը: Հնչակ կուսակցության Երևանի մասնաճյուղի վարչության նախագահ Ս. Բաբադյանը 1924 թ. նոյեմբերի 13-ին Հայաստանի Կոմկուսի կենտկոմին է հղում մասնաճյուղի ընդհանուր ժողովի ընդունած հռչակագիրը և կից գրությունը՝ Կոմկուսին ձուլվելու

³¹ Նույն տեղում, գ. 275 թ. 1:

³² Նույն տեղում, թթ. 3-4:

³³ ՀՀ ՀԲԿՓ ՊԿԱ, Ֆ. 4045, ց. 1, գ. 284, թ. 1:

³⁴ Բայց Կովկասում եղել են առանձին հնչակյան գործիչներ, որոնք դեմ են եղել կազմակերպությունների լուծարմանը: Այդպիսիներից էին Տիգրան Ղազանջյանը և Տիգրան Ռսկանյանը, որոնք էլ կենտրոնական վարչության որոշմամբ վտարվում են կուսակցությունից (Տես՝ ՀՀ ՀԲԿՓ ՊԿԱ, Ֆ. 4045, ց. 1, գ. 284, թթ. 1-2):

³⁵ Նույն տեղում:

մասին³⁶: Հռչակագրի կետերից մեկում ասվում էր, որ «Հնչակյան կուսակցության մասսայի ցանկությունն է լուծարված տեսնել իրենց կուսակցությունը և մտնել Կոմկուսի շարքերը»³⁷, իսկ մյուսում՝ «Հնչակյանների արտասահմանի ղեկավարները իրենց ըմբռնողությամբ և վարքագծով չեն համապատասխանում մեր երկրի և կուսակցության շահերին և չեն կարող մեզ ղեկավարել»³⁸:

Եվ վերջապես 1924 թ. նոյեմբերի 19-ին Թիֆլիսում Հնչակի համաքաղաքային ժողովում ընդունվեց հռչակագիր (հայտարարություն) ԽՍՀՄ-ի սահմաններում Հնչակ կուսակցության արձակման մասին³⁹: Կուսակցության վետերան Մարո Նազարբեկյանի և մյուսների ստորագրությամբ կազմված այդ հռչակագրում ասվում էր.

1. ԽՍՀՄ-ի սահմաններում արձակված համարել Հնչակ կուսակցության ինչպես կենտրոնական, այնպես էլ տեղական կոմիտեները և մտնել ՌԿ(բ)Կ շարքերը:

2. Դիմել Հնչակի արտասահմանյան բոլոր կազմակերպություններին կանգնել 3-րդ ինտերնացիոնալի դրոշի տակ:

3. Խորհրդային Հայաստանի ստեղծումով Հայկական հարց այլևս գոյություն չունի (այսինքն լուծվել է - Ա.Հ.)⁴⁰:

Այս հռչակագրից հետո ԽՍՀՄ տարածքում եղած հնչակյան բոլոր կազմակերպությունները լուծարվեցին, իսկ նախկին հնչակյան անդամների զգալի մասը մտավ Կոմունիստական կուսակցության շարքերը:

Հնչակյան կազմակերպությունների լուծարմանը այլ վերաբերմունք ցուցաբերեցին արտասահմանյան մասնաճյուղերը: Նույն 1924 թ. աշնանը, ավելի քան տասնամյա ընդմիջումից հետո, Հնչակի արտասահմանյան մասնաճյուղերը Աթենքում գումարեցին կուսակցության 8-րդ ընդհանուր պատգամավորական ժողովը (համագումար)⁴¹: Համագումարի ընդունած որոշումով՝ Հնչակ կուսակցության արտասահմանյան հատվածը պահպանեց իր ինքնուրույն գոյությունը⁴²:

Միաժամանակ, նա իր հավատարմությունը արտահայտեց դեպի հեղափոխական մարքսիզմը և ջերմ համակրանքը դեպի Խ. Հայաստանը: Որոշվեց Խ. Հայաստան ուղարկել մի պատվիրակություն՝ կուսակցության ղեկավարներ՝ Ս. Սապահ-Գուլյանի և Ս. Քարյանի գլխավորությամբ՝ Հայաստանին ծանոթանալու և իրենց հետագա անելիքները ճշտելու նպատակով⁴³:

³⁶ Նույն տեղում, գ. 290, թ. 1:

³⁷ Նույն տեղում, թ. 2:

³⁸ ՀՀ ՀՔԿՓ ՊԿԱ, Ֆ. 4045, գ. 1, գ. 290, թ. 2:

³⁹ Նույն տեղում, գ. 297, թ. 1:

⁴⁰ Նույն տեղում, թ. 2:

⁴¹ Նույն տեղում, գ. 296, թ. 1:

⁴² Լ. Ա. Խորշոռյան, *Սփյուռքահայ կուսակցությունները ժամանակակից էտապում*, Ե., 1964, էջ 220-221:

⁴³ ՀՀ ՀՔԿՓ ՊԿԱ, Ֆ. 4045, գ. 1, գ. 296, թ. 1:

Հավատարիմ մնալով սոցիալիզմի դավանանքին և ակնկալիք ունենալով ստանալ ԽՄԿԿ և խորհրդային պետության համակրանքն ու աջակցությունը՝ Ս Գ Հնչակյան կուսակցությունը միամտություն ունեցավ Հայ Գաղի լուծումը կապել Երրորդ կոմիտեերնի ու համաշխարհային պրոլետարական հեղափոխության հաղթանակի հետ: Օրինակ, նման բովանդակության որոշում էր կայացրել 1934 թ. Մարտիլում գումարված Ս. Գ. Հնչակյան կուսակցության 9-րդ համագումարը⁴⁴: 1930-ական թվականներին կուսակցությունը գործակցել է 3-րդ Կոմիտեերնի գործկոմի հետ⁴⁵:

Խորհրդային փուլում չնայած Հնչակը բարյացակամ վերաբերմունք է ունեցել ԽՍՀՄ-ի և Խ. Հայաստանի հանդեպ, սակայն վերջիններիս կողմից միշտ էլ արժանացել է սառը, նույնիսկ թշնամական վերաբերմունքի:

4. ՀՄԳԿ (սպեցիֆիկներ)

Հայաստանի խորհրդայնացումից հետո ոչ պակաս հետապնդումների ու հալածանքների ենթարկվեց ՀՄԳԿ-ն կամ այսպես կոչված «սպեցիֆիկները»: Ինչպես արդեն գիտենք, Հայաստանի Սոցիալ-դեմոկրատական բանվորական կուսակցությունը, որն իր մեջ էր ներառել նաև որոշ թվով նախկին հայ մենշևիկների, միակ ձախակողմյան կուսակցությունն էր, որն իր աշխարհայացքով լինելով զուտ սոցիալ-դեմոկրատական բանվորական կազմակերպություն՝ հանդես է բերել ընդգծված ազգային դիմագիծ: Հենց դրա համար էլ նա մեծ չափով արժանանում էր բոլշևիկների քննադատությանն ու արգահաստանքին:

Եթե մարքսիզմի տեսական հարցերում «սպեցիֆիկները» ցուցաբերում էին հետևողականություն, ապա գործնական ու մարտավարական խնդիրներում վարել են անկայուն, փոփոխական քաղաքական գիծ: Այդ բանը բացորոշ երևաց Հայաստանի խորհրդայնացումից հետո նոր փոփոխված քաղաքական իրադրության մեջ: Մինչ այդ, բոլշևիզմի և խորհրդային իշխանության անհաշտ հակառակորդ համարվող «սպեցիֆիկները» արդեն 1920 թ. դեկտեմբերին, մասամբ բոլշևիկների վախից ու սպառնալիքից, մասամբ իրենց էությանը բնորոշ անակզբունքայնությունից, մասամբ էլ զուցե հայրենիքը փրկելու ցանկությունից մղված, պատրաստակամություն արտահայտեցին աջակցել ու համագործակցել Հայաստանի խորհրդային իշխանության հետ: Հայհեղկոմին ուղղված հայտարարության մեջ ասված է. «Մեր վերաբերմունքը դեպի Հայաստանի խորհրդային իշխանությունը ոչ միայն բացասական չէ, այլև աջակցության և գործակցության պատրաստակամություն ենք արտահայտում

⁴⁴ Ա. Կիտուր, *Այլ. աշխ., հ. 1-ին, էջ 521-522*:

⁴⁵ Ա. Կիտուր, *Այլ. աշխ., հ. 1-ին, էջ 522, հ. 2, էջ 182-187*:

ընդհանուրիս հայրենիքի պաշտպանության և բարգավաճման գործում⁴⁶։ Սակայն նման հավաստիացումներն ու խոստումները ամենևին էլ չփրկեցին ՀՄԴԲԿ-ին՝ ոչ մի բանի առջև կանգ չառնող բոլշևիկների հաշվեհարդարից։ 1920 թ. դեկտեմբերի 2-ի Երևանի համաձայնագրով Հայիեղկոնի իշխանության գլուխ անցնելուց մի քանի օր անց նորահիմն ՉԵԿԱ-ի կողմից սկսվեցին ձերբակալությունները։ «Սպեցիֆիկները» ևս, հայ քաղաքական մյուս կուսակցությունների նման, արժանացան նույնաբանությ խուզարկությունների, ձերբակալությունների, հետապնդումների ու հալածանքների։ Ձերբակալվածների թվում էր նաև ՀՄԴԲԿ ղեկավար գործիչ, բոլշևիկների անհաշտ հակառակորդ Բախչի Իշխանյանը⁴⁷։ Նա ձերբակալվեց Հայաստանի խորհրդայնացման առաջին օրը՝ դեկտեմբերի 2-ին։ Իր վկայությամբ՝ բանտարկության հրամանը տրվել էր հայտնի բոլշևիկ, պետական գործիչ ու ակնավոր պատմաբան Աշոտ Հովհաննիսյանի թելադրանքով⁴⁸։ Վերջինս այդ ժամանակ զբաղեցնում էր Բ. Լեգրանի դիվանագիտական միսիայի տեղեկատու բաժնի վարիչի պաշտոնը։ Բ. Իշխանյանը երկու ամիս հայտնվեց խորհրդային բանտում, որի մասին թողել է սահմուկեցուցիչ դեպքերով հարուստ հիշողություններ⁴⁹։

Բանտում եղած ժամանակ Բ. Իշխանյանը գաղտնի մամակներով խնդրում էր իր կուսակից ընկերներին՝ Գ. Անանունին, Գ. Պիճիկյանին, Տ. Տրդատյանին իրեն բանտից ազատել⁵⁰։ Մյուս կողմից նա դիմում էր Հայաստանում Ռուսաստանի դիվանագիտական ներկայացուցչությանը իրեն թույլ տալ աշխատել Խ. Հայաստանում իր մասնագիտությամբ՝ տնտեսավիճակագրական ուսումնասիրությունների գործով։

1920 թ. դեկտեմբերի 4-ին թվագրված Բ. Իշխանյանի դիմում խնդրանքում կարդում ենք. «Եվ երբ ես այժմ տեսնում եմ, որ իրերի անողոր ղաասավորությամբ հայ դժբախտ ժողովրդի վերջին բեկորների փրկությունը պայմանավորված է նրա երկրի սովետական վարչաձևով և հատկապես, ուժեղ Սովետական Ռուսաստանի բարյացակամ վերաբերմունքով, ապա ես ոչ միայն ոչինչ չունեմ և չեմ ունենա իրերի նոր ղաասավորության դեմ, այլև պատրաստ եմ բոլոր ուժերը ի սպաս դնել՝ Սովետական Հայաստանում և անդուլ խանդով գործելու սիրածս մասնագիտական աշխատանքների սահմաններում»⁵¹։ Բ. Իշխանյանը բանտից ազատվեց միայն 1921 թ. փետրվարյան հայտնի իրադարձությունների շնորհիվ։

Բայց որպես ճախակողմյան տիպի կուսակցություն՝ ՀՄԴԲԿ անդամների մի զգալի մասը, շատերի նման, անցնում է Բոլշևիկյան կուսակցության

⁴⁶ ՀՀ ՀԲԿ ՊԿԱ, Ֆ. 1022, ց. 7, գ. 75, ք. 1։

⁴⁷ Ս. Վրացյան, Հայաստանի Հանրապետություն, Բեյրութ, 1958, էջ 511։

⁴⁸ Բ. Իշխանյան, Երկու ամիս բոլշևիկյան բանտում, Գահիրե, 1924, էջ 9, 24։

⁴⁹ Բ. Իշխանյան, նշվ. աշխ., էջ 147-172։

⁵⁰ Ե. Չարենցի անվան գրականության և արվեստի թանգարան (ԳԱԹ), Գ. Անանունի ֆոնդ, Գ. 50, ք. 15։

⁵¹ ԳԱԹ, Գ. Անանունի ֆոնդ, գ. 50, ք. 10։

շարքերը⁵², իսկ ոմանք էլ ծայտվում են: Հայաստանի խորհրդայնացումից հետո նախկին «սպեցիֆիկ» գործիչներից մեծարվեց միայն (բայց ոչ տևական) հայտնի տեսաբան Ալ. Ռուբենին: Անգամ Երևանում դրվեց նրա արձանը⁵³: 1912 թվականից Ալ. Ռուբենին հարել էր բոլշևիկներին, իսկ 1920 թ. մարտի 23-ին զոհվել թուրք-մուսավաթականների կազմակերպած Շուշիի հայտնի ջարդերի ժամանակ⁵⁴: Իրազեկենք, որ ստույգ չեն պատմաբան Հ. Վարդանյանի հայտնած տեղեկություններն այն մասին, թե Ռուբենին Բաքվում է զոհվել⁵⁵:

Կոմունիստական (բոլշևիկյան) կուսակցության և նախկին «սպեցիֆիկների» միջև հաշտեցում չէր կարող լինել: Այդ պայքարը սաստկացավ երկրում սոցիալիզմի կառուցմանը զուգընթաց և իր բարձրակետին հասավ 1930-ական թվականների կեսերին: Փաստենք, որ Ս. Կասյանի, Ա. Մռավյանի և մյուսների հակասպեցիֆիկյան աշխատությունները գաղափարաբարակական զգալի հող նախապատրաստեցին նախկին «սպեցիֆիկների» բռնադատության ու հաշվեհարդարի համար:

Այսպիսով, Հայաստանի խորհրդայնացումից հետո մյուս քաղաքական կուսակցությունների պես ՀՍԳԲԿ նույնպես ենթարկվեց լուծարման ու բռնադատությունների:

5. Ռամկավար Ազատական կուսակցության (ՌԱԿ) հիմնումը

Նույնատիպ ճակատագրի արժանացան Անդրկովկասի ու Ռուսաստանի հայ ազատական կուսակցությունները՝ Հայ ժողովրդականները և Հայ սահմանադրական ռամկավարները: Հայաստանի խորհրդայնացումից հետո նրանց ղեկավարների հիմնական մասը անցավ արտասահման⁵⁶: Սակայն արտասահմանում նրանց հետագա կազմակերպական գործունեությունը այլ ընթացք ստացավ: 1921 թ. հոկտեմբերին Կոստանդնուպոլսում սրանք միավորվեցին Սփյուռքի գաղութահայ ազատական կուսակցությունների ու միությունների հետ և հիմնեցին մեկ միասնական՝ **Ռամկավար Ազատական կուսակցությունը (ՌԱԿ)**⁵⁷:

⁵² ՀՀ ՀՔԿՓ ՊԿԱ, ֆ. 1, ց. 1, գ. 39, թ. 4:

⁵³ Ս. Կասյան, *Սպեցիֆիկները և սպեցիֆիզմը, Թիֆլիս, 1928, էջ 44-45, 109:*

⁵⁴ Ա. Գ. Հովհաննիսյան, *Երկու բնութագիր (Ստ. Շահումյան և Ալ. Ռուբենի) Ե., 1927, էջ 25. «Հայաստանի կոուպերացիա», 31 հուլիսի 1920, (թիվ 14), էջ 570:*

⁵⁵ Հ. Գ. Վարդանյան, *Հայ բուրժուա-ազգայնական կուսակցությունների դիրքավորումը ռուսական առաջին հեղափոխության տարիներին (1905-1907 թթ.), Ե., 1975, էջ 137:*

⁵⁶ Հայաստանում սովետական իշխանության ամրապնդման պատմության մի քանի հարցեր, Ե., 1987 թ., էջ 191-192:

⁵⁷ Ա. Յափուճյան, *Համառոտ պատմություն Ռամկավար ազատական կուսակցության կազմության, Գահիրե, 1977, էջ 3:*

Հարկ է նշել, որ այդ միավորումը միանգամայն անհրաժեշտ ու օրինա-
չափ երևույթ էր, որի նախաքայլերն սկսվել էին դեռևս 1919-1920 թվականնե-
րին: Դեռ 1919 թ. ամռանը Փարիզում Արշակ Չոպանյանի նախաձեռնությ-
յամբ հիմնվել էր 50 հոգուց (անդամներից) բաղկացած կազմակերպություն՝
«Հայ Ազատական միություն»: Միության հիմնադիրներից էին նաև Բ. Արքին-
յանը, Տիրան Ալեքսանյանը, Վահան Թեքեյանը, Էդգար Շահինը և ուրիշներ:
Փարիզում սկսեց լույս տեսնել Ազատական միության պաշտոնաթերթ «Հա-
յաստանը»:

Հայ ազատական միության ստեղծման կապակցությամբ Երևանից Ա.
Գարբինյանը նամակով շնորհավորեց Ա. Չոպանյանին. «Նախ կը շնորհավո-
րինք Ձեր նախաձեռնությունը,- հայտնում էր ռամկավար գործիչ Ա. Գարբին-
յանը 1919 թ. հոկտեմբերի 29-ի թվակիր նամակում,- «**Ազադական միու-
թյուն**» ստեղծելու ազգային մեծ ձեռնարկին մեջ: Հավատացած ենք, որ հիմ-
նադիրները մոտիկ ապագային իրենց հույսերը արդարացած պիտի տեսնին,
երբ միևնույն սկբզունքներու շուրջ կազմված ապադասակարգային և ազա-
տական հայ կուսակցությունները, հոսանքները և մինչև այժմ կուսակցու-
թյուններե դուրս մնացած ազգային բանհմաց տարրերը միանան միևնույն դրո-
շակի տակ, որուն այնքան կարոտ է մեր նահատակված ազգը այսքան տա-
ռապանքներե հետո»⁵⁸:

Հայ ազատական միությունը իր մասնաճյուղերը հիմնեց Շվեյցարիա-
յում, Բելգիայում, Մանչեստրում, Լոնդոնում և այլուր: Այս միությունը փաս-
տորեն դարձավ առաջին քայլը ապագա ՌԱԿ-ի ստեղծման ճանապարհին:
Ազատական միությունը նպատակ էր դրել «նպաստել հայկական համախոհ
տարրերի միացմանը» և ստեղծել մի նոր մեծ ազգային կուսակցություն⁵⁹:

Հայոց անկախ պետականության վերահաստատման պայմաններում
անհրաժեշտ համարվեց, որ Վերակազմյալ հնչակյան, (որը ստացել էր «Ազա-
տական» անունը)⁶⁰, Սահմանադիր ռամկավար և Հայ ժողովրդական կուսակ-
ցությունները կազմակերպական առումով միավորվեն մեկ միաձույլ առաջա-
դիմական, ազգասիրական, ապադասակարգային կուսակցության մեջ:

Հարկ է նշել, որ այս ուղղության կուսակցությունների և հոսանքների
միավորման գործը հետաձգվեց, քանի որ նրանք սպասում էին Հայկական
հարցի մոտալուտ լուծմանը, որի արդյունքում էլ Միացյալ և Անկախ Հայաս-
տանում պիտի տեղի ունենար միավորումը: Ռամկավար և ազատական կու-
սակցությունների միավորման խնդիրը կապվում էր Միացյալ և Անկախ Հա-
յաստանի հետ այն հիմնավորմամբ, որ Հայկական հարցի լուծմամբ թուրքա-
հայ ժողովրդի հետ ռամկավար-ազատական կուսակցությունն էլ Երկիր
կմտներ և իր ոտքի տակ հող կունենար: Բայց քանի որ դեպքերն ու իրադար-
ձություններն այլ ընթացք ստացան, այդ իսկ պատճառով որոշվեց միացումը

⁵⁸ ՀՀ ՊԿՊԱ, Ծ. 282, ց. 1, գ. 1, թ. 1:

⁵⁹ «Աշխատավոր», Թիֆլիս, 8 հոկտեմբերի 1919 թ.:

⁶⁰ Ա. Յափուճյան, նշվ. աշխ., էջ 47:

իրականացնել՝ այլևս չսպասելով Հայկական հարցի լուծմանը, մանավանդ որ այդ ուղղությամբ այլևս որևէ գործնական հույս չէր մնացել:

Կազմվեց մի գործադիր մարմին, որը բանակցությունների մեջ պետք է մտներ մի կողմից ՀԺԿ, իսկ մյուս կողմից գաղութահայության շրջանում գործող Ս. ռամկավար և Վերակազմյալ Հնչակյան (Ազատական) կուսակցությունների հետ՝ դրանք ձուլելու մի կուսակցության մեջ: Նորահիմն կուսակցության ծրագրային հիմնադրույթները պիտի լինեին ա) Միացյալ և Անկախ Հայաստան, ք) Ռամկավարական խորհրդարանական կառավարություն, գ) հայերենը պետական պաշտոնական լեզու, դ) խղճի ու դավանանքի կատարյալ ազատություն և օրենքի առաջ Հայաստանի բոլոր քաղաքացիների հավասարություն, ե) անվճար և նախնական պարտադիր կրթություն: Նորաստեղծ կուսակցության կենտրոնատեղին պիտի լինեի Հայաստանի մայրաքաղաքը⁶¹: Ավելացնենք, որ հայ ռամկավարների արտասահմանյան կազմակերպությունների ու անհատ գործիչների վերաբերմունքը դեպի ՀՀ կառավարությունը եղել է ավելի լոյալ ու բարյացակամ, քան Ժողովրդական կուսակցության և կառավարության հարաբերությունները: Օրինակ, «Ազատական միության» ղեկավար Ա. Չոպանյանը Փարիզից անձամբ շնորհավորել է վարչապետ և արտ. գործ. նախարար Հ. Օհանջանյանին՝ Սևրի Միացյալ և Անկախ Հայաստան նվիրագործող դաշնագրի ստորագրման կապակցությամբ: Իր հերթին, պատասխան մամակով, վարչապետը Երևանից շնորհակալություն է հայտնել մեծանուն քաղաքական, գրական ու մշակութային գործիչն⁶²:

1919-1921 թթ. ընթացքում «Ազատական միությունը» և անձամբ Ա. Չոպանյանը նախապատրաստական-կազմակերպական աշխատանքներ էին տանում հայ ռամկավար-ազատական (լիբերալ) տիպի կուսակցությունները, հոսանքները և կազմակերպությունները մեկ միացյալ կուսակցության մեջ ձուլելու ուղղությամբ: Միքայել Պապաճանյանը և Արտաշես Էնֆիաճյանը ՀԺԿ անունից բանակցում էին միացման շուրջը⁶³: Միաժամանակ, Անդրկովկասում բանակցություններ էին ընթանում Հայ ռամկավար և Հայ ժողովրդական կուսակցության միջև՝ մեկ կուսակցությունների մեջ ձուլվելու նպատակով: Դրա համար նախատեսված էր 1920 թ. հունիսի վերջերին Երևանում հրավիրել Հայ ռամկավար կուսակցության համագումար⁶⁴:

Ռամկավար (ժողովրդական) և ազատական բոլոր տիպի կուսակցությունների ու հոսանքների միավորման համար սկզբում ծրագրված էր միավորիչ հիմնադիր համագումար հրավիրել 1920 թ. փետրվարի 15-ին Փարիզում: Դրան մասնակցելու համար հրավերներ էին ստացել՝ Հայ ժող. կուսակցությունը⁶⁵, Հայ ռամկավար կուսակցության Կիլիկիայի շրջանային վարչությունը

⁶¹ «Ժողովուրդ», 31 օգոստոսի 1919 թ.:

⁶² ՀՀ ՊԿՊԱ, Ծ. 282, ց. 1, գ. 14, ք. 1:

⁶³ «Ժողովուրդ», 31 օգոստոսի 1919:

⁶⁴ «Մշակ», 4 հունիսի 1920թ.:

⁶⁵ ՀՀ ՊԿՊԱ, Ծ. 282, ց. 1, գ. 13, ք. 4:

նը⁶⁶, Վերակազմյալ հնչակյան և այլ նույնաբնույթ կուսակցություններ ու հոսանքներ: Միացման նպատակով պատգամավորական ընդհանուր ժողով հրավիրելու մասին հրավերներ էին ուղարկվել Հայաստանի, Կիլիկիայի, Պոլսի, Ամերիկայի և Եգիպտոսի Կենտրոնական գլխավոր ներկայացուցչական մարմիններին⁶⁷: Ա. Դարբինյանը նշում էր, որ արտասահմանում ուժեղ էին Եգիպտոսի և Պոլսի ռամկավար մարմինները, որոնք միացման շուրջ սկսել էին եռակողմ ու քառակողմ բանակցությունները⁶⁸: Արտասահմանյան ռամկավարների ուժեղ կազմակերպություններից էր նաև Ամերիկայում գործող «Ազգային ռամկավար կուսակցությունը», որի վարչության ատենապետն էր պրոֆ. Մ. Անանիկյանը, իսկ գործադիր մարմնի նախագահը՝ Սարգիս Սալեմեյանը⁶⁹:

Հարկ է ընդգծել, որ միավորմանը պատրաստվող՝ Ռամկավար, Ժողովրդական, Վերակազմյալ հնչակյան կուսակցությունների և Փարիզի «Ազատական» միության աշխարհայացքն ու սոցիալ-քաղաքական պլատֆորմները, ըստ էության, նույնական էին: Սրանք պարզապես ներկայացնում էին հայ իրականության տարբեր հատվածները և տարբերությունը միայն իրենց անվանումների մեջ էր: «...Վերակազմյալությունը, ռամկավարությունը, Ազատական միությունը և Ժողովրդական կուսակցությունը տարբեր բառերով միևնույն բանն են ասում»⁷⁰: Այնպես որ օրինաչափ ու անխուսափելի էր դրանց ձուլումը մեկ կուսակցության մեջ:

Սակայն 1920 թ. փետրվարի 15-ին Փարիզում հրավիրվելիք միավորիչ համագումարը ինչ-ինչ պատճառներով չկայացավ: Դրա գումարումը հետաձգվեց⁷¹: 1921 թ. Հայաստանում Փետրվարյան ապստամբության պարտությունից հետո Հայ ժողովրդական կուսակցության ղեկավարները հեռացան հայրենիքից⁷²: Մինչ այդ, Կ. Պոլսում կազմվել էր Հայ Ս. ռամկավար կուսակցության ժամանակավոր կենտրոնական վարչություն, որը կորոզիանցնող աշխատանքներ էր տանում իր շրջանակների հետ: Միաժամանակ, 1920 թ. նոյեմբերին Կ. Պոլսում գումարվեց Վերակազմյալ հնչակյան (Ազատական) կուսակցության համագումար, որում ընդունվեց միացման մասին որոշում⁷³: Դրանից հետո ռամկավար և ազատական կուսակցությունների միջև սկսվեցին երկկողմ և բազմակողմ բանակցությունները միացման և նորաստեղծ կուսակցության անվան շուրջ:

1921 թ. աշնանը, երբ արդեն շատ բան էր պարզվել, ՌԱԿ-ի հիմնումը դարձավ օրախնդիր հարց: Ի վերջո 1921 թ. հոկտեմբերին Կ. Պոլսում Արմեն

⁶⁶ Նույն տեղում, գ. 15, ք. 1:

⁶⁷ Նույն տեղում գ. 51, ք. 2:

⁶⁸ Ա. Դարբինյան, Հայ ազատագրական շարժման օրերեն, Փարիզ, 1947, էջ 395:

⁶⁹ ՀՀ ՊԿՊԱ, ֆ. 282, ց. 1, գ. 13, ք. 1:

⁷⁰ «Հայրենիք», 1920, թիվ 3, էջ 30:

⁷¹ «Ժողովուրդ», 16 հունվարի 1920 թ.:

⁷² Հ. Գանգրունի, Հայաստան 1918 և հայ քաղաքական միտքը, Պեյրուք, 1984, էջ 228:

⁷³ Ա. Յափունճյան, նշվ. աշխ., էջ 48:

նական-ռամկավար, Վերակազմյալ հնչակյան-ազատական և մասամբ Ժողովրդական կուսակցությունների, ինչպես նաև այլ միությունների ու հոսանքների միավորումով պաշտոնապես հռչակվեց **Ռամկավար Ազատական կուսակցությունը**, որի համար, ըստ Ա. Գարբինյանի, նշանաբան դարձավ «Հայրենիքի հետ, հայրենիքի համար» սկզբունքը⁷⁴: Հայրենիք ասելով նկատի էր առնվում արդեն խորհրդայնացված Հայաստանը:

ՌԱԿ-ը որդեգրեց խորհրդային կողմնորոշում՝ նպատակ դնելով ա) հետամուտ լինել թուրքահայ հարցին Խ. Հայաստանի առաջնորդությամբ, բ) աջակցել Հայաստանի վերաշինությանը և ազգահավաքման գործին, գ) Հայաստանի և Սփյուռքի միջև կապերի ամրապնդումը, դ) գաղթօջախներում հայկական մշակույթի պահպանումը ու զարգացումը և այլն⁷⁵: Ինչպես նկատում ենք, ՌԱԿ-ը, իր ծրագրային նպատակադրումներով, վերածվեց սփյուռքահայ համայնքային կուսակցության, որը հիմնականում համերաշխվում էր Խորհրդային Հայաստանի գոյությանը և ձգտում նրա հետ համագործակցություն հաստատել: Բայց և այնպես՝ ՌԱԿ-ը ամբողջովին չիրաժարվեց Միացյալ Հայաստանի անկախության գաղափարից և Հայ Դատի պահանջից՝ վերջինիս լուծումը կապելով խորհրդային պետության քաղաքականության հետ⁷⁶:

Խորհրդային ժամանակաշրջանում ՌԱԿ բարյացակամ վերաբերմունք է ցուցաբերել Խ. Ռուսաստանի և նրա իշխանության տակ գտնվող Խ. Հայաստանի հանդեպ՝ հուսալով, թե Ռուսաստանը իր ծանրակշիռ նպաստը կբերի թուրքահայ դատի արդարացի ու հայանպաստ լուծման գործում: Խորհրդային Հայաստանի գոյության ողջ ընթացքում ՌԱԿ-ը և նրա մասնույր հիմնականում լոյալ վերաբերմունք են ցուցաբերել խորհրդային պետության նկատմամբ, սակայն որակվելով որպես «բուրժուական», հակասոցիալիստական տարր՝ նա փոխադարձ վստահության ու համարժեք վերաբերմունքի չի արժանացել վերջինիս կողմից:

Գնահատելով Ռամկավար Ազատական կուսակցության անցած ավելի քան ութ տասնամյակների ուղին՝ հարկ է ընդգծել, որ նա ևս փարված է եղել ազգապահպանության, հայ մշակույթի աստարման ու հայրենիքի գաղափարների:

Այսպիսով, հայ քաղաքական կուսակցությունների լուծարումից և հայրենիքից վտարվելուց հետո սկսվում է նրանց պատմության նոր փուլը՝ սփյուռքյան գործունեության ժամանակաշրջանը:

⁷⁴ Ա. Գարբինյան, *նշվ. աշխ.*, էջ 9, 468, 495, Ա. Յափունյան, *նշվ. աշխ.*, էջ 48:

⁷⁵ «Ճրագիր Ռամկավար ազատական կուսակցության», Փարիզ, 1930, էջ 3:

⁷⁶ Գ. Լազյան, *Հայաստան և Հայ Դատը*, Ե., 1991, էջ 367-368

ՎԵՐՋԱԲԱՆ

Ամփոփենք. պատմաքաղաքական դեպքերի ու իրադարձությունների երկաթյա տրամաբանությամբ Հայաստանը կանգնեց անկախության փաստի առաջ: Շուրջ 600-ամյա ընդմիջումից հետո հայ ժողովուրդը ձեռք բերեց իր ազգային անկախ պետականությունը, որի համար նա պարտական էր առաջին հերթին իր հերոսական ոգորումներին: Յուրաքանչյուր ժողովրդի, ազգի զարգացման ու բարգավաճման ամենամեծ գրավականը, հիրավի, անկախության մեջ է: «Անկախության ուղիով ու անկախության միջոցով է, որ պիտի ընթանա հայ ժողովրդի հետագա ազատագրական պայքարը»¹:

Հայաստանի առաջին հանրապետության պետաիրավական կառույցի անբաժան մասն է կազմել խորհրդարանը, որը ձևավորելիս՝ հաշվի էր առնվել պառլամենտարիզմի համաշխարհային փորձը: Այդ նույն ժամանակ արդեն քաղաքական պայքարի բավականին դաժան դպրոց էին անցել քաղաքական կուսակցությունները, որոնք իրենց գործունեությամբ պետք է միս ու արյուն դառնային հայ իրականության մեջ առաջին անգամ ձևավորված խորհրդարանի համար:

Հայաստանի անդրանիկ խորհրդարանը ՀՀ ծնունդն էր, նրա հոգեհարազատ զավակն ու անբաժան ուղեկիցը: Հանրապետության գոյության 2,5 տարվա ընթացքում կազմվել են երկու գումարման խորհրդարան՝ առաջինը, որպես Հայոց Ազգային խորհրդի անմիջական իրավահաջորդ, գործել է 1918 թ. օգոստոսի 1-ից մինչև 1919 թ. հունիսի 5-ը, բազմակուսակցական հիմքի վրա, առանց ընտրությունների, իսկ երկրորդը՝ 1919 թ. օգոստոսի 1-ից մինչև 1920 թ. դեկտեմբերի 2-ը, ընտրությունների միջոցով: Այդ նույն ընթացքում կազմվել են չորս կառավարություն (կաբինետ):

Հայաստանի երկու գումարման խորհրդարանն իր գործունեության ընթացքում ընդունել է 300-ից ավելի օրենքներ, որոնց մի զգալի մասը, սակայն, եղել են ընդամենը որոշումներ և կառավարչական հրահանգներ:

Քաղաքական և պետական կառուցվածքի տեսակետից՝ հանրապետության խորհրդարանն ու կառավարությունը նպատակ էին դրել Հայաստանը դարձնել Արևմուտքի տիպի խորհրդարանական, դեմոկրատական (ռամկավար) հանրապետություն, որի սահմանադրությունը և այլ հիմնական օրենքները պետք է մշակվեին և ընդունվեին ապագա իրավիրվելիք Սահմանադիր ժողովում՝ Հայկական հարցի վերջնական լուծումից, այսինքն՝ Անկախ, Ազատ և Միացյալ Հայաստանի ստեղծումից հետո: Սակայն պատմաքաղաքական դեպքերն այնպես զարգացան, որ ՀՀ կարճատև կյանքն ընթացավ առանց սահմանադրության: Հանրապետությունը չունեցավ նաև իր նախագահը (պրեզիդենտը), որ նույնպես ծրագրված էր:

¹ Վ. Նավասարդյան, *Դաշնակցության անելիքը, Գահիրե, 1924, էջ 278:*

Ընդհանուր առմամբ, ՀՀ համար բնորոշ էր կառավարման հանրապետական ձևը՝ խորհրդարանի գերակայությամբ: Պետության գլխավոր իշխանության մարմինը հանդիսանում էր խորհրդարանը: Պետության գլխավոր իրավասությունները՝ օրենսդիր, մասամբ նաև գործադիր պատկանում էին խորհրդարանին: Գործադիր իշխանությունը՝ կառավարությունը, ձևավորվում ու հաստատվում էր խորհրդարանի կողմից: Հանրապետության նախագահի պաշտոնի բացակայության պայմաններում վարչապետը հաշվետու էր միայն խորհրդարանի առջև:

ՀՀ առաջին փուլում բավականին մեծ են եղել Հայաստանի խորհրդի (խորհրդարանի) իրավասության շրջանակները, որն օրենսդրականից զատ, երբեմն իրացնում էր նաև գործադիր իշխանության ֆունկցիաներ: Այսպես՝ Հայաստանի խորհրդի ընդունած օրենքների մի մասը ոչ այնքան օրենքներ էին որպես այդպիսին, որքան պարզապես որոշումներ, վարչական կարգադրություններ ու հրահանգներ: Այսինքն՝ ստացվել է այնպես, որ խորհրդարանը, փոխանակ զբաղվելու իր օրինաստեղծ աշխատանքով, շրջանցելով իր իրավասությունները, իր վրա է վերցրել գործադիր մարմնի՝ կառավարության ֆունկցիաներ:

Սակայն ժամանակի ընթացքում, դեպքերի ու հանգամանքների բերումով, սահմանադրության բացակայության, օրենսդիր, գործադիր և դատական իշխանությունների իրավասությունների շրջանակների ու գործունեության ոլորտների ոչ հստակ սահմանազատվածության (տարանջատվածության) և սուբյեկտիվ այլ պատճառներով, բարձրագույն գործադիր իշխանությունը՝ կառավարությունը իր հերթին, գերազանցելով իր իրավասության սահմանները, ժամանակ առ ժամանակ (սովերեյտ) ու մի տեսակ անտեսելով խորհրդարանի գոյությունը), խորհրդարանն ուղարկելով արձակուրդ՝ ստանձնել է նաև օրենսդրական ֆունկցիաներ, զբաղվել՝ օրինաստեղծ գործունեությամբ: Կնշանակի՝ հստակորեն սահմանազատված չեն եղել օրենսդիր և գործադիր իշխանության մարմինների իրավասության շրջանակները: Այդ իսկ պատճառով էլ խորհրդարանն ու կառավարությունը հաճախ գիտակցաբար կամ անգիտակցաբար միախառնվելով՝ կրկնօրինակել են իրար:

Անշուշտ, նման աշխատառճը անհարիր էր իրավական, ժողովրդավարական պետական համակարգին: Ուսումնասիրության արդյունքներով հեշտ է նկատել այն միտումը, որ գնալով նսեմացվել է խորհրդարանի դերն ու նշանակությունը, և դա զգալի չափով պայմանավորված էր նրանում ընդդիմության թուլությամբ: Եթե Հայաստանի առաջին ոչ ընտրովի խորհրդարանը՝ Հայաստանի խորհուրդը, իր խաղացած իրավաբաղաբական դերով ու նշանակությամբ համեմատում ենք՝ երկրորդ՝ ընտրովի խորհրդարանի հետ, ապա տեսնում ենք, որ առաջինը մի շարք պարամետրերով, օրինակ, իրավասության շրջանակներով, ընդդիմության ուժեղությամբ և այլն գերազանցում էր երկրորդին, սակայն վերջինս էլ իր աշխատանքի արդյունավետությամբ ու խորհրդարանին բնորոշ արհեստավարժությամբ էր գերազանցում առաջինին: Եթե Հ. Քաջազունու վարչապետության շրջանում պետական իշխանության

գլխավոր դեմքը խորհրդարանն էր (որն առանցքային դեր էր խաղում երկրի քաղաքական կյանքում), Ալ. Խատիսյանի վարչապետության ժամանակաշրջանում իրար հավասարակշռում ու հակակշռում էին խորհրդարանն ու կառավարությունը, ապա Հ. Օհանջանյանի գլխավորած Բյուրո-կառավարության ժամանակ, հանգամանքների թելադրանքով, խորհրդարանն իրար հետևից մի շարք ամիսներ ուղարկվեց հարկադիր արձակուրդ և գործնականում թուլացավ:

Կարծում ենք, որ միակողմանի է խորհրդարանի նման կացությունը բացատրել այն ժամանակվա դեկավարության և ՀՅԳ մենիշխանական ձգտումներով: ՀՅԳ խորհրդարանը դիմազրկելու ձգտում (միտում) չուներ հենց թեկուզ այն պատճառով, որ վերջնիս կազմի 90 տոկոսը ներկայացնում էին այդ իսկ կուսակցության անդամները: Կառավարությունը ևս իր ամբողջ կազմով դաշնակցական էր: Դեռ 1919 թ. աշնանը ՀՅԳ 9-րդ Ընդհ. ժողովի որոշմամբ որոշակիորեն սահմանազատվել էին կառավարության և կուսակցության իրավասությունների սահմանները. կառավարությունը պատասխանատու էր միայն խորհրդարանին, իսկ ՀՅԳ Բյուրոն կառավարության վրա կարող է ազդել միայն խմբակցության միջոցով¹: Այսինքն՝ սահմանվում էր, որ կառավարությունը ենթակա ու հաշվետու էր միայն խորհրդարանի առաջ՝ ընդունելով վերջնիս գերադասությունը: Այստեղից էլ հետևում է, որ և՛ ՀՅԳ-ն, և՛ կառավարությունը խորհրդարանը դիմազրկելու և նրանից ազատվելու որևէ հետի՞ն նպատակ չեն ունեցել: Դա ուղղակի հակասում էր կուսակցության համաժողովի ընդունած որոշումների ոգուն:

Այսպիսով, խորհրդարանի դիմազրկումը և ամբողջ իշխանությունը Բյուրո-կառավարության ձեռքում կենտրոնացնելը պայմանավորված էր պատմական դեպքերի ու իրադարձությունների այն իրական ու օբյեկտիվ գործընթացներով, որի մեջ հայտվել էր Հայաստանը տվյալ ժամանակաշրջանում:

ՀՀ խորհրդարանի պատմության էական կողմերից մեկը հայ քաղաքական կուսակցությունների գործունեության բացահայտումն է: Խորհրդարանն այն հիմնական խողովակն է, որով յուրաքանչյուր կուսակցություն աշխատում էր կյանքի կոչել իր քաղաքականությունը: ՀՀ-ում գործել են ինչպես խորհրդարանական, այնպես էլ ոչ խորհրդարանական կուսակցություններ:

Ելնելով գործող կուսակցությունների ծրագրային պահանջներից, պրակտիկ գործունեությունից, մարտավարությունից, քաղաքական դավանանքից ու կողմնորոշումից՝ Հայաստանի ու հայ իրականության շուրջ տասնյակի հասնող քաղաքական կուսակցությունները դասակարգել ենք երկու՝ ազգային և ոչ ազգային խմբի և երեք թևի (ուղղության)՝ «աջակողմյան» «կենտրոն» և «ձախակողմյան»:

Կենտրոնամետ գիծ վարող ՀՅ Դաշնակցությունը ՀՀ գոյության 30 ամիսների ընթացքում եղել է պետության բարձրագույն երկու (օրենսդիր և գոր-

¹ Ա. Մ. Հակոբյան, ՀՅԳ 9-րդ ընդհանուր ժողովը, Երևան, 1994, էջ 22:

ծաղիք) մարմիններում քաղաքական հիմնական ղեկավար ուժը: Այդ ընթացքում երկու անգամ կազմվել է կուալիցիոն (խառը) կառավարություն (դահլիճ)՝ մի դեպքում՝ «աջակողմյան»՝ Հայ ժողովրդական կուսակցության ներկայացուցիչների մասնակցությամբ, իսկ երկրորդ անգամ՝ «ձախակողմյան»՝ Հայ սոցիալիստ- հեղափոխականների (էսէռների) հետ: Եթե առաջին կուալիցիան, որ տևել է 7-8 ամիս, կարելի է դիտել որպես բնականոն, ապա երկրորդը, որ տևեց ընդամենը տասը օր, հարկադիր քայլ էր՝ թելադրված Խ. Ռուսաստանի համակրանքը շահելու դիտավորությունից: Փորձը ցույց է տալիս, որ որպես սոցիալիստական, ՀՅԳ- հակված էր մերձեցման գնալ ոչ թե «ձախակողմյան»՝ սոցիալիստական, այլ «աջակողմյան»՝ ազգային, բուրժուական որակվող կուսակցությունների հետ: Եվ սա պատահական երևույթ չէր: Այս հանգամանքը մեկ անգամ ևս հաստատում է այն միտքը, որ Գաշնակցության համար առաջնայինը միշտ եղել և մնում է ազգային խնդիրը, իսկ սոցիալականը նկատվում է որպես միջոց նպատակների իրականացման համար:

Հայաստանի խորհրդարանի պատմության առանձնահատկություններից մեկն էլ այն էր, որ այնտեղ կային պատգամավորներ և անգամ խմբակցություններ, որոնք չէին ճանաչում Հայաստանի անկախությունը ու հաճախ գիտակցաբար և անգիտակցաբար խարխլում էին նրա հիմքերը:

Հայաստանի Հանրապետությունում գործող քաղաքական կուսակցությունների պատմական փորձի անակնկալն այն էր, որ Հայաստանում հաղթանակեց այն կուսակցությունը, որը երկրի ներսում էական կշիռ ու ազդեցություն չուներ: Բայց նա հաղթեց դրսի ահեղ ուժերի օգնությամբ: 1920 թ. գարնանը Ռուսաստանի վերադարձը Կովկաս կանխորոշեց Հայաստանի անկախության վերացումը:

ՀՀ գործող քաղաքական կուսակցությունների ու մասնավորապես նրանց խորհրդարանական գործունեության փորձի ուսումնասիրությունը մեզ բերում է այն հետևության, որ ամեն անգամ, երբ հայ ժողովրդին ու նրա հայրենիքին արտաքին ու ներքին մեծ վտանգ էր սպառնում (օրինակ, այդպիսի վտանգ էին 1918 և 1920 թվականների թուրքական հարձակումները), տեղի էր ունենում հայ քաղաքական գրեթե բոլոր ուժերի, բացառությամբ համայնավարների, համախմբում (կոնսոլիդացիա), իսկ երբ թուլանում կամ վերանում էր այդ վտանգը, ապա կրկին ուժեղանում էր ընդդիմությունը և ներքաղաքական պայքարը կուսակցությունների միջև: Ընդհանուր առմամբ, Հայաստանում գործող կուսակցությունները հիմնականում կանգնեցին հանրապետության անվտանգության և հայոց պետականության պաշտպանության դիրքերում: Ուրախությամբ պետք է արձանագրել, որ համազգային ու համապետական շահի գիտակցման այս առողջ բնազդական ավանդույթը պահպանվում է նաև մեր օրերում՝ հայ հասարակական - քաղաքական կազմակերպությունների գործելակերպում:

Հայ քաղաքական կուսակցությունների ու մասնավորապես քաղաքական ընդդիմության գործունեության բնորոշ կողմերից մեկն էլ այն է, որ այդ պայքարը խորհրդարանում և թե՛ նրանից դուրս ընթացել է հիմնականում իշ-

խանության համար: Այս միտումը համեմատաբար ուժեղ է դրսևորվել ՀՀ առաջին փուլում՝ մինչև 1919 թ. կեսերը:

Ընդհանուր առմամբ ՀՀ-ում գործող ընդդիմադիր կուսակցությունները ՀՅԴ դեմ մղվող պայքարում իրար չներդաշնակեցին: Քաղաքական ընդդիմության «աջ» և «ձախ» խմբակցությունների (թևերի) միջև գոյություն ունեին այնպիսի սուր հակասություններ (քաղաքական, գաղափարական, սոցիալ-տնտեսական և այլն), որ նրանք չկարողացան միասնական ճակատ կազմել հանրապետությունը կառավարող հիմնական քաղաքական ուժի՝ ՀՅԴ դեմ մղվող պայքարում: Ավելին՝ իրար հետ չկարողացան համաձայնության գալ ոչ միայն «աջ» ու «ձախ» խմբակցությունները, այլև հենց «ձախերն» իրար հետ:

ՀՅԴ-ից հետո ՀՀ-ում գործող երկրորդ ազդեցիկ քաղաքական ուժը ՀԺԿ էր: Սակայն լավ սկսած, նույնիսկ միառժամանակ ՀՅԴ հետ խառը կառավարություն կազմած ժողովրդականները մի շարք պատճառներով անհաջողության մատնվեցին: ՀԺԿ լինելով ազգային, ամենից առաջ անհաջողության մատնվեց ոչ այնքան Հայաստանում սոցիալական թույլ հենարան ունենալու, որքան հանրապետությունում ոչ ճիշտ գործելակերպ վարելու հետևանքով: Ընդհանուր առմամբ, այս կուսակցությունը, չնայած իր ընդդիմությանը, միշտ էլ մնաց ազատականության, օրինականության, չափավորության և պատասխանատվության շրջանակներում: Իսկ առանձին պահերի էլ ուղղակի համագործակցեց կառավարության հետ՝ լինելով կամ նրա կազմում, կամ էլ՝ նրա կողքին:

Անդրադառնալով հայ քաղաքական կուսակցությունների արտաքին քաղաքական գործունեության և մասնավորապես Հայկական հարցում նրանց ցուցաբերած դիրքորոշումներին՝ ուսումնասիրության արդյունքներով հանգել ենք հետևյալ եզրահանգման: Հայկական հարցի բարեհաջող լուծմանը հետամուտ են եղել, ավել կամ պակաս չափով, հայ ազգային տիպի բոլոր կուսակցությունները՝ սկսած Դաշնակցությունից վերջացրած Վերակազմյալ հնչակյաններով: Թե՛ Հայաստանում և թե՛ նրա սահմաններից դուրս նրանք շատ ճգնեցին, տարածքային հավակնոտ պահանջներ ներկայացրին, բայց, ի վերջո, հարցը ունեցավ ոչ հայանպաստ ավարտ: Հայ ազգային կուսակցությունների ամենամեծ սխալն այն էր, որ առանց բացառության գրեթե բոլորը, մի քիչ ավել կամ պակաս չափով, Հայկական հարցի լուծման իրենց պահանջներում իրատես չգտնվեցին: Նրանց ձգտում-ցանկություններն ու դրան հասնելու հնարավորություններն իրար չէին համապատասխանում: Դրա համար էլ երիցս անգամ հույսը կապեցին դրսի, օտար ուժերի օգնության հետ և արդյունքում հիասթափվելով, հերթական անգամ խաբվեցին՝ կրելով մարդկային ու տարածքային հսկայական կորուստներ: ՀՀ գոյության գրեթե ամբողջ ժամանակաշրջանում հիմնական կառավարող՝ ՀՅԴ կուսակցությունը կողմնորոշված էր դեպի Արևմուտք: Չնայած նման կողմնորոշման համար կային գորավոր պատճառներ և գայթակղիչ սպասելիքներ, սակայն ի վերջո այդ քա-

դաքսականությունը օբյեկտիվ պատճառներով իրեն չարդարացրեց: Արդյունքում՝ Հայաստան աշխարհը պարփակվեց ընդամենը 30 հազ. քառ. կմ մեջ:

Ինչ վերաբերում է հայ քաղաքական կուսակցությունների մյուս խմբին՝ ոչ ազգային կուսակցությունների նույն խնդրին ցուցաբերած վերաբերմունքին, ապա պետք է ասել, որ սրանց (սկսած էսեռներից և վերջացրած բոլշևիկներով) այնքան էլ չէր մտահոգում Արևմտահայոց խնդիրը: Այս կուսակցություններն ավելի շատ մտահոգ էին դասակարգային պայքարի և սոցիալ-տնտեսական խնդիրների լուծման հարցերով: Ոչ ազգային, «ճախակողմյան» կուսակցությունները Հայկական հարցի լուծումը վերջին հաշվով կապեցին Հայաստանի խորհրդայնացման ու հայ ժողովրդի սոցիալական ազատագրության խնդրի լուծման հետ:

Հանրապետությունում ազատորեն գործել են առկա բոլոր կուսակցությունները, այդ թվում բոլշևիկները: Համենայն դեպս, մինչև 1920 թ. գարունը Հայաստանում առկա ազգաբնակչության ու հասարակական-քաղաքական կուսակցությունների ու կազմակերպությունների համար հիմնականում ապահովվել են ժողովրդավարական ազատություններ՝ մտածողության, խոսքի, մամուլի, ժողովների, ցույցերի, գործադուլների, ռամկավար աշխատանքային օրենսդրություն և այլն: Անգամ չի եղել մշակված օրենք այս կամ այն կուսակցության գործունեությունը սահմանափակելու կամ դադարեցնելու վերաբերյալ: Խորհրդարանի պատմության օրինակով կարելի է հանգել այն հետևության, որ ՀՀ-ում գործող բոլոր կուսակցությունների համար հիմնականում ապահովված են եղել քաղաքական ազատություններ:

Չնայած այն ժամանակվա ծանր ու արտասովոր պայմաններին՝ Հայաստանի խորհրդարանը, ինչպես հարկն է, չկարողացավ իրեն լիովին դրսևորել: Նա իր կարճատև և այն էլ ընդհատումներով գործունեության ընթացքում չհասցրեց մշակել ու ընդունել սեփական (ազգային) պետաիրավական ամբողջական ու կայուն օրենսդրություն: ՀՀ շարունակում էր հիմնականում առաջնորդվել ցարական Ռուսաստանի ու Ժամանակավոր կառավարության, Անդրկովկասի կոմիսարիատի ու Սեյմի ընդունած օրենքներով, որոնք ակնհայտ է, որ այնքան էլ չէին պատշաճում հայոց ազգային պետականությանը ու երկատված հայ իրականությանը: Ընդամին այդ օրենքները երկար ժամանակ մայրենի լեզվով (հայերեն) թարգմանված էլ չէին և միայն սկսած 1920թ. կեսերից՝ Արտաշես Չիլինգարյանի (Ռուբեն Դարբինյանի) արդարադատության նախարարի պաշտոնակատարության ժամանակ, զգալի աշխատանք կատարվեց օրենքները և դատաստանական աշխատանքը հայացնելու ուղղությամբ:

Սեփական, ազգային առանձնահատկություններին բնորոշ ու հոգեհարազատ օրենքներ շատ քիչ ընդունվեցին ու գործադրվեցին, որոնք էլ բացասաբար անդրադարձան հանրապետության իրավական հիմքերի ամրապնդմանը: Այն ժամանակ հանգամանքները, իրադրությունը, դեպքերի գլխապետույտ արագությամբ զարգացումը հնարավորություն չտվեցին ձևավորել ու ամբողջացնել ժողովրդավարական հասարակարգին բնորոշ օրենքներ:

Անշուշտ, արհեստավարժ չէր Հայաստանի խորհրդարանը: Խորհրդարանի արհեստավարժության մակարդակը չափվում է նրա հանձնաժողովների աշխատանքով ու մշակած, ընդունած աշխատող օրենքներով: Թեև Հայաստանի երկու խորհրդարաններն էլ ունեին լիակազմ ու բազմակուսակցական մեկ տասնյակից ավելի հանձնաժողովներ, սակայն, որպես կանոն, դրանք չէին կատարում իրենց առջև ծառայող գլխավոր աշխատանքը՝ ՀՀ - պայմաններին ու հայ ժողովրդի ազգային դիմագծին ու առանձնահատկություններին համապատասխան օրենքների մշակումը և ընդունումը: Հայաստանի խորհրդարանի և նրա հանձնաժողովների գործունեության թույլ կողմերից մեկն այն էր, որ ընդունված օրենքների ճնշող մեծամասնությունը (որոշ տվյալներով՝ մինչև 90 տոկոսը) եղել են կառավարության ներկայացրած օրինագծեր¹: Էլ հաշվի չենք առնում այն հանգամանքը, որ առանձին ամիսների (երբ խորհրդարանն ուղարկվում էր հարկադիր արձակուրդ) կառավարությունն իր ստորաբաժանումներում մշակում և ինքն էլ ընդունում էր օրենքները: Կնշանակի խորհրդարանական հանձնաժողովները իրենց կոչման բարձրության վրա չէին, նրանք չէին կատարում իրենց գլխավոր գործը՝ օրենքների նախագծերի կազմումը, այլ ընդամենը նախնական քննության էին ենթարկում կառավարության ներկայացրած օրինագծերը և որոշ խմբագրական փոփոխություններից հետո ներկայացնում խորհրդարանի քննությանն ու հաստատմանը:

ՀՀ, անշուշտ, պակասում էին շատ օրենքներ, դրսևորվում էին անիշխանական երևույթներ՝ ալան-թալան, շահատակություններ, «մաուզերիզմ» և այլն: Պետական մարմինների աշխատանքի անհատակության, անօրինությունների, զեղծարարությունների, անիշխանության գլխավոր պատճառներից մեկը օրենքի ու օրենսդրության պակասն էր կամ էլ՝ եղածների անկատարությունը: Իր հերթին, հանրապետության արտաքին ու ներքին անկայուն պայմանները, Հայկական հարցի շարունակ ձգձգումը մի տեսակ անորոշության մեջ էին պահում ժողովրդին ու կառավարությանը և դրանով իսկ քաղաքական հող ստեղծում հանրապետության ներքին անկայունության, անիշխանական երևույթների դրսևորման համար:

Բայց իրավացի չենք լինի, եթե ամեն ինչի համար մերկապարանոց ձևով քննադատենք միայն իշխանություններին և հիմնական կառավարող կուսակցությանը: ՀՀ Դաշնակցությունը գործելու մեծ եռանդ էր ցույց տալիս: Բացթողումների համար մեղքի իրենց մասնաբաժինը ունեին նաև ժողովուրդը, լայն հասարակաշերտերը, ընդդիմադիր կուսակցությունները: Ժողովրդին ևս մեղքի բաժին վերագրելով՝ մենք առաջնորդվել ենք հեգելյան հայտնի այն կանխադրույթով, որ ամեն ժողովուրդ արժանի է իր կառավարությանը: Բանն այն է, որ հանրապետությունում օրենքների պակասի հետ մեկտեղ, պակասում էր նաև հարգանքը եղածների հանդեպ: Հարգանքը պետության նկատմամբ առանձնապես մեծ չէր: Հաճախ գյուղացիությունը չէր

¹ «Հայաստանի ծայն», 9 հունվարի 1920թ.:

ուզում հարկ ու տուրք մուծել և զինվոր տալ պետությանը: Ունանց մեջ արմատացել էր այն մտայնությունը, որ եթե պետությունը հայկական է, ուրեմն՝ այլևս հարկեր, տուրքեր և այլ պարտավորություններ չպիտի ունենան նրա հանդեպ: «Նրանք զարմանքով և զայրացած կհարցնեին. ինչպե՞ս թե, այժմ երկիրը մերն է, դարձյա՞լ, նորե՞ն պիտի տանք զինվորներ և տուրքեր»¹: Սա ինքնին վկայում է ժողովրդի քաղաքական և իրավական ցածր կուլտուրայի մասին: Այն ժամանակվա հայ ժողովրդի մեծամասնության մեջ տակավին չէր ձևավորվել հայրենիքի, անկախ պետականության պաշտպանության և ամրապնդման համընդհանուր միասնական ըմբռնում: Սա, անշուշտ, կարելի է դասել ՀՀ անկման սոցիալ-հոգեբանական գործոնների թվին:

Մյուս կողմից՝ պետք էր հասկանալ եղեռն տեսած ու պատերազմի ահավոր զրկանքներ կրած ժողովրդի մեծամասնության հոգեկան խախտված վիճակը և սոցիալական ահավոր պայմանները: Ուստի՝ շատ դժվար էր կարգ ու կանոն, օրինապահություն պահանջել հարազատներ կորցրած, իր ճակատագրից դժգոհ, զազազած, քաղցած, ցնցոտիավոր մարդկանցից, որոնք երբեմն «անխընտրում էին սովի փոխարեն զնդակով մեռնել»²:

Նյութական, տնտեսական դժվարությունները, հարյուրիկազարավոր գաղթականների անորոշ տեղաշարժերը, օրենքների ու օրինապահության պակասը մի կողմից, օրինազանց տարրերի ու օրենքներ չհարգող առանձին սպառազեն անկանոն ուժերի (խմբերի) անիշխանական գործողությունները մյուս կողմից, դրան գումարած հանրապետության տարածքում առկա ավելի քան կեսմիլիոնանոց թուրք-թաթարական տարրերի՝ դրսից (Թուրքիայի և Ադրբեջանի կողմից) հրահրվող շարունակական խլրտումներն ու ապստամբական ելույթները, բոլշևիկների հակապետական քարոզչությունը հասարակական-քաղաքական անկայունության հող էին ստեղծում և դրանով իսկ զգալի չափով թուլացնում հանրապետության պետական կառույցի հիմքերը, երկրի տնտեսական ու մշակութային վերաշինության գործընթացները:

ՀՀ պետական կառույցի, իրավաքաղաքական և այլ բնույթի թերությունների ու բացթողումների համար ի վերջո պետք է լինել ներողամիտ մաս այն իմաստով, որ մեր ժողովրդի պատմության մեջ առաջին անգամ էր հայ քաղաքական կուսակցությունը դարձել կառավարող: Բնականաբար պակասում էին փորձը, ձեռնահաս ուժերը, կառավարելու այնքան բարդ արվեստը, ուստի և անխուսափելի էին սխալներն ու բացթողումները:

Ակներև է, որ ժողովրդավարական ավանդույթների, պետական մտածողության ու իրավաքաղաքական կուլտուրայի պակաս կար ինչպես ամբողջ հասարակության մեջ, այնպես էլ բնականաբար իշխանությունների շրջանում: Ինքնին հասկանալի է, որ անցյալից ծանր ժառանգություն ստացած հայ ժողովուրդը, միանգամից անկախություն ձեռք բերելով, չէր կարող

¹ Գ. Չախուրյան, Ի՞նչ էր և ի՞նչ պիտի լինի մեր ուղին, Վիեննա, 1923, էջ 15:

² Ռուբեն, նշվ. աշխ., էջ 302:

մեկ-երկու տարում լիարժեք վերագտնել իրեն ու ապրել լիաթոք ժողովրդավարական կյանքով:

Ուսման վարության հավակնող ամեն մի պետության իրական ժողովրդավարության մակարդակը չափվում է մարդու իրավունքներով ու ազատություններով, կուսակցությունների ազատ գործելու հնարավորություններով, հասարակական-քաղաքական կյանքում առողջ ու կառուցողական ընդդիմության առկայությամբ և այլ անկապտելի հատկանիշերով: Որքան էլ, որ ՀՀ իր հասարակական-քաղաքական, իրավական և տնտեսական կառույցներով որակում ենք որպես ժողովրդավարական (ուսման վարական) հանրապետություն, բայց և հաշվի առնելով պատմականության գործոնը, կարծում ենք, որ այն ժամանակվա ժողովրդավարությունը չի կարելի չափել ժողովրդավարության ներկայիս բովանդակությամբ ու չափանիշերով, մի հանգամանք, որից դեռևս շատ հեռու են անգամ ներկայումս ժողովրդավարության հավակնող շատ երկրներ, այդ թվում՝ նաև մերօրյա Հայաստանի Հանրապետությունը:

Այդուհանդերձ, չնայած իր անկատարությանը, բայց և այնպես, իր ամբողջության մեջ վերցված, բոլոր հիմքերը կան պնդելու, որ 1918-1920 թթ. Հայաստանում առկա էր **կազմակերպված պեպություն** և այդ պետության շատ էական դրսևորումներից (բաղադրիչներից) էր նրա խորհրդարանը: Հայաստանի խորհրդարանն իր ընդհատումներով գործունեության ընթացքում, ընդհանուր առմամբ օժանդակել է **Հայոց պեպականության հիմքերի ամրակայմանը և զարգացմանը:**

Այսպիսով, ուսումնասիրության գիտական նորույթն այն է, որ խորհրդարանի և քաղաքական կուսակցությունների գործունեության բազմակողմանի վերլուծության հիման վրա հանգել ենք հանրագումարային այն եզրակացության, որ, իր առանձին թերություններով ու անխուսափելի բացթողումներով հանդերձ, իրավաքաղաքական և տնտեսական տեսակետից ՀՀ իրենից ներկայացնում էր հիմնականում ժողովրդավարական տիպի հանրապետություն: Այնտեղ առկա է եղել պետականություն՝ իրեն բնորոշ բոլոր հատկանիշերով մի պետականություն, որն արգամիք էր հայ ժողովրդի անդուլ պայքարի և թափած հոգևոր, ֆիզիկական ջանքերի: ՀՀ անկասկած իր արժանի տեղը պետք է գրավի հայ ժողովրդի բազմադարյան ու մասնավորապես հայոց անկախ պետականության պատմության հոլովույթում:

Այս ամենի հետ միասին, ուսումնասիրությունը միաժամանակ մեզ բերում է այն հետևության, որ ժողովրդավարության բովանդակության տեսակետից ՀՀ պատմությունը կարելի է բաժանել երկու փուլի. առաջինը՝ 1918թ. մայիսի 28-ից մինչև 1920թ. ապրիլը ներառյալ, երբ Հայաստանը հիմնականում ժողովրդավարական հանրապետություն էր և երկրորդ՝ 1920թ. մայիսից մինչև դեկտեմբերի 2-ը, երբ արտաքին ու ներքին մի շարք աննպաստ հանգամանքների թելադրանքով տեղի ունեցավ ժողովրդավարական գործընթացների հարկադիր կասեցում: Ամենից առաջ խորհրդարանի մեկուսացումը, իրավական դաշտի նեղացումը, քաղաքացիների ազատությունների

սահմանափակումը, թուրք-մահմեդական խռովությունների ճնշման կապակցությամբ կարգապահության անկումը բանակում, և անիշխանական այլ երևույթների ուժեղացումը հիմք են տալիս մեզ ասելու, որ ՀՀ ունեցավ ժողովրդավարության լուրջ կորուստ, մի երևույթ, որը ներքնապես զգալի թուլացրեց պետության հիմքերը:

Ժողովրդավարական հիմքերի խարխուլումը, անշուշտ, հանրապետության անկման հիմնավոր պատճառների թվում կարելի է դասել: Բայց սա չէր ՀՀ անկման գլխավոր պատճառը: Դրա գլխավոր պատճառը Հայաստանից դուրս խմորված արտաքին ուժերն էին՝ քեմալական Թուրքիան և Խորհրդային Ռուսաստանը, որոնք ունեին իրենց շահերը, եվրոպական տերությունները և ԱՄՆ-ը, որոնք խոստումներից այն կողմ չանցան:

Ընդամենը երկու և կես տարի տևած Հայաստանի առաջին անկախ հանրապետության անկումից հետո էլ դրան հաջորդած խորհրդային 70-ամյա տիրապետության ընթացքում, հայ ժողովրդի մեջ բնավ չմեռավ անկախության ոգին, վկան` Հայաստանի մերօրյա հանրապետությունը: Հայոց անկախ պետականությունը պետք է հանդիսանա հայ ազգային գաղափարախոսության հիմնասյուններից մեկը: Առաջին հանրապետության մաքառումաշատ, բարդ ու հակասական պատմությունը, Հայաստանի խորհրդարանի և քաղաքական կուսակցությունների դասառատ փորձը շատ օգտակար և ուսանելի են ներկայիս անկախ պետության ամրակայման ու զարգացման, նրան ժամանակակից չափանիշերով ժողովրդավարական բովանդակությամբ հագեցնելու համար:

ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ.....3

Գ.ԼՈՒԽ ԱՌԱՋԻՆ. ՀԱՅԱՍՏԱՆԻ ԽՈՐՀՐԳԻ
(ԽՈՐՀՐԳԱՐԱՆԻ) ԿԱԶՄԱՎՈՐՈՒՄԸ

- 1. Պատմական ակնարկ.....21
- 2. Արևելահայերի համագումարը.....26
- 3. Հայոց Ազգային խորհրդի հիմնումը և գործունեությունը.....32
- 4. Անդրանիկ կառավարության և խորհրդարանի ձևավորումը.....45
- 5. Հայաստանի խորհրդի առաջին քայլերը.....51

Գ.ԼՈՒԽ ԵՐԿՐՈՐԴ. ԿՈՒՍԱԿՑՈՒԹՅՈՒՆՆԵՐԸ

ԵՎ ԽՈՐՀՐԳԱՐԱՆԸ

- 1. Խորհրդարանական կուսակցությունները և նրանց խմբակցությունները... 60
 - ա) «Աջակողմյան».....63
 - բ) «Կենտրոն».....65
 - գ) «Ձախակողմյան».....69
- 2. Արտախորհրդարանական կուսակցությունները.....82
- 3. Կառավարության առաջին ճգնաժամը.....90
- 4. Հայկական հարցը և արտաքին քաղաքականության խնդիրները.....100

Գ.ԼՈՒԽ ԵՐԲՐՈՐԴ. ԱՌԱՋԻՆ ԽՈՐՀՐԳԱՐԱՆԻ

ՕՐԵՆՍԴԱՐԱԿԱՆ ԳՈՐԾՈՒՆԵՈՒԹՅՈՒՆԸ

- 1. Օրինաստեղծ աշխատանքը.....113
- 2. Խորհրդարանի ֆինանսավարկային գործունեությունը.....130
- 3. Հողային խնդիրը.....135
- 4. Գաղթականության հարցերը խորհրդարանում.....145
- 5. Խորհրդարանը և կուսակցությունները բնակչության սոցիալական պաշտպանվածության մասին.....150
- 6. Բանակի և պաշտպանության հարցերը խորհրդարանում և կուսակցությունները.....154
- 7. Խորհրդարանի ճգնաժամը և արձակումը.....155

Գ.ԼՈՒԽ ՉՈՐԻՐՈՐԴ. ԵՐԿՐՈՐԴ ԽՈՐՀՐԳԱՐԱՆԸ

ԵՎ ԿՈՒՍԱԿՑՈՒԹՅՈՒՆՆԵՐԸ

- 1. Խորհրդարանի ընտրությունները և կուսակցությունները.....174
- 2. Խորհրդարանի բացումը և հանձնաժողովները.....191
- 3. Ընդդիմությունը երկրորդ խորհրդարանում և նրանից դուրս.....198
- 4. ՀՅԴ-9-րդ Ընդհանուր ժողովը.....214
- 5. Խորհրդարանը և կառավարությունը.....234
- 6. Կուսակցություն-խմբակցություն-կառավարություն հարաբերությունները.....241

ԳԼՈՒԽ ՀԻՆԳԵՐՈՐԳ. ԽՈՐՀՐԳԱՐԱՆԻ
ԳՈՐԾՈՒՆԵՈՒԹՅՈՒՆԸ

1. Օրենսդրական աշխատանքը: Սոցիալ-տնտեսական և կրթամշակութային խնդիրներ.....	249
2. Ֆինանսավարկային հարցերը խորհրդարանում.....	259
3. Ներգաղթի խնդիրը խորհրդարանում.....	262
4. Բանակի և Արցախի խնդիրները խորհրդարանում.....	266
5. Արտախորհրդարանական գործունեություն.....	273

ԳԼՈՒԽ ՎԵՑԵՐՈՐԳ. ԿՈՒՍԱԿՅՈՒԹՅՈՒՆՆԵՐԸ ԵՎ
ԽՈՐՀՐԳԱՐԱՆԸ ՄԱՅԻՍՅԱՆ ԴԳՆԱԺԱՄԻ ՇՐՋԱՆՈՒՄ

1. Մայիսյան ապստամբությունը.....	275
2. Խորհրդարանի միջոցառումները 1920 թ. Մայիսյան ապստամբության կապակցությամբ: Բյուրո-կառավարության ստեղծումը...279	
3. Կուսակցությունների վերաբերմունքը Մայիսյան ապստամբությանը.....	287

ԳԼՈՒԽ ՅՈՒԹԵՐՈՐԳ. ԿՈՒՍԱԿՅՈՒԹՅՈՒՆՆԵՐԸ ԵՎ
ԽՈՐՀՐԳԱՐԱՆԸ ՀՀ ՎԵՐՋԻՆ ՓՈՒԼՈՒՄ

1. Խորհրդա-թուրքական համագործակցությունը.....	294
2. Կուսակցությունները թուրք-հայկական պատերազմի շրջանում.....	308
3. Խորհրդարանը և կուսակցությունները ՀՀ անկման փուլում.....	318

ԳԼՈՒԽ ՈՒԹԵՐՈՐԳ. ԿՈՒՍԱԿՅՈՒԹՅՈՒՆՆԵՐԻ ԼՈՒԾԱՐՈՒՄԸ

1. ՀՅ Դաշնակցություն.....	334
2. Սոցիալիստ հեղափոխականներ (Էսէռներ).....	339
3. Սոց.-Դեմ. Հնչակ.....	341
4. ՀՄԴԿ («Սպեցիֆիկներ»).....	345
5. Ուսմկավար Ազատական կուսակցության (ՌԱԿ) հիմնումը.....	347

ՎԵՐՋԱԲԱՆ.....	352
---------------	-----

ԱՐԱՐԱՏ ՄԽԻԹԱՐԻ ՀԱԿՈՒՅԱՆ

**ՀԱՅԱՍՏԱՆԻ ԽՈՐՀՐԴԱՐԱՆԸ ԵՎ
ՔԱՂԱՔԱԿԱՆ ԿՈՒՄԱԿՑՈՒԹՅՈՒՆՆԵՐԸ
(1918-1920 թթ.)**

АРАРАТ МХИТАРОВИЧ АКОПЯН

**ПАРЛАМЕНТ АРМЕНИИ И
ПОЛИТИЧЕСКИЕ
ПАРТИИ (1918-1920 ГГ.)**

Տպաքանակը՝ 1000:

Ե Ր Ե Վ Ա Ն 2005

